

战国策校注

吴师道

文硕阁

wenshuoge.com

目录

关于我们	3
提要	5
战国策刘序	6
战国策曾序	7
战国策校注序	8
战国策校注序	9
卷首	11
卷一	26
卷二	33
卷三	41
卷四	80
卷五	111
卷六	133
卷七	172
卷八	204
卷九	223
卷十	244
李文叔书战国策后序	253
王觉题战国策	254
孙元忠书阁本战国策后	255
孙元忠刘元父语	256
括苍刊本序	258

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 史部五

战国策校注 杂史类

提要

【臣】等谨案战国策校注十卷元吴师道撰师道字正传兰溪人至治元年进士官至礼部郎中事蹟具元史儒学传战国策旧有高诱注宋绍兴间缙云鲍彪病其阙略重为之注而复为改定其次第师道又以鲍彪注为未善又取剡川姚宏之注与彪注参校而杂引诸书考证之其书一仍彪注之旧而每条之下凡增其所阙者谓之补凡纠其所失者谓之正各以补曰正曰别之复取刘向曾巩所校三十三篇四百八十六章旧第为彪所变者别存于首前有师道自序撮举彪注之大纰缪者凡十九条议论皆极精审古来注是书者当以师道为最善其後附载李文叔王觉孙朴诸跋及姚宏姚寬两序于是书本末源流叙述尤详宏字令声一曰伯声尝为删定官忤秦桧死大理狱寬即着西溪丛语者尝注是书今皆不传惟藉师道是书存其崖略尔乾隆四十五年十二月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

战国策刘序

战国策刘序

护左都水使者光禄大夫臣向言所校中战国策书中书余卷错乱相糅舛又有国别者八篇少不足臣向因国别者略以时次之分别不以序者以相补除复重得三十三篇本字多误脱为半字以赵为肖以齐为立如此字者多中书本号或曰国策或曰国事或曰短长或曰事语或曰长书或曰修书臣向以为战国时游士辅所用之国为之策谋宜为战国策其事继春秋以後讫楚汉之起二百四十五年之间事皆定以杀青书可缮写叙曰周室自文武始兴崇道德隆礼义设辟雍泮宫庠序之教陈礼乐弦歌移风之化叙人伦正夫妇天下莫不晓然论孝悌之义惇笃之行故仁义之道满乎天下卒致之刑措四十余年远方慕义莫不宾服雅颂歌咏以思其德下及康昭之後【以思其德一作恩德其上下及一无下字】虽有衰德其纲纪尚明及春秋时已四五百载矣然其余业遗烈流而未灭五霸之起尊事周室五霸之後时君虽无德人臣辅其君者若郑之子产晋之叔向齐之晏婴挟君辅政以并立於中国犹以义相支持歌咏以相感聘觐以相交期会以相一盟誓以相救天子之命犹有所行会享之国犹有所耻小国得有所依百姓得有所息孔子曰能以礼让为国乎何有周之流化岂不大哉及春秋之後衆贤辅国者既没而礼义衰矣孔子虽论诗书定礼乐王道粲然分明以匹夫无势化之者七十二人而已皆天下之俊也时君莫尚之是以王道遂用不兴故曰非威不立非势不行仲尼既没之後田氏取齐六卿分晋道德大废上下失序至秦孝公捐礼让而贵战争弃仁义而用诈譎苟以取强而已矣夫篡盗之人列为侯王诈譎之国兴立为强是以转相放效後嗣师之遂相吞灭并大兼小暴师经岁流血满野父子不相亲兄弟不相安夫妇离散莫保其命溘然道德絶矣晚世益甚万乘之国七千乘之国五敌侔争权尽为战国贪饕无耻竞进无厌国异政教各自制断上无天子下无方伯力攻争强胜者为右兵革不休诈伪并起当此之时虽有道德不得施设有谋之强负阻而恃固连与交质重约结誓以守其国故孟子荀卿儒术之士弃捐於世而游说权谋之徒见贵於俗是以苏秦张仪公孙衍陈轸代厉之属生从横短长之说左右倾侧苏秦为从张仪为横横则秦帝从则楚王所在国重所去国轻然当此之时秦国最雄诸侯方弱苏秦结之合六国为一以徇背秦秦人恐惧不敢闚兵於关中天下不交兵者二十有九年然秦国势便形利权谋之士咸先驰之苏秦初欲横秦弗用故东合从及苏秦死後张仪连横诸侯听之西向事秦是故始皇因四塞之国据崤函之阻跨陇蜀之饶听衆人之策乘六世之烈以蚕食六国兼诸侯并有天下仗於诈谋之积终无信笃之诚无道德之教仁义之化以缀天下之心任刑罚以为治信小术以为道遂燔烧诗书坑杀儒士上小尧舜下邈三王二世愈甚惠不下施情不上达君臣相疑骨肉相疏化道浅薄纲纪坏败民不见义而悬於不宁抚天下十四岁天下大溃诈伪之弊也其比王德岂不远哉孔子曰道之以政齐之以刑民免而无耻道之以德齐之以礼有耻且格夫使天下有所耻故化可致也苟以诈伪偷活取容自上为之何以率下秦之败也不亦宜乎战国之时君德浅薄为之谋策者不得不因势而为资据时而为【阙】故其谋扶急持倾为一切之权虽不可以临国教化兵革救急之势也皆高才秀士度时君之所能行出奇策异智转危为安运亡为存亦可喜皆可观护左都水使者光禄大夫臣向所校战国策书録

战国策曾序

战国策曾序

刘向所定着战国策三十三篇崇文总目称十一篇者阙臣访之士大夫家始尽得其书正其误谬而疑其不可考者然後战国策三十三篇复完叙曰向叙此书言周之先明教化修法度所以大治及其後诈谋用而仁义之路塞所以大乱其说既美矣卒以谓此书战国之谋士度时君之所能行不得不然则可谓惑於流俗而不笃於自信者也夫孔孟之时去周之初已数百岁其旧法已亡其旧俗已熄久矣二子乃独明先王之道以为不可改者岂将强天下之主以後世之所不可为哉亦将因其所遇之时所遭之变而为当世之法使不失乎先王之意而已二帝三王之治其变固殊其法固异而其为天下国家之意本末先後未尝不同也二子之道如是而已盖法者所以适变也不必尽同道者所以立本也不可不一此理之不易者也故二子者守此岂好为异论哉能勿苟而已矣可谓不惑於流俗而笃於自信者也战国之游士则不然不知道之可信而乐於说之易合其设心注意偷为一切之计而已故论诈之便而讳其败言战之善而蔽其患其相率而为之者莫不有利焉而不胜其害也有得焉而不胜其失也卒至苏秦商鞅孙臆吴起李斯之徒以亡其身而诸侯及秦用之亦灭其国其为世之大祸明矣而俗犹莫之悟也惟先王之道因时适变为法不同而考之无疵用之无敝故古之圣贤未有以此而易彼也或曰邪说之害正也宜放而絶之则此书之不泯其可乎对曰君子之禁邪说也固将明其说於天下使当世之人皆知其说之不可从然後以禁则齐使後世之人皆知其说之不可为然後以戒则明岂必灭其籍哉放而絶之莫善於是故孟子之书有为神农之言者有为墨子之言者皆着而非之至於此书之作则上继春秋下至秦汉之起二百四五十年之间载其行事固不得而废也此书有高诱注者二十一篇或曰三十二篇崇文總目存者八篇今存者十篇云编校史馆书籍臣曾巩序

国策刘向校定本高诱注曾巩重校凡浙建括苍本皆据曾所定剡川姚宏续校注最後出予见姚注凡二本其一冠以目錄刘序而置曾序于卷末其一冠以曾序而刘序次之盖先刘氏者元本也先曾氏者重校本也今不敢失其旧故次曾氏焉吴师道识

战国策校注序

战国策校注序

国策史家者流也其文辩博有焕而明有婉而微有约而深太史公之所考本也自汉称为战国策杂以短长之号而有苏张纵横之说学者讳之置不论非也夫史氏之法具记一时事辞善恶必书初无所决择楚曰檇机书恶也鲁曰春秋善恶兼也司马史记班固汉书有佞幸等列传学者岂以是为不正一举而弃之哉矧此书若张孟谈鲁仲连发策之慷慨谅毅触讐纳说之从容养叔之息射保功莫大焉越人之投石谋贤莫尚焉王斗之爱穀忧国莫重焉诸如此类不一皆有合先王正道孔孟之所不能违也若之何置之曾巩之序美矣而谓禁邪说者固将明其说於天下则亦求其故而为之说非此书指邪起秦迄今千四百岁由学者不习或衍或脱或後先失次故肖立半字时次相糅刘向已病之矣旧有高诱注既疎略无所稽据注又不全浸微浸灭殆於不存彪於是考史记诸书为之注定其章条正其衍说而存其旧慎之也地理本之汉志无则缺字训本之说文无则称犹杂出诸书亦别名之人姓名多不传见欲显其所说故系之一国亦时有论说以翊宣教化可以正一史之谬备七略之缺於之论是非辨得失而考【阙】兴亡亦有补於世绍兴十七年丁卯仲冬二十有一日辛巳冬至缙云鲍彪序

战国策校注序

战国策校注序

先秦之书惟战国策最古文最讹舛自刘向校定已病之南丰曾巩再校亦疑其不可考者後汉高诱为注宋尚书郎括苍鲍彪诋其踈略谬妄乃序次章条补正脱误时出已见论说其用意甚勤愚尝并取而读之高氏之踈略信矣若谬妄则鲍氏自谓也东莱吕子大事记间取鲍说而序次之世亦或从之若其谬误虽未尝显列而因此考彼居然自见遂益得其详焉盖鲍专以史记为据马迁之作固采之是书不同者当互相正史安得全是哉事莫大於存古学莫善於阙疑夫子作春秋仍夏五残文汉儒校经未尝去本字但云某当作某某读如某示谨重也古书字多假借音亦相通鲍直去本文径加改字岂传疑存旧之意哉比事次时当有明徵其不可定知者阙焉可也岂必强为傅会乎又其所引书止於淮南子後汉志说文集韵多摭彼书之见闻不问本字之当否史注自裴徐氏外索隐正义皆不之引而通监诸书亦莫考浅陋如是其致误固宜顾乃极诋高氏以陈贾为孟子书所称以伐燕为齐宣用是发愤更注不思宣王伐燕乃孟子明文宣闵之年通监谓史失其次也鲍以赧王为西周君而指为正统此开卷大误不知河南为西周洛阳为东周韩非子说秦王以为何人魏惠王盟白里以为他事以鲁连约矢之书为後人所补以魏几鄢陵为人名以公子牟非魏牟以中山司马子期为楚昭王卿此类甚多尚安得诋高氏哉其论说自谓翊宣教化则尤可议谓张仪之诳齐梁为将死之言善周人诈以免难为君子所恕张登狡狴非君子所排苏代之詖为不可废陈轸为絶类离羣蔡泽为明哲保身聂政为孝乐羊为隐忍君王后为贤智妇人韩几瑟为义嗣卫嗣君为贤君皆悖义害正之甚者其视名物人地之差失又不足论也鲍之成书当绍兴丁卯同时剡川姚宏亦注是书云得会稽孙朴所校以阁本标出钱藻刘敞校字又见晋孔衍春秋後语参校补注是正存疑具有典则大事记亦颇引之而世罕传知有鲍氏而已近时浚仪王应麟尝斥鲍失数端而庐陵刘辰翁盛有所称许以王之博洽知其未暇?数而刘特爱其文采他固弗之察也吕子有云观战国之事取其大旨不必字字为据盖以游士增饰之词多矧重以讹舛乎辄因鲍注正以姚本参之诸书而质之大事记存其是而正其非庶几明事蹟之实求义理之当焉或曰战国策者六经之弃也子深辨而详?之何其戾鲍彪之区区又不足攻也夫人患理之不明耳知至而识融则异端杂说皆吾进德之助而不足以为病也曾氏之论是书曰君子之禁邪说者固将明其说於天下使皆知其不可为然後以禁则齐以戒则明愚有取焉尔是非之在人心天下之公也是虽刍蕘不遗非虽大儒必斥愚何择於鲍氏哉特寡学謏闻谬误复恐类之世之君子有正焉固所愿也秦定二年岁乙丑八月日金华吴师道序

国策之书自刘向校録逮南丰曾氏皆有序论以着其大旨向谓战国谋士度时君所能行不得不然曾氏讥之以为惑流俗而不笃於自信故因之推言先王之道圣贤之法而终谓禁邪说者固将明其说於天下其论正矣而鲍氏以为是特求其故而为之说者策乃史家者流善恶兼书初无决择其善者孔孟之所不能违若之何置之鲍之言殆後出者求备邪夫天下之道王伯二端而已伯者犹知假义以为名仗正以为功战国名义荡然攻鬪并吞相诈相倾机变之谋唯恐其不深捭阖之辞惟恐其不工风声气习举一世而皆然间有持论立言不戾乎正殆千百而一二尔若鲁仲连盖絶出者然其排难解纷忼慨激烈每因事而发而亦未闻其

反正明本超乎事变之外也况其下者乎当是之时本仁祖义称述唐虞三代卓然不为世俗之说者孟子一人而已求之是书无有也荀卿亦宗王者今唯载其絶春申之书而不及其他田子方接闻孔氏之徒其存者仅仅一言又何略於此而详於彼邪史莫大於春秋春秋善恶兼书而圣人之心则欲寓褒贬以示大训是书善恶无所是非而作者又时出所见不但记载之也谈季子之金多位高则沾沾动色语安陵嬖人之固宠则以江乙为善谋此其最陋者夸从亲之利以为秦兵不出函谷十五年诸侯二十九年不相攻虽甚失实不顾也厠雅於郑则音不纯置薰於莸则气必夺善言之少不足以胜不善之多君子所以举而谓之邪说者盖通论当时习俗之敝举其重而名之也近代晁子正书志列於纵横家亦有见者且其所列固有忠臣义士之行不系於言者而其继春秋抵秦汉载其行事不得而废曾氏固已言之是岂不知其为史也哉窃谓天下之说有正有邪其正焉者主于一而其非正者君子小人各有得焉君子之於是书也考事变?情伪则守益以坚知益以明小人之於是书也见其始利而终害小得而大丧则悔悟惩创之心生世之小人多矣固有未尝知是书而其心术行事无不合者使其得是书而究之则将有不为者矣然则所谓明其说於天下为放絶之善者詎可訾乎

卷首

钦定四库全书

战国策校注卷首 宋 鲍彪 原注

元 吴师道补正

卷一

东周【凡二十二章】

秦兴师临周章 秦攻宜阳章

东周与西周战章 东周欲为稻章

昭献在阳翟章 秦假道於周章

楚攻雍氏章 周最谓吕礼章

周相吕仓章 温人之周章

或为周最章 石行秦章

苏厉为周最章 谓周最曰章

为周最谓魏王章 赵取周之祭地章

杜赫欲重景翠章 周共太子死章

三国隘秦章 昌他亡西周章

昭翦与东周恶章 严氏为贼章

卷二

西周【凡十七章】

薛公以齐章 秦攻魏将犀武章

秦令穰里疾章 雍氏之役章

周君之秦章 苏厉谓周君章

楚兵在山南章 楚谓道於二周章

司寇布章 秦召周君章

犀武败於伊阙章 韩魏易地章

秦欲攻周章 宫他谓周君章

谓齐王曰章 三国攻秦反章

犀武败周章

卷三

秦一【凡十三章】

魏鞅亡魏入秦章 苏秦始将连横章

秦惠王谓寒泉子章 冷向谓秦王章

张仪说秦王章 张仪欲假秦兵章

司马错与张仪章 张仪之残穰里章

张仪欲以汉中章 楚攻魏张仪谓秦章

田莘之为陈轸章 张仪又恶陈轸章

陈轸去楚之秦章

卷四

秦二【凡十六章】

齐助楚攻秦章 楚絶齐章

秦惠王死章 义渠君之魏章

医扁鹊章 秦武王谓甘茂章

宜阳之役冯章谓章 甘茂攻宜阳章

宜阳未得章 宜阳之役楚畔秦章

秦王谓甘茂章 甘茂亡秦且之齐章

甘茂相秦章 甘茂约秦章

径山之事章 秦宣太后章

卷五

秦三【凡十七章】

薛公为魏谓魏冉章 秦客卿造章

魏君谓魏冉章 谓魏冉曰和不成章

谓穰侯曰章 谓魏冉曰楚破秦章

五国罢成蹇章 范子因王稽章

范雎至章 应侯谓昭王章

秦攻韩围陉章 应侯曰郑人章

天下之士章 谓应侯曰君禽马服章应侯失韩之汝南章 秦攻邯郸十七月章

蔡泽见逐章

卷六

秦四【凡十章】

秦取楚汉中章 薛公入魏而出齐女章三国攻秦入函谷章 秦昭王谓左右章

楚魏战於陁山章 楚使者景鲤在秦章

楚王使景鲤如秦章 秦王欲见顿弱章

项襄王二十年章 或为六国说秦王章

卷七

秦五【凡八章】

谓秦曰臣窃惑章 秦王与中期章

献则谓公孙消章 楼许约秦魏章

濮阳人吕不韦章 文信侯欲攻赵章

文信侯出走章 四国为一章

卷八

齐一【凡十七章】

楚威王战胜於徐州章 齐将封田婴於薛章

靖郭君将成薛章 靖郭君谓齐王章

靖郭君善齐豹辨章 邯郸之难赵求救章

南梁之难韩氏请章 成侯邹忌为齐相章

田忌为齐将章 田忌亡齐而之楚章

邹忌事宣王章 邹忌修八尺章

秦假道韩魏章 楚将伐齐鲁亲之章

秦伐魏陈轸合三晋章 苏秦为赵合从说齐章 张仪为秦连横说齐章

卷九

齐二【凡八章】

韩齐为与国章 张仪事秦惠王章

犀首以梁为齐战章 昭阳为楚伐魏章

秦攻赵赵令楼缓章 权之难齐燕战章

秦攻赵长平齐楚救章或谓齐王曰周韩章

卷十

齐三【凡十一章】

楚王死太子在齐章 齐王夫人死章

孟尝君将入秦章 孟尝君在薛章

孟尝君奉夏侯章 孟尝君讌坐章

孟尝君舍人章 孟尝有舍人章

孟尝君出行国章 淳于髡一日章

齐欲伐魏淳于髡谓齐王章

卷十一

齐四【凡十一章】

齐人有冯谖章 孟尝君为从章

鲁仲连谓孟尝君章 孟尝君逐於齐章

齐宣王见顔觸章 先生王斗章

齐王使使者问赵章 齐人见田骈章

管燕得罪章 苏秦自燕之齐章

苏秦谓齐王曰章

卷十二

齐五【一章】

苏秦说齐闵王章

卷十三

齐六【凡九章】

齐负郭之民章 王孙贾年十五章

燕攻齐取七十余成章 燕攻齐齐破章

貂勃常恶田单章 田单将攻狄章

濮上之事章 齐王建入朝章

齐以淖君之乱章

卷十四

楚一【凡二十章】

齐楚构难章 五国约秦以伐齐章

荆宣王问羣臣章 昭奚恤与彭城君章

邯郸之难昭奚恤谓楚章 江尹欲恶昭奚恤章 江乙欲恶昭奚恤章 江乙说於安陵君章

江乙为魏使於楚章 郢人有狱章

城浑出周章 韩公叔有齐魏章

魏氏恶昭奚恤章 江乙恶昭奚恤章

楚杜赫说楚王章 楚王问於范环章

苏秦为赵合从说楚章张仪为秦破从连横章张仪相秦谓昭睢章 威王问於莫敖章

卷十五

楚二【凡九章】

魏相翟强死章 齐秦约攻楚章

术视伐楚章 四国伐楚章

楚怀王拘张仪章 楚王将出张子章

秦败楚汉中章 楚襄王为太子之时章女阿谓苏子章

卷十六

楚二【凡十章】

苏子谓楚王曰章 苏秦之楚三日乃得见章楚王逐张仪於魏章 张仪之楚贫章

楚王令昭睢之楚章 张仪逐惠施於魏章

五国伐秦魏欲和章 陈轸告楚之魏章

秦伐宜阳楚王谓陈轸章 唐且见春申君章卷十七

楚四【凡十三章】

或谓楚王曰章 魏王遗楚王美人章

楚王后死章 庄辛请楚襄王章

齐明说卓滑章 或谓黄齐章

长沙之难章 有献不死之药章

客说春申君章 天下合从章

污明见春申君章 楚考烈王无子章

虞卿谓春申君章

卷十八

赵一【凡十七章】

知伯从韩魏兵章 知伯帅赵韩魏章

张孟谈既固赵宗章 晋毕阳之孙章

魏文侯借道章 秦韩围梁燕赵救章

腹繫为室章 苏秦说李兑章

赵收天下且以伐齐章 齐攻宋奉阳君不欲章 甘茂为秦约魏章 谓皮相国章

或谓皮相国章 赵王封孟尝君以武城章 谓赵王曰三晋合章

卷十九

赵二【凡七章】

苏秦从燕之赵章 秦攻赵苏子为谓秦章 张仪为秦连横说赵章 武灵王平昼章

王立周绍为传章 赵燕後胡服章

王破原阳章

卷二十

赵三【凡二十三章】

赵惠文王三十年章 赵使机郝之秦章

齐破燕赵欲存章 秦攻赵藺离石祁拔章 富丁欲以赵合章 魏因富丁章

魏使人因平原君章 平原君请冯忌章

平原君谓平阳君章 秦攻赵於长平章

秦攻赵平原君使人章秦赵战於长平章

秦围赵之邯郸章 说张相国章

郑同北见赵王章 建信君贵於赵章

卫灵公章 或谓建信君章

苦城常谓建信章 希写见建信章

魏魑谓建信章 秦攻赵鼓铎之章

齐人李伯见孝成王章

卷二十一

赵四【凡十九章】

为齐献书赵王章

齐欲攻宋秦令起贾章齐将攻宋而秦楚禁章五国伐秦无功罢於成皋章楼缓将使伏事章翟卿请赵王章

燕封宋人荣蚡章 三国攻秦赵攻中山章赵使赵庄合从章 翟章从梁来章

冯忌为庖陵君章 冯忌请见赵王章

客见赵王曰章 秦攻魏取宁邑章

赵使姚贾约韩魏章 魏败楚於陁山章

秦召春平侯章 赵太后新用事章

秦使王翦章

卷二十二

魏一【凡二十七章】

知伯索地於魏章 乐羊为魏将章

西门豹为邺令章 文侯与虞人期章

魏文侯与田子方章 魏武侯与诸大夫章

魏公叔痤为魏将章 魏公叔痤病章

苏子为赵合从说魏章 张仪为秦连横说魏章 齐魏约而伐楚章 苏秦拘於魏章

陈轸为秦使於齐章 张仪恶陈轸於卫章

张仪欲穷陈轸章 张仪走之魏章

张仪欲以魏合於秦韩章 张仪以秦相魏章 张仪欲并相秦魏章 魏王将相张仪章

楚许魏六城章 张仪告公仲章

徐州之役犀首谓梁章 秦败东周与魏战章

齐王将见燕赵楚章 魏令公孙衍请和於秦章 公孙衍为魏将章

卷二十三

魏二【凡十七章】

犀首田盼欲得齐魏章 犀首见梁君章

苏代为田需说章 史举非犀首章

楚王攻梁南章 魏惠王死章

五国伐秦无功而还章 魏文子田需周宵章

魏王令惠施之楚章 魏惠王起境内衆章

齐魏战於马陵章 惠施为韩魏文章

田需贵於魏王章 秦召魏相信安君章

秦楚攻魏围皮氏章 龐葱与太子章

梁王魏嬰觴諸侯章

卷二十四

魏三【凡十章】

秦約趙而伐魏章 芒卯謂秦王章

秦敗魏於華走芒卯章秦敗魏於華魏王且入朝章華軍之戰魏不勝章 齊欲伐魏魏使人章

秦將伐魏魏王聞之章魏將與秦攻韓朱已章華陽君約魏魏王將封其子章

秦使趙攻魏魏謂趙王章

卷二十五

魏四【凡二十七章】

獻書秦王曰章 八年謂魏王曰章

魏王問張旄章 客謂司馬食其章

魏秦伐楚魏王不欲章穰侯攻大梁章

白珪謂新城君章 秦攻韓之管章

秦趙構難而戰章 長平之役平都君說章樓梧約秦魏章 芮宋欲絕秦趙章

為魏謂楚王曰章【連上為一】 管鼻之令翟強章

成陽君欲以韓魏听章秦拔寧邑魏王令人章秦罷邯鄲攻魏章 魏王欲攻邯鄲章

周肖謂宮他章 周最善齊章

周最入齊秦王怒章 秦魏為與國齊楚約章信陵君殺晉鄙章 魏攻管而不下章

魏王與龍陽君章 秦攻魏急或謂魏王章秦王使人謂安陵君章

卷二十六

韩一【凡二十四章】

三晋已破知氏章 成午从赵来章

魏之围邯鄲章 申子请仕章

苏秦为楚合从说韩章 张仪为秦连横说韩章 张仪谓齐王曰章 楚昭献相韩章

秦攻陜韩使人章 五国约而攻秦 楚王为章 郑强载八百金章 郑强之走张仪章

宜阳之役 杨达谓章 秦围宜阳 游腾谓章

公仲以宜阳之故章 秦韩战于浊泽章

顏率见公仲章 韩公仲谓向壽章

或谓公仲曰听者章 韩公仲相齐楚之交善章 王曰向也子曰章 或谓魏王王倣章

观□谓春申章 公仲数不信於诸侯章 卷二十七

韩二【凡二十一章】

楚围雍氏五月章 楚围雍氏 韩令冷向章 公仲为韩魏易地章 錡宣之教韩王章

襄陵之役 毕长谓章 公叔使冯君於秦章

谓公叔曰公欲得章 谓公叔曰乘舟章

齐令周最使郑立章

韩公叔与几瑟争国 郑强为楚章

韩公叔与几瑟争国 中庶子强章

齐明谓公叔曰章 公叔将杀几瑟也章

公叔且杀几瑟也章 谓新城君曰章

胡衍之出几瑟章 几瑟亡之楚章

冷向谓韩咎章 楚令景鲤入韩章

史疾为韩使楚章 韩傀相韩章

卷二十八

韩三【凡二十四章】

或谓韩公仲曰章

或谓公仲曰今有一举章韩人攻宋秦王大怒章或谓韩王曰秦王欲章谓郑王曰昭厘侯章东孟之会章【今连上为一】

韩阳役於三川章 秦大国也章

张丑之合齐楚讲章 或谓韩相国曰人之章公仲使韩珉之秦章
韩相公仲珉使韩侈章客卿为韩谓秦王曰【旧三章为一】

韩珉相齐章 或谓山阳君曰章

赵魏攻华阳韩谒急章秦招楚而伐齐章

韩氏逐向晋章 张登谓费综章

安邑之御史章 魏王为九里之盟章

建信君轻韩熙章 段产谓新城君章

段干越人谓新城君章

卷二十九

燕一【凡十五章】

苏秦将为从北说燕章奉阳君李兑章

权之难燕再战章 燕文公时章

人有恶苏秦於燕王章张仪为秦破从连横章宫他为燕使魏章 苏秦死其弟苏代章

燕王哙既立章 初苏秦弟厉章

燕代过魏章【旧三章相连鲍以後二章为一姚本第三章别提作行恐当自是一章】燕昭王收破燕章 齐伐宋宋急章

苏代谓燕昭王曰章 燕王谓苏代曰章

卷三十

燕二【凡十四章】

秦召燕王章 苏代为奉阳君章

奉阳君告朱謹章 苏代为燕说齐章

苏代自齐使人谓燕章 苏代自齐献书於燕章 陈翠合齐燕章 燕昭王且与天下伐齐章 燕饥赵将伐之章 昌国君乐章

或献书燕王章 客谓燕王曰章

赵且伐燕 苏代为燕章 齐魏争燕章

卷三十一

燕三【凡五章】

齐韩魏共攻燕章 张丑为质於燕章

燕王喜使栗腹章 秦并赵北向迎燕章

燕太子丹质於秦章

卷三十二

宋卫【凡十四章】

齐攻宋 宋使臧子章 公输般为楚设

犀首伐黄章 梁王伐邯郸章

谓大尹曰章 宋与楚为兄弟章

宋康王之时章 智伯欲伐卫章

智伯欲袭卫章 秦攻卫之蒲章

卫使客事魏章 卫嗣君病章

卫嗣君时胥靡章 卫人迎新妇章

卷三十三

中山【凡十章】

魏文侯欲残中山章 犀首立五王章

中山与燕赵为王章 司马喜使赵章

司马喜三相中山章 陰姬与江姬争为后章 主父欲伐中山章

中山君飧都士大夫章 乐羊为魏将攻中山章 昭王既息民章

校正凡例

一鲍更易策文元次穀乱欲从旧本则不见駁正之意已着目錄于前今据其本疏辨凡注之谬误者抹之辨正则以正曰着之未明而改定者亦从此例阙遗及他有发明者以补曰着之

一鲍所改及加字并抹除字复存之或与一本合而可通者从之而注其下他本字异义通者以一本着之

一大事记与鲍说有当见或与今说有相发者则见之不悉引

卷一

钦定四库全书

战国策校注卷一 宋 鲍彪 原注

元 吴师道 补正

西周【汉志河南洛阳谷城平陰偃师巩緱氏皆周地也正曰按大事记周贞定王二十八年考王初立封其弟揭於河南是为河南桓公河南即郑鄆武王迁九鼎周公营以为都是为王城洛阳周公所营下都以迁顽民是为成周平王东迁定都王城王子朝之乱敬王徙都成周至是考王以王城故地封桓公焉平王东迁之後所谓西周者丰镐也东周者东都也威烈王以後所谓西周者河南也东周者洛阳也何以称河南为西周自洛阳下都视王城则在西也何以称洛阳为东周自河南王城视下都则在东也河南桓公卒子威公立威公卒子惠公立考王十五年河南惠公复自封其少子班於巩以奉王号东周没亦諡惠是时东西周虽未分治河南惠公既号奉王者为东周亦必自号西周矣显王二年赵与韩分周为二於是东西各为列国显王虽在东周特建空名是後史传所载致伯赐胙之类周王也征伐谋策称东西周君者皆谓二周也周本纪云赧王时东西周分治非也赧王特徙都西周耳当以赵世家为正按高诱注西周王城今河南东周成周今洛阳世本云西周桓公名揭居河南东周惠公名班居洛阳及索隐正义所载甚详独邵子经世书纪赧王为西周君与东周惠公并不纪西周公仍旧误也鲍考之不精即以西周为王谓之正统谓东不得先於西乱易旧次此开卷第一繆近时陈振孙书录特举其首西周为美亦失考所当改正从旧又考春秋书王城成周公羊传曰王城者何西周也成周者何东周也说亦甚明昭二十六年天王入于成周左传以十二月入王城三十二年城成周盖敬王定迁在既城之後而孙莘老胡康侯皆以成周即京师亦未考王城成周之实而误合为一也要之此文古今说者多以迷瞽致误故大事记辨之甚详且实因鲍氏而发近有着东西周辨者其说亦然而不引吕子岂未之见耶徐广云周比亡凡七县河南止緱氏此是合东西周地言之今总注盖因正统之说而误者】安王【威烈王子此类并以事见纪表世家新出正曰东西周虽分王实在上策以东西周称决不当系之王鲍以西周即王故此系以安王赧王而东周系以惠公彼西周桓威惠武等公着在史册独不见乎安王烈王实都东周而可系之西周乎按策中周君皆指东西二君故多称主君其称王者则附以见章鲍止以严氏为贼一条遂出】

【王时事又误也鲍用意虽勤傅会舛谬者多并见各章】

严氏为贼【严仲杀韩相傀列侯三年书杀侠累是也杀人不以道曰贼於此为五年正曰韩策阳坚此作竖字有讹索隐曰纪年韩山坚贼其君哀侯韩山坚即韩严非严遂使聂政杀侠累事也说见上及韩策】而阳竖与焉【鸿烈人间训注竖小使也韩策名坚】道周【出亡过周】周君留之十四日载以乘车驷马而遣之【乘四马也一车驾四马所谓驷马车】韩使人让周【让譙责也然则此时周之令已不行於诸侯矣正曰此东周君也策文明曰小国

】周君患之客谓周君正语之曰【使以留之之情告之补曰一本客谓周君曰正语之正犹直也】寡人【孤寡不谷王侯之称】知严氏之为贼而阳竖与之故留之十四日以待命也【待韩之命】小国不足【衍亦字】亦【补曰疑在不字上一本无】以容贼君之使又不至是以遣之也【元在东周策时周末分也彪谓客之辩虽足以文周而周君实为天下逋逃主所谓欲盖而彰者何以示天下乎正曰考其时则烈王五年王都东周若以王都为尊则旧卷首东周是矣】

赧王【周纪慎靓王子岁丁未立徙都西周西京镐京也宋忠曰卒諡西周武公正曰西周不当系之王前已论之西周桓威惠武等公东周惠公昭文君虽见史传然年世不明事实难附鲍所附赧王诸章据史亦有可考者然无考者悉强附焉系王既非不复深论 镐京大谬按周纪西周君彝秦周君王赧卒宋忠曰云云正义曰非也西周公即西周武公王赧即周】

【王也周君与王赧此年俱卒通监书赧王入秦大事记谓当从之史衍周君二字又楚世家楚欲图周周王赧使武公则武公为臣明矣岂可合为一人乎】

周共太子死【周绍云西周武公之共太子死正曰策元在东周鲍据周纪改此恐有误而下注周纪之文以存疑】有五庶子皆爱之而无适立也【适犹定也故与莫反正曰适专主也】司马翦【司马楚卿疑即昭翦】谓楚王【怀】曰何不封公子咎【周君别子】而为之请太子【请於周使立为太子】左成【楚人正曰此类当因旧注凡有明徵者可定其生地不可考而仕国可见者则当曰某国臣正义注此正作楚臣高注亦多作臣後放此】谓司马翦曰周君不听是公之智困【困不通也】而交絶於周也不如谓周君曰孰欲立也微告翦翦令楚王资之以地【封地以为之资】公若欲为太子【此左成告翦之辞为皆去音犹助也】因令人谓相国御展子【楚相之御姓展】詹夫空【詹音字同小臣也空其名】曰王类欲令若为之【王楚王类犹似若汝也言楚王之意告】此健士也【此亦左成喻翦之言健犹悍也正曰此亦成作翦语语长子者】居中【国中】不便於相国【二士居中与国事以其悍故相国不之便若出而使周则不居中用事相国之所欲也故以此说之相国必从】相国令之为太子【此策周纪有元在东周正曰见上补曰共恭同适丁历反咎音皋】

谓齐王【凡言谓言为而不人失之也犹言或为或谓王闵王正曰周最屡见东西周策谓周最曰仇赫之相宋云云事在赧王十七年周最於齐王厚也而逐之听祝弗相吕礼云云礼之相在赧王二十九年此则王当齐闵之世周纪赧王四十五年周君之秦客谓周最以应为太后养地五十八年有周聚以收齐则正当顷襄王之世相距凡四十年不可定为闵王时也按策西周两章皆云最为太子而东周又出最名无曰太子云者疑或自是二人然无所考】曰王何不以地齎周最【齎持遗也最周之庶子凡周皆周之族正曰鲍意此即上章事而上有五庶子之文尔无明?】以为太子也齐王令司马悍【齐人】以赂进周最於周【进犹荐】左尚【齐人】谓司马悍曰周不听是公之智困而交絶於周也公不如谓周君曰何欲置【置犹立】令人微告悍悍【补曰一本悍请令】令王进之以地左尚以此得事【以教悍得齐王意故委任之疑此即上章楚王楚人补曰最史作聚索隐云最古聚字说文同赵策颜最史亦作颜聚】

司寇布【司寇周官布其名】为周最谓周君曰君使人告齐王以周最不肯为太子也【闵王善最欲其为太子以赂进之最时让立周以最不肯立告齐正曰闵王说见前章此并无据】臣为君不取也函冶氏【冶销铁也函盖其姓补曰剡川姚氏云函姓冶官名因以为号】为齐太公【田和也始代吕氏为齐侯】买良劔公不知善归其劔而责之金【归还之也责取也金买劔之金】越人请买之千金折而不卖【折折劔正曰高注云虽千金犹未尽其本价故折其钱而不卖则折作折阙义若作断折则於下文不通】将死【函冶氏将死】而属其子【属嘱同集韵托辞】曰必无【无以告人】独知【自知其良正曰二语因高注愚意必无独知当作一句言凡有售必使衆知其良不可独知也】今君之使最为太子【周虽以最不肯立告齐犹欲立之特未定耳】独知之契也【契约也当两知之今则独补曰礼记右契注一书两札同而别之】天下未有信之者也臣恐齐王之谓【元作为】为【补曰策为谓通借此当作谓】君实立果【亦周子】而让之於最【让饰说也】以嫁之於齐【嫁犹卖也言欺齐】君为多巧【巧犹诈】最为多诈【心欲之而言不肯】君何不买信货哉【可信之货非独知也】奉养无有爱於最也【爱犹吝】使天下见之【然则立最信矣从周纪皆当为楚王正曰使衆见之而信最之当立从周纪改楚非补曰为周为君为齐之为去声】

秦令樗里疾【秦惠王弟其居在渭南陰乡樗里故号樗里子後相武王】以车百乘入周周君迎之以卒【百人为卒】甚敬楚王怒【怀王】让周以其重秦客【谓疾】游腾【周人正曰高注作臣】谓楚王曰昔智伯【晋卿智襄子之孙瑤】欲伐公由【夷国属临淮汉志由作犹又九域图并州有仇犹城引此正曰高注狄国括地志云并州孟县外城俗名原仇山史樗里传作仇犹韩子仇繇吕氏春秋刘外纪夙繇高注或作仇首汉志临淮乃泗之漣水罗氏路史谓非智伯所伐者公音求字又作忬?】遗之大钟载以广车【欲开道也】因随入以兵公由卒亡无备故也【受其钟不防以兵】桓公伐蔡也【僖二年蔡姬沉舟荡公公怒归之未絶也蔡嫁之故伐之蔡蔡叔度所封属汝南後徙沛下蔡】号言伐楚【号声言也以伐楚号衆】其实袭蔡【无钟鼓曰袭正曰此据左氏说陆氏纂例掩其不备曰袭】今秦虎狼之国也【喻其贪残】兼有吞周之意使樗里疾以车百乘入周周君惧焉以蔡公由惑之【以二国为惑补曰一本戒之注以二国为戒也】故使长兵在前【戈矛之属】强弩在後名曰卫疾【卫行列为护也】而实囚之【补曰一本下有也字】周君岂能无爱国哉恐一日之亡国【恐秦亡之】而忧大王【为楚王忧】楚王乃悦【樗里传有】

雍氏之役【周纪注阳翟有雍氏城韩记注赧王三年十五年楚再围雍氏此十五年也】韩徵甲与粟於周【徵犹索】周君患之告苏代【秦之弟洛阳人】苏代曰何患焉代能为君令韩不徵甲与粟於周又能为君得高都【属上党正曰水经云伊水迺邲邮亭又北迺高都杜预云河南新城有邲邮亭括地志云高都旧城在洛州伊阙县北京相璠云非在上党者】周君大悦曰子苟能寡人请以国听【以国事从之】苏代遂往见韩相国公仲【元作中下同韩公族】中【正曰古仲字省补曰索隐云公仲侈裴駰云相国秦官韩亦有诸国仿秦也】曰公不闻楚计乎昭应【楚将也昭屈景皆楚之族姓後有不重注】谓楚王【怀王】曰韩氏罢於兵【罢疲同劳也】仓廩空【并谷所入】无以守城吾攻之以饥【因其饥攻之补曰一本收之】不过一月必拔之【得城曰拔如拔物然】今围雍氏五月不能拔是楚病

也【病犹困】楚王始不信昭应之计矣今公乃徵甲与【元作及】及【正曰史作与及义自通母烦改字】粟於周此告楚病也【犹以饥疲告之】昭应闻此必劝楚王益兵守雍氏雍氏必拔公仲中曰善然吾使者已行矣代曰公何不以高都与周公仲中怒曰吾无徵甲与粟於周亦已多矣何为与高都代曰与之高都则周必折而入於韩【折犹屈入犹归】秦闻之必大怒而焚周之节【节符信也行者所执焚之者不通周也周官通達於天下必有节无节则不達】不通其使是公以敝高都得完周也何不与也公仲中曰善不徵甲与粟於周而与高都楚卒不拔雍氏而去【纪有而略周君为东周补曰正义雍於恭反】

薛公【靖郭君田婴之子孟尝君田文也袭其父封薛薛属鲁国】以齐为韩魏攻楚【楚怀二十六年齐韩魏攻楚此十二年也】又与韩魏攻秦【齐闵二十六年为韩魏攻秦此十七年也正曰此据史按通监大事记赧王二年当闵王元年此当作十六年】而藉兵乞食於西周【藉犹借】韩庆【凡韩皆韩人其在周去韩仕周也凡非本国人皆自其国来仕者也】为西周谓薛公曰君以齐为韩魏攻楚九年取宛叶以北【二县属南阳九字误当云六或五补曰宛於袁反邓州县叶舒涉反汝州县】为强韩魏【为犹代补曰一本而取宛叶以北以强韩魏】今又攻秦以益之【益其强】韩魏南无楚忧西无秦患则地广而益重齐必轻矣夫本末更盛【更犹迭】虚实有时【言不可常】窃为君危之【并言齐薛今虽善韩魏後或为患】君不如令敝邑【周也】陰合为秦【陰犹私】而君无攻【但出兵临秦不用攻也】又无藉兵乞食【勿示秦以弱】君临函谷【临言以兵至其地函谷关名在弘农补曰正义云陕州桃林县西南有洪溜涧古函谷也今属灵宝县】而无攻令敝邑以君之情【心所欲也】谓秦王【昭襄】曰薛公必不【补不字补曰史此下有不字是】破秦以张韩魏【张去音大之也】所以进兵者欲王令楚割东国以与齐【楚之东地即楚策下东国云】而【元作也】也【补曰史作而】秦王出楚王【怀】以为和【楚怀王十年张仪诱楚王会秦秦留之此十六年也】君令敝邑以此惠秦【秦得无攻周之力也】秦得无攻【元作破】破而以楚之东国自免也必欲之楚王出必德齐【齐出之齐之恩也】齐得东国而益强而薛世世无患秦不大弱【无三国之兵故】而处之三晋之西【赵魏韩本晋三卿分晋而君之故曰三晋】三晋必重齐【秦居晋西不弱而善齐三晋畏秦故齐重】薛公曰善因令韩庆入秦而使三国无攻秦而使不藉兵乞食於周【孟尝传有今按楚记三国攻楚秦救之引去与此言取宛叶小駁补曰大事记颖滨苏氏云秦昭王欺楚怀王要之割地诸侯熟视无敢一言问秦者惟田文怨秦借楚为名与韩魏伐秦自山东难秦未有若此其壮者也惜其听韩庆之计临函谷而无攻以求楚东国而名义索然以尽由此观之秦惟不遇桓文之君故横行而莫之制世岂有以大义而屈於不义者哉 为强为和之为如字余去声】

三国攻秦反【反犹还】西周恐魏之藉道也【藉亦借】为西周谓魏王【哀正曰此据史按通监大事记显王三十五年乃魏惠王後元年慎靓王三年当魏襄元年说见魏策此当作襄事在二十一年】曰楚宋不利秦之听【元作德】德三国也【听犹顺从三国近楚宋秦听之则强而害楚宋故不利也正曰三国不攻秦而解故秦德之秦德之则和而不利於楚宋】彼且攻王之聚【楚宋攻魏之廩庠正曰邑落曰聚如 狐聚阳人聚之类】以利【元作到补曰一本作利】秦【若为秦报魏王】魏王惧令军设舍速东【舍军次也魏东还必道周周必宾之故恐今速东则无宾之之费矣】

韩魏易地【韩策书此在楚国雍氏後】西周弗利樊余【周人正曰高注作臣补曰姚云余下曾有为周字】谓楚王【怀】曰周必亡矣韩魏之易地韩得二县魏亡二县【易地则魏亦有得而独言亡者亡多於得也】所以为之者【魏虽多亡然且为之】尽包二周【东西】多於二县九鼎存焉【汉志武王迁九鼎于郊鄠鄠属河南为东周正曰说见前】且魏有南阳郑地三川【河内修武注晋始启南阳是也京兆山阳皆有郑河南有新郑此在楚魏之间新郑也河南郡注秦三川郡也周纪三川震注泾渭洛补曰杜注在晋山南河北故曰南阳郑本在西都畿内咸林武公得虢桧之地乃徙其封是为新郑咸林今华州郑县新郑今郑州正曰三川河洛伊张仪所谓天下朝市秦武王所谓车通以闚周室者也秦拔成臯荥阳初置三川郡】而包二周则楚方城之外危【南阳郡注叶公邑号方城补曰正义云方城山在叶县西】韩兼两上党【汉并州郡甘茂传注远韩近赵故言两此韩所得也今按东策周再说金投秦策蓝田径山三章所言则上党亦属魏】以临赵即赵羊肠以上危【上党壶関有羊肠坂高注赵险塞山形屈折如羊肠此皆以所近之国强故危】故易成之日楚赵皆轻楚王恐因赵兵以止易【补曰一本因赵以止易也】

秦攻魏将犀武军於伊阙【唐志为县属河南注北有伊阙故阙此役秦昭十四年此二十二年补曰正义云水经注禹疏龙门以通水两山相对若阙故谓之伊阙今洛南犹谓之龙门也诸本犀作?当正】进兵而攻周为周最谓李兑【赵司寇】曰君不如禁秦之攻周【禁犹止】赵之上计莫如令秦魏复战【赵魏隣也魏有秦兵则赵无事】今秦攻周而得之【得犹胜正曰得其土地人民也】则衆必多伤矣秦欲持【元作待】待【补曰字有讹】周之得【得犹保】必不攻魏【恐重伤】秦若攻周而不得前有胜魏之劳後有攻周之败又必不攻魏今君禁之而秦未与魏讲也【讲和解也补曰史甘茂传索隐云邹氏讲读曰媾又曰汉史媾讲两字常杂愚按构构购亦然今凡为和解之义者定读从媾为交结之义者字当从才後放此】而全赵令其止必不敢不听是君却秦而定周也【却犹退】秦去周必复攻魏魏不能支【支犹拒】必因君而讲【与秦和也】则君重矣【凡言重皆制人而不制於人者也】若魏不讲而疾支之是君存周而战秦魏也重亦尽在赵

犀武败於伊阙周君之魏求救【白起既败魏遂进攻周周以魏怨之故往求救补曰大事记秦怒东周助韩魏故攻之按策文当作西周】魏王【昭】以上党之急辞之【意者有赵或韩兵也正曰赵兵无考周韩魏共伐秦此时韩魏必和】周君反见梁囿【陈留浚仪注魏惠王自安邑徙大梁有林池曰囿正曰囿者蕃育鸟兽之所】而乐之也綦母恢【周人正曰高注作臣】谓周君曰温囿不下此【温属河内言其乐不在梁下】而又近【近周】臣能为君取之反见魏王王曰周君怨寡人乎对曰不怨且谁怨乎臣为王有患焉周君谋主也【犹为天子故正曰韩世家使公孙喜率周魏伐秦败伊阙缘是故称谋主此周君也】而设以国为王扞秦【设施陈扞卫也】而王无之扞也【无为周扞者】臣见其必以国事秦也秦悉塞外之兵与周之衆以攻南阳而两上党絶矣【言赵韩援魏之路絶正曰是时魏上党被兵若周秦攻南阳则魏又当御其攻而上党必絶後云上党无患言得并力於此也】魏王曰然则奈何綦母恢曰周君形不好小利【形犹势也小利谓温囿国小多忧其势宜不得游观】事秦而好小利【有秦助则无国患乃得游观】今王许戍三万人【戍守边也许为周扞秦】与温囿周君得以为辞於父兄百姓【云得戍卒之援】而私【元作利】利【补曰姚云

钱本作私按作利字则与上協】温圉以为乐【得戍公也得圉私也】必不合於秦臣尝闻温圉之利计岁八十金【魏人贡其上之数】周君得温圉其以事王者岁百二十金【周许魏之数】是上党无患【周善事魏则赵韩必不加兵】而赢四十金【赢有余贾利也】魏王因使孟卯【鸿烈泛论注齐人即芒卯】致温圉於周君【致送也】而许之戍【彪谓周君非贤君也秦兵在境而乐於圉其志荒矣恢虽能得圉非君子所以事其君者也补曰为辞为乐之为如字余去声】

犀武败周使周足【周相】之秦或谓周足曰何不谓周君曰臣之秦秦周之交必恶【皆美恶之恶正曰左传周郑交恶杜注两相疾恶据此则皆当乌故反】主君之臣【主君称周君】又秦重【秦之所重】而欲相者【欲得相周】且恶臣於秦【此人欲代足相周故败其使事此二国所以必恶】而臣不能为使矣臣愿免而行【免已之相以顺欲者】君因相之彼得相不恶周於秦矣君重秦【此下或人复说足也】故使相往行而免是【元作且】且轻秦也公必不免【虽以免自请势不可免也】公言是而行交善於秦是公之事成【元作成事】成事【补曰恐当作事成】也交恶於秦不善於公者【补者字】且诛矣【意其恶足於秦也】

苏厉【亦秦之弟】谓周君曰败韩魏杀犀武攻赵取蔺离石祁者【蔺及离石属西河祁属太原补曰此注大事记取】皆白起【秦将武安君】是攻用兵【攻功字言善巧也正曰攻工字通借】又有天命也【得天之助】今攻梁【魏都】梁必破破则周危君不若止之谓白起曰楚有养由基者【楚共王将】善射去柳叶者百步而射之百发百中【发发矢】左右皆曰善有一人过曰善射可教射也矣【意欲其息】养由基曰人皆善【善善我】子乃曰可教射子何不代我射之也客曰我不能教子支左屈右【支如竹之支也盖取其直左右臂正曰列女传云左手如拒右手如附枝右手发之左手不知此射之道也】夫射柳叶者百发百中而不以善息【百中善也此时宜息】少焉气力倦弓拨矢钩【元作拘今从史拨弓反也钩矢锋屈也补曰姚本作钩拘有钩音古或通】一发不中前功尽矣【尽犹?】今公破韩魏杀犀武而北攻赵取蔺离石祁者公也公之功甚多今公又以秦兵出塞过两周践韩而以攻梁【践履也犹过】一攻而不得前功尽?公不若称病不出也【周纪三十四年有补曰射之射柳之射食亦反】

楚兵在山南【山吴岳属扶风礼所谓岳山也正曰岳山秦地非此所指高注在周之山南】伍【元作吾下同】吾【补曰吾字讹当作伍】得【楚将也高注吾作五】将为楚王【顷襄】属怨於周【属连也犹结】或谓周君曰不如令太子将军正【周太子也将去音军正犹卒正军之率也正曰此谓将军而正迎也史穰苴传军正无注】迎伍吾得於境而君自郊迎令天下皆知君之重伍吾得也因泄之楚曰【微漏其言使楚知之】周君所以事伍吾得者器必多且归楚【此以间得於楚言与得之器其必载以归】王必求之【楚王】而伍吾得无効也【効犹致也得实未尝得器故无以効】王必罪之【以其欺也彪谓此谋虽不出於正而免国於难可也正曰鲍以此为尊周缪矣】

楚请道於两周之间【以假道请】以临韩魏周君患之苏子【元作秦秦字季子洛阳人其

死时东西周末分此当为代若秦诸如七处不一正曰东西周说见前史不曰苏秦东周洛阳人乎】谓周君曰除道属之於河【除去秽也夏纪注河出金城积石盖道行两周之间使楚所假连及之正曰河东过洛汭在巩县东洛邑北望有河】韩魏必恶之【恶楚】齐秦恐楚之取九鼎也【道广可以出鼎】必救韩魏而攻楚楚不能守方城之外安能道二周之间若四国弗恶【齐秦韩魏】君虽不欲与也【与之道正曰谓鼎也】楚必将自取之矣

秦召周君周君难往【意不欲往】或为周君谓魏王【安厘正曰无考周纪作韩王】曰秦召周君将以使攻魏之南阳王何不出兵於河南【河南洛阳也时未为郡言河之南耳正曰河南即西周郑鄆考王封弟河南其名久矣】周君闻之将以为辞於秦而不往【以魏兵在境为言】周君不入秦秦必不敢越河【越度也】而攻南阳

周君之秦谓周最曰【最时从王】不如誉秦王之孝也【秦昭】因以原为太后养地【齐记注河内沁水有原城后昭王母宣太后也供养之地汤沐邑也补曰原姚本作?史同徐注颍川父城县?乡】秦王太后必喜是公有秦也【有言得其意】交善【周秦之交】周君必以为公功交恶劝周君入秦者必有罪矣【纪四十五年有】

秦欲攻周周最谓秦王【昭】曰为国之计者不攻周攻周实不足以利国而声畏天下【声犹名也周天子也今见攻故天下畏秦正曰畏犹恶也周地狭不足以利国而有攻天子之恶名见畏恶於天下与司马错说同意】天下以声畏秦必东合於齐兵敝於周【攻虽胜不无伤失】而合天下於齐则秦孤而不王矣是天下欲罢秦【罢疲同下同】故劝王攻周秦与天下俱罢【天下合齐而与秦战战则必疲】则令不横行於周矣【横行无畏惧也纪有】

宫他【周人正曰高注作臣】谓周君曰宛恃秦而轻晋【宛属南阳故申伯国南阳三晋时属韩韩厘五年秦拔我宛盖宛亡在春秋之晋三晋分晋乃属韩也】秦饥而宛亡【此下皆恃远轻近而亡秦饥不能援宛故晋?之其亡不经见】郑恃魏而轻韩魏攻秦而郑亡【郑河南新郑郑君乙二十一年韩哀侯?之】邾莒亡於齐【鲁邹衍故邾也邾曹姓国二十九世楚灭之莒属越阳国故盈姓国三十世楚?之盖恃齐也】陈蔡亡於楚【陈舜後汉淮阳国楚惠王十年灭陈四十二年?蔡皆不见所恃盖即恃楚不备之也】此皆恃援国而轻近敌也【援引也故有助意】今君恃韩魏而轻秦国恐伤矣君不如使周最【元作早补曰姚本正作最】陰合於赵以备秦则不毁

战国策校注卷一

卷二

钦定四库全书

战国策校注卷二 宋 鲍彪 原注

元 吴师道 补正

东周【汉志河南巩东周君所居正曰东周当从旧居卷首说见前
大事记云东周惠公班秉政洛阳采邑在巩汉志说非余见前】

惠公【周纪考王封其弟河南是为桓公桓公子威公威公子惠公惠公封其子於巩号东周
惠公然则河南巩父子同諡又纪西周武公赧王则諡也盖以避秦不敢称尊楚记顷襄十八
年王赧使武公此武公赧王臣也而徐注以为惠公之子疎矣惠公之子自为东周君岂为西
周用邪两周西先亡至秦庄襄元年俱?正曰东周止有惠公名著策有文君他无见徐广云纪
年顯王九年东周惠公杰薨皇极经世东周惠公卒子杰嗣二书不同则其世系亦难明矣凡
策所书君得皆为惠公时事邪 赧王非諡武公鲍引宋忠说误为二人前索隐谓諡法无赧赧
然惭愧故以为号战国相王周之王号自若不闻其为秦贬损也王赧使武公徐广谓即西周
武公大事记从之西周惠公封子於巩为东周惠公实同諡者继西周之惠公则武公也既曰
武公则周君也谓别为一人可乎东西周虽分治王犹在上为东周君敬奉王命而王使之又
何不可乎】

秦兴师临周而求九鼎周君患之以告顔率【周人】顔率曰大王勿忧臣请东借救於齐顔
率至齐谓齐王【闵正曰大事记云姚氏考春秋後语周顯王齐宣王也今附载於顯王三十
三年宋太丘社亡之前】曰夫秦之为无道也欲兴兵临周而求九鼎周之君臣内自尽【尽
其心思补曰姚云尽字刘曾集作画】计与秦【计犹谋】不若归之大国【谓齐】夫存危
国【周有秦兵危也】美名也得九鼎厚宝也【厚犹重】愿大王图之齐王大【补曰一本
大说】发师五万人使陈臣思【即後田臣思凡陈田皆齐公族】将以救周而秦兵罢齐将
求九鼎周君又患之顔率曰大王勿忧臣请东解之【东之齐解免之】顔率至齐谓齐王曰
周赖大国之义得君臣父子相保也愿献九鼎不识大国何涂之从【问其路所从出礼遂上
有径洫上有涂】而致之齐齐王曰寡人将寄径於梁【径步道也犹言假涂】顔率曰不可
夫梁之君臣欲得九鼎谋之晖台之下【台名曰晖故孟子称梁有台池之乐】沙【元作少
】少【补曰少当作沙】海之上【九域图开封有沙海引此】其日久矣鼎入梁必不出齐
王曰寡人将寄径於楚【楚非适齐之途既不可入梁亦无从至楚其云然不可晓也】对曰
不可楚之君臣欲得九鼎谋之於叶庭之中【即南阳叶也补曰姚云後语作章华之庭】其
日久矣若入楚鼎必不出王曰寡人终何涂之从而致之齐顔率曰敝邑固窃为王患之夫鼎
者非效壶醯酱瓿耳【壶昆吾圜器瓿瓿也补曰一本醯壶此文穀次】可怀挟提挈以至齐
者非效鸟集乌飞兔兴马逝【并喻其轻疾】漓然止於齐者【集韵漓渗流貌】昔周之代
殷得九鼎凡一鼎而九万人挽之【挽引也】九九八十一万人士卒师徒【士一人也二千

五百人为师徒步行者正曰左传注步卒七十二人甲士三人又百人为卒徒衆也此士卒师徒亦大?言之耳】械器被具【械器之总名被具士卒所服用之具】所已备者称此【备人之所应用使称足此八十一万人补曰姚本已作以正曰称此者彼此均等犹史言他物称是谓士衆賁械具备挽鼎之役者又且八十一万也】今大王纵有其人何涂之从而出臣切为大王私忧之齐王曰子之数来犹无与耳【言许之而实不与也】顔率曰不敢欺大国疾定所从出敝邑迁鼎以待命齐王乃止【补曰洪氏迈云策首载此以为奇谋此特儿童之见尔疑必无是事而好事者饰之愚按左氏尝载楚子问鼎事当时争欲得鼎以见其强不可以为无】

秦攻宜阳【韩邑属弘农秦武三年攻宜阳赧王七年也补曰大事记云今河南府福昌县城东南北三面峭絶天险龟池二穀皆在境内盖控扼之地此据甘茂传文年表拔宜阳在次年宜阳之役五月而不拔凡涉两岁也通监大事记皆於赧七年书伐八年书拔景翠救韩在八年】周君谓周累曰【补曰一本赵累大事记引】子以为如何对曰宜阳必拔也君曰宜阳城方八里材士十万【士之有材武者】粟支数年公仲之军二十万景翠【楚将】以楚之衆临山而救之【楚与韩隣而与秦相图故救之】秦必无功对曰甘茂【下蔡人仕秦补曰茂一作戊後多有说文史作戊古字通】羈旅也【集韵羈旅寓也】攻宜阳而有功则周公旦也【言且相秦】无功则削迹於秦【言不得留】秦王不听羣臣父兄之议而攻宜阳宜阳不拔秦王耻之臣故曰拔君曰子为寡人谋且奈何对曰君谓景翠曰公爵为执珪官为柱国【楚卿】战而胜则无加焉矣不胜则死不如背秦援宜阳【翠时盖援宜阳而有秦之私故云补曰秦策冯章许楚汉中楚懼而不进所说有秦私者窃谓此策上既言秦之必拔翠之不胜则死而又曰不如背秦援宜阳意殊不类恐此胜有缺误背下或有之字或秦下复有秦字援字或作拔劝之避秦兵待秦既拔然後进兵乘其敝当秦惧之韩德之而交得赂以为利下文秦拔宜阳景翠果进兵果字可见又秦策楚畔秦而合於韩句意似与此同然彼指翠未救时言之尔其後韩楚虽合楚不为韩氏与秦战固已惧之矣】公进兵秦恐公之乘其敝也【乘谓因而攻之】必以宝事公公仲慕公之为已乘秦也亦必尽其宝秦拔宜阳景翠果进兵秦惧遽効煮枣【属济陰冤句】韩氏果亦効重宝景翠得城於秦受宝於韩而德东周【德恩之也补曰为寡为已之为去声余如字】

东周与西周战韩救西周为东周谓韩王【襄】曰西周者故天子之国也多名器重宝按兵而勿出【按下与举反】可以德东周西周之宝可尽矣【欲韩出兵故赂之纪八年有】

东周与西周争西周欲和於楚韩【和二国以为已援】齐明【疑楚人两见楚策正曰无明徵注例以国姓者皆其国人齐明岂不可为齐人邪故大事记止云当时之辯士也】谓东周君曰臣恐西周之与楚韩宝令之为已求地於东周也不如谓楚韩曰西周之欲入宝持二端【言东兵急则入不急则已】今东周之兵不急西周西周之宝不入楚韩楚韩欲得宝即且趣我攻西周【趣疾也督使疾战我谓东周】西周宝出是我为楚韩取宝以德之也【言有恩於楚韩】西周弱矣

东周欲为稻【为谓种之】西周不下水【稻宜湿西周居河之上流正曰不下专指河水】

东周患之苏子【非代则厉】谓东周君曰臣请使西周下水可乎乃往见西周之君曰君之谋过矣今不下水所以富东周也今其民皆种麦【麦宜燥也】无他种矣君若欲害之不若一为下水以病其所种下水东周必复种稻种稻而复夺之若是则东周之民可令一仰西周【有望於上则仰补曰为去声仰疑向反】而受命於君矣西周君曰善苏子亦得两国之金也【彪谓此策不可行东西周壤地相接岂不能候其所种苏子东人也为东游说而岂得不疑且今下水安能保其不夺虽一为下何补哉正曰据此策则西人可以制周必不疑於其说苏子公为反覆以得金岂顾其复夺哉大事记云其微如此其所争又如此可不哀哉然则又何足深辨也】

昭献在阳翟【属颍川补曰韩策楚昭献相韩】周君将令相国往【往与献会】相国将不欲苏厉为之谓周君曰楚王与魏王遇也主君令陈封之楚【此言畴昔之事陈向叶皆仕周而位在相下】令向公之魏楚韩之遇也【亦其王遇】主君令叶公之楚令向公之韩今昭献非人主也而主君令相国往若其王在阳翟主君将令谁往【言必君自往】周君曰善乃止其行

秦假道於周以伐韩周恐假之而恶於韩不假而恶於秦史黻【韩史疑即厌补曰黻正义云乌减於点二反】谓周君曰君何不令人谓韩公叔【韩公族】曰秦敢絶塞【絶横渡塞障也为垣垒以遮止邻国往来】而伐韩者信东周也公何不与周地发重使【使周发使】使之楚秦必疑【秦楚相图之国也周使使楚故秦疑其图已】不信周是韩不伐也【不受秦伐】又谓秦王【武】曰韩强【补曰强巨两反】与周地将以疑周於秦寡人不敢弗受秦必无辞而令周弗受是得地於韩而听於秦也【纪八年彪谓战国之士设心措辞无不出於诈若此者君子之所怒也下章次之正曰鲍意尊周故谓行诈免难所可恶与前注为伍得章失同】

楚攻雍氏【此亦赧之十五年也】周赧秦韩【赧食米也时秦救韩周以米饷之正曰诗传粮也音张】楚王【怀】怒周周君患之或为周谓楚王曰以王之强而怒周周恐必以国合於所与粟之国则是劲王之敌也【劲强也】故王不如速解周恐【周以楚怒之故恐】彼前得罪而後得解必厚事王矣

苏厉为周最谓苏子【元作秦】秦曰君不如令王【君谓苏子王周君也此时与赧俱王其称公後避秦也正曰尤缪】听最以地合於魏赵【地周地】故必怒【称故者特为之怒苏子怒最】合於齐【怒最而反其所合】是君以合齐与强楚更产子【时齐与楚善合齐则得与楚为与国可至再世产子言易世也与党与也补曰刘辰翁云吏字当作更平声】君若欲因最之事【与最同合魏赵此厉本谋也前与游辞耳故为为周最】则合齐者君也割地者最也【补曰最欲合赵魏而苏秦欲合齐厉为最故言若不废最之事则君合齐而最合赵魏也】

谓周最曰仇赫之相宋【补曰赫一本作赧】将以观秦之应赵宋【絶句】败三国【韩魏齐也魏纪哀二十一年与韩齐败秦函谷盖此时秦欲败之反为所败也赧十八年正曰哀当

作襄下同十八当作十七年表文大事记从之】三国不败将与赵宋合於东方【即三国】以孤秦亦将观韩魏之於齐也不固则将与宋败三国【此应秦也】则卖宋於三国【此应三国也以国情输之曰卖言赫不忠於宋不应秦则应三国以此知赫本非宋人补曰一本则卖赵宋】公何不令人谓韩魏之王【韩襄魏哀】曰欲秦赵之相卖乎【此卖犹欺】何不合周最兼相【使韩魏皆相之】视之不可离【视示同二国同相最可见其交之固补曰离去声】则秦赵必相卖以合於王也

为周最谓魏王【哀正曰襄】曰秦知赵之难与齐战也【难言其不利正曰难畏阻意】将恐齐赵之合也必陰劲之【劲赵以兵使之强】赵不敢战【难先战】恐秦不已收也【违其劲之之意】先合於齐秦赵争齐【齐固秦所欲合故其劲赵谓之陰劲正曰秦欲伐齐赵欲合齐故云争齐】而王无人焉【无主其事於齐者】不可王不去周最【最时在魏欲之齐故此士为之言使得去】合与收齐【与即谓齐齐魏之与国】而以兵急之【元作之急急之以兵则非合矣】之急则伐齐无因事矣【言秦见齐有魏兵必伐之有此有彼曰因犹言无他事矣齐败魏马陵宜为魏仇因此言合与】

盖其国形宜相依也正曰而以兵伐齐言今不合与收齐而以秦兵之急则伐齐是无可依之事矣】

谓周最曰魏王【哀正曰昭】以国与先生【以德齿尊称之也与谓相之正曰孟子注学士年长者谓之先生】贵合於秦以伐齐【贵犹欲】薛公【田文】故主【齐闵王也最尝仕齐故称之然】轻忘其薛不顾其先君之丘墓【谓齐王田文欲去国以避秦兵正曰此田文相魏时也下文谓魏王薛公可见文激於祝弗吕礼之故劝秦伐齐故生上恐缺一字盖言文犹背齐以起下文最不与伐齐之意大事记赧王二十九年魏以田文为相谓其去齐相魏在齐灭宋之前史在灭宋之後】而公独修虚信【最本善齐固不背齐然今相魏魏有以秦伐齐之形犹为虚信信谓亲之】为茂行【茂盛美也】明羣臣【明犹示也臣魏臣】据故主【据仗持也犹言为之此言最在魏示羣臣以为齐王不欺之此所谓茂行正曰修虚信为茂行句明羣臣据故主句】不与伐齐【与去音正曰与如字许也】产以忿强秦【产犹生也魏欲伐齐已独不与犹生此节目也违秦不伐齐故秦忿】不可公不如谓魏王薛公曰请为王入齐天下不能伤齐【最之智略足以全齐】而有变【万一有伤齐者】臣请为救之【此则非虚信矣】无变王遂伐之【伐秦】且臣为齐奴也【为去音言其为之如奴事主】如累王之交於天下【累者事相连及犹误也交谓齐魏】不可【此言非人之情】王为臣赐厚矣臣入齐则王亦无齐之累也【此累犹患正曰按魏策周最入齐秦王怒令姚贾让魏王魏王为之谓秦王曰魏之所以为王通天下者以周最也今最遁寡人入齐齐无通於天下矣敝邑之事王亦无齐累矣最入齐则正与此章相首尾所谓敝邑之事王亦无齐累语又与此合曰请为王入齐天下不能伤齐者最自许其足以全齐有变为秦伐齐齐急则请魏之救无变谓秦不能伐则王遂伐之此厚齐之说也且臣为齐奴以下以为魏言之为齐奴为齐奴隶也交指秦也累達及也不可以最故使魏恶於秦王使最得入齐为赐厚矣最入齐则秦无疑於魏是魏不为齐所累也补曰为王为救之为去声余如字】

赵取周之祭地周君患之告於郑朝【凡郑皆郑人】郑朝曰君勿患也臣请以三十金【一斤为一金正曰正义云秦以一镒为一金孟康云二十四两云注】复取之周君予之郑朝献之赵太卜因告

以祭地事及王病使卜之太卜譴之曰【譴谪问也】周之祭地为崇【神祸也】赵乃还之

杜赫【周人正曰楚策云楚杜赫】欲重景翠於周谓周君曰君之國小尽君之重宝珠玉以事诸侯不可不察也【國小必赂以求援不可胜赂故宜察】譬之如张罗者张之於无鸟之所则终日无所得矣张於多鸟处则又骇鸟矣【多鸟处有触罗者傍鸟必觉觉则羣惊而去矣】必张於有鸟无鸟之际然後能多得鸟矣今君将施於大人大人轻君施於小人小人无可以求又费财焉【均之费财而小人多则多费也】君必施於今之穷士不必且为大人者【不必犹不可知也言不终穷或且为大人者此指翠也】故能得欲矣【齐策楚策皆有杜赫在齐则威王时於周?王时也自?威至是八十年矣疑赫字误景翠实此时人正曰按齐策田忌亡齐之楚邹忌代相恐其

以楚权复齐杜赫曰臣请为留楚忌 宣王二年忌有马陵之战其奔必後此 楚策五国伐秦魏欲和杜赫云云在楚怀王十一年当慎靓王三年大事记据韩世家注赧王三年书楚景翠围韩雍氏自宣王二年至赧王三年为三十年自慎靓王三年至此为七年则翠之与赫何不相及之有】三国隘秦【赧十八年注具前隘谓隔絶之正曰八当作七补曰策隘厄字通此当乙革反】周令其相之秦以秦之轻也【见其隘於三国】留其行【不进】有人谓相国曰秦之轻重未可知也秦欲知三国之情公不如遂见秦王【昭】曰请为【一作谓】王听东方之处【听侦候之东三国也处其所为】秦必重公是公重周【下衍重周二字】重周以取秦也【秦重相则周重矣】齐重故有周【齐重天下重之也故犹旧也有言善之】而已取齐【此时秦齐为天下重已善秦不可忽齐故又劝之取齐正曰有谓收已也取谓得於彼也齐为重国故能收有周而周已取之矣今复取秦是周常不失重国之交】是周常不失重国之交也【补曰凡轻重字自然重者上声重之者去声此章轻重齐重重国之重上声余去声】

宫【元作昌下同此书作宫不一】昌【正曰昌当依本文】他亡西周【以罪去国曰亡】之东周尽输西周之情於东周【输言委以告之】东周大喜西周大怒冯雎【元作且雎之省也犹赵作肖齐作立故後唐且史作睢裴駰亦曰唐睢以华穎悟秦也此西人下同正曰且当依本文】曰臣能杀之君予金三十斤冯雎且使人操金与书间遗宫昌他【为反间书以遗之】曰告宫昌他事可成勉成之不可成亟亡来【亟急也】事久且泄自令身死【事泄露则死而不亟来自取之也正曰本文明白注少久字似不必】因使人告东周之候【侦候之吏扬雄曰西北一候】曰今夕有奸人当入者矣候得而献东周【得其人与书】东周立杀宫昌他

昭翦与东周恶或谓昭翦曰为公画陰计【为人谋者画之以筹】昭翦曰何也曰【补此字正曰古书多如此不必补】西周甚憎东周常【元作尝】尝【补曰当作常古通】欲东周

与楚恶西周必令贼公因宣言东周也【集韵宣扬也】以恶【元作西周二字】西周【补曰字有讹未详】之於王也【王楚怀王】昭翦曰善吾又恐东周之贼已【此翦自计】而以轻西周恶之於楚【翦恶东必善西西善翦则楚亦因重西矣东欲坏其交故贼翦翦死则西无内主於楚东因得使楚恶之】遽和东周【彪谓周衰君臣唯贪利而畏祸故一切趋避变乱於游谈之口而无有特操翦之虑死如此其能复固其所守乎】

周最谓吕礼【凡吕皆齐人礼以秦昭十三年奔魏十九年复归秦其相齐在薛公归薛後见孟尝传盖赧二十一年後也正曰吕皆齐人此类无据当缺晋有吕錡吕相本魏氏不必吕尚後也】注奔魏据秦纪按穰侯传冉相秦欲诛吕礼礼出奔齐大事记从之归秦据秦纪及穰侯传按秦纪下接齐破宋之文年表破宋在秦昭二十一年则纪误矣按吕礼相齐孟尝君遗穰侯书劝秦伐齐而礼亡事当在齐灭宋前大事记

书於赧王二十九年之首 则礼自奔齐至去齐首尾九年然解题亦据 後六年来归则未改也【】曰子何不以秦攻齐臣请令齐相子【秦攻齐礼使之也齐欲免攻故可使之相礼】子以齐事秦必无虑【元作处】处【正曰前後章有此字义当同】矣子因令【下衍周字】周最居魏以共之【与齐俱事秦】是天下制於子也子东重於齐西贵於秦秦齐合则子常重矣

谓薛公【田文】曰周最於齐王厚也【闵王】而逐之【补曰史秦王将吕礼相齐欲困苏代代乃谓云云 史周最於齐至厚也而齐王逐之策文省而胜祝弗史作亲弗索隐谓策得之一本况弗】听祝弗【齐人】相吕礼者欲取秦也秦【补此二字】齐合【上章所谓以齐事秦正曰注据补二字然言齐合则秦自见省文尔下章齐合亦然一本欲取秦秦齐合】弗与礼重矣【与犹如也言二国合则齐所重无如礼者正曰史亲弗与吕礼重矣言二国合则二人重策齐合弗与礼重矣言齐与秦合则二人重於齐视史语简而胜上文秦字省尤可见】有【下衍周字】周【补曰史作用】齐【秦有之正曰有用齐者言二子用齐】秦必轻君君弗如急北兵趋赵【亦与赵攻秦】以秦魏【能左右之曰以以犹使正曰从史以下有和字是急北兵读秦魏句是时秦怒齐齐赵交恶秦欲合魏前章魏贵合秦以攻齐赵难与齐战下章齐合则赵恐伐可见皆一时事也秦赵魏合为攻齐也故云急北兵趋赵以和秦魏也趋即趣促也谓不如急北方之兵从随之应秦魏而相与以攻齐也魏策周最入齐秦让魏魏谓秦曰大国欲急兵则趋赵而已趋即趋也此语正同虽时有後先而事理不异尔史载此策在文谢病归薛後文从其计而吕礼嫉害文乃劝秦伐齐吕礼亡其後齐?宋文乃】

【奔魏且文在齐岂敢召穰侯之兵哉召秦伐齐必文已去齐而史失之也此策云收周最反齐王则亦文奔魏之後召秦兵之前乎】收周最以为後行【齐初逐最欲取秦合也今攻秦收最用之可图後举行犹举正曰当从史无为字後作厚行下孟反最本厚於齐今齐逐之故收最以厚其行上文厚字同义】且反齐王之信【齐前与秦合今与赵攻之信反也正曰齐用礼以合秦取信今反之使不合也】又禁天下之率【率犹从也谓从齐补曰率史作变索隐云齐秦合则弗礼用用则轻孟尝二说皆通】齐无秦天下果弗必走【果犹决也走去音趋之也言不趋齐正曰史齐无秦则天下集齐亲弗必走此果字当从史作集谓齐无秦合而

秦赵魏合则天下之兵集於齐祝弗必走言弗而不及礼者齐听弗而相礼弗走礼不待言矣【齐王谁与为其国【言必重文孟尝传有正曰此章参之史可以互正如弗乃祝弗名尤易知而注乃释以他说其误甚矣】

齐听祝弗外周最谓齐王【闵】曰逐周最听祝弗相吕礼者欲深取秦也【补曰深取之深恐因下文衍】秦得天下则伐齐深矣【秦得齐则益强故能得天下得天下则亦不能存齐】夫秦【补正曰说见上此下云急兵以示秦则无秦字尤明矣】齐合则赵恐伐【秦伐之】故急兵以示秦【赵兵攻齐】秦以赵攻【攻齐】与之齐伐赵【之犹趋】其实同理【以赵攻齐则得齐趋齐伐赵亦得赵故其理同】必不处矣【处犹据也秦不据齐理同而独不据齐齐无兵而赵已出兵故也正曰注难通处义未详】故用祝弗即天下之理也【理在受兵於赵正曰言天下必将归秦】周相吕仓见客於周君【言之於君使得见补曰见贤遍反】前相工师籍恐客之伤已也【伤犹毁此即枝工师籍】因令人谓周君曰客者辨士也然而所以不可者【不可听用】好毁人【彪谓工师籍非端人也德义不愆何恤人之言】

周文君【史书东周略甚岂惠公後有此君邪不然则惠公别称也鸿烈道应训亦称周昭文君此後书训皆鸿烈也】免【下衍士字】士【补曰疑衍姚云曾集本去】工师籍相吕仓国人不说也君有闵闵之心【亦不说也】谓周文君曰国必有诽誉【诽谤也】忠臣令诽在已誉在上宋君夺民时以为台而民非之【见襄十一年】无忠臣以掩盖之也子罕释相为司空【司空主土工传言子罕亲执扑以行筑者是也】民非子罕而善其君齐桓公宫中女【元作七】七市女闾七百【闾里中门也为门为市於宫中使女子居之正曰宫中为女市女闾凡七百也】国人非之管仲故为三归之家【妇人谓嫁曰归夫家曰家仲盖三取女也】以掩桓公非自伤於民也【管仲为此人皆毁之仲非乐於毁也其意欲掩盖桓公耳一说仲欲掩公之非寧自毁也】春秋记臣弑君者以百数皆大臣见誉者也故大臣得誉非国家之美也【彪谓此言掩君之非可耳而齿见誉者於弑君之列则後世名卿贤相何道而可以安於朝廷之上不仁哉此言也补曰汉高帝系治萧何曰吾闻李斯相秦有善归主有恶自与云云王卫尉曰秦以不闻其过亡天下李斯之分过又何足法哉】故衆庶成强【言师籍之得衆】增积如山周君遂不免【卒相仓也】

温人之周【温时为西邑綦母恢请之也正曰西周得温圉耳】周不纳【并东周】客即对曰主人也【矫称东人补曰姚云一本周不内问曰客邪对曰云云韩非子文同】问其巷【补曰韩非子作巷人】而不知也吏因囚之君使人问之曰子非周人而自谓非客何也对曰臣少而诵诗诗曰普天之下莫非王土率土之滨莫非王臣【小推北山诗普徧率循也】今周君天下则我天子之臣而又为客哉故曰主人君乃使吏出之

或为周最谓金投【盖赵人之不善齐者】曰秦以周最之齐疑天下【周使最之齐秦以此疑周齐与天下合而谋己正曰无考】而又知赵之难子【不敢违投】齐人战恐【秦既疑齐投又不善齐故齐惧伐】齐【下衍韩字】韩【补曰疑衍】之合必先合於秦秦齐合则公之国虚矣【言赵必破而为墟墟虚字同大丘也】公不如救齐因佐秦而伐韩魏上党长子【属上党并韩地】赵之有己【二国有秦兵故赵得取其边地】公东收宝於秦【佐秦

故】南取地於韩魏因以困【韩魏唇齿之国故也】徐为之东【为犹谋也东谓齐】则有合矣【齐合赵也始时赵与齐隙无合理今得秦韩故齐惧而合其实最时相齐虑有赵患故为最谋者移之韩魏也】

周最谓金投曰公负令秦与强齐战【负犹失也其失在此正曰负恃也令字疑合】战胜【胜齐】秦且收齐而封之【封谓疆理之】使无多割【割谓出地】而听天下之战【诸国求地於齐齐不多割则必战此秦弱齐之计正曰此秦制齐之命】不胜国大伤【赵伤也时赵令秦与齐战战不胜则秦必咎赵能无伤乎正曰赵恃合於秦以与齐战不胜则国大伤而听命於秦矣】不得不听秦【赵听也】秦尽韩魏之上党太原【魏地後为秦郡】西土【元作止】止【正曰上西字姚本引钱一作而】秦之有已【秦之所难者齐也已收齐则韩魏不守】秦地天下之半也制齐楚三晋之命【赵以大伤故亦见制】覆【元作复】复【补曰覆通】国且身危【覆如覆器然国赵也身谓投】是何计之道也【言非计此策最为齐使赵拒秦也】

石行秦【周人正曰无考一本石作右右行秦官也】谓大梁造【秦爵梁作良秦孝十年卫鞅惠文五年公孙衍昭襄十五年白起皆为之此盖起也正曰无考】曰欲决霸主之名不如备两周辩智之士【备谨待之】谓周君曰【行秦谓之】君不如令辩智之士为君争於秦【秦欲卑周争者争此也既谨待之则争必得矣补曰王应麟云周赧王卒于乙巳明年丙午秦迁西周君而东周君犹存壬子秦迁东周君而周遂不祀作史者当自丙午至壬子系周统於七国之上乃得春秋存陈之义大事记周赧後即系秦朱子以为未当纲目以七国如楚汉并书之今按解题云自赧王降周统已絶东周虽未亡特邾莒附庸之类耳所以存而未论也朱子虽以七国并书而赧王之後亦不以东周系统者其意亦不异纲目之成在乾道壬辰而淳熙辛丑吕子卒大事记始出非矫之也】

凡二十六章

战国策校注卷二

卷三

<史部,杂史类,战国策校注>

钦定四库全书

战国策校注卷三 宋 鲍彪 原注

元 吴师道 补正

秦【苏张说外自弘农故关以西京兆扶风冯翊北地正郡西河安定天水陇西皆秦地南有巴蜀广汉犍为武都西有金城武威张掖酒泉炖煌又西南有牂柯越为益州皆属焉】

孝公【献公子显王八年庚申立正曰注意专以此为重今考其舛谬不合者各见本章】

卫鞅【卫之庶孽公子姓公孙氏】亡魏入秦【鞅事魏相公叔痤为庶子见魏策正曰此据史愚谓公孙卫之公孙也庶孽公子恐非盖因为中庶子而生此文】孝公以为相封之於商【属弘农补曰卢藏用後语注今商州上洛之地又见後章注】号曰商君商君治秦法令至行【至犹极】公平无私罚不讳强大【讳犹避也强宗大族】赏不私亲近法及太子【是为惠王】黥劓其傅【墨渍其颧曰黥截鼻曰劓太子犯法鞅曰法之不行自上犯之太子君嗣也不可刑刑其傅公子?黥其师公孙贾】暮年之後道不拾遗民不妄取兵革大强【革甲也以革为札】诸侯畏惧然刻深寡恩【刻犹深也刻金木者有深而已】特以强服之耳孝公行之八年疾且不起欲传商君【传位与之】辞不受孝公已死惠王代後莅政有顷【莅临也集韵上临下】商君告归【惧诛归商】人说惠王曰大臣太重者国危左右太亲者身危【君之身】今秦妇人婴儿【集韵女曰婴男曰儿补曰释名人始生日婴婴胸前也投之胸前乳养故曰婴】皆言商君之法莫言大王之法是商君反为主大王更【补曰更平声】为臣也且夫商君固大王之仇讎也愿大王图之商君归还【时自商欲归魏不得故还秦】惠王车裂之而秦人不怜【无念之者】

惠文君【孝公子元年显王三十二年甲申也十三年始称王前此称王後人追书耳】

苏秦始将连横【文颖曰关东为从西为横孟康曰南北为从东西为横瓚曰以利合曰从以威势相胁曰横正曰高注连关中之谓横合关东之谓从大事记取】说秦惠王曰大王之国西有巴蜀汉中之利【三郡并属益州】北有胡貉【胡楼烦林胡之类集韵貉似狐】代马之用【代幽州郡】南有巫山【在南郡巫补曰正义云夔州巫山县】黔中之限【黔故楚地秦地距此二郡耳故言限秦昭三十年始定为黔中郡後为武陵郡见後志补曰大事记今黔辰施元等州正曰高注皆有塞险故谓之限】东有殽函之固【始皇纪注殽二殽函函关也在弘农补曰左传殽有二陵杜注在渑池县西函见周策】田肥美民殷富【殷盛也】战车万乘奋击百万【士之能奋击者】沃野千里【沃言其肥润】蓄积饶多地埶形便【地

势与形便於攻守】此所谓天府【言蓄聚之富非人力也】天下之雄国也【物之雄者强】以大王之贤士民之衆车骑之用【骑士之便马者】兵法之教【教犹习】可以并诸侯吞天下称帝而治愿大王少留意臣请奏其効【奏进効功也】秦王曰寡人闻之毛羽不丰满者不可以高飞文章不成者【文章法令也】不可以诛罚道德不厚者不可以使民政教不顺者【逆人之心】不可以烦大臣【逆人心则行之难故大臣劳】今先生俨然【矜庄貌】不远千里而庭教之【教之於广庭】愿以异日【异犹他也俟成顺然後承教以此知为惠王初补曰史时方诛商鞅疾辨士弗用】苏秦曰臣固疑大王之不能用也昔者神农伐补遂【国名未详】黄帝伐涿鹿【属上谷】而禽蚩尤【九黎氏之後事见史】尧伐驩兜【书止言放之岂尝伐之而不服邪正曰书放驩兜又尧伐驩兜禹伐共工见荀子此游士之辞下言五帝三王不能坐而致地故以战续之此不过欲售其攻战之说耳凡战国言帝王事类如此皆不足辨後放此】舜伐三苗【国名缙云氏之後正曰事见书不必泛引】禹伐共工【伐乃流之】汤伐有夏文王伐崇【崇侯虎纣卿士道之为恶】武王伐纣齐桓任战【任犹用也作内政寄军令是也】而霸天下由此观之恶有不战者乎古者使车毂击驰【毂辐所凑也相击而驰言其衆补曰毂击说见齐策】言语相结【约亲也补曰後语注结音吉此古韵协也下文悉然横黄态替浊蹢玉反聊留服蒲北反信新兵濬□反】天下为一约从连横兵革不藏文士并飭【文谓辨也飭饰同】诸侯乱惑万端俱起不可胜理科条既备【科程也集韵条件也】民多伪态书策稠浊【策简也大事书之稠多也言有司文书多阅者昏乱正曰稠多浊乱也】百姓不足上下相愁民无所聊【集韵聊赖也】明言章理【文章法理正曰章亦明也谓明着之言章显之理下下文辞谓辞之文者三语文势同】兵甲愈起辩言伟服【伟奇也补曰伟一作伪】战攻不息繁称文辞【游说也正曰明言者教令辩言者游说文辞者书策明言章理即科条既备辩言伟服即言语相结繁称文辞即书策稠浊】天下不治舌敝耳聋不见成功行义约信天下不亲於是乃废文任武厚养死士【敢死之士】缀甲厉兵【集韵厉严也正曰厉即砺】効胜於战场【効致其功也】夫徒处而致利【徒犹空也言无所为】安坐而广地虽古五帝三王五霸明主贤君常欲坐而致之其势不能故以战续之寛则两军相攻迫则杖戟相撞【迫近也杖如杖剑戟谓持戟戟有支矛撞手搗也正曰杖持执也直亮反戟有支兵】然後可建大功是故兵胜於外义强於内【论战故独言义】威立於上民服於下今欲并天下凌万乘【集韵凌侵尚也当从人】诎敌国【诎服也】制海内子元元【元善也民之类善故称元】臣诸侯【言敌国又言诸侯则侯非其敌者】非兵不可今之嗣主【时君皆继世者也】忽於至道皆惛於教【惛不明也】乱於治迷於言惑於语沉於辩【沉犹溺】溺於辞【溺谓为所冒没】以此论之王固不能行也说秦王书十上而说不行黑貂之裘敝【貂鼠属大而黄黑出丁零国】黄金百斤尽资用乏絶【资货也】去秦而归嬴滕【方言担齐楚陈宋曰嬴通作嬴滕緘也正曰一本嬴滕是累夷纏累字通用伦迫反易嬴其角嬴其瓶孔?達云揭累纏绕也诗邪幅在下注如今行滕即位所谓复也注说下与履蹢不伦而担橐又已言矣】履蹢【屐也正曰史虞卿蹢蹢注草履也蹢与屨通】负书担囊【高注橐囊也然则此字元作橐从此说则上滕字当从巾囊也橐无底囊有底正曰一本作橐高注橐囊通言】形容枯槁面目黧犁【补曰古字黧犁通借】黑【集韵黧黑黄色正曰黧黑色集韵误见魏策】状有愧【元作归今从高注】归【补曰当作愧姚氏亦云】色归至家妻不下紕【机缕也不下言自若】嫂不为炊父母不与言苏秦喟然叹曰【喟太息也】妻不以我为夫嫂不以我为叔父母不以我为子是皆秦之罪也乃夜

发书陈篋数十【篋藏也】得太公陰符之谋【汉志有陰符经正曰陰符经恐非此所指索隐云陰符是太公兵法】伏而诵之简练以为揣摩【简犹择练凍帛也取其熟揣量摩研也游说之术或量其情或研切之】读书欲睡引锥自刺其股【锥锐也鍼之类】血流至足曰安有说人主不能出其金玉锦绣取卿相之尊者乎朞年揣摩成曰此真可以说当世之君矣於是乃摩燕乌集阙【摩言切近过之阙名未详补曰高注阙塞名也】见说赵王【肃侯】於华屋之下【见说见而说也华高丽也】抵掌而谈【集韵抵侧击也】赵王大说封为武安君【补曰武安赵邑正义云潞州武安县】受相印革车百乘【兵车也】锦绣千纯【集韵匹端曰纯正曰高注纯束也徒温切】白璧百双【补曰璧玉环也色白好曰璧】黄金万鎰【一鎰二十四两补曰鎰说见前】以随其後约从散横以抑强秦故苏秦相於赵而关不通【六国之关不通秦也正曰即所谓秦兵不敢窥函谷关者】当此之时天下之大万民之衆王侯之威谋臣之权皆欲决於苏秦之策【决言用之不疑策谋也】不费斗粮未烦一兵未战一士未絶一弦未折一矢诸侯相亲贤於兄弟【贤犹胜】夫贤人在而天下服一人用而天下从故曰式於政不式於勇【式犹用】式於廊庙之内【廊东西序庙以尊先祖人君之居谓之岩廊庙堂尊严之称正曰文穎云廊殿下外屋顔师古云堂下周廂又岩廊高屋也愚按此言宫与庙也庙堂字见徐乐梅福传刘向九叹王逸注人君为政举事告宗庙议於明堂今人称宰相为庙堂盖误】不式於四境之外当秦之隆【苏秦隆盛之时】黄金万鎰【元从水】溢【补曰此书溢鎰通】为用转毂连骑【後车之盛正曰车骑之盛】炫燿於道【光耀也】山东之国从风而服【以草偃为喻也】使赵大重【为从主诸侯尊之】且夫苏秦特穷巷掘门【凿垣为门补曰掘即窟古字通齐策掘穴穷巷邹阳书?死掘穴楚策亦有】桑户枢樞之土耳【枢门牝也樛木为之如捲捲屈木孟也】伏轼【车前横木】擗衔【集韵擗挫也盖犹顿衔勒也】横历天下【历过也犹横行】庭说诸侯之主【犹庭教云】杜左右之口【杜犹塞】天下莫之伉【集韵匹也正曰姚云钱刘作抗当也一本天下莫之能伉伉抗古字通】将说楚王【威】路过洛阳【汉为河南郡】父母闻之清宫除道【清洒埽也】张乐设饮【张施也】郊迎三十里【迎於郊】妻侧目而视【不敢正视】侧耳而听嫂蛇行匍伏【蛇不直行伏音匍匍匍伏地也】四拜自跪而谢【集韵跪小拜也既拜复膝地】苏秦曰嫂何前倨而後卑也【倨不避也】嫂曰以季子位尊而多金【譙周曰秦字季子正曰司马贞曰此嫂呼小叔为季子未必字也】苏秦曰嗟乎贫穷则父母不子富贵则亲戚畏惧人生世上势位富厚盖可以忽乎哉【忽轻也此策史略同合从在赵肃侯十六年此四年彪谓秦之自刺可谓有志矣而志在於金玉卿相故其所成就适足夸嫂妇而此史极口称颂之是亦利禄徒耳恶睹所谓大丈夫之事哉正曰按史秦出游数岁困归兄弟嫂妹妻妾窃笑之於是得周书陰符读之以出揣摩乃求说周显王弗信至秦说惠王弗用乃之赵奉阳君弗说之去就燕文侯资之至赵奉阳君死乃说肃侯合从说楚後还过洛阳显王除道郊劳与策小异】

秦惠王谓寒泉子【秦处士之号】曰苏秦欺寡人【欺诈也言以虚声恐之】欲以一人之智反覆山东东山【补曰当作山东】之君从以欺秦赵固负其衆【负犹恃】故先使苏秦以其币帛约乎诸侯诸侯不可一犹连鸡之不能俱止於栖亦明矣【连谓绳击之栖鸡所宿也】寡人忿然含怒日久吾欲使武安子起往喻意焉【喻谕同告也告诸侯以不可一之意】寒泉子曰不可夫攻城堕邑【败城邑曰堕】请使武安子善我国家【称国家之美正曰

能美善我国家】使诸侯请使客卿张仪【魏人仕秦惠五年为客卿】秦惠王曰敬受命【按起以昭二十九年为武安君自合从至是五十七年矣所称武安子起谬也正曰起号武安君此云武安子必别一人上既言武安子起而下止言武安子盖起字属下文李牧亦封武安君如此名不一且张仪死於秦武王时与白起战胜攻取时不相及补曰使诸侯之使去声余如字】

楚魏战於陜山【魏记苏秦传注在密县密属河南楚记威王卒魏因丧取我陜山魏襄六年伐楚败之陜山在此前九年正曰徐广云召陵有陜亭密县有陜山正义云括地志云在郑州新郑县西南大事记取鲍氏所引召陵韩策引正义又谓楚北有汾陜之塞即此皆一地也愚恐汾字有误因韩陜城汾旁讹也说见彼条从通监在惠後六年高注作惠】魏许秦以上洛【属弘农】以絶秦於楚【使不助楚】魏战胜楚败於南阳【荆州郡非修武所谓】秦责赂於魏【责求也】魏不与管浅【秦人】谓秦王曰王何不谓楚王【怀】曰魏许寡人以地今战胜魏王【襄正曰惠】背寡人也王何不与寡人遇【遇犹会】魏畏秦楚之合必与秦地矣是魏胜楚而亡地於秦也是王以地德寡人【秦因楚会得地楚之惠也补曰一本以魏地德寡人】秦之楚者多资矣【之往也言将以厚币往结楚好】魏弱若不出地【补曰刘辰翁云多弱字即若愚谓以弱句义亦善】则王攻其南寡人攻其西魏必危秦王曰善以是告楚楚王扬言【扬显言之】与秦遇魏王闻之恐効上洛於秦

楚使者景鲤在秦从秦王与魏王【襄正曰惠】遇於境【此下脱简有秦使周最解说与魏所以遇之意见高注而楚策有其事补曰按鲍所谓楚策元在韩曰齐楚之交善秦与魏遇且以善齐而絶楚乎楚景鲤之秦与魏遇楚王怒恐秦以楚为有陰於秦魏也且罪鲤云云】

楚怒秦令周最谓楚王曰魏请无与楚遇而合於秦【补曰别本以此足缺文在是以鲤与之遇也句上即高注秦令周最解说者姚本楚怒秦令最谓楚王曰魏王遇於境楚使者是以云云其文缺误不如别本明白】

是以鲤与之遇也敝邑之於与遇善之【加好於魏正曰敝邑秦自称谓鲤与秦魏遇此以为善盖二国之遇将以善齐而絶齐於楚而楚使在焉故齐疑之而不与合也】故齐不合也楚王因不罪景鲤而德周秦【齐魏讎也好魏故齐不合齐楚敌也齐不合故楚说正曰以齐楚交善章考之其失可见】

楚王【怀】使景鲤如秦客谓秦王曰景鲤楚王【下衍使景二字】使景【补曰姚云一本无二字】所甚爱王不如留之以市地【市买卖所之也言使楚以地赎鲤如之】楚王听则不用兵而得地楚不听则杀景鲤更【下衍不字】不【补曰疑衍】与不如景鲤者【元作留补曰姚云留曾刘作者是】是便计也【便犹利也】秦王乃留景鲤景鲤使人说秦王曰臣见王之权轻天下【权事势也天下所轻】而地不可得也臣之来使也闻齐魏皆且割地以事秦所以然者以秦与楚为昆弟国今大王留臣是示天下无楚也齐魏有何重於孤国也【有犹又补曰二字古通用後策陈轸云又何重孤国即此文】楚知秦之孤不与地而外结交以图【图秦】则社稷必危不如出臣秦王乃出之【补曰来使之使去声更平声】

楚攻魏张仪谓秦王曰不如与魏以劲之【与犹助】魏战胜复听於秦必入西河之外【禹贡西河属雍州此时属魏子夏老於西河之上是也补曰盖主冀之西而言正义云同华等州】不胜魏不能守王必取之【自取河外】王用仪言取皮氏卒万人车百乘【皮氏属河东魏地也今秦於此取卒与车岂丧地七百里时入秦邪补曰正义云皮氏在绛州龙门县西】以与魏犀首【公孙衍也陰晋人司马彪曰犀首魏官若今虎牙将军补曰按年表陰晋人犀首为大良造则非官名而韩策摻留以犀首张仪并言何为一人独以官称乎恐犀首或姓名也魏亦有犀武说又见卫策】战胜威王【楚】魏兵罢敝【罢疲同】恐畏秦果献西河之外【魏襄五年入秦河西地此前八年也仪时为客卿魏七年纳上郡此前十年也仪时为相正曰惠後五年补曰此章称楚威王威王在位凡十一年攻魏事史无见年表十一年魏败我陜山因丧来伐是岁秦取魏皮氏明年入上郡于秦而西河滨洛之地尽皆楚威死後也陜山前一年魏入少梁河西地于秦岂是时楚魏已构兵乎】

田华之为陈轸【二皆齐姓补曰一本田萃姚同】说秦惠王曰臣恐王之如郭君【郭虢同属扶风正曰路史云北虢仲後也在大阳今陜州西南虢仲之封在岐东迁曰此之上阳为南虢东虢叔之封制也今郑之荥阳按此策所指者北虢也】夫晋献公欲伐郭而憚舟之侨存【憚难之也侨郭大夫】荀息【晋大夫】曰周书有言美女破舌【破坏其事舌指諫臣】乃遗之女乐以乱其政舟之侨諫而不听遂去【闵二年奔晋】因而伐郭遂破之又欲伐虞【属河东大阳】而憚宫之奇存荀息曰周书有言美男破老【老成人补曰汲冢周书美男破老美女破舌武之毀也注云所以毀敌也修文御览引周书作美男破产美女破车】乃遗之美男教之恶宫之奇宫之奇以諫而不听遂亡【左氏不言其地】因而伐虞遂取之今秦自以为王【时亦未王谓其欲之】能害王者之国者楚也【因其有自王之志故称之曰王者】楚知横门君之善用兵【下衍用兵二字补曰姚云钱刘本无】与陈轸之智故骄张仪以五国【骄宠之也言楚使韩魏赵燕齐以事属之以重其权按仪初游楚楚相答之後相楚乃为秦间耳楚无骄之之事今云然因其自楚来间之耳】来必恶是二人【恶言其恶也】愿王勿听也张仪果来辞因言轸也王怒而不听

张仪又恶陈轸於秦王曰轸驰陈楚之间今遂不加善秦而善轸【言楚善之补曰一本今楚不如】然则是轸自为而不为国也且轸欲去秦而之楚王何不听乎【听犹许】王谓陈轸曰吾闻子欲去秦而之楚信乎陈轸曰然王曰仪之言果信也曰非独仪知之也行道之人皆知之也孝己爱其亲【世纪殷高宗有贤子孝己母早死高宗惑後妻之言放之而死补曰尸子云孝己事亲一夜而五起视衣厚薄枕之高下也】天下欲以为子子胥忠乎其君【伍子胥楚人平王杀其父奢胥奔吴吴王夫差败越於夫椒越王勾践求委国为臣妾夫差将许之胥諫不听後吴伐齐胥諫请释齐先越太宰嚭谗之赐剑以死】天下欲以为臣卖仆妾售乎闾巷【售卖去之也】者良仆妾也【良善也】出妇嫁乡曲者【曲里之一曲如韦曲杜曲】良妇也吾不忠於君楚亦何以轸为忠乎忠且见弃吾不之楚何适乎秦王曰善乃止之【轸传有】

陈轸去楚之秦【言去楚者本其始仕秦之时自楚来也且为输楚张本】张仪谓秦王曰陈轸为王臣常以国情输楚【情谓国事之隐者补曰情实也输写也输写以告之】仪不能与

从事愿王逐之即复之楚愿王杀之王曰軫安敢之楚也王召陈軫告之曰吾能听子子欲何之请为子约车【约纏束之正曰高注具也盖约束戒令之策多有】对曰臣愿之楚王曰仪以子为之楚吾又自知子之楚子非楚宜安之也【补曰一本且安之也】軫曰臣出必故之楚以顺王与仪之策【策谓其所筹度】而明臣之楚与否也【此之即所谓以国情输楚正曰故之楚之之往也之楚与否之之语助也下同】楚人有两妻者人詵其长者【詵相呼诱也补曰後语作挑徒了反】长者詈之【詈骂也】詵其少者少者许之居无几何【时不久也】有两妻者死客谓詵者曰汝取长者乎少者乎取长者【詵者对也】客曰长者詈汝少者和汝【和犹应】汝何为取长者曰居彼人之所则欲其许我也今为我妻则欲其为詈人也【以国情输楚犹许者也軫诚有此则今之楚楚必不欲也补曰许我詈之云云後汉冯衍传有】今楚王【怀】明主也而昭阳贤相也軫为人臣而常以国情【补补曰国下当有情字】输楚楚【元作王】王必不留臣昭阳将不与臣从事矣以此明臣之楚与不【之亦犹於】軫出张仪入问王曰陈軫果安之王曰夫軫天下之辩士也孰【元作孰】孰【补曰孰熟通说文生熟字本但作孰後人加火以别之】视寡人曰軫必之楚寡人遂无可奈何也寡人因问曰子必之楚也则仪之言果信也軫曰非独仪之言行道之人皆知之昔者子胥忠其君天下皆欲以为臣孝己爱其亲天下皆欲以为子故卖仆妾不出里巷而取者良仆妾也出妇嫁於乡里者善妇也臣不忠於王楚何以軫为忠忠【补补曰史复有忠字是】且见弃軫不之楚而何之乎王以为然遂善待之【此一事再出着书者以所闻駁异也彪谓軫之辩类捷给而其所称譬皆当於人心不诡於正论周衰辩士未有若軫之絶伦离羣者也正曰秦为无道鲁仲连不肯帝秦子顺义不入彼诚豪杰之士已軫往来其间其居秦也又与张仪争宠鄙哉虽其为楚谋也多而终不能以善楚也之楚之对辩给不诡於正犹为彼善於此耳补曰太事记显王四十一年秦陈軫奔楚解題引策文自卖仆妾以下正归乎云軫居秦期年惠王终相张仪而軫奔】义渠君【西戎也北地郡有义渠道】之魏公孙衍谓义渠君曰道远臣不得复过矣【不复相过】请谒事情【谒白也情犹实】义渠君曰愿闻之对曰中国无事於秦则秦且烧?获君之国【?亦烧也言火其国以得其地补曰?即熬】中国为有事於秦【事皆谓战】则秦且轻使重币【轻言其行疾】而事君之国也【此事君之事】义渠君曰谨闻令【令犹命】居无几何五国伐秦【後七年韩赵魏燕齐共攻秦】陈軫谓秦王曰义渠君蛮夷之贤君王不如赂之以抚其心【抚安也】秦王曰善因以文绣千匹好女百人遗义渠君【遗赠也】义渠君致羣臣而谋【致之使至】曰此乃公孙衍之所谓也因起兵袭秦大败秦人於李帛之下【史张仪传未有此策帛作伯地缺平原传注河内成臯有李城岂秦兵与诸国遇於此而见败邪正曰正义云怀州温县本李城也李同父所封按赵救邯鄲时同战死封其弟为李侯意者因此号李城事在後且此云李帛必非秦既攻五国不胜而走秦兵不应至怀是时诸国连匈奴秦恐义渠因而有变故赂以和之义渠之袭必次於五国之後恐非与诸国遇时也补曰按史犀首相魏张仪去犀首闻仪复相秦害之乃谓义渠君云云且五国伐秦事在惠文後七年次年魏因仪请成於秦乃复相秦则此时仪未为秦相也仪自惠文後三年出相魏至今在魏衍不相则仪必不去也故大事记谓伐秦之役仪在魏陰为秦用而又谓衍与义渠语在相魏之後盖亦不能无疑岂仪去魏之秦犀首知其必相而害之欤又按秦纪书韩赵魏燕齐帅匈奴伐秦年表韩魏赵楚燕五国伐秦不胜楚世家书苏秦约从六国共攻秦】

【楚怀王为从长至函谷关秦击之六国皆引归齐独後互有不同通监据年表大事记据楚世家按楚世家特详者以从长故当以为正年表诸国皆书不胜齐独後而不败故略不书坎纪不书楚者岂以世家文已明坎修鱼之战虏韩申差年表在次年而纪於此连书之则纪诚有误也高注五国作齐宋韩魏赵尤误】司马错【秦人】与张仪争论於秦惠王前司马错欲伐蜀张仪曰不如伐韩王曰请闻其说对曰亲魏善楚下兵三川塞轘【补曰轘胡贯反】轘缙氏之口【高纪注轘轘缙氏险道属河南补曰瓚云轘轘缙氏险道在缙氏东南索隐云缙氏以山为名】当屯留之道【属上党补曰正义云屯当潞州县道即太行羊肠阪道也】魏絶南阳【秦使之絶】楚临南郑【亦河南郡】秦攻新城宜阳【新城属河南补曰左传僖六年注新城郑新密今荥阳密也大事记白起系韩新城引正义云在洛州伊阙县又秦韩会新城云两周间地名注引正义云许州襄城县古新城县也按?戎华阳君又号新城君则华阳在密者此策以宜阳并言地必连近当是伊阙尔】以临二周之郊诛周主之罪【诛讨也补曰周主谓二君】侵楚魏之地周自知不救九鼎宝器必出据九鼎按图籍【土地之图人民金谷之籍】挟天子以令天下【号令指麾之】天下莫敢不听此王业也今夫蜀西僻之国而戎狄之长也敝名【补曰一本名作兵】劳衆不足以成名【伯王之名】得其地不足以为利臣闻争名者於朝争利者於市今三川周室天下之市朝也而王不争焉顾争於戎狄【顾还视也故为反义】去王业远矣司马错曰不然臣闻之欲富国者务广其地【务趣也正曰务专力也】欲强兵者务富其民欲王者务博其德三资者备【三者於国如人之有资货】而王随之矣今王之地小民贫故臣愿从事於易夫蜀西僻之国也而戎狄之长也而有桀纣之乱以秦攻之譬如使豺狼逐羣羊也取其地足以广国也得其财足以富民缮兵【缮补也正曰左传隐元年缮甲兵注治也训切】不伤衆而彼已服矣故拔一国而天下不以为暴利尽四海【言四方之物蜀兼有之故苏秦於巴蜀汉中独曰利补曰一本西海新序同】诸侯不以为贪是我一举而名实两附【不贪暴名也得国实也】而又有禁暴正乱之名今攻韩劫天子【劫胁止也】劫天子恶名也而未必利也又有不义之名【韩无罪而伐之不义也】而攻天下之所不欲危【天下皆有尊周之志正曰史攻天下之所不欲危矣新序同按下文云此臣所谓危是也今无矣言虽以欲字句而危字自为句亦奇】臣请谒其故周天下之宗室也【宗尊也】齐【补曰齐字恐衍】韩周之与国也周自知失九鼎韩自知亡三川则必将二国并力合谋【并并也】以因于齐赵而求解乎楚魏【解免秦兵】以鼎与楚以地与魏王不能禁此臣所谓危不如伐蜀之完也【不虞伤败】惠王曰善寡人听子卒起兵伐蜀十月取之遂定蜀蜀主更号为侯而使陈庄相蜀蜀既属【属犹附】秦益强富厚轻诸侯【仪传有在前十年前而表在後九年谓前年议伐後年取之而取之书十月知为一年事也今从表补曰秦纪与表合按甘茂传云张仪西并巴蜀当仪与错议不同故纪表并言错定蜀而茂传之言如此何也水经云秦自石牛道使张仪司马错寻路伐蜀灭之华阳国志云蜀王伐苴侯苴侯奔巴求救於秦惠文王使张仪司马错伐蜀灭之是二人同往也】

齐助楚攻秦取曲沃【晋桓叔所封汉属河东为闻喜此时属秦与上取皮氏卒同义】其後秦欲伐齐齐楚之交善惠王患之谓张仪曰吾欲伐齐齐楚方懼子为寡人虑之奈何张仪曰王其为臣约车并币【言并则币非一物正曰并合也】臣请试之【不自必之辞】张仪南见楚王【怀】曰敝邑之王所说甚者无大大王【大犹过】唯仪之所甚愿为臣者【唯辞也传称往相楚是也】亦无大大王敝邑之王所甚憎者【衍亦字】亦【补曰疑衍】无大

齐王【闵】唯仪之所【补】甚憎者亦无大齐王今齐王之罪其於敝邑之王甚厚【言得罪於秦重也】敝邑欲伐之而大国与之懽是以敝邑之王不得事令【事犹听从】而仪不得为臣也大王苟能闭关絕齐臣请使秦王献商於之地【楚纪注在今顺阳郡南乡丹水二县有商於在於中故名弘农商县是也】方六百里若此齐必弱【失楚援故】齐弱则必为王役【元作没补曰姚本作役】矣【役言为楚役使】则是北弱齐西德於秦【秦楚因絕齐得报曲沃之役楚之惠也】而私商於之地以为利也则此一计而三利俱至楚王大说宣言之於朝廷曰不谷得商於之地方六百里羣臣闻见者毕贺【毕犹尽】陈轸後见【时去秦在楚】独不贺楚王曰不谷不烦一兵不伤一人而得商於之地六百里寡人自以为智矣诸士大夫皆贺子独不贺何也陈轸对曰臣见商於之地不可得而患必至也故不敢妄贺王曰何也对曰夫秦所以重王者以王有齐也今地未可得而齐先絕是楚孤也【无援故】秦又何重孤国且先出地絕齐秦计必弗为也先絕齐後责地且必受欺於张仪【言仪必背约】受欺於张仪王必惋之【惋犹恨】是西生秦患北絕齐交则两国兵必至矣楚王不听曰吾事善矣子其弭口无言【集韵弥止也通作弭】以待吾事【轸之策此可谓明矣而怀王不听愚而好自用者也其死秦宜哉】楚王使人絕齐使者未来【来还也】又重絕之张仪反【絕句】秦使人使齐齐秦之交陰合楚因使一将军受地於秦张仪至【前反而今至也】称病不朝楚王曰张子以寡人不絕齐乎乃使勇士往詈齐王张仪知楚絕齐也乃出见使者曰从某至某广从六里【横度为广直为从】使者曰臣闻六百里不闻六里仪曰仪固以小人【小人贫窶之称言不能多与】安得六百里使者反报楚王楚王大怒欲兴师伐秦陈轸曰臣可以言乎【补曰高注初王使弭口今可以言未也】王曰可矣轸曰伐秦非计也王不如赂之一名都【都邑有闻於时者】与之伐齐是我亡於秦而取偿於齐也【偿还也言胜齐则得地虽亡所赂足以相偿】楚国不尚全事【不尚尚也言无所丧补曰高注事一云齐乎字是】王今已絕齐而责欺於秦是吾合齐秦之交也国【元作固补曰史作国姚注曾本固作国】必大伤楚王不听【是亦明计也而不听是以知楚王之悍也彼岂能用屈原哉】遂举兵伐秦【补曰史云使屈匄将】秦与齐合韩氏从之楚兵大败於杜陵【属京兆正曰高注楚邑】故楚之土壤士民非削弱仅以救亡者【集韵仅劣也】计失於陈轸过听於张仪【过犹误怀十六年有此十一年也补曰张仪商於之欺虽豎子犹能知之以陈轸之智固不为难也仪之肆意而无忌者知怀王之愚而轸之言必不入也不然他日楚之请仪将惧其甘心焉而仪请自往卒不能害岂非中其所料也哉洪迈云赂秦攻齐策尤乖谬不义齐本与国宜割地致币卑词谢罪复求其援而反欲攻之轸说谬矣子为为臣之为使者使齐之使并去声】楚絕齐齐举兵伐楚陈轸谓楚王【怀】曰王不如以地东解於齐西讲於秦【补曰讲当从媾读说见前】王使陈轸之秦秦王谓轸曰子秦人也寡人与子故也【故言有旧补曰高注轸元仕於秦】寡人不佞【佞高才也】不能亲国事也【躬亲治国】故子弃寡人事楚王今齐楚相伐【轸传言韩魏】或谓救之便或谓救之不便子独不可以忠为子主计【主怀王】以其余为寡人乎陈轸曰王独不闻吴人之游楚者乎楚王甚爱之【楚先王】病【吴人】故使人问之【楚王使问】曰【使者还王问之】诚病乎意亦思乎【思吴】左右曰臣又知其思与不思【注家说有为又则又亦有也此言有以知之正曰刘辰翁云又知犹安知愚谓终缺安字按姚本作不知是】诚思则将吴吟【作吴人呻吟】今轸将为王吴吟【言不忘秦】王不闻夫管与之说乎【轸传作馆豎子】有两虎争【元作诤下同】诤【补曰字与争通下同】人而鬪管庄子将刺之【传管作卞刺有伤也补曰索隐引策】

作馆馆谓逆旅舍其人字庄子】管与止之曰虎者戾虫【戾犹暴】人者甘饵【以饼饵喻之】今两虎争诤人而鬪小者必死大者必伤子待伤虎而刺之则是一举而兼两虎也无刺一虎之劳而有刺两虎之名齐楚今战战必败【必有一败】败王起兵救之有救齐之利而无伐楚之害【今详秦王言为子主计则以齐楚正相伐故也今轸言无伐楚亦所以忠为主也】计听知覆逆者【能计善听知二国之覆逆覆逆言不顺於理正曰覆谓反覆逆谓逆料覆即下文一二逆即下文本末】唯王可也计者事之本也听者存亡之机【机主发矢喻事之要也先也】计失而听过能有国者寡也故曰计有一二者难恃【一二言反覆计之集韵恃乱也】听无失本末者难惑【轸传有无计听下补曰蒯通说韩信曰听者事之候也计者事之机也听过计失而能久安者鲜矣听不失一二者不可乱以言计不失本末者不可纷以辞轸为楚媾於秦而劝秦收齐楚之敝岂所以忠为主哉或疑史作韩魏者是考秦惠时唯十三年韩举赵护帅师与魏战败绩去楚絶齐时远甚他不见韩魏相攻事且策言甚明窃意楚已遣人解齐轸之媾秦欲其不助齐耳当识其意不可泥於辞也】秦惠王死公孙衍欲穷张仪李雋【秦人】谓公孙衍曰不如召甘茂於魏召公孙显【秦人正曰李雋据高注此无据】於韩起樗里子於国【起犹举】三人者皆张子之雋也公用之则诸侯必见张子之无秦矣

武王【惠文子元年赧王五年辛亥】

张仪欲假秦兵以救魏【时将相魏】左成谓甘茂曰不如予之魏不反秦兵【谓败而死伤多】张子不反秦【谓秦以丧兵诛之】魏若反秦兵张子得志於魏不敢反於秦矣【惧秦疑其厚魏】张子不去秦【去犹舍也仪虽为魏犹有得秦之心】张子必高子【高贵重也高之者欲茂以秦资之正曰刘辰翁云不去秦万一不行救魏也亦必高茂之谊高茂之忠】

张仪之残樗里疾也【残犹害】重而使之楚【重犹贵贵之者欲使楚亦贵重之】因令楚王【怀】为之请相於秦【请於秦使相之】张子谓秦王曰重樗里疾而使之者将以为国交也【结两国之交】今身在楚【疾之身】楚王因为请相於秦臣闻其言【闻疾之言盖诬之也】曰王【楚王】欲穷仪於秦乎臣请助王楚王以为然故为请相也今王诚听之彼必以国事楚王秦王大怒樗里疾出走【补曰为然之为如字余去声】

张仪欲以汉中与楚【惠十三年取楚汉中】请秦王曰【补曰请当是谓字】有汉中蠹【蠹木中虫也言为国害】种树不处者【言非其所】人必害之家有不宜之财则伤【非所宜得得之必有祸】今【元作本】本【正曰自有汉至伤本有穀舛疑当云种树不处则伤本家有不宜之财者人必害之】汉中南边为楚利此国累也甘茂谓王曰地大者固当忧乎【言不然】天下有变【谓害於秦】王割汉中以和楚【补曰一本王割汉中以为和楚姚注一无为字此作以楚和穀次也】楚必畔天下而与王【畔犹背】王今以汉中与楚即天下有变王何以市楚也

为【补】魏【补曰姚云曾钱本此下有文字】谓魏冉曰【楚人宣太后弟後封穰侯传言其用事武王时此时冉欲如楚魏恐其合也】公闻东方之语乎【东山东】曰弗闻也曰辛

张阳母泽【辛疑韩人张张仪母泽疑齐人正曰此章多难通此类尤难知下文云观张仪与泽又不云母泽当阙】说魏王【哀正曰襄】薛公【田婴】公叔也曰臣战【与楚战】载主契国【主木主军行载之禱且告焉契言以国为约】以与王约【王魏王】必无患矣若有败之者臣请挈领【领项也言欲请诛持其项以受鈇钺】然而臣有患也【患楚与秦合下衍十六字】夫楚王之以其臣请挈领然而臣有患也【补曰此十六字姚云一本无】夫楚王【怀】之以其国依冉也而事臣之主【事征伐也臣辛张阳主韩魏齐也此三人之辞非说冉者故名冉】此臣之所甚患也【此下乃说者之辞】今公东而因言於楚【公谓冉东东之楚也因与楚好言】是令张仪之言为禹【仪以武二年死故此章必次之此禹善谏今仪言楚依冉而冉果与楚合是仪之谋侔於禹也】而务败公之事也【三国是仪之说必欲败冉合楚之事】公不如反公国【谓秦】德楚【但施恩惠而不之楚】而观薛公之为公也【观其於冉如何】观三国之所求於秦而不能得者请以号三国以自信也【为韩魏齐请其所欲於秦因宣言之所以信於三国】观张仪与泽之所不能得於薛公者【衍也字】也【补曰恐衍】而公请之以自重也【薛公所不与仪者冉为之请而得则仪重冉仪时相魏为仪请亦所以为魏魏亦重冉也补曰为公之为去声】

医扁鹊【卢人字越人正曰鲍本高注史渤海郡郑人姓秦氏名越人徐广云郑当为郑正义云又家於卢号卢医按周礼释文引史记姓秦名少齐越人今史无少齐字恐释文为是彼时所见本末缺也越人似非名字】见秦武王武王示之病扁鹊请除【欲去其病】左右曰君之病在耳之前目之下除之未必已也将使耳不聰目不明君以告扁鹊扁鹊怒而投其石【砭也所以砭弹臃肿正曰此亦本高注石针曰砭所以刺病投弃擲也】曰【补补曰姚云刘本有曰字】君与知之者谋之而与不知者败之使此知秦国之政也【此如此】则君一举而亡国矣【按扁鹊与赵简子同时至是百三十年矣正曰简子在晋昭顷定公时周景王敬王之世也秦武王元年当赧王五年相去二百余年名字必差】

秦武王谓甘茂曰寡人欲车通三川以闚周室【闚窥同小视也周室洛邑盖欲取之不正言尔言三川知其志不止镐京也正曰三川宜阳说见周策大事记盖控扼之地故秦武云云】而寡人死不朽乎【补曰乎史作矣】甘茂对曰请之魏约伐韩王令向壽【宣太后外族】辅行【辅犹副】甘茂至魏谓向壽子归告王曰魏听臣矣然愿王勿攻也事成尽以为子功【补曰茂欲寿告王勿攻王必疑其故而茂得以荐其言故曰事成尽以为子功大事记云壽武王所亲幸故茂以诱之】向壽归以告王王迎甘茂於息壤【山海经鯀窃息壤以堙洪水时则训於中央言息壤堙洪水之州而柳子厚言永州有之则息壤非一处此秦地也】甘茂至王问其故【勿攻之故】对曰宜阳大县也上党南阳【此属修武】积之久矣【二县财赋归之】名为县其实郡也【此时韩都平阳春秋传上大夫受郡下大夫受县则郡县之称久矣正曰大事记云春秋时郡属於县赵简子所谓上大夫受县下大夫受郡是也战国时县属於郡所谓上郡十五县者是也魏惠後十年方孝公商鞅时并小乡为大县县一令尚未有郡及守称故魏纳上郡之後十余年秦纪始书汉中郡或者山东诸侯先变古制而秦效之欤】今王倍数险【倍背同】行数千里【补曰一本行千里】而攻之难矣臣闻张仪西并巴蜀之地【并犹兼】北取西河之外南取上庸【属汉中补曰大事记云本庸国今房州竹山县汉中要地也】天下不以【衍为字】为【补曰姚氏云钱刘本无此字】多张仪而贤先

王【惠文】魏文侯令乐羊将攻中山【冀州国後志云一名中山亭补曰见中山策】三年而拔之乐羊反而语功文侯示之谤书一篋乐羊再拜稽首曰此非臣之功主君之力也今臣羈旅之臣也樗里疾公孙衍二人者【补曰衍史并作奭新序作公孙子谓皆秦诸公子】挟韩而议【媒孽之也】王必听之是王欺魏而臣受公仲朋【元作侈】侈之怨也【朋公仲名此书後或名朋或名侈朋侈字近故误史并作侈然韩策言公仲侈又言韩侈为两人今定公仲名朋别韩侈也正曰史田齐世家韩冯徐广云即公仲侈大事记韩又有韩明韩侈冯朋音混而侈明朋字讹故也且当各存旧文辩见各条】昔者曾子处费【鲁邑属东海】费人有与曾子同名族者【族姓也】而杀人人告曾子母曰曾参杀人曾子之母曰吾子不杀人织自若【若如故也】有顷焉人又曰曾参杀人其母尚织自若也顷之一人又告之曰曾参杀人其母惧投杼【机之持纬者】踰墙而走夫以曾参之贤与母之信也而三人疑之【使其母疑】则慈母不能信也今臣之贤不及曾子而王之信臣又未若曾子之母也疑臣者【疑之於王】不谄三人【适啻同】臣恐王为臣之投杼也王曰寡人不听也请与子盟於是与之盟於息壤果攻宜阳五月而不能拔也樗里疾公孙衍二人在【言在中也】争之王王将听之召甘茂而告之甘茂对曰息壤在彼王曰有之因悉起兵复使甘茂攻之遂拔宜阳【在三年茂传有】宜阳之役【役犹戍役正曰役事也】冯章【秦人】谓秦王曰不拔宜阳韩楚乘吾敝国必危矣不如许楚汉中以懽之【使楚说也】楚懽而不进韩必孤无奈秦何矣王曰善果使冯章许楚汉中而拔宜阳楚王【怀】以其言责汉於冯章冯章谓秦王曰王逐亡臣【诈为逐之】因谓楚王曰寡人固无他而许楚王【彪谓此策可以无出地矣如後不可为约何正曰战国变诈多此类岂暇虑後邪怀王亲受商於之欺而犹不悟昏於贪故也】

甘茂攻宜阳三鼓之【鼓以进军】而卒不上【卒士也上犹前】秦之右将有尉【军尉】对曰公不论兵【言不以兵法治士】必大困甘茂曰我羈旅而得相秦者我以宜阳饵王【以钩喻也】今攻宜阳而不拔公孙衍樗里疾挫我於内【挫摧也补曰衍史作奭下章同】而公仲【元作中】中以韩穷我於外是无伐之日已【战功曰伐言後不复立功正曰一本作无茂是盖字讹】请明日鼓之而不可下因以宜阳之郭为墓【示必死也】於是出私金以益公赏明日鼓之而宜阳拔【补曰一本鼓之宜阳拔】

宜阳未得秦死伤者衆甘茂欲息兵左成谓甘茂曰公内攻於樗里疾公孙衍【二人毁之如攻国然】而外与韩朋【元作侈】侈为怨今公用兵无功公必穷矣公不如进兵攻宜阳宜阳拔则公之功多矣是樗里疾公孙衍无事也【不得事权】秦衆尽【谓死伤多】怨之深矣【使茂久攻二人持之故也】

宜阳之役楚畔秦而合於韩秦王惧甘茂曰楚虽合韩不为韩氏先战韩亦恐战而楚有变其後【变背约也楚时助韩兵在韩後正曰言其後有变也】韩楚必相御也【御犹制也二国虽合犹相疑故自相制】楚言与韩而不余怨於秦【楚之与韩有言而已而其於秦不见多怨正曰声言与韩而不遗怨於秦】臣是以知其御也

宜阳之役杨逵【秦人正曰无据】谓公孙显曰请为公以五万攻西周得之是以九鼎抑【

元作印】印【补曰大事记引作市者是】甘茂也【显与茂争国者见惠王策抑按也正曰按惠王策李雎云云显乃张仪雎无与茂争国事】不然秦攻西周天下恶之其救韩必疾则茂事败矣【言攻而不胜亦足以败茂元在韩策补曰鲍既改从秦策今韩策仍出此章杨逵作杨佺印作市注亦异大事记所取鲍氏云显得止用显亦今韩策注文高注此章无作佺字者岂别本有之而鲍又重见於此乎宜阳之役策公孙衍史并作公孙奭又有公孙显公孙郝公孙赫其云挟韩而议云善韩皆仕秦而党韩者大事记谓郝显奭郝奭在秦为一人愚谓赫即郝也然其事亦多与衍类又恐衍即显之讹也今且当各从本文】

秦王谓甘茂曰楚客来使者多健【言其强辨】与寡人争辞寡人数穷焉【辞屈也】为之奈何甘茂对曰王勿患也其健者来使者【补曰者字疑衍】则王勿听其事其需弱者来使【集韵需音儒韦柔滑貌补曰需即儒】则王必听之然则需弱者用而健者不用矣王因而制之【弱者易制因可制】

甘茂相秦秦王爱公孙衍与之间有所立【请间之间暇隙也因暇与语将置相也】因自谓之曰寡人且相子甘茂之吏道而闻之【闻之於道补曰姚注刘本无道而二字按韩非子道而作道穴云秦王欲将犀首樗里疾恐代之将也凿穴於王之所常隐语者王果与犀首计之境内尽知之盖樗里疾道穴听之矣】以告甘茂甘茂因入见王曰王得贤相敢再拜贺王曰寡人托国於子焉更得贤相对曰王且相犀首王曰子焉闻之对曰犀首告臣王怒於犀首之泄也乃逐之【补逐逐衍也曰告人足矣必不告已正曰姚本有之字补曰告人之云机更深险】

甘茂约秦魏而攻楚楚之相秦者屈盖【凡屈皆楚人楚任之於秦使为秦相】为楚和於秦秦啓关而听楚使甘茂谓秦王曰誑【元作怵】怵【补曰策誑怵字通】於楚【誑诱也若怵则惊耳】而不使魏制和【制谓主之】楚必曰【以鬻魏之言告魏】秦鬻魏【鬻卖也如卖友云言始约而终背之】魏【补补曰恐缺一魏字】不说而合於楚楚魏为一国恐伤矣王不如使魏制和魏制和必说【絶句】王不恶於魏则寄地必多矣【言魏楚割地与秦时地未入故言寄】

谓秦王曰臣窃惑王之轻齐易楚而卑畜韩也臣闻王兵胜而不骄霸主约而不忿【主天下之要约正曰歛约也】胜而不骄故能服世约而不忿故能从邻【使邻国服从】今王广德魏赵【大施恩惠】而轻失齐骄也战胜宜阳不恤楚交忿也【言不以交楚为意】骄忿非霸王之业也臣窃为大王虑之而不取也诗云靡不有初鲜克有终【大雅荡诗】故先王之所重者唯终与始何以知其然也【补曰一本唯始与终何以知其然】昔智伯瑶残范中行【范吉射中行寅晋两卿】围晋阳【属太原故许唐国补曰大事记晋阳汉太原郡所治龙山在西北晋水所出北齐分晋阳置龙山县隋改龙山曰晋阳而以晋阳为太原县】卒为三家笑【赵魏韩也事见韩策晋出公十七年正曰大事记晋出公十七年晋荀瑶与韩赵魏氏分范中行之地反攻出公奔齐道死晋哀公四年赵约韩魏攻荀瑶灭之】吴王夫差栖越於会稽【故越国扬州郡亦山名事见哀元年】胜齐於艾陵【杜注齐地哀十一年补曰正义云艾山在兖州傅县南】为黄池之遇【陈留外黄沟县有黄沟又魏内黄注吴会诸侯于黄

池今黄沟是哀十三年正曰哀十三年杜注陈留封丘县南有黄亭近济水按外黄小黄封丘皆属陈留外黄有黄沟故指为黄池而内黄隶相者亦有黄沟水经注所谓河水决通濮济黄沟者也相与封丘殊远当以杜注为正路史同杜注】无礼於宋【并哀十三年吴欲伐宋杀其大夫囚其妇人】遂为【元作与】与【补曰当作为一本死於垂遂】勾践禽死【二十二年】梁君【惠王】伐楚胜齐制韩赵之兵驱十二诸侯以朝天子於孟津【在河内河阳县南魏记惠王二年败韩于马陵败赵于怀十五年鲁卫宋郑君来朝二十八年中山君为相不见齐楚及朝天子事正曰年表二十九年】後子死【太子申也三十年齐败魏马陵虜申】身布冠【以丧礼自居也】而拘於秦【拘犹制正曰高注太子见杀故布冠而拘执于秦】三者非无功也能始而不能终也今王破宜阳残三川而使天下之士不敢言雍天下之国【雍拥同言据有之】徙两周之疆【侵逼之】而世主不敢窥阳侯之塞【河东阳注阳侯国】取黄棘【秦纪楚纪怀王与昭王盟于黄棘皆不地正曰正义云盖在房襄二州】而韩楚之兵不敢进王若能为此尾【言善其後正曰尾终也即上文能终之说】则三王不足四五霸不足六王若不能为此尾而有後患则臣恐诸侯之君河济之士【济水在温西北此言中国尔正曰济水出绛州垣曲县王屋山伏流至孟州济源县出二源合流至温入河出河南溢而为滎自郑以东贯滑曹郛济齐青入于海】以王为吴智之事也诗云行百里者半於九十【逸诗言行九十里适足为五十里耳】此言末路之难今大王皆有骄色以臣之心观之天下之事依世主之心【依犹?】非楚受兵必秦也【皆骄强故】何以知其然也秦人援魏以拒楚楚人援韩以拒秦【衍王字】王【补曰姚本无此字】四国之兵敌【秦楚韩魏也韩魏虽弱以得援故与之敌】而未能复战也【敌故不敢轻战】齐宋在绳墨之外以为权【外言四国不以为意权言能轻重四国】故曰先得齐宋者伐秦【此言魏韩得之正曰下文楚先得齐可知】秦先得齐宋则韩氏铄【以销金喻】韩氏铄则楚孤而受兵也楚先得之则魏氏铄魏氏铄则秦孤而受兵矣若随此计而行之则两国者【秦楚】必为天下笑矣【彪谓此策孟轲之徒也惜其不名正曰孟子曰仲尼之徒无道桓文之事者五伯者三王之罪人今策云伯王之业五伯不足六孟子而有是言欺骄者必败亦论之常其言先得齐宋以下是乃量事势计较强弱不过以力服人而已岂可与孟子同日语哉补曰曰江之当大之为去声夫上处】

秦王与中期【秦人】争论不胜秦王大怒中期徐行而去或与中期说秦王曰悍人也【悍勇也勇者多忤人】中期适遇明君故也向者遇桀纣必杀之矣秦王因不罪【补曰当日中期悍人也有错文】

昭襄王【武王母弟元年赧王九年乙卯】

甘茂亡秦【茂传昭元年击魏皮氏未拔去】且之齐出关遇苏子【代也代传侍燕太子质於齐将适秦】曰君闻夫江上之处女乎【女在室者】苏子曰不闻曰夫江上之处女有家贫而无烛者处女相与语欲去之【遣之使去】家贫无烛者将去矣谓处女曰妾以无烛故常先至扫室布席何爱於余明之照四壁者幸以赐妾何妨於处女妾自以为有益於处女何为去我处女相语以为然而留之今臣不肖弃逐於秦而出关愿为足下扫室布席幸无我逐也苏子曰善请重公於齐乃西说秦王曰甘茂贤人非恒士也【恒常也】其居秦累世重矣

【茂事惠武昭三王】自穀谿谷地形险易尽知之彼若以齐约韩魏反以谋秦是非秦之利也秦王曰然则奈何苏代曰不如重其贄【集韵贄与摯通握持也言多持物往遗之】厚其禄以迎之彼来则置之槐谷【扶风有槐史云鬼谷注在阳城补曰按史谿鬼槐谷并作鬼谷故前则徐注在阳城後则刘伯庄云在关内云阳皆不明按姚引後语注槐里之谷今京兆始平之地作鬼谷大非】终身勿出【代知茂必留齐故言此尔不为茂游说也正曰代以此言激秦王与之上卿以相迎之使齐亦重茂岂非游说也】天下何从图秦秦王曰善与之上卿以相迎之齐【迎之於齐补曰姚注钱作以相印迎之】甘茂辞不往苏子【元作秦】秦【补曰姚氏云一作代按史同】伪为【补曰伪为二字疑是为谓盖之上卿之事诚有何得言伪为一本作谓】齐【补补曰姚氏云一作伪为齐闵王】王【闵】曰甘茂贤人也今秦与之上卿以相迎之茂德王之赐故不往愿为王臣今王何以礼之王若不留必不德王彼以甘茂之贤得擅用强秦之衆则难图也齐王曰善赐之上卿命而处之【命犹入命之命茂传有补曰列女传齐女徐吾与邻妇合烛夜绩辞亦相类史通谓游士假设之辞遽以名字加之者】

献则【楚人为芊戎游说者】谓公孙消【秦人】曰公大臣之尊者也数伐有功【伐战伐】所以不为相者太后【宣太后】不善公也芊【元作卒下同】辛【补曰当作芊下同】戎者太后之所亲也【穰侯传后同父弟芊戎为华阳君凡芊皆楚人】今亡於楚在东周【戎时未入秦知为昭王初也】公何不以秦楚之重资而相之於周乎【使为周相】楚必便之矣【戎虽以罪去楚楚既与秦共资之必为楚用故楚利之】是辛【芊】戎有秦楚之重太后必说公公相必矣

三国攻秦入函谷【魏记哀二十一年与齐韩共攻秦此九年也正曰哀当作襄】秦王谓楼缓【赵人见穰侯传此九年相秦而免】曰三国之兵深矣寡人欲割河东而讲【大河之东非地名补曰讲媯通说见前】对曰割河东大费也免【元作勉补曰策免勉通姚本正作免】於国患大利也此父兄之任也【谓公族】王何不召公子他【元作池下同此书多作他】池【正曰池即他且当从本文】而问焉王召公子他池而问之对曰讲亦悔不讲亦悔王曰何也对曰王割河东而讲三国虽去王必曰惜矣【悔其失地】三国且去吾特以三城从之此讲之悔也王不讲三国入函谷咸阳必危【咸阳秦都扶风渭城也补曰大事记山南曰阳水北亦曰阳其地在渭水之北犹之诸山之南故曰咸阳】王又曰惜矣吾爱三城而不讲此又不讲之悔也王曰钧吾悔也【钧均同平也】宁亡三城而悔无危咸阳而悔也寡人决讲矣【决断也犹必】卒使公子他池以三城讲於三国三国【补此二字补曰宜复有三国二字】之兵乃退【缓时相秦对以池之言岂为侵官哉而曰此父兄之任焉用彼相矣补曰缓之不自言池以两悔言皆箝其主之术也周策韩庆为西周说薛公令临函谷而无攻楚割东国以与齐而秦出楚王以为和薛公从之会公子池来媯遂罢兵大事记说见彼章当参观按三城者武遂与韩封陵与魏齐城与齐武遂封陵在河东齐城无考事在年表秦昭九年下十一年书韩与齐魏击秦与我武遂大事记谓即此年事误分也通监纲目通以为楼缓公子池之对者误】

薛公【田文】为魏谓魏冉曰文闻秦王欲以吕礼收齐【收犹取也礼时相齐亲礼所以取齐昭十三年礼奔魏其相齐见周策及孟尝传後至十九年归秦明年齐伐宋伐宋後文乃相

魏此事合在礼归秦之前此时文未相魏其言为魏意亲之矣正曰失考辩并见周策】以济天下君必轻矣齐秦相聚以临三晋礼必并相之【相齐及秦】是君收齐以重吕礼也齐免於天下之兵其讎君必深【齐讎冉也欲得陶故故下章曰攻齐不成陶为邻恤然齐未免於兵亦不敢尔正曰齐无兵患则可以肆志於冉与秦得天下则伐齐深文意同但言其事理当尔】君不如劝秦王令敝邑【薛也文以此十三年奔薛】卒攻齐之事齐破文请以所得封君齐破晋强【晋谓魏】秦王畏晋之强也必重君以取晋【文亲魏而重冉故欲取晋必重冉】齐与晋敝邑【薛虽文旧封而属齐齐破畏魏且取薛予魏】而不能支秦【魏得薛秦必害之而魏实弱不能当秦】晋必重君以事秦是君破齐以为功采晋以为重也【补曰姚本操晋是采字讹义不通】破齐定封而秦晋皆重君若齐不破吕礼复用【礼虽亡秦之齐秦方以礼收齐则复亲之今齐不破是秦收齐之功遂也礼为有功於秦秦必用之并相齐秦也】子必大穷矣

冷向【高注秦人今详为齐人正曰高注秦臣韩赵策亦有此人】谓秦王曰向欲以齐事王使攻宋也宋破晋国危安邑王之有也【晋国大梁也宋在其东宋破则梁危安邑属河东近秦梁危则秦可取安邑】燕赵恶齐秦之合必割地以交於王矣齐必重於王【秦多得地齐畏其强故重之】则向之攻宋也且以恐齐而重王【燕赵交於秦故齐必恐】王何恶向之攻宋乎【恶皆去音】向以王之明为先知之【言秦自知攻宋之利】故不言

谓穰侯曰为君虑封【谋所以定其封】苦【元作若】若【补曰此连下有缺误】於除宋罪重齐怒【宋齐所恶也故除宋罪则齐怒齐怒则冉之封不定故以为苦除解免也】须残伐乱宋德强齐定身封此亦百世之一时已【补曰须残字有衍误赵策作宋罪重齐怒深残伐乱宋云云又作宋之罪重齐之怒深残乱宋云云凡两见彼言为奉阳君定封说见陂策姚本之时也已】

谓魏冉曰楚破秦秦【补正曰秦下宜复有秦字】不能与齐悬衡矣【悬衡轻重等也此言秦轻於齐】秦三世积节於韩魏【节犹事也言累有战伐之事正曰刘辰翁云积往来之节也】而齐之德新加【加於韩魏】与【衍齐字正曰此与亦作焉】齐秦交争韩魏韩【补】魏东听【谓听齐正曰姚本齐秦交争韩魏东听自通】则秦伐矣齐有东国之地方千里楚包九夷【补曰索隐云属楚之夷】又方千里南有符离之塞【属沛】北有甘鱼之口【未详疑为济陰高鱼正曰王应麟云鲍说非左氏昭十三年传次于鱼陂注竟陵县城西北甘鱼陂】权悬宋卫【言较其轻重】宋卫乃当阿甄耳【庄十三年注阿今济北东阿齐之阿邑甄属济陰庄十四年会于鄆史作甄此言二国如齐邑尔补曰鄆本濮州鄆城】利有千里者二【谓齐楚正曰恐非此句正指楚】富擅越隶【越勾践国隶犹礼之秋官肆隶征伐所获之民也擅专有之事正曰越有三皆属楚隶徒隶贱称此言楚之强】秦乌能与齐悬衡韩【正曰此句与策首不同当与上权悬宋卫为比一本权悬韩魏者是支分字上或缺楚字如此义乃欠通】支分方城膏腴之地【支言细散取之腴腹肥也言肥沃如之】以薄郑【薄犹迫也郑属长安在秦汉之间正曰西都咸林郑旧封去方城远新郑荥阳是时已为韩策凡言郑者韩也】兵休复起足以伤秦不必待齐五国罢成臯【属河南详见赵策惠文十二年此二十一年也史不书补曰臯姚本作皋前汉志成臯故虎牢亦名制左传所谓岩邑也正义

引括地志云成臯故县在洛州汜水县西南汜音似】秦王欲为成阳君【以赵魏策知为韩人此十七年入朝时在其国】求相韩魏韩魏弗听秦太后【宣】为魏冉【冉后弟时主五国之成后恐成阳害其事故为之言】谓秦王曰成阳君以王之故穷而居於齐今王见其達而收之亦能翕其心乎【翕犹收也言收之晚】王曰未也太后曰穷而不收達而报之恐不为王用且收成阳君失韩魏之道也【其穷在齐亦必韩魏所恶】

秦取楚汉中再战於蓝田大败楚军韩魏闻楚之困乃南袭至邓楚王引归後三国【齐韩魏】谋攻楚恐秦之救也或说薛公可发使告楚曰今三国之兵且去楚楚能应而共攻秦虽【补曰姚氏本章首有此六十六字】蓝田【属京兆】岂难得哉【此策上有脱简盖三国攻楚楚求秦救薛公时在魏说者欲使薛公遣使之楚告以舍楚攻秦以疑秦使不救楚此言三国既舍楚攻秦蓝田可得也】况於楚之故地【蓝田秦近邑也尚可得而况楚地谓秦且以汉中予楚】楚疑於秦之未必救已也而今三国之辞云【元作去三国攻楚史不书薛云上所言者也】去【补曰当作云】则楚之应之也必劝【劝乐之也言乐从从三国攻秦此一说也】是楚与三国谋出秦兵矣【出兵敌三国也其谋自楚】秦为知之必不救也三国疾攻楚楚必走秦以急【趋秦告急补曰姚注一本以下有告字】秦愈不敢出【畏三国也此又一说】则是我离秦而攻楚也【我三国也离言絕其交】兵必有功薛公曰善遂发重使之楚楚之应之果劝於是三国并力攻楚楚果告急於秦秦遂不敢出兵大【衍臣字】臣【补曰姚氏云曾作胜高注亦作大胜】有功【此章应属齐若魏然附之齐则薛公时在魏附之魏则无薛公事以其事不完不明而齐魏无所适属也故次之此正曰秦惠王後十三年取楚汉中非薛公在魏时事鲍不见脱简文故其说妄谬而次之此】

薛公入魏而出齐女【魏公子负刍之母薛公恶齐故逐之】韩春谓秦王曰王何不取为妻以齐秦刳魏【刳刳同】则上党秦之有也【此上党属魏】齐秦合而立负刍负刍立其母在秦则魏秦之县也【言负刍以母故必事秦】已珉【元作民下同字书无之而韩眠韩策作珉今并从之此魏人也正曰已字句今连作已珉非眠珉策字通恐即韩眠也】眠欲以齐秦而困薛公【争魏权故补曰一本欲以齐秦刳魏而困薛公】佐欲定其弟【佐负刍庶兄也定定其立】臣请为王因珉与佐也【因二人可以刳魏困薛】魏惧而复之【反齐女】负刍必以魏歿世事秦齐女入魏而怨薛公终以齐奉事王矣【齐女德秦而齐其父母国也齐又与薛公隙故女能得之以事秦】

谓魏冉曰和不成【与赵和秦也此二十七年白起击赵因伐光狼正曰无考】兵必出白起者复将战胜必穷公不胜必事赵从公公又轻【不能穷冉故从冉而和然先和则冉重今不胜而和故轻】公不若母多【谓专志於和母他务也】则疾到【赵归我也此盖冉欲和而起欲战也起冉所荐其言穷公起字不尔补曰语不可晓有缺误姚云到恐封】

陜山之事【穰侯传魏背秦与齐从亲秦使穰侯攻赵韩魏於华阳下且益赵以兵伐齐则此役也陜山在密後志注云史记秦破魏华阳地亦在县则此策书陜山史书华阳一役也事在三十四年正曰大事记华阳之役秦救韩而击赵魏年表列传或云得三晋将或云攻赵韩魏皆记者之误按大事记赧王四十一年魏背秦与齐从亲秦魏冉伐魏拔四城明年赵魏伐韩

秦魏冉救韩败赵魏且与赵观津益赵以兵伐齐?曰陘山是前大事记华阳亭多在密阳】赵且与秦伐齐齐惧令田章以阳武【属河南此时属齐正曰此指开封阳武非齐地当考】合於赵而以顺子为质【齐公子】赵王【惠文】喜乃按兵告於秦曰齐以阳武赐敝邑而纳顺子欲以解戈敢告下吏【不斥王故言告吏】秦王使公子他之赵谓赵王曰齐与大国救魏而倍约【齐背二国】不可信恃大国不义【赵以齐倍之为不义】以告敝邑【告以伐齐】而赐之二社之地【邑皆有社二社二邑也正曰未详战国之制】以奉祭祀今又按兵且欲合齐而受其地非使臣之所知也请益甲四万大国裁之苏代为齐献书穰侯曰臣闻往来者之【元作之者】之者【补曰宜作者之史无之字姚注钱刘一作往来之言者】言曰秦且益赵甲四万人以伐齐臣窃必之敝邑之王【必者意其然王襄王】曰秦王明而熟於计穰侯智而习於事必不益赵甲四万人以伐齐是何也夫三晋相结秦之深讎也三晋百背秦百欺秦不为不信不为无行今破齐以肥赵赵秦之深讎【此二十七年败赵取代光狼】不利於秦一也秦之谋者必曰破齐敝晋【此晋赵也以赵破齐齐破赵亦敝】而後制晋楚之胜【二国破敝秦无後虑可以南制楚】夫齐罢国也【罢疲同】以天下击之譬犹以千钧之弩溃痈也【补曰史作决溃痈】秦王安能制晋楚哉【夫能制人必其威武足以屈人今攻罢国胜之非武也安能制人】二也秦少出兵则晋楚不信【不信其伐齐】多出兵则晋楚为制於秦齐恐则不走於秦且走晋楚【兵多则非独齐见制惧晋楚亦见制齐畏秦故不趋秦而与晋楚同患故趋晋楚】三也齐割地以实晋楚则晋楚安齐举兵而为之顿剑【二国恶秦而齐先伐故既合则齐为二国出兵顿下也此以小言之】则秦反受兵四也是晋楚以秦伐齐【晋亦赵也初与秦伐齐】以齐破秦【为之顿剑是也】何晋楚之智而齐秦之愚五也秦得安邑【此攻华阳时得之安邑魏地亦属韩犹上党两属也白起传取韩安邑正曰按起传取韩安邑以东到乾河在取魏灭六十邑前一年昭王之十七年也索隐云韩故地又魏以安邑入秦在昭王二十一年恐非此时得之】善齐以安之亦必无患矣秦有安邑则韩魏必无上党哉【言可取】夫取三晋之肠胃【安邑上党如之】与出兵而惧其不反也孰利故臣窃必之敝邑之王曰秦王明而熟於计穰侯智而习於事必不益赵甲四万人以伐齐矣【穰侯传有补曰於是穰侯不行引兵而归为齐为之之为使臣之使两走字并去声】

秦客卿造【造其名】谓穰侯曰秦封君以陶【冉别封也越记注陶今济陰定陶补曰说见赵策】藉君天下【借以制天下之权】数年矣攻齐之事成陶为万乘【国大也】长小国以朝天子【补曰姚本率以朝】天下必听五霸之事也攻齐不成陶为邻恤【言近於忧】而莫之据也【无援国可恃正曰言攻齐不成功则陶且有为邻国得之之忧】故攻齐之於陶也存亡之机也君欲成之何不使人谓燕相国曰圣人不能为时【时天时非人所能为】时至而失【补曰姚本时至而弗失】舜虽贤不遇尧也不得为天子汤武虽贤不当桀纣不王故以舜汤武之贤不遭时不得帝王今攻齐此君之大时也【得时之利无大於此】因天下之力伐讎国之齐报惠王之耻【田单破燕燕惠王之初】成昭王之功【燕昭二十八年乐毅伐齐入临淄三十二年下齐七十余城明年田单复之补曰惠王字疑有误且不当在昭王前】除万世之害此燕之长利而君之大名也【君谓燕相】诗云树德莫如滋【滋益也】除害莫如尽【逸诗补曰泰誓树德务滋除恶务本姚本作书云】吴不亡越越故亡吴齐不亡燕燕故亡齐【齐闵八年苏代为齐说燕哱让子之燕几亡矣而不卒攻故有乐毅临

淄之役正曰齐宣二十七年注让子之下宣云於是燕乱齐伐之云云】齐亡於燕吴亡於越此除疾不尽也非以【元作以非】以非【正曰以非至之害句或以已字通属上句上下文两有此】此时也成君之功除君之害秦卒有他事【卒猝同】而从齐齐秦【元作赵】赵合其讎君必深矣挟君之讎【讎谓齐】以诛於燕【使燕诛相】後虽悔之不可得也已君悉燕兵而疾攻【元作僭】僭【正曰字误当作从下文可证】之天下之从君也若报父子之仇诚能亡齐封君於河南【亦河之南非郡此盖寓封】为万乘达途於中国南与陶为邻世世无患愿君之专志於攻齐而无他虑也【补曰後为万乘之为去声】顷襄王二十年秦白起拔楚西陵或拔鄢郢夷陵烧先王之墓王徙东北保於陈城楚遂削弱为秦所轻於是白起又将兵来伐楚人有黄歇者游学博闻襄王以为辩故使於秦说昭王曰天下莫强於秦楚今闻大王欲伐楚此犹两虎相鬪而弩犬受其敝不如善楚臣请言其说臣闻之【补曰姚氏云此段首有缺文史记新序後语皆有之文亦小异今以後语补案此当下接物至云云而章首说秦王曰四字已在此段内当为衍文】

说秦王曰【按史此春申君未封时书在击芒卯後此三十四年也补曰说已见上】物至而反【至犹极】冬夏是也致至而危【致言取物置之物上】累碁是也今大国之地半天下有二垂【边陲】此从生民以来万乘之地未尝有也先帝【尊称之耳时未为帝】文王【惠文王非孝文】武【元作庄】庄王【按史秦轻楚顷襄王歇乃上书说秦昭王则史与此策书此为庄王谬也补曰庄当作武】王之王三世而不接地於齐【不与通也】以絶从亲之要【要约也】今王使成桥【秦人补曰刘伯庄云桥音矫】守事於韩【守犹待】成桥已【元作以正曰以已通】以北入燕【使燕入朝於秦补曰史作盛桥以其地入秦为是新序同此言韩入地下言取魏地也】是王不用甲不伸威而出百里之地【出言割地燕入秦必割地予秦秦使之出也】王可谓能矣王又举甲兵而攻魏社【补曰姚本作杜是】大梁之门举河内【属司隶正曰正义云即怀州也在河南之北西河之东东河之西】拔燕酸枣虚桃人【燕南燕属东郡酸枣属陈留徐注始皇五年取酸枣燕虚又苏代曰决宿胥之口魏无顿丘按此则虚魏地也桃人史作?注燕县有桃城今按任城有桃聚补曰燕张仪传注滑州胙城县酸枣正义云故城在渭州酸枣县此古酸枣县南虚正义云谓殷虚今相州所理大事记解始皇纪引正义云姚虚在濮州雷泽县东二地不同按高注作虚文协】楚燕之兵【补曰史作魏之兵意此上皆魏地当作魏之兵不然燕楚以来援者言之】云翔而不敢校【云翔散也语注包曰校报也正曰尔雅其飞也翔注布翅翱翔按翔有高起貌汉书言翔贵古人每言高翔】王之功亦多矣王休甲【元作申无休字今从史】申【正曰史文虽顺此作重义自通】息衆二年然後复之又取蒲衍首垣【河东蒲阪注故蒲苏代曰北有河外卷衍注不地今按属魏故魏地书拔我首垣蒲阳衍而张仪说魏王秦据卷衍又南阳有杜衍垣元作恒河东有首山首垣正曰徐广及索隐皆云此蒲在卫之长垣蒲乡索隐云衍在河南与卷近正义云属郑州恒姚本作垣索隐云首盖牛首垣即长垣非河东之垣也长垣开封县】以临仁【兵临之仁地缺】平丘【元作兵】兵【补曰当从史文作丘】小黄济阳婴城【地并属陈留婴犹縈也盖二邑环兵自守补曰按燕策决白马之口魏无黄济阳史作外黄正义云故黄城在曹州考城县东济阳故城在曹州冤胸县西南大事记云水经注河水旧在白马县南洑通黄沟赵世家拔魏黄城正义引括地志云故黄城在魏州冠氏县南十里因黄沟为名旧注陈留外黄者非】而魏氏服矣王又割濮【周纪注在江河之南楚纪注建宁邵南有濮

夷】磨之北【後志当阳县注荆州记沮水西有磨城子胥所造正曰江汉南之濮乃书所谓彭濮之濮沮水磨城远不相涉下文北属之燕可见濮即卫之濮上水出东郡濮阳南入钜野者也索隐云磨地近濮按史表有磨侯程黑索隐云表作历历县在信都地邑并无磨愚按此字作磨与历通犹乐毅书磨室之类新序正作濮历则其字甚明】属之燕断齐秦之要絶楚魏之脊天下五合六聚而不敢救也王之威亦憚矣【补曰憚史作殫是新序同殫尽也】王若能持功守威省攻伐之心而肥仁义之诚【高注肥犹厚地犹道则此诚字元作地也补曰守威疑守成史诚作地新序同姚氏云一本作诚】使无复後患三王不足四五霸不足六也王若负人徒之衆恃【元作材史作仗】材【补曰姚云一本无】甲兵之强一【元作壹】壹【补曰史作乘新序同】毁魏氏之威【前胜魏有威矣今自挫毁不持守也正曰从乘字义明】而欲以力臣天下之主臣恐有後患诗云靡不有初鲜克有终易曰狐濡其尾【未济注小狐不能涉大川虽济而无余力将濡其尾不能终也】此言始之易终之难也何以知其然也智氏见伐赵之利而不知榆次之祸也【榆次属太原智伯葬处正曰索隐云败于榆次正义云属并州县】吴见伐齐之便而不知干隧之败也【干隧吴地苏秦春申传并不注道应注干隧在临淮岂此耶盖或越王逐北至是正曰正义云出万安山西南一里太湖即夫差自剄处在苏州吴县西北四十里】此二国者非无大功也没【元作设补曰姚云刘本作没】利於前【没犹溺】而易【补曰易音亦前之利易後之患也】患於後也吴之信越也从而伐齐遂攻齐人於艾陵【补曰艾陵在兖州博远县】还为越王禽於三江之浦【礼扬州其川三江浦水滨也高注即干隧正曰书蔡传委江东江松江也】智氏信韩魏从而伐赵攻晋阳之城胜有日矣【其日可期】韩魏反之杀智伯瑤於凿台之上【史注在榆次】今王妬楚之不毁也【谓无伤】而忘毁楚之强魏也【楚毁不能侵之故强考下文宜有韩字补曰史作韩魏新序同】臣为大王虑而不取【补曰取下有也字文顺】诗云大武远宅不涉【逸诗武足迹宅犹居也言地之居远者虽有大足不涉之也正曰威武之大者远安定之不必涉其地也】从此观之楚国援也邻国敌也诗云他人有心予忖度之跃跃鼯兔遇犬获之【大雅巧言诗忖亦度也跃跃走也鼯狡也言兔虽善走或时遇犬犬能得之人心难知或可忖度补曰跃天力反】今王中道而信韩魏之善王也【中道在前後间】此正吴信越也臣闻敌不可易时不可失臣恐韩魏之卑辞虑患【以虑患故卑辞】而实欺大国也王既无重世之德於韩魏【重犹累】而有累世之怨焉夫【补曰姚本之怨矣无焉夫字】韩魏父子兄弟接踵而死于秦者百世矣【补曰百世史作将十世新序同高注百一作累】本国残社稷坏宗庙隳剝腹拆颐【颌也】首身分离暴骨草泽【暴日乾也】头颅僵仆【颅首骨僵僂仆倒也】相望於境父子老弱系虏相随於路【系累为虏虏获也】鬼神狐祥【狐之为妖者正曰史狐伤是新序作潢洋三字楚辞後语注潢户广反洋音养】无所食【无人为之依也】百姓不聊生族类离散流亡为臣妾【男为人臣女为妾】满海内矣韩魏之不亡秦社稷之忧也今王之攻楚不亦失乎且王攻楚之日则恶出兵【恶安也】王将藉路於仇雠之韩魏乎兵出之日而王忧其不反也是王以兵资於仇雠之韩魏必攻随阳右壤【补曰一本随阳右壤叠一句新序同阳作水索隐云楚都陈随水之右壤盖在随之西今邓州之西多山林者是也】此皆广川大水山林谿谷不食之地王虽有之不为得地是王有毁楚之名无得地之实也且王攻楚之日四国必【衍应字】应【补曰姚云一本无史同】悉起应王【齐赵韩魏也方言南攻故不及燕应言以兵从之盖蹶秦也】秦楚之兵【补补曰史之下有兵字】构而不离魏氏将出兵而攻留【属楚国】方与【方与胡陵属山阳】鉶胡陵碭萧

相【碭属梁国余属沛】故宋必尽【七国故皆宋地】齐人南面泗北必举【济陰乘氏注泗水入淮鲁国卞县注入沛补曰书蔡传泗水出鲁国卞县桃墟西北陪尾山四源俱导因名西南过彭城又东南过下邳入淮卞今泗水县】此皆平原四達膏腴之地也而王使之独攻【秦与楚战不暇救七邑及泗北二国攻之兵势无所分也】王破楚於以肥韩魏於中国而劲齐【补曰姚云刘本以上无於字楚史新序同】韩魏之强足以校於秦矣【校较同直也言与之敌】而齐南以泗为境东负海【负与抱反背也】北倚河而无後患天下之国莫强於齐齐魏得地葆利【葆保同】而详事不更【事犹治补曰不更姚本下更是详其事以下於吏慎重之意应上葆利言】一年之後为帝若未能於以禁王之帝有余【禁也】制夫以王壤土之博人徒之衆兵革之强而注地於楚【注犹属言地广正曰注泻之注补曰史作树怨於楚新序同姚本一举衆而注地】诎令韩魏【诎犹反正曰魏句屈命令於韩魏归为帝之重於齐言齐韩魏皆强而齐尤甚也】归帝重於齐是王失计也臣为王虑莫若善楚秦楚合而为一以临【元作临以补曰姚云刘本作以临】韩韩必受首【言其服而请诛】王襟以山东之险【蔽障如襟】带以河曲之利【围绕如带】韩必为关中之候【比之候吏】若是王以十万【补补曰史十下有万字是新序同】戍【元作成】成【补曰史作成是新序作伐】郑梁氏寒心【战惧则然】许鄢陵【并属颍川】婴城上蔡召陵【并属汝南】不往来也【韩魏不通补曰史上蔡上有而字新序同从此则上以婴城句】如此而魏亦关内候矣王一善楚而关内二万乘之主注地於秦【元作齐】齐【补曰当作秦】齐之右壤可拱手而取也【拱歛手】是王之地一经【元作任】任【补曰史作经是】两海【东南正曰索隐云西海至东海】要絶天下也【要谓中】是燕赵无齐楚齐楚【补此二字补曰宜从史叠齐楚字是新序同】无燕赵也然後危动燕赵【以危亡之事恐动之】持齐楚【持劫之也补曰史直摇齐楚新序同通监纲目从之】此四国者不待痛而服矣【痛言攻伐之酷春申传有补曰史昭王曰善於是止白起而谢韩魏发使赂楚约为与国恶音乌重世之重平声藉音借方与音房预为王之为去声】

段产【秦人】谓新城君【韩襄十二年注芊戎也】曰夫宵行者能无为奸而不能令狗无吠已今臣处郎中【郎廊同汉官表注主廊内诸官正曰廊字通作郎不谓郎为廊郎中令秦官郎乃其属此注在郎中令下非郎职也大事记谓是时郎中职已亲近】能无议君於王而不能使人毋议臣於君愿君察之也【元在韩策魏昭策白圭语同正曰见下】

段干越人【凡段干皆魏人今在秦补曰史注段干魏邑路史段干李姓邑初邑段後邑干因邑而氏】谓新城君曰王良之弟子驾【良赵简子御驾马在车下负轨】云取千里【其言然】马遇造父之弟子【造父周穆王之御不得与王良同时然学出於造父者得称为其弟子非必与之同时也】造父之弟子曰马不千里【不能然】王良弟子曰马千里之马也服千里之服也【驾车马四两服在中央夹辕两骖在旁见太叔于田言马言服马岂骖邪】而不能取千里何也曰子纆牵长【纆索也以牵马】故纆牵於事万分之一也而难千里之行今臣虽不肖於秦亦万分之一也而相国见臣【戎未尝相以其传国事称之】不释塞者【言障之於下不解】是纆牵长也【亦在韩策详二臣之言则戎之宠少衰矣故范雎得而间之正曰上章为议己者言下章言相国之短於用已皆不见芊戎宠衰之意为秦亦无明徵当从旧次难去声】

范子【名睢字叔後封应侯凡范皆晋旧姓故史云魏人补曰睢音虽】因王稽【秦谒者令时使魏还】入秦献书昭王曰臣闻明主莅正【史作政字通】有功者不得不赏有能者不得不官劳大者其禄厚功多者其爵尊能治衆者其官大故不能者不敢当其职焉能者亦不得蔽隐使以臣之言为可则仵而益利其道【利犹達】若将弗行则久留臣无谓【元作为】为也语曰人主【补曰姚云後语作庸主史同】赏所爱而罚所恶明主则不然赏必加於有功刑必断於有罪今臣之胸不足以当樗质【集韵樗斫木鑽鑽铁樗质鑽同】要不足以待斧钺【钺亦斧也】岂敢以疑事尝试於王乎【尝亦试也】虽以臣为贱而轻辱臣独不重任臣者後无反覆於前者耶【得任人必保其後後不如言则为反覆此任人者所重也王岂得轻之补曰姚本反覆於前王】臣闻周有砥厄宋有结禄梁有悬黎楚有和璞【卞和之璞皆美玉名】此四宝者工之所失也【失谓不能别之故卞和三刖也】而为天下名器然则圣王之所弃者独不足厚国家乎【厚言使之重】臣闻善厚家者取之於国善厚国者取之於诸侯【皆取其人】天下有明主则诸侯不得擅厚矣是何也为其凋荣也【凋伤也荣草华也此喻厚重彼有擅之则比无有】良医知病人之死生圣主明於成败之事利则行之害则舍之疑则少尝之虽尧舜禹汤复生弗能改已【补曰睢云圣主明於成败之事而曰疑则少尝之语既反覆又引舜禹舜禹岂尝疑事者哉所谓游士之言】语之至者臣不敢载之於书其浅者又不足听也意者臣愚而不闚於王心耶【闚合同补曰闚史作概索隐引策作关】亡【元作已补曰姚云已钱作亡史同】其言臣者【亡其犹得亡补曰亡其犹亡乃】将贱而不足听耶非若是也则臣之志【絶句正曰史自非然者臣愿云云按自非然者即策非若是也臣愿即策则臣之志愿云云志字句絶虽奇非文义】愿少赐游观之间【间隙也】望见足下【不斥王故指其足下之人犹陛下也】而入之书上秦王说之因谢王稽说【且谢且说说其未用之故正曰谢其得人而说其欲见之意姚云一本无说字史同】使人持车召之【睢传有补曰为其之为去声说之之说音悦】

范睢至秦王庭迎范睢曰【补曰一本谓范睢】寡人宜以身受令久矣今者义渠之事急【盖修李帛之怨补曰大事记赧王四十四年秦灭义渠汉匈奴传秦昭王时义渠戎王与宣太后乱有二子太后诈杀王於甘泉】寡人日自请太后今义渠之事已寡人乃以身受命躬窃闵然不敏【闵犹伤敏疾也自伤其见睢之晚】敬执宾主之礼范睢辞让是日见范睢见者【下见贤遍反】无不变色易容者秦王屏左右【博雅屏除也此谓去之】宫中虚无人秦王跪而进曰先生何以幸教寡人【以教之为宠】范睢曰唯唯有间【间隙也正曰间犹顷也孟子为间如字】秦王复请范睢曰唯唯若是者三秦王跽曰【跽长跪也】先生不幸教寡人乎范睢谢曰非敢然也臣闻始时吕尚之遇文王也身为渔父而钓於渭阳之滨耳【渭水出陇西首阳此渭水之阳诗在咸阳之地补曰正义引吕氏春秋云太公钓於兹泉酈道元云磻溪中有兹泉水源出岐州岐山县西南凡谷北流十二里注于渭】若是者交疏也【絶句】已一说而立为太师载与俱南【补曰姚本无南字史同】归者其言深也故文王果收功于吕尚卒擅天下而身立为帝王即使文王疏吕望而弗与深言是周无天子之德而文武无与成其王也今臣羈旅之臣也交疏於王而所愿陈者皆匡君臣之事处人骨肉之间【处犹在也谓欲言太后及穰侯等】愿以陈臣之陋忠而未知王心也所以王三问而不对者是也臣非有所畏而不敢言也知今日言之於前而明日伏诛於後然臣弗敢畏也大王信行臣之言死不足以为臣患亡不足以为臣忧漆身而为厉【言赖恶疾也补曰豫让传索隐云凡

漆有毒近之者多患疮肿若癩然故以漆涂身令若癩然厉赖音近古多借】被髮而为狂不足以为臣耻五帝之圣而死三王之仁而死五霸之贤而死乌获之力而死【秦纪乌获武王力士然自孟子时称之则其以力闻久矣】奔育之勇而死【史注孟奔夏育皆勇士育之力能举千钧补曰皆卫人】死者人之所必不免处必然之势可以少有补于秦此臣之所大愿也臣何患乎伍子胥橐载而出昭关【楚关名补曰後语注云韦橐】夜行而昼伏至於菱夫【地缺正曰姚本作菱求索隐云即溧水】无以饵其口坐行蒲服【匍匐同饥困故】乞食於吴市【胥传在丹阳溧阳】卒兴吴国阖闾为霸使臣得进谋如伍子胥加之以幽囚不复见是臣说之行也臣何忧乎箕子接輿【高士传楚人陆通字接輿】漆身而为厉被髮而为狂无益於殷楚使臣得同行於箕子接輿漆身【补曰姚本一本无此二字】可以补所贤之主是臣之大荣也【二子无补于时犹为之今为而有补故特以为荣正曰接輿固辟世之士箕子之心岂睢所能知鲍顺文为说谬矣】臣又何耻乎臣之所恐者独恐臣死之後天下见臣尽忠而身蹙也【蹙僵也】是以杜口裹足莫肯即秦耳【即就也补曰即一作乡】足下上畏太后之严下惑奸臣之态居深宫之中不离保傅之手【女保女傅非大臣也】终身闇惑无与照奸大者宗庙灭覆小者身以孤危此臣之所恐耳若夫穷辱之事死亡之患臣弗敢畏也臣死而秦治贤於生也秦王跪曰先生是何言也夫秦国僻远寡人愚不肖先生乃幸至此此天以寡人恩先生【恩溷同乱也浊貌】而存先王之庙也寡人得受命于先生此天所以幸先王而不弃其孤也先生奈何而言若此事无大小上及太后下至大臣愿先生悉以教寡人无疑寡人也范雎再拜秦王亦再拜范雎曰大王之国北有甘泉谷口【文纪注在云阳云阳属冯翊】南带泾渭【泾水出安定泾阳】右陇蜀【陇西有陇坻即陇阪】战车千乘奋击百万以秦卒之勇车骑之多以当诸侯譬若施韩卢【俊犬名博物志韩有黑犬名卢】而逐弩兔也【弩言其不俊补曰姚本施作驰弩作蹇史同】霸王之业可致今反闭关【补补曰史闭下有关字姚云李善引同】而不敢窥兵於山东者是穰侯为国谋不忠而大王之计有所失也王曰愿闻所失计雎曰大王越韩魏而攻强齐非计也少出师则不足以伤齐多之则害於秦臣意王之计【以意测之】欲少出师而悉韩魏之兵则失义【义宜也已少出师而使人悉出非宜也】今见与国之不可亲【与谓韩魏】越人之国而攻可乎疏於计矣昔者齐人伐楚【闵二十三年败楚重丘大有功正曰十二年】战胜破军杀将再辟千里【辟拓地也】肤寸之地无得者【集韵侧手曰扶通作肤春秋传肤寸而合】岂齐不欲地哉形弗能有也诸侯见齐之罢露【罢疲同在野曰露】君臣之不亲举兵而伐之【魏昭十二年与秦赵韩燕伐齐败之】主辱军破为天下笑所以然者以其伐楚而肥韩魏也此所谓藉贼兵而齎盗食者也王不如远交而近攻【补曰远交近攻秦卒用此术破诸侯并天下】得寸则王之寸得尺亦王之尺也今舍此而远攻不亦谬乎且昔者中山【元作山中】山中【补曰当作中山】之地方五百里赵独擅之【武灵二十七年亡中山】功成名立利附焉【元作则今从史】则【补曰恐当从史作焉】天下莫能害【此言近攻之利】今韩魏中国之处而天下之枢也【言出入来往所由】王若欲霸必亲中国而以为天下枢以威楚楚强则楚附楚强则赵附【言虽不能兼制必有一附】楚赵附则齐必惧惧必卑辞重币以事秦齐附而韩魏可虚也【可使为丘虚】王曰寡人欲亲魏魏多变之国也寡人不能亲请问亲魏奈何范雎曰卑辞重币以事之不可削地而赂之不可举兵而伐之【彪谓远交近攻雎之策当矣语未卒而复欲亲之既亲之又欲伐之立谈之间矫乱如此使人主何适从乎若曰某策为上某次之其可也正曰大事记亲魏者岂诚爱魏哉孤韩党耳】於是举兵而攻邢丘

【在河南平臯补曰史廩丘鄴丘即邢丘也正义云汉置平臯县在怀州武德县也】邢丘拔【四十一年夏取邢丘】而魏请附曰【睢复说也】秦韩之地形相错如绣秦之有韩若木之有蠹人之病心腹天下有变为秦害者莫大於韩【补曰姚本此下有王不如收韩一句】王曰寡人欲收韩韩【补补曰姚云钱本有史同】不听为之奈何范雎曰举兵而攻荥阳【属河南】则成臯之路不通北斩太行之道【河内山阳唐有此山晋隘也】则上党之兵不下一举而攻宜阳则其国断而为三【衍魏字补曰宜一本作荥史同是时宜阳之拔久矣】魏【补曰字疑衍】韩见必亡焉得不听韩听而霸事可成也王曰善【睢传有按史拔邢丘在亲魏说後二年此三十八年也拔宜阳说亦在拔邢丘前则此邢丘拔要终言之也正曰大事记秦昭王三十六年范雎为客卿三十九年拔怀四十一年拔邢丘史拔邢丘後睢复说攻韩则此自是两节策附载为一章也昭王四十四年攻韩取南阳絶太行道皆行雎之谋也】

范雎曰臣居山东闻齐之内有田单【齐之族属後为相封安平君史云田文非也文去齐至是已一十余年不得近舍单远论文也补曰姚氏云後语亦作文愚谓举齐事言不必一时】不闻其有王闻秦之有太后穰侯泾阳【昭王母弟】华阳【补曰正义云华阳亭名在洛州密县故华城在郑州管城县南杜注新城密也故戎又号新城君泾阳雍州县高陵属京兆四贵者穰侯泾阳华阳高陵也史泾阳华阳击断无讳下有高陵进退不请一句策下文出高陵则此有缺文又走泾阳下姚云曾有华阳字史同】不闻其有王夫擅国之谓王【擅专也】能专利害之谓王制杀生之威之谓王今太后擅行不顾【不顾王也】穰侯出使不报【报犹白也言不白王而擅遣使於外】泾阳华阳击断无讳【击断谓刑人无讳言不避王】四贵备而国不危者未之有也为此四者下乃所谓无王已然则权焉得不倾而令焉得从王出乎臣闻善为国者内固其威而外重其权穰侯使者操王之重决裂诸侯【谓分割其地】剖符於天下【剖犹分符信也谓军符汉制竹长六寸分而相合正曰竹长六寸说文符也汉文纪云郡国守相为铜虎符竹使符索隐云汉书仪铜虎符发兵符使符出入徵发此剖符承上决裂而言谓擅封爵也】征敌伐国莫敢不听战胜攻取则利归於陶国敝御於诸侯【国谓秦御言为诸侯所制补曰下章利尽归於陶国之币帛云云恐字有缺误】战败则怨结於百姓而祸归社稷诗曰木实繁者【实木子】披其枝【披谓褫之正曰披折也普靡反】披其枝者伤其心【逸诗】大其都者危其国【此因诗申之也正曰恐此四语皆诗非必逸诗古有此语尔】尊其臣者卑其主淖齿【楚将楚使救齐因相之】管齐之权【管犹管榷之管专之也】缩闵王之筋悬之庙梁宿昔而死【集韵宿夜也通作昔事在闵四十年正曰三十年】李兑用赵减食主父【减主父食】百日而饿死【赵惠文四年】今秦太后穰侯用事高陵【亦昭王母弟】泾阳佐之卒无秦王此亦淖齿李兑之类也臣今见王独立於庙朝矣且臣将恐後世之有秦国者非王之子孙也秦王惧於是乃废太后逐穰侯出高陵走泾阳於关外【此四十一年补曰按睢传睢相在昭王四十三年秦纪明年太后薨葬芷阳骊山九月穰侯出之陶是太后初未尝废穰侯虽免相而未就国太后葬後始出之陶此辨士增饰非实之辞故大事记从邵氏皇极经世书免魏冉相国夺宣太后权以客卿范雎为丞相封应侯其下书华阳君芊戎王弟泾阳君市出就封华阳盖高陵别名此书为实纲目书秦君废其母不治事逐魏冉芊戎公子市公子理云云亦失考】昭王谓范雎曰昔者齐公得管仲时以为仲父今吾得子亦以为父【睢传有补曰睢欲言太后穰侯先已摩切秦王王曰上及太后下至大臣愿先生悉以之教寡人宜可言矣而且陈远交近攻之策至是始极所欲言此策士之深

术也史所谓未敢言内先言外以观秦王之俯仰是矣而乃谓左右多窃听者睢恐故尔则未然也睢岂不能屏左右言乎】

应侯谓昭王曰【补曰秦纪应亭索隐云在河东临晋又应为太后养地徐云潁川父城县应乡又作大城按括地志之应乡在汝州鲁山县东後策应侯夫韩之汝南说者谓与应邻则在汝者为是昭王夺太后养地以封睢亦恶矣应於陵反】亦闻恒思【地缺】有神丛与【灌木中有神灵托之补曰墨子建国必择木之修茂者以为丛位史丛祠索隐云高诱注云神祠丛树也今高注本缺】恒思有悍少年请与丛博【局戏也六着十二碁】曰吾胜丛丛藉我神三日【以神灵借我】不胜丛丛困我乃左手为丛投【班固奕指曰博悬於投不必慧巧駟曰投投琼】右手自为投【右强而便欲自取胜正曰尚左尊神也】胜丛丛藉其神三日丛往求之遂弗归五日而丛枯七日而丛亡今国者王之丛势者王之神藉人以此得无危乎臣未尝闻指大於臂臂大於股若有此则病必甚矣百人舆瓢而趋【负之如舆载物正曰舆载也】不如一人持而走疾百人诚舆瓢瓢必裂【以争持者衆】今秦国华阳用之穰侯用之太后用之王亦用之不称瓢为器则已【称犹等也谓比国於瓢】称瓢为器国必裂矣臣闻之木实繁者枝必披枝之披者伤其心都大者危其国臣强者危其王且今邑中自斗食以上【汉官表岁俸不满百斛计日而食一斗一升】至尉内史【秦有郡县有内史郡国官也】及王左右有非相国之人者乎【相国穰侯】国无事则已国有事臣必见王独立於庭也臣窃为王恐恐万世之後有国者非王子孙也臣闻古之善为政者其威内扶【扶犹持也言不颠仆】其辅外布【辅谓股肱之臣】而【元作四】四【补曰字误宜作而】治政不乱不逆使者直道而行不敢为非今太后使者分裂诸侯而符布天下操大国之势徵强兵伐诸侯战胜攻取利尽归於陶国之币帛竭入太后之家境内之利分移华阳古之所谓危主灭国之道必从此起三贵竭国以自安【据上文不及涇阳高陵】然则令何得从王出权何得母分是【衍我字】我【补曰姚云刘本无此字】王果处三分之一也【彪谓人君生事之所严有母而已范睢说昭王乃以太后为称首忍哉君子所以进其身岂舍此独无说乎】

秦昭王谓左右曰今日韩魏孰与始强对曰弗如也王曰今之如耳【魏人正曰高注韩臣按如姓魏有如姬】魏齐【魏相】孰与孟尝【先时相魏】芒卯之贤【不言魏人魏亡兵也】对曰弗如也王曰以孟尝芒卯之贤帅强韩魏之兵以伐秦犹无奈寡人何也今以无能之如耳魏齐帅弱韩魏以攻秦其无奈寡人何亦明矣【补曰姚本此下有左右皆曰尽然六字】中期【武王时已出此人至是四十四五年矣】堆琴【补曰期史作旗说苑申旗史冯琴索隐引後语伏琴韩子堆瑟说苑伏瑟愚谓此记其堆琴而起对犹论语记舍瑟也庄子云孔子堆琴】对曰王之料天下过矣【料量也】昔者六晋之时【智范中行韩魏赵晋卿也实分晋国】智氏最强灭破范中行又帅韩魏以围赵襄子於晋阳决晋水【出晋阳补曰正义引括地志云晋水出并州晋阳县西东南流注汾水】以灌晋阳城不沈者三版耳【版高二尺】智?出行水【行去音按视也】韩康子御魏桓子骖乘【徐无鬼疏在左为骖在右为御】智伯曰始吾不知水之可亡人之国也乃今知之汾水利以灌安邑【汾水出汾阳属河东补曰汉志汾水出太原汾阳县北山至河东汾阳县入河正义云安邑在绛州夏县汾水东北历安邑西河入河高注安邑魏桓子邑】绛水利以灌平阳【绛水平阳并属河东正曰晋迁新田今绛县谓平阳为故绛正义引括地志云绛水一名白水今名弗泉源出绛山高注平阳

韩康子邑】魏桓子肘韩康子【不敢正语以肘筑之】康子履魏桓子蹶其踵【蹶蹈踵跟也】肘足接於车上而智氏分矣身死国亡为天下笑今秦之强不能过智伯韩魏虽弱尚贤其在晋阳之下也此乃方其用肘足时也愿王之勿易也【彪谓此贤人君子之言也人君闲暇宜数闻之魏厘十一年有此四十一年也以在取邢丘下故不可先范雎事正曰秦自孝公商鞅以来政俗弥恶当时动以遗礼义弃仁恩虎狼称之是以鲁连孔顺义所不臣盖圣贤之徒之所絶也凡委质於其国者虽有忠言嘉谏皆不得在君子之科】

秦宣太后爱魏丑夫【魏人仕秦】太后病将死出令曰为我葬必以魏子为殉【以人从葬曰殉】魏子患之庸芮【秦人正曰高注臣】为魏子说太后曰以死者为有知乎太后曰无知也曰若太后之神灵明知死者之无知矣何为空以生所爱葬於无知之死人哉若死者有知先王积怒之日久矣太后救过不贍何暇乃【补曰一无乃字】私魏丑夫乎太后曰善乃止【后死在四十二年补曰为魏之为去声】

秦攻韩国陁【僖四年次于陁注楚地颍川召陵南有陁亭此时属韩韩桓惠九年秦拔我陁此四十三年也正曰召陵陁亭者陁山也说见前非此陁史韩世家秦拔我陁城汾旁正义云陁故城在绛州曲沃县西北汾水之旁白起传作邢丘亦误大事记据世家为文】范雎谓秦昭王曰有攻人者有攻地者穰侯十攻魏而不得【补曰姚云得一作能】伤者非秦弱而魏强也其所攻者地也地者人主所甚爱也人主者人臣之所乐为死也攻人主之所爱与乐死者鬪故十攻而弗【补曰姚本弗下有能字】胜也今王将攻韩国陁臣愿王之毋独攻其地而攻其人也王攻韩国陁以张仪为言【仪死至雎之相四十四年矣仪亦未尝在韩此必误】张仪之力多且割【元作削】削【补曰疑即下文割字】地而以自贖於王几割地而韩不尽张仪之力少则王逐张仪而更与不如仪者市【智不如耳非力也】则王之所求於韩者尽可得也【补曰更平声此章有舛误未详】

应侯曰郑人谓玉未理者璞周人谓鼠未腊者朴周人怀朴【元作璞】璞【补曰当作朴】过郑贾曰欲买朴乎郑贾曰欲之出其朴乃鼠也因谢不取【谢辞去也补曰一本出其朴视之乃鼠也说亦见尹文子及汉应奉传】今平原君【赵公子胜惠文王弟後相孝成见魏无忌传】自以贤显名於天下然降其主父沙丘而臣之【降贬损之也钜鹿有沙丘亭赵记不书此未详正曰赵纪书公子成李兑非平原也平原字必有误】天下之王尚犹尊之是天下之王不如郑贾之智眩於名【眩目无常主也故为惑】不知其实也

天下之士合从相聚於赵而欲攻秦秦相应侯曰王勿忧也请令废之秦於天下之士非有怨也相聚而攻秦者以己有【补曰一本有作欲】富贵耳王见大王之狗卧者卧起者起行者行止者止毋相与鬪者投之一骨轻起相牙者【轻犹忽也牙言以牙相噬】何则有争意也於是使【补】唐雎载音乐予之五千金居武安【属魏郡赵奢传注在邯鄲西正曰武安说见前】高会【高诱注大会也】相与饮谓邯鄲人【邯鄲赵国都】谁来取者於是其谋者固未可得予也【用金少故未能动谋者】其可得予者与之昆弟矣【谋人之昆弟正曰言与之和好若昆弟矣此下有缺文】公与秦计功者【应侯教唐雎云】不问金之所之金尽者功多矣今令人复载五千金随公唐雎行至武安散不能三千金天下之士大相与鬪矣【

士得金复为秦故其谋不协补曰六国犹连鸡羣士如鬪狗所以虎狼秦张颐哆其口 秦纪尉繚说秦王曰愿大王母爱财物赂其豪臣以乱其谋不过亡三十万金则诸侯可尽大事记云前此范雎之散合从後此陈平之间项羽同出一术盖乱世风俗贪鄙故此术每中有言礼义廉耻於多事之际必以为迂濶不知拨乱之策莫要於此愚谓郭开之间李牧晋鄙客之谗信陵後胜之劝王建秦卒亡此三国者皆应侯之术也高祖购陈豨将亦陈平之故智欤】

谓应侯曰君禽马服君乎【赵括也袭其父称补曰史白起传昭王四十八年秦复定上党分军为二王齮攻虎牢拔之司马梗定太原韩赵恐使苏代说应侯大事记引 服?曰马服犹言服马也崔浩曰马服官名言服武事也】曰然又即围邯鄲乎【四十八年十月】曰然曰【补】赵亡秦王王矣武安君为三公武安君所以为秦战胜攻取者七十余城南亡鄢郢汉中【南郡宣城注故鄢江陵注郢都又郢故郢正曰详见後五都注】禽马服之军不亡一甲虽周【补曰姚云钱刘本此下有召字】吕望之功亦不过此矣赵亡秦王王武安君为三公君能之下乎虽欲无为之下固不得之矣秦尝攻韩邢【赵国襄国津故邢国此字当作?补曰上章秦攻韩国陘史记惠王九年秦拔我陘汾旁十年秦击我太行我上党郡守以郡降赵事正相次也】困於上党上党之民皆返为赵【冯亭事】天下之民不乐为秦民之日固久矣今攻赵北地入燕东地入齐南地入楚魏则秦所得不能【元作一】一【正曰字误史作所得民亡几何此盖亡字误分】几何故不如因而割之【许赵割地来和】因以为武安功【如是则起无大功雖不为之下补曰史无以为此因字非史又云於是应侯言於秦王王听之割韩垣雍赵六邑以和武安君由是与应侯有隙下接复欲伐赵云云】

应侯失韩之汝南【豫州郡近应国应侯尝取得之】秦昭王谓应侯曰君亡国其忧乎应侯曰臣不忧王曰何也曰梁人有东门吴者其子死而不忧其相室【室家之相此女也男曰家老】曰公子爱子【衍也字】也天下无有今子死而不忧何也东门吴曰吾尝无子无子之时不忧今子死乃即与无子时同也臣奚忧焉臣亦尝为子【此臣应侯子余子也此时无地】为子时不忧今亡汝南乃即与【元作与即】与即【补曰当作即与】为梁余子同也【大司徒可任之余为余子正曰周礼小司徒致余子注余子谓羹也传晋有公族余子杜云嫡子之母弟也吕春秋张仪魏氏余子索隐云支庶也人季子也庄子注不应丁夫为余子赵策亦有余子字按梁余子恐是虽入秦而亡其余子之在梁者臣亦尝为子言已亦若东门吴乃即与为梁余子同言亡地与亡子同】臣何为忧秦王以为不然以告蒙傲【秦人补曰傲恐即嫪始皇七年死此时相及】曰今也寡人一城围食不甘味卧不便席今应侯亡地而言不忧此其情【补曰姚云一本此下有何字】也【问其心诚然否】蒙傲曰臣请得其情乃往见应侯曰傲欲死应侯曰何谓也曰秦王师君天下莫不闻而况於秦国乎今傲势得为秦王为【元作为王】为王【补曰当作正为姚云一本无为字是】将兵臣以韩之细也显逆【言其国小而逆节着正曰显逆乱之诛又作显违诛戮义亦通】诛夺君地傲尚奚生不若死应侯拜蒙傲曰愿委之卿蒙傲以报於昭王自是之後应侯每言韩事者秦王弗听也以其为汝南虏也【汝南民为韩虏获者补曰以为为忧为将之为如字依姚本句则为秦之为亦如字】

昭王既息民缮兵复欲伐赵【围邯鄲也】武安君曰不可王曰前年国虚民饥君不量百姓

之力求益军粮以灭赵今寡人息民以养士蓄积粮实三军之俸【集韵俸秩禄也】有倍於前而曰不可其说何也武安君曰长平之事【後志泚氏有长平亭在上党郡南山中百二十里事在此四十七年补曰正义云长平在泽州高平县西】秦军大克【元从寸下同徐铉曰胜此物谓之克若尅则杀也正曰克尅字通】尅赵军大破秦人欢喜赵人畏惧秦民之死者厚葬伤者厚养劳者相飧【乡人饮酒也】饮食舖馈【舖申时食吴谓祭鬼曰馈正曰以食食人曰舖馈即馈饷从食鬼声高注非】以靡其财【集韵靡靡同坏也】赵人之死者不得收伤者不得疗【治也】涕泣相哀勦力同忧【勦并力也】耕田疾作以生其财今王发军虽倍其前臣料赵国守备亦以十倍矣赵自长平以来君臣忧惧早朝晏罢卑辞重币四面出嫁结亲燕魏连好齐楚积虑并心备秦为务其国内实其交外成当今之时赵未可伐也王曰寡人既以兴师矣乃使【衍五字】五校大夫王陵将而伐赵陵战失利亡五校【集韵校木为栏格也军部及养马用之故军尉马官以为号】王欲使武安君称疾不行王乃使应侯往见武安君责之曰楚地方五千里持戟百万君前率数万之衆入楚拔鄢郢焚其庙东至竟陵【後志属江夏起此二十八年取鄢二十九年取郢补曰竟陵在郢州长寿县南今复州亦其地焚其庙即所谓烧夷陵先王之墓也】楚人震恐【震霹雳震动也故为恐】东徙而不敢西向【徙陈】韩魏相率兴兵甚衆君所将之卒【补补曰当有卒字大事记补】不能半之而与战之【补曰当是之战】於伊阙【十四年】大破二国之军流血漂卤【卤櫓同大盾也正曰高注卤大漂也言杀人多而流血漂浮卤也】斩首二十四万韩魏以故称东藩此君之功天下莫不闻今赵卒之死於长平者已十七八其国虚弱是以寡人【雖称王命故云】大发军人数倍【元作君补曰姚本作倍字】於赵国之衆愿使君将必欲灭之矣君常以寡击衆取胜如神况以强击弱以衆击寡乎武安君曰是时楚王【顷襄】恃其国大不恤其政而羣臣相妬以功谀諂用事良臣斥疎【集韵斥亦疎】百姓心离城池不修既无良臣又无守备故起所以得引兵深入多倍城邑【兵深入城邑在後故言倍倍背同正曰倍如字言深入所过城邑多也】废梁焚舟以专民【梁桥也此皆示以不还使民专於战也下衍以字】以【补曰大事记云此作心字】掠於郊野【掠夺取也】以足军食当此之时秦之士卒以军中为家将帅为父母不约而亲不谋而信一心同力死不旋踵【不反走也】楚人自战其地咸顾其家各有散心莫有鬪志是以能有功也伊阙之战韩孤顾魏【时韩僖侯立三年耳故称曰孤正曰韩势孤也】不欲先用其衆魏恃韩之锐【时韩主兵故韩记言率周魏攻秦魏记言佐韩也】欲推以为锋【锋军之先】二军争便之力不同是以臣得设疑兵以持【元作待】待韩阵【时未交战也】专军并锐触魏之不意魏军既败韩军自溃乘胜逐北【战败曰北】以是之故能立功皆计利形势【谓人谋地利军之形势】自然之理何神之有哉今秦破赵军於长平不遂以时乘其振惧而灭之【振震同以赵畏服遂释攻】畏而释之使得耕稼以益蓄积养孤长幼【补曰长其幼小者】以益其衆缮治兵甲以益其强增城浚池以益其固王折节以下其臣【屈折肢节】臣推体以下死士【推体犹委质正曰推体犹委身谓以身与之也】至於平原之属皆令妻妾补缝於行伍之间臣人一心上下同力犹勾践困於会稽之时也以今伐之赵必固守挑其军战【挑摧挠也挠敌求战正曰汉书撓挑敌以求战左传谓之致师】必不肯出围其国都必不可克尅攻其列城必未可拔掠其郊野必无所得兵出无功诸侯生心外救必至臣见其害未睹其利又病未能行应侯慙而退以言於王王曰微白起吾不能灭赵乎复益发军更使王齮代王陵伐赵围邯鄲八九月死伤者衆而弗下赵王【孝成】出轻锐以寇其後秦数不利武安君曰不听臣计今果如何王闻之怒因

见武安君强起之曰君虽病强为寡人卧而将之有功寡人之愿将加重於君如君不行寡人恨君武安君顿首曰臣知行虽无功得免於罪虽不行无罪不免於诛然唯愿大王览臣愚计释赵养民以诸侯之变【补曰以字下疑有缺】抚其恐惧伐其憍慢诛灭无道以令诸侯天下可定何必以赵为先乎此所谓为一臣屈而胜天下也大王若不察臣愚计必欲快心於赵以致臣罪此亦所谓胜一臣而为天下屈者也夫胜一臣之严焉【严犹威】孰若胜天下之威大邪臣闻明主爱其国忠臣爱其名破国不可复完死卒不可复生臣宁伏受重诛而死不忍为辱军之将【军败则辱此所谓爱名】愿大王察之王不荅而去【事在四十八年及五十年元在中山策之末彪谓起之策秦楚三晋可谓明切然人臣无以有已故孔子不俟驾行矣长平之败属耳赵何遽能益强以起之材智知己知彼而得算多不幸至於无功极矣何破国辱军之有三请不行此自抽杜邮之剑也正曰应侯纳苏之说许韩赵割地以和由是起与之有隙不从伐赵者为此也大事记谓起之死皆雎之力鲍可谓不探其心者矣所引孔子不俟驾行盖当仕有官职而以其官召之此不类也】秦攻邯郸十七月不下庄【人名也】谓王稽曰君何不赐军吏乎王稽曰吾与王也不用人言庄曰不然父之於子也令有必行者必不行者曰去贵妻卖爱妾此令必行者也因曰母敢思也此令必不行者也守闾姬曰【姬母也正曰广韵老姬也此引说文不切】曰某夕某孺子【孺子乳也妇之尝乳者亦妇之美称齐策王有七孺子】内某士【内私之也言姬之言亦有必行者】贵妻已去爱妾已卖而心不有【有犹欲也言父虽令之而非其所欲故令之勿思则必不行】欲教之者人心固有【教犹告也孺子内士人心固欲其告虽非至亲令必行也】今君虽幸於王不过父子之亲【言王之令亦能夺其所贵爱有不必行者】军吏虽贱不卑於守闾姬【言且告稽】且君擅主轻下之日久矣闻三人成虎【即魏策庞葱所称者】十夫揉椎【揉屈伸木也】衆口所移无翼而飞故曰不如赐军吏而礼之王稽不听军吏穷果恶王稽杜摯以反【摯稽之副也雎传言稽与诸侯通则此所恶亦其实也】秦王大怒而欲兼诛范雎【稽始荐雎雎後任稽守河东补曰史王稽为河东守三岁不上计郑安平降赵应侯请罪秦法任人而所任不善者以其罪罪之於是应侯当收三族昭王恐伤其意加赐益厚後二岁稽与诸侯通坐诛应侯益以不怛昭王临朝叹息应侯惧不知所出此策雎曰云云当在此时所谓秦王大怒而欲兼诛雎者则非当从史然王益厚赐而善遇之者所以愧之也】范雎曰臣东鄙之贱人也【魏在秦东】开罪於【衍楚字】楚【补曰恐衍】魏【开言始得罪】遁逃来奔臣无诸侯之援亲习之故【习犹狎故旧也言非王近习之旧】王举臣於羈旅之中使职事【职犹主】天下皆闻臣之身与王之举也今愚【元作遇】遇【补曰当作愚】惑【衍或字】或【补曰衍】与罪人同心【罪人为王稽】而王明诛之是王过举【过犹误也昔举而今诛之是举之误】显於天下而为诸侯所议也臣愿请药赐死而恩以相葬臣【既杀之而加恩以国相礼葬之】王必不失臣之罪【已杀之】而无过举之名王曰有之【然其过举之言】遂弗杀而善遇之

秦攻赵苏子谓秦王曰臣闻明王之於其民也博论而技艺之【试之以事】是故官无乏事而力不困於其言也多听而时用之是故事无败业而恶不章臣愿王察臣之所谒而効之於一时之用也臣闻怀重宝者不以夜行任大功者不以轻敌是以贤者任重而行恭智者功大而辞顺【皆不伐也】故民不恶其尊而世不妬【元从女从后】妬【补曰訛当作妬】其业臣闻之百倍之国者【谓地广也】民不乐後也【争先附之正曰地既广矣民不乐其後

之复有事也】功业高世者人主不再行也【一举成之不待後正曰大功不再】力尽之民仁者不用也求得而反静【复於无事】圣王之制也功大而息民用兵之道也今用兵终身不休力尽不罢怒赵【元作赵怒】赵怒【补曰当作怒赵】必於其已邑【必欲战服使为已邑】赵仅存哉【言所存无几】然而四轮之国也【轮犹通言其民於适四方无所不通故下言从而不止正曰姚本作四输是言四面输写之国】今虽得邯郸非国之长利也【时攻邯郸不拔故曰今虽】意者地广而不耕民羸而不休又严之以刑罚【新民未服故】则虽从而不止矣【言且去之】语曰战胜而国危者物不断也【物事也断犹止言战事不止】功大而权轻者地不入也【补曰战胜国宜安而愈战则国危功大权宜重而愈求功则权轻危故物不止轻故地不入不断不入因上文用兵不休与虽从而不止言之】故过任之事父不得於子【虽父责之其子使必为不可得也】无已之求君不得於臣故【补曰此下当有缺字以下句推之可见】识乎微之为着者强察乎息民之为用者霸明乎轻之为重者王【不伐人之所轻也重莫大焉】秦王曰寡人案兵息民则天下必为从将以逆秦苏子曰臣有以知天下之不能为从以逆秦也臣以田单如耳为大过也【补曰如耳见前此时必二人欲为从故云然】岂独田单如耳为大过哉天下之主亦尽过矣夫虑收亡齐【言世主志虑欲尔补曰亡齐指其尝亡于燕言之下作破齐】罢楚【并音疲】敝魏与不可知之赵【未亡而有亡形正曰言其存亡不可知】欲以穷秦折韩臣以为至愚也夫齐威宣者世之贤王也德博而地广国富而民用【民为之用元作用民】用民【补曰当作民用】将武而兵强宣王用之後破【元作富】富【补曰字因下误疑为逼】韩威魏以南伐楚西攻秦秦【补补曰宜复有秦字】为齐兵困於穀函之上【补曰按秦惠後七年五国击秦齐师独後不败他战无考一本穀塞之上】十年攘地【攘推也犹招】秦人远迹不服【远迹畏而避之也然终不服】而齐为虚戾【战败其地为虚其民为戾戾疾也按齐记及表不书秦败齐唯秦记惠十三年攻齐昭二十二年伐齐河东取九县三十六年攻齐取刚壽不至是也此乐毅入临淄之役也秦与五国共败之补曰赵策亦有社稷为虚戾之语庄子国为虚厉释文虚如字又音墟李云居宅无人曰虚死而无後为厉恐此戾即厉也】夫齐兵之所以破韩魏之所以仅存者何也【破韩魏宜能强而适足自存者何正曰齐宜强而反遭破韩魏宜亡而乃仅存何也故下文言齐之受殃注读句误】是则伐楚攻秦而後受其殃也今富非有齐威宣之余也【今谓世主】精兵非有富韩劲魏之库也而将非有田单司马之虑也【司马穰苴以齐言之耳非威宣将正曰说见齐策】收破齐罢楚敝魏不可知之赵欲以穷秦折韩臣以为至误臣以为从一【合从为一正曰当作一不可成下文从之一成可见】不可成也客有难者今人有患於世【难者如刑名家苏子所患也】夫刑名之家【申韩之徒】皆曰白马非马也已如白马实马乃使有白马之为也【如使白马实马必有白马之为如天下之马不皆为白马故曰非马】此臣之所患也【言难者皆无端若此故可患而今非若此也】昔者秦人下兵攻怀【属河内】服其人三国从之【赵赵奢齐鲍佞并楚为三】赵奢鲍佞将【絶句】楚有四人【不名告之】起而从之临怀而不救之自去不从【赵鲍楚四人本起救怀而不救又听秦之自去不随後击也】不识三国之憎秦而爱怀邪亡其憎怀而爱秦邪【亡其犹云亦亡正曰亡其前有解不必注】夫攻而不救去而不从是以知【补补曰此下或有缺文】三国之兵困而赵奢鲍佞之能也【以不救不从为能知秦之不可当也】故裂地以败於齐【此下申言上穀函之败正曰裂地败齐当是指五国伐齐之事三国之不救怀卒裂地以败齐皆言从之不能合】田单将齐之良以兵横行於中十四年终身不敢设兵以攻秦折

韩也而驰於封内【言不出战所谓谓横行於中】不识从之一成恶存也於是秦王解兵不出於境诸侯休天下安二十九年不相攻【以此策为苏秦合从时则所称赵奢惠文孝成将也苏秦不当称之自昭讫始皇定天下无年不战则天下不相攻之说不可晓也今定为孝成九年邯郸围後说是後秦独攻取两周犹息兵五六年前此後此皆无解兵之事补曰二十九年不相攻必有误字辩士增饰之词固多然不应如此之甚云在赵策为赵而说也当从】

张仪【补曰误当作韩非】说秦王【此上元有张仪字而所说皆仪死後事故删去说云者犹西周谓齐王之比正曰王应麟云姚氏谓韩非子第一篇吕成公丽泽集文取此鲍失考愚按集文所谓非上书请破天下从即此非以韩王安相奉使秦始皇十三年也次年见杀今以韩子考其言而策文义胜者不复也】曰臣闻之弗知而言为不智知而不言为不忠为人臣不忠当死言不审亦当死【审悉也正曰韩子审作当胜不当即上云不智也】虽然【言已未能如言】臣愿悉言所闻【悉详尽也】大王裁其罪【裁制也】臣闻天下陰燕阳魏【陰北阳南】连荆【楚也始皇讳其父名故称曰荆知此书始皇时人作】固齐【时山东国齐楚为大故从人连结之恃以为固】收余韩【韩时弱多丧地今存者其余也】成从将西南【按南韩作面是下文有】以与秦为难【赧五十九年与诸侯从此五十一年】臣窃笑之世有三亡而天下得之其此之谓乎【此谓从补曰韩子作二亡无以逆攻顺者一句】臣闻之曰以乱攻治者亡以邪攻正者亡以逆攻顺者亡今天下之府库不盈【府文书藏库兵车藏今详凡有藏者皆得称也正曰府库藏货财对下困仓藏谷粟言】困仓空虚【困圆廩正曰高注圆曰困方曰仓】悉其士民张军数千百万【张去声正曰平声亦通补曰韩此下云其顿首戴羽为将军断死於前不至千人皆以言死】白刃在前斧质在後【诛不进战者故在後】而皆去之不能死【不战也正曰韩之军却走不能死也】非【元作罪补曰韩正作非】其百姓不能死也【言亦死之补曰一本而皆去之不能死韩而却走不能死也谓本其上不杀也韩上不能故也皆当从韩胜】言赏则不与言罚则不行赏罚不行故民不死也今秦出号令而行赏罚不攻耳【补】无相攻【元作攻相】攻相事也【言秦有不攻耳无敢与相攻者正曰韩作有功无功相事也姚云曾本如此】出其父母怀衽之中【衽衣衿】生未尝见寇也闻战顿足徒裼【此顿下也集韵徒空手裼袒也正曰顿踊也徒谓空露袒裼露臂也】犯白刃蹈煨炭【煨盆中火补曰韩鑪炭】断死於前者【以死自断】比比【元只一字】是也【比次也言如是者相次也正曰韩作皆是此盖皆之讹】夫断死与断生也不同【言死难补曰断死生之断都玩反断长之断覩缓反前後同】而民为之者是贵奋也【奋言勇不顾死补曰韩贵奋死也】一可以合十【与敌合鬪补曰四合字一本皆作胜韩作对当也义长】十可以合百百可以合千千可以合万万可以胜天下矣今秦地形断长续短方数千里名师数百万【名言有勇决之称】秦之号令赏罚地形利害天下莫如也【秦有断死之利诸侯有不死之害故不如秦正曰利害是总言】以此与天下【与言与之争】天下不足兼而有也是知秦战未尝不胜攻未尝不取所当未尝不破也【当相值也】开地数千里此甚大功也然而甲兵顿【此顿言其劳弊】士民病蓄积索【集韵索尽也】田畴荒【畴耕治之田】困仓虚四邻诸侯不服霸王之名不成此无异故【犹言无他事】谋臣皆不尽其忠也臣敢言往昔昔者【补曰韩臣敢言之往者盖两昔字因者字讹衍当从韩胜】齐南破荆东破宋【闵二十八年补曰韩东破是】西服秦【荆秦事未详正曰齐南破荆以下以地势言之非以年之先後也齐宣王二十五年与五国攻秦湣王十六年与韩魏伐秦】

十一年与韩魏伐楚十三年与秦韩魏败楚】北破燕【十五年正曰齐宣王二十九年伐燕取之】中使韩魏之君【两国从其役】地广而兵强战胜攻取诏令天下【以诏令令天下时未称诏此秦史之言耳正曰诏告命令也下文诏之及後策赵王之教诏之使者明诏之类】济清河浊【补曰韩作齐之清济浊河与下文协语胜】足以为限【东郡壽张注沛上有句城又平原有鬲津般河皆近齐正曰书蔡传济水自郑以东贯滑曹郛济齐青以入于海自郛以下皆齐地正义云真河从洛魏二州界北流入海亦齐西北界左传齐履西至于河】长城钜防足以为塞【苏秦传注济北卢有防门又有长城东至海後志注防门即钜防补曰长城西头在齐州平陰县界太山记云太山西有长城缘河经太山一千里至琅琊台入海】齐五战之国也【上所谓南破东破之类正曰谓四面及中受兵】一战不胜而无齐【燕昭入临淄事】故由此观之夫战者万乘之存亡也且臣闻之曰削株掘根无与祸邻祸乃不存秦与荆人战大破荆袭郢取洞庭五都江南【扬州记太湖一名湖亭一名震泽一名洞庭按熊绎都丹阳文王徙江陵是为郢都昭王徙郢所谓故郢又自郢徙都与鄢为五史多言鄢郢齐策鄢郢者楚之柱国知鄢亦为都江南即汉志楚地所谓江南地远者也补曰大破荆在昭王二十九年楚顷襄之二十一年正曰洞庭在巴陵见楚魏策即此路史熊绎初封丹阳今秭归武徙枝江亦曰丹阳楚文都南郢即江陵又谓故郢昭王避吴迁都今宜城为北郢即郢州惠王迁鄢在宜城曾氏谓屈瑕乱鄢以济者都鄢非久都故惠王末墨翟重茧趋郢宣王时王宫遇盗郢军见黜怀王入秦齐使郢中立王皆昭惠後愚按楚词哀郢庄辛说襄王郢都必危白起拔郢始徙陈知怀襄之世亦仍都南郢也考烈王徙壽春命曰郢又年表考烈徙都钜阳大事记谓春申君用朱英策自陈徙壽春不云自钜阳也据此楚不止五都鲍因误文又以其时在徙陈前故徙陈以下不论而其说亦不明故为正之正义云江南在豫章长沙南楚之地韩五都作五湖史苏秦传五渚注引策文洞庭五渚谓此渚乃湖之讹燕策亦有五渚字按策既言袭郢而五都郢在其中都字必误当从韩五湖说不一索隐云具区洮滈彭蠡青草洞庭又说太湖射阳青草丹阳宫亭宫亭即彭蠡张勃吴录谓太湖别名或说太湖中自有五湖】荆王【顷襄】亡走东伏於陈【见白起传】当是之时随荆以兵则荆可举【拔其国如举物然言易也】举荆则其民足贪也地足利也东以强齐燕【强於二国补曰韩强作弱是下有】中陵三晋然则是一举而霸王之名可成也【举犹行】四邻诸侯可朝也【使之朝秦】而谋臣不为引军而退与荆人和令荆人收亡国聚散民立社主【为木主社】置宗庙令帅天下西面以与秦为难此固已无【补曰韩无作失下并同】霸王之道一矣天下有比志【比密也言其志亲】而军华下【即华阳之所】大王以诈【补曰诈韩作诏是下同】破之兵至梁都【元作郭】郭【正曰韩本文】围梁数旬则梁可拔梁拔则魏可举【梁以都言魏全国也】举魏则荆赵之志絶【魏居二国之中而为与国故举魏则二国不通】荆赵之志絶则赵危【赵尤近秦】赵危而荆孤东以强【补曰见上】齐燕中陵三晋然则是一举而霸王之名可成也四邻诸侯可朝也而谋臣不为引军而退与魏氏和令魏氏收亡国取散民立社主置宗庙此固已无霸王之道二矣前者穰侯之治秦也用一国之兵而欲以成两国之功【秦及穰侯所封也如封刚壽以广陶之类】是故兵终身暴露於外士民潞【补曰韩作疲】病於内【潞即露耳故高注为羸】霸王之名不成此固已无霸王之道三矣赵氏中央之国也杂民之所居也【补曰韩子注赵都邯鄲燕之南齐之西魏之北韩之东故曰中央兼四国之人故曰杂】其民轻而难用也【轻则其志不坚】号令不治赏罚不信地形不便【无险隘故正曰非无险隘上云中央之国此云不便是以大势言之】上非能尽其民力彼

固亡国之形也而不忧民氓【在野曰氓】悉其士民军於长平之下以争韩之上党【冯亭事】大王以诈【补曰诏字】破之拔武安【此杀赵括事在四十七年】当是时赵氏上下不相亲也贵贱不相信也然则是邯郸不守拔邯郸完河间【冀州国完之者欲急取修武上党诸郡置之去也正曰韩作筦山东河间】引军而去西攻修武【属河内】踰羊肠降代上党代三十六县上党十七县【补曰踰羊肠降代韩作踰华绛三十六韩作四十六十七韩作七十】不用一领甲不苦一民皆秦之有也代上党不战而已为秦矣东阳【属清河】河外【滹沱河之外正曰苏秦说赵云东有清河张仪说赵告齐使兴师度清河军邯郸之东即此河也东阳既属清河不得为他说矣】不战而已反为齐矣【此本赵所得齐地今赵弱故齐复取之取之则益弱矣】中呼沱【元作池】池【正曰古沱通史弟子传滹池补曰韩中山呼池】以北【中言中分之呼沱在代鹵城】不战而已为燕矣【燕乘败取之】然则是举赵则韩必亡韩亡则荆魏不能独立则是一举而坏韩蠹魏【蠹者病其中也】挟【补曰韩作拔】荆以东【补曰韩作东以弱齐强燕】弱齐燕决白马之口【张仪传守白马之津津在东郡】以流【补曰韩作沃】魏氏【流作灌】一举而三晋亡从者败【合从者】大王拱手以须【须胥同待也】天下编随而伏【补曰韩作败也编言衆随而伏降矣以绳次物曰编】霸王之名可成也而谋臣不为引军而退与赵氏为和以大王之明秦兵之强霸王之业【谓先世所创】地尊不可得【地与相王之尊正曰韩尊作曾刘辰翁谓地犹弟皆失考】乃取欺於亡国【亡国以长平之败言赵】是谋臣之拙也且夫赵当亡不亡秦当霸不霸天下固量秦之谋臣一矣乃复悉【补曰韩此下有士卒字】以攻邯郸不能拔也弃甲兵怒战栗而却【且怒且惧而退补曰韩作弃甲兵拏战竦而天下】天下固量秦力二矣军乃引退并於李下【後志河内有李城赵封李同之父於此补曰韩作孚下】大王又并军而致与战【致言极力】非能厚胜之也【厚犹大】又交罢却【交言秦与赵俱罢兵而退】天下固量秦力三矣内者量吾谋臣外者极吾兵力【极言度其力之所至】由是观之臣以天下之从【合从也】岂其难矣内者吾甲兵顿士民病蓄积索田畴荒困仓虚外者天下比志甚固愿大王有以虑之也且臣闻之战战栗栗日慎一日苟慎其道天下可有也何以知其然也昔者纣为天子【元作下补曰韩作子】帅天下将【补曰一本将甲】百万左饮於淇谷【河内共淇水所出】右饮於洹水【苏秦传注出林虑项纪注在安阳县北前後志在良乡东南】淇水竭而洹水不流【亦竭也】以与周武为难武王将素甲三千领【绢素为之非金革也正曰素以色言】战一日破约之国【以甲子日战遂克之】禽其身据其地而有其民天下莫不伤【伤殷之亡耳正曰韩作莫伤】智伯帅三国之衆以攻赵襄主於晋阳【礼大夫称主】决水灌之三年【补曰韩作三月赵策亦两云三年】城且拔矣襄主错龟【错措同置也补曰错韩作鑽】数策【以筮也】占兆【灼龟拆处曰兆】以视利害何国可降【三国中孰为可降】而使张孟谈【赵之谋臣】於是潜行而出反智伯之约【使韩魏背之】得两国之衆以攻智伯之国禽其身以成襄子之功今秦地断长续短方数千里名师数百万秦国号令赏罚地形利害天下莫如也以此与天下天下可兼而有也臣昧死【自言不知死所】望见大王言所以举【补曰韩无此字】破天下之从【举谓一举】举赵亡韩【举犹拔也补曰非言及於亡韩是岂可不为寒心甚矣其忍也斩臣以徇於国以主不忠於国者亡韩之言当如之】臣荆魏亲齐燕【二国去秦远未可加兵故亲之以寬兵力其後秦灭诸国二国独後亡以此故也】以成霸王之名朝四邻诸侯之道大王试听其说一举而天下之从不破赵不举韩不亡荆魏不臣齐燕不亲霸王之名不成四邻诸侯不朝大王斩臣以徇於

国【狗行以示人也】以主不忠於国者【主言以为首恶彪谓此章论事深切着明荀卿不如秦所以取天下盖行其说也而史失其人猥以张仪名之惜哉所称谋臣范雎也补曰韩以为为王谋不忠者正曰韩非师荀卿者也其术不主於卿卿论兵以附民为要以仁义为本以禁暴除害为务非而有是言欤大意不过欲极威怒而务攻取耳鲍既考之不精且谓卿不如谬矣补曰苏氏论荀卿历诋天下之贤人以自是其愚李斯以其学乱天下其高谈异论有以激之也韩非此书历诋秦之谋臣盖指魏冉范雎之徒他日谓申不害徒术无法公孙鞅徒法无术张仪以秦狗韩魏甘茂以秦徇周穰侯应侯攻他国以成其私封所诋者亦非一人其刚愎不逊自许太过则亦卿之风也终以忤李斯短姚贾而杀其身太史公谓非知说之难而不能自脱可以为骋说者之戒矣】

蔡泽【燕人】见逐於赵而入韩魏遇夺釜鬲於涂【人夺之也尔雅鬲鼎也】闻应侯任郑安平【魏齐困范雎安平匿之时安平击魏以二万人降赵】王稽【通诸侯也】皆负重罪应侯内慙乃西入秦将见昭王使人宣言以感怒应侯曰燕客蔡泽天下骏雄弘辩之士也彼一见秦王秦王必相之而夺君位应侯闻之使人召蔡泽蔡泽入则揖应侯应侯固不快及见之又倨应侯因让之曰子尝宣言代我相秦岂有此乎对曰然应侯曰请闻其说蔡泽曰吁君何见之晚也夫四时之序成功者去矣人生手足坚强耳目聪明圣智岂非士之所愿与应侯曰然蔡泽曰质仁秉义【质犹体】行道施德於天下天下怀乐敬爱愿以为君王岂非辩智之期与【期犹志也辩智者志期得此】应侯曰然蔡泽复曰富贵显荣成理万物【物治也】万物各得其所生命壽长终其年而不夭伤天下继其统【统继也】守其业传之无穷名实纯粹【言其两全美】泽流千世称之而母絶【补曰一本此下有与天下终一句】岂非道之符【言行道之効】而圣人所谓吉祥善事与应侯曰然泽曰若秦之商君楚之吴起【卫人仕魏後相楚而死】越之大夫种【姓文越王句践之相】其卒亦可愿与【元作矣】矣【补曰矣史作欤】应侯知蔡泽之欲困已以说复曰何为不可夫公孙鞅事孝公极身毋二【极身犹竭已】尽公不还私【还反顾也】信赏罚以致治竭智能示情素【素其所蓄积正曰素慤通诚也】蒙怨咎【集韵蒙覆也蒙冒同鞅尝刑太子之傅知必见怨咎犹冒为之】欺旧交虜魏公子卬【卬则鞅之旧也】卒为秦禽将破敌军攘地千里吴起事悼王使私不害公谗不蔽忠言不取苟合行不取苟容行义不顾【元作固补曰姚云曾作顾】毁誉必欲【元作有】有霸王强国不辞祸凶大夫种事越王王离困辱【离罹同集韵遭也】悉忠而不解【解懈同】王虽亡絶尽能而不离【离犹去】多功而不矜富贵不骄怠若此三子者义之至忠之节也故君子杀身以成名义之所在身虽死无憾悔何为而不可哉蔡泽曰主圣臣贤天下之福也君明臣忠国之福也父慈子孝夫信妇贞家之福也故比干忠不能存殷子胥智不能存吴申生孝而晋惑乱【僖五年】是有忠臣孝子国家灭乱何也无明君贤父以听之故天下以其君父为戮辱【戮杀也贱之加刑戮为辱之人】怜其臣子夫待死而後可以立忠成名是微子不足仁孔子不足圣管仲不足大也於是应侯称善蔡泽得少间【间言有隙可乘】因曰商君吴起大夫种其为人臣尽忠致力则可愿矣閔天事文王周公辅成王也岂不亦忠乎以圣【补曰姚本以君臣论之】论之商君吴起大夫种其可愿孰与閔天周公哉应侯曰商君吴起大夫种不若也蔡泽曰然则君之主慈仁任忠【任犹信】不欺旧故孰与秦孝楚悼越王乎应侯曰未知何如也蔡泽曰主固亲忠臣不过秦孝越王楚悼君之为主正乱批患折难【批?同西齐切击也集韵?或作批又蒲结切】广地殖谷【殖种也】

】富国足家强主威盖海内功彰万里之外不过商君吴起大夫种而君之禄位贵盛私家之富过於三子而身不退窃为君危之语曰日中则移月满则亏物盛则衰天之常数也进退盈缩变化圣人之常道也昔者齐桓公【补曰一本有九合诸侯一句】一匡天下至葵丘之会【杜注陈留外黄东有葵丘】有骄矜之色畔者九国【僖九年】吴王夫差无敌【元作适】适【正曰史作敌适通与人鬪击也】於天下轻诸侯陵【元作凌】凌【正曰陵通史凌云汉书陵云】齐晋遂以杀身亡国夏育太史啓【太史周官其人未详史作太史激岂君王后之父邪】叱呼骇三军【叱诃也】而身死於庸夫此皆乘至盛不近道理也夫商君为孝公平权衡正度量调轻重决裂阡陌教民耕战是以兵动而地广兵休而国富故秦无敌於天下立威诸侯功已成矣【补补曰史此下有矣字】遂以车裂楚地持戟百万白起率数万之师以与楚战一战举鄢郢再战烧夷陵【属南郡】南并蜀汉又越韩魏攻强赵北坑马服诛屠四十余万之衆【屠言杀之酷】流血成川沸声若雷使秦业帝【有帝之业】自是之後赵楚慑服【慑失气也】不敢攻秦者白起之势也身所服者七十余城功已成矣赐死於杜邮【起传注在咸阳西门十里】吴起为楚悼罢无能废无用损不急之官塞私门之请一楚国之俗南攻扬越【越属扬州】北并陈蔡破横散从使驰说之士无所开其口功已成矣卒支解【断其四支按起传宗戚大臣射刺起死】大夫种为越王悬草剏邑【悬耕剏造也】辟地殖谷【殖植同】率四方之【补】士专【补】上下之力【补曰史方下有之字士下有专字恐此有缺】以禽劲吴成霸功勾践终拮而杀之【拮曳同搏也盖逼之楚记言赐剑死补曰拮姚本作搢】此四子者功成而不去祸至於此此所谓信而不能屈往而不能反者也范蠡知之超然避世长为陶朱【居陶易姓朱】君独不观博者乎或欲【衍欲字补曰姚云一本无此字】大投【大言全胜也】或欲分功【分胜者所获】此皆君之所明知也今君相秦计不下席谋不出廊庙坐制诸侯利【补补曰姚本有此字史同】施三川以实宜阳以【补曰一本及史无此字】决羊肠之险塞太行之口又斩范中行之途【斩谓絶之此言断三晋之路】栈道千里【栈棚也施於险絶以济不通】通【补补曰史於上有通字】於蜀汉使天下皆畏秦秦之欲得君之功极矣此亦秦之分功之时也【秦秦人】如时【补曰史作是】不退则商君白公吴起大夫种是也君何不以此时归相印让贤者授之必有伯夷之廉长为应侯世世称孤而有乔松之壽【乔王子乔松赤松子皆不死】孰与以祸终哉此则君何居焉应侯曰善乃延入坐为上客後数日入朝言於秦昭王曰客新有从山东来者蔡泽其人辩士臣之见人甚衆莫有及者臣不如也秦昭王召见与语大说之拜为客卿应侯因谢病【以病辞去】请归相印昭王强起应侯应侯遂称笃【笃犹甚】因免相昭王新说蔡泽计画遂拜为秦相【在五十二年】东收周室蔡泽相秦王数月人或恶之惧诛乃谢病归相印号为刚成君【补曰水经云雁门子延水东迺置成南泽燕人疑此即其所邑与】居【补补曰姚云一本有居字史同】秦十余年事【补补曰史昭上有事字】昭王孝文王庄襄王卒事始皇帝为秦使於燕三年【居燕三年】而燕使太子丹入质於秦【泽传有彪谓周衰辩士皆矜材角智趋於利而已唯泽为近道德明哲保身之策故其得位不数月引去优游於秦以封君令终美矣非苟知之亦允蹈之泽之谓乎正曰泽知范雎内慙故西入秦志在夺相扬雄所谓搯其咽抗其气拊其背而夺其位乃矜材角智趣利之尤者相秦数月惧诛归印亦智巧之尤无功而退既无当於道德之旨明哲保身之义彼何足以知之哉补曰为主为君为孝为楚为越为秦之为去声】

孝文王【昭王子元年辛亥周亡至是六年矣】

濮阳人【属东郡】吕不韦贾於邯郸见秦质子异人【子楚初名孝文王子】归而谓父曰耕田之利几倍曰十倍珠玉之赢几倍曰百倍立国家之主赢几倍曰无数曰今力田疾作不得煖衣余食今建国立君泽可以遗世【遗犹诒世後世】愿往事之【事犹为补曰不韦鄙耕田珠玉之小利而图建国立君之大利自以为计得矣徙蜀饮酖之时能无悔乎】秦子异人质於赵处於帮城【赵地缺补曰字书无口字龙龕手监云音脚】故往说之曰子傒【异人异母兄】有承国之业又有母在中今子无母於中【异人母曰夏姬无宠如无母然】外托於不可知之国【史言赵不礼之故祸福未可知也】一日倍约身为粪土【弃死且贱也】今子听吾计事求归【以求归为事正曰刘辰翁云计事犹谋事求归别句】可以有秦国吾为子使秦必来请子乃说秦王后【孝文后华阳夫人】弟阳泉君曰君之罪至死君知之乎君之门下无不居高尊位太子门下无贵者【太子子傒】君之府藏珍珠宝玉君之骏马盈外廐美女充後庭王之春秋高【春秋举成岁此言其年高】一日山陵崩【山陵喻高且固崩喻死】太子用事君危於累卵而不壽於朝生【木槿也朝荣夕死今又不如】仆有可以一切【权宜也】而使君富贵千万岁【衍其字】其宁於太山四维【四方之隅不可移也正曰以太山为四维】必无危亡之患矣阳泉君避席【离席前请】请闻其说不韦曰王年高矣王后无子子傒有承国之业士仓又辅之王一日山陵崩子傒立士仓用事王后之门必生蓬蒿子异人贤材也弃在於赵无母於内引领西望而愿一得归王后诚请而立之是子异人无国而有国王后无子而有子也阳泉君曰然入谓王后王后乃请赵而归之赵未之遣不韦说赵曰子异人秦之宠子也无母於中王后欲取而子之使秦而欲屠赵不顾一子以留计【留本决也】是抱空质也【此质本以交好今不能然故曰空】若使子异人归而得立赵厚送遣之是不敢倍德畔施是自为德讲【必以德施讲好於赵正曰讲即媾字】秦王老矣一日晏驾【天文志天子当早作而方崩陨臣子之心犹谓宫车晚出】虽有子异人不足以结秦赵乃遣之【不韦传秦围邯郸赵欲杀子楚子楚脱亡归与此驳】异人至不韦使楚服而见【以王后楚人故服楚制以说之】王后说其状高其智曰吾楚人也而自子之乃变其名曰楚王使子诵【诵所习书】子曰少弃捐在外尝无师傅所教学不习於诵王罢之【补曰大事记不习於诵此焚书之兆也愚按昭王问荀卿儒无益於人之国其来久矣】乃留止【止宫中】间曰【间政事之隙】陛下尝轝车於赵矣【高纪五年注陞者云云轝碾车木】赵之豪杰得知名者不少【以名见知於王】今大王反国皆西面而望大王无一介之使以存之【昭二十八年注一介单使也存问也问其存亡】臣恐其皆有怨心使边境早闭晚开【有警则然】王以为然奇其计王后劝立之王乃召相令之曰寡人子莫若楚立以为太子子楚立【是为庄襄王】以不韦为相号曰文信侯食蓝田十二县王后为华阳太后诸侯皆致秦邑【致邑为太后养地也按此是子楚以孝文王立後不韦说使归之不韦传则言孝文为安国君时归与此駁彪谓不韦贾人也彼安能知义欲图赢而夺嫡立庶秦国之不乱败者幸也以是得赢而饮酖于蜀于是知有天道矣凡不韦所立於时皆丧身灭国之事周衰士之陰险倾邪无辈於不韦者不足算也不足算也子楚之计平平耳孝文称为奇而立之非老悖乎】

庄襄王【文王子元年壬子】

始皇帝【庄襄王子元年乙卯】

文信侯欲攻赵以广河间使刚成君蔡泽事燕三年而燕太子质於秦文信侯因请张唐【秦人】相燕【补曰姚本此下有欲与燕共伐赵以广河间之地一句】张唐辞曰燕者必径於赵【径者道所出也】赵人得唐者受百里之地文信侯去而不快少庶子甘罗【礼庶子掌诸侯卿大夫之庶子罗茂之孙正曰高注少庶子官名罗文信家臣也索隐引策甘罗事吕不韦为庶子即指此也注以周制言秦官误庶子说又见後】曰君侯何不快甚也文信侯曰吾令刚成君蔡泽事燕三年而燕太子已入质矣今吾自请张卿相燕而不肯行甘罗曰臣行之文信侯【元作君】君【正曰以罗所事言故称君】叱去曰【补曰姚云曾作曰去语胜】我自行之而不肯汝安能行之也甘罗曰夫项橐【列子有问日出者岂其人乎正曰无稽】生七岁而为孔子师今臣生十二岁於兹矣君其试臣奚以遽言叱也甘罗见张唐曰卿之功孰与武安君唐曰武安君战胜攻取不知其数攻城堕邑不知其数臣之功不如武安君也甘罗曰卿明知功之不如武安君与曰知之应侯之用秦也【见用於秦】孰与文信侯专曰应侯不如文信侯专曰卿明知为不如文信侯专与曰知之甘罗曰应侯欲伐赵武安君难之去咸阳七里绞而杀之【起传言赐剑】今文信侯自请卿相燕而卿不肯行臣不知卿所死之处矣唐曰请因孺子而行【因之请於文信离娄注孺子童子】今库具车廐具马府具币行有日矣甘罗谓文信侯曰借臣车五乘请为张唐先报赵见赵王【悼襄】赵王郊迎谓赵王曰闻燕太子丹之入秦与曰闻之闻张唐之相燕与曰闻之燕太子入秦者燕不欺秦也张唐相燕者秦不欺燕也秦燕不相欺则伐赵危矣燕秦所以不相欺者无异故欲攻赵而广河间也今王齎臣五城以广河间归燕太子与【补】赵攻燕得上谷【幽州郡】三十六县与秦什一【以什之一与秦也罗传有补曰史云得上谷三十城人秦有十一索隐云谓以十一城予秦也二说未知孰是】

秦王欲见顿弱【秦人】顿弱曰臣之义不参拜王能使臣无拜则可矣不即不见也秦王许之於是顿子曰天下有有【补正曰一本有姚同】其实而无其名者有无其实而有其名者有无其名又无其实者王知之乎王曰弗知顿子曰有其实而无其名者商人是也无把铤推耨之劳【铤芸苗器耨耨器补曰徐按诗传镇铤也七遥反字书锹同耨亦芸田器庄子作耨】而有积粟之实此有其实而无其名者也无其实而有其名者农夫是也解冻而耕暴背而耨无积粟之实此无其实而有其名者也无其名又无其实者王乃是也已立为万乘无孝之名以千里养无孝之实秦王悖然而怒【悖艱同语色艱如也补曰艱如说文文今论语作勃】顿弱曰山东战国有六威不掩於山东而掩於母【始皇母帝太后也本吕不韦姬通不韦又通嫪母人告之王诛母而迁雍】臣窃为大王不取也秦王曰山东之战国可兼与顿子曰韩天下之咽喉魏天下之胸腹王资臣万金而游【资齎同】听之韩魏【时不通诸国故请王听其往也】入其社稷之臣於秦【说之使归秦】即韩魏从【补曰一本叠此三字】而天下可图也秦王曰寡人之国贫恐不能给也顿子曰天下未尝无事也非从即横也横成则秦帝从成则楚王秦帝即以天下恭养【且敬且养】楚王即王虽有万金弗得私也秦王曰善乃资万金使东游韩魏入其将相北游【衍於字】於燕赵而杀李牧【赵良将幽王七年杀之此十八年】齐【补曰一本此下有王字】入朝四国毕【元作必】必【补曰疑毕】从【齐魏燕赵也杀牧时已虏韩正曰高注燕赵韩魏是上已言齐矣杀牧是要终言之】顿

子之说也【说始皇在十年还太后前此要终言之彪谓顿子之义高於范雎而其说过之远矣惜其不知择本焉有仁人君子而为始皇用哉鲁连视之蔑矣正曰大事记茅焦说秦王曰秦方以天下为事而大王有迁母太后之名恐诸侯闻之由此倍秦顿子告始皇山东战国有六威不掩於山东而掩於母始皇所重者独兼并诸侯耳茅焦所以能复太后者特以诸侯背秦恐之非能以母子天性感悟之也愚按顿弱镇有威掩於母之一言其下即说以兼并行诈未尝正谏迁母之失又非茅焦比二人虽异於范雎於义皆不足取】

或为六国说秦王曰土广不足以为安人衆不足以为强若土广者安人衆者强则桀纣之後将存昔者赵氏亦尝强矣曰赵强何若【曰犹言如】举左案齐【言举兵於左则齐下案下也】举右案魏厌案万乘之国【厌言案之不一正曰厌益涉反培压也又伏也】二国千乘之宋也【宋於七国时为千乘今使齐魏伐之】筑刚平【赵地缺赵成侯四年筑刚平以侵卫五年齐魏为卫取我刚平皆不注正曰正义云盖在河北】卫无东野【详此则刚平赵取之卫也】刍牧薪采【刍草也以食马牧养牛人也大者薪小者采正曰刍草也牧牧人也】莫敢闚东门当是时卫危於累卵天下之士相从谋曰吾将还其委质【还反言改事也僖二十三年注委质屈膝也正曰彼注不明此强节入质赘通即下文抱质孟子传质是也委致也】而朝於邯郸之君乎於是天下有称伐邯郸者莫不夕【补】令朝行魏伐邯郸【魏惠三十年伐赵赵告急齐是以有马陵之败正曰在後】因退为逢泽之遇【开封东北有逢池或曰宋之逢泽】乘夏车【夏取其文礼有夏篆正曰乘夏车者言中夏之车下文可徵夏亥雅反礼注夏赤也孤东夏篆非天子之车】称夏王【夏中国也】一【补正曰朝音潮即下十二诸侯朝天子者为字疑衍】朝为天子天下皆从齐宣王【元作太公太公之时无此事也】太公【补曰二字有误】闻之举兵伐魏【补曰一本此下有壤地两分家国大危八字也】梁王身抱质执璧【质赘同羔雁之属也】请为陈侯臣【齐陈敬仲之後故称陈侯赵成侯二十二年魏拔邯郸齐亦败魏于桂陵不至如此所称故定为宣王马陵之役正曰按大事记周显王十六年魏惠十八年齐威二十六年赵成侯二十二年魏拔赵邯郸服十二诸侯遂称王齐乘其敝败之桂陵二十七年秦孝公会诸侯于逢泽以朝王策谓魏伐邯郸遂为逢泽之遇按魏既克邯郸即为齐楚所袭天下未尝皆从当据史书秦显王二十八年魏惠三十年齐宣二年魏伐韩齐伐魏以救韩败魏于马陵魏世家书魏伐赵乃往岁事是时亦田忌孙臃将而桂陵马陵易混故尔其後惠王用惠施之言朝齐以怒楚魏策有显王三十六年魏惠後二年齐宣十年楚成六年楚伐齐大败申缚於洞上今以此考之伐邯郸乃魏惠十八年事逢泽之遇秦为之非魏也败魏马陵而魏朝之者齐宣王也举兵伐魏一语在会逢泽後则亦指马陵之役而上文伐邯郸乃败桂陵时事天下皆从指服泗上十二诸侯言之亦未免讹舛也大事记又谓魏为逢泽之遇天下皆从又梁君驱十二诸侯以朝天子语虽不可尽信但魏自拔邯郸後称王则无可疑者也】天下乃释梁郢威王闻之【郢楚都也亦避始皇父讳楚威七年伐齐败之徐州】寝不寐食不饱帅天下百姓以与申缚遇於泗水之上【缚齐将杨之子注申诸姜】而大败申缚赵人闻之至根桑【地缺赵记注根桑一曰平桑疑即此处魏地也盖赴魏之难也】燕人闻之至格道格道不通平际絶【二地缺】齐战败不胜谋则不得使陈毛释剑擗【擗夜戒有所击引也释二者不自卫示卑也补曰擗侧侯反也】委南听罪【委去南面之尊正曰听罪於楚】西说赵【说使人解之】北说燕内喻其百姓而天下乃释齐【言不攻东齐也】於是天下【补正曰一本於是夫天由夫之讹也】积薄而为厚聚

少而为多以同言郢威王於侧紂之间【高注紂当为牖】臣岂以郢威王为政衰谋乱以至於此哉郢为强【絶句】临天下诸侯故天下乐伐之也【补曰同言郢威王云云言天下又欲谋楚也此章先言赵强而魏伐之魏强而齐伐之齐强而楚伐之楚强而诸侯又谋之言强者之不足恃召天下之所恶而欲共攻之者也言此欲以止秦之攻故云为六国说也】

四国为一【荆齐燕代见下文正曰见下也】将以攻秦秦王召羣臣宾客六十人而问焉曰四国为一将以图秦寡人屈於内【财力困也】而百姓靡於外为之奈何羣臣莫对姚贾【魏人】对曰贾愿出使四国必絶其谋而案【元作安也】安【正曰息】其兵乃资车百乘金千斤衣以其衣【以王衣衣之宠之也】舞以其剑【古者饮则以剑舞之以王剑赐之使为舞时用正曰姚本舞刘本作带也】姚贾辞行絶其谋止其兵与之交以报秦秦王大说贾封千户以为上卿韩非【韩之诸公子秦王见其书恨不及见之攻韩韩遣之使秦秦王说之贾与李斯毁之死也】知之曰贾以珍珠重宝南使荆齐【元作吴此章无吴事此四国後亡者也三晋灭久矣正曰无考当从旧】吴北使燕代之间三年四国之交未必合也而珍珠重宝尽於内是贾以王之权【补曰一本此下有国之宝三字】外自交於诸侯愿王察之且梁监门子【监门卒也贾父曾役】尝盗於梁臣於赵而逐取世监门子【父死子继曰世】梁之大盗赵之逐臣与同知社稷之计非所以厉羣臣也【厉砺同也】王召姚贾而问曰吾闻子以寡人财交於诸侯有诸对曰有王曰有何面目复见寡人对曰曾参孝其亲天下愿以为子子胥忠於君天下愿以为臣贞女工巧【有妇功也】天下愿以为妃【妃匹也补曰妃当音配曾参止之身云云即陈轸之说】今贾忠王而王不知也贾不归四国尚焉之使贾不忠於君四国之王尚焉用贾之身桀听谗而诛其良将紂听【元作闻】闻谗而杀其忠臣至身死国亡今王听谗则无忠臣矣王曰子监门子梁之大盗赵之逐臣姚贾曰太公望齐之逐夫【妇逐之也不经见】朝歌之废屠【朝歌属河内贾肉不售故曰废补曰楚词师望在津昌何识鼓刀扬声后何喜集注云吕望鼓刀在列肆文王亲往问之望曰下屠屠牛上屠屠文王善载与俱归此与猎渭滨而得之说不同盖当时好事者之言犹伊尹百里奚自鬻之比惜乎孟子时无间者不得并折辨之也】子良之逐臣【未闻】棘津之雠不庸【後志琅邪西海太公所出又钓於棘津今存雠售同盖尝求售与人为庸不见用也】文王用之而王管仲其鄙人之贾人也【五鄮为鄙盖鄮鄙之人为贾者仲尝与鲍叔贾补曰鄙下人字疑衍】南阳之敝幽【修武南阳也仲颖上人尝以贫困隐此敝困幽隐也】鲁之免囚【见庄二十九年】桓公用之而霸百里奚虞之乞人傅卖以五羊之皮【奚虞臣也不见用自鬻於秦养牲者以五羖羊皮鬻之补曰说见上说苑邹子说梁王曰管仲故成陰之狗盗也天下之庸夫也太公望故老妇之出夫也朝歌之屠户也棘津迎客之舍人也云云亦此类】穆公相之而朝西戎文公用中山盗而胜於城濮【僖二十八年晋文公用舅犯之谋破楚成王於城濮与此不同杜注城濮及史注止云卫地正曰文公用中山盗而胜於城濮与上句穆公相之而朝西戎文意同此但言用人不问其出於贱恶而卒有如是之功耳按文公有寺人披斩祛豎头须窃藏二事邹阳书文公亲其雠而强伯诸侯注以为寺人勃鞞新序文公用其盗以为里鳧须即豎头须也二事皆可通】此四士者皆有诟丑大诽【诟辱丑耻也】天下【补曰姚注曾作於天下】明主用之知其可与立功也【补】使若卞随务光【并汤时人辞汤之聘】申屠狄【紂时人自沉于渊并见庄子】人主岂得其用哉故明主不取其污不听其非察其为已用【污者非者虽不取不听知其为用则或听取察言听取之】故可以存社稷虽有外诽

者不听虽有高世之名无咫尺之功者【八尺曰咫】不赏是以羣臣莫敢以虚愿望於上【无功而愿赏虚愿也补曰魏无知之论陈平曰今有尾生孝己之行而无益胜负之数王何暇用之乎即姚贾之说也燕策苏秦苏代之辞亦此类】秦王曰然乃【衍可字补曰一本无】复使姚贾而诛韩非【高诱妄人也注此书谬妄非一处如此策以姚贾为陈贾齐策以伐燕为齐宣王初不考其岁月贾乃与李斯同时安得见於孟子之书宣闵皆尝伐燕而子哙之役实闵王也诱之率意如此愚天下後世甚矣彪之校注盖为此发愤故其所称皆必有依据惧获罪於後人也正曰鲍注是书谓高氏以姚贾於孟子书陈贾以伐燕为齐宣王为是发愤凡策之书宣者悉据史记改从闵大诋高氏而以此为称首夫学者考订於千载之上义理事徵而已岁月名字之差互者当博取徵验而折以事理之是非信其可徵者或彼此有据则并存之可也择焉不精凭私臆决妄诋前人辄改旧文何鲍氏之果哉考之赵策赵使姚贾约韩魏时虽不可考其云赵使则赵臣也魏策周最入齐秦王怒令姚贾让魏王秦武魏襄时也其云秦令则秦臣也此策姚贾梁监门子则魏人仕秦并始皇李斯时者殆非一姚贾矣姚以舜姓得为陈高不为无据使诚孟子书所称当与秦武魏襄相及并始皇李斯者则非然未知的为一人而高辄以此姚贾为孟子书讥周公不仁不智者固非矣唯子哙之役则有可言者史记年表齐宣王立十九年卒儋王立燕哙七年当湣王十年书哙子之皆死惟孟子以为宣王而策之文与之合此通监所据也通监宣王二十九年伐燕视史记下移十年宣王伐燕即薨次年湣王立宣闵之年或乱而失次通监必有所据而大事记亦从之伐燕之事莫详於孟子莫着於国策史记年表无明文齐世家不书特燕世家掇取国策而易宣以湣耳安得据史记之略而废孟子国策之详且明哉传曰所见异辞所闻异辞所传闻异辞宣王伐燕孟子所见也史记所传闻者也安得据所传闻而废所见者哉或谓荀卿尝事宣王为之讳也孟子之书幸有国策明徵不然则非孟之徒得以肆其说矣策文书宣非出高氏岂为率意谬妄鲍之诋高氏乃所以自谓也高注吕氏春秋陰康氏据汉书改为陶唐氏昔人讥其不视古今人表妄改本文鲍之失正类此学者之所以慎於传疑也】

战国策校注卷三

卷四

<史部,杂史类,战国策校注>

钦定四库全书

战国策校注卷四 宋 鲍彪 原注

元 吴师道 补正

齐【东有菑川东莱琅邪高密胶东南有泰山城阳北有千乘济河以南渤海之高乐高城重合信阳西有济南平原】

威正【田齐桓公子元年安王二十四年癸卯】

濮上之事【此东郡濮水之上实卫地】赘子死章子走【皆以名子之犹婴子文子章匡章】盼子谓齐王曰【曰盼也威王言使守高唐者并齐将】不如易余粮於宋【易移与之】宋王【辟公正曰辟公说见宋策桓公未尝称王宋偃十一年称王当齐宣王二十五年此非威王时】必说梁氏不敢过宋伐齐齐固弱【固犹信】是以余粮收宋也齐国复强虽复责之宋可【可责其偿】不偿因以为辞攻之亦可【盼子威王臣威自九年後未尝败挠此言二子死盖九年前也正曰盼子虽见称於威王宣王二年马陵之役盼为将十年楚败齐令齐逐田婴张丑说楚王云婴逐盼子必用则盼先着於宣王之世伐燕之役章子将兵亦宣王时且策有齐国复强之言决非威王时也】

邯郸之难【赵成侯二十一年魏围邯郸此二十五年】赵求救於齐田侯召大臣而谋曰救赵孰与勿救刍子【名忌二十一年相明年封下邳号成侯】曰不如勿救段干纶【补曰史作朋後语作萌】曰勿救则我不利【我我齐】田侯曰何哉对曰【补二字补曰史有对曰二字】夫魏氏兼邯郸其於齐何利哉田侯曰善乃起兵甲【补曰一本甲作曰是言将屯於其郊故後云乃起兵南攻】军於邯郸之郊【以军法陈之於此正曰高注军屯也愚谓凡言军於某地者犹言师於某地成列则云陈於某】段干纶曰臣之求利且不利者非此也【且犹与】夫救邯郸军於其郊是赵不拔而魏全也【两国不战故也】故不如南攻襄陵以敝魏【襄陵属河东魏邑也攻之使魏困】邯郸拔而承魏之敝【承言继其後】是赵破而魏弱也田侯曰善乃起兵南攻襄陵七月邯郸拔齐因承魏之敝大破之桂陵【诸注止言魏地齐记有云二十六年正曰正义云桂陵在曹州乘氏县东北又说见後】

秦假道韩魏以攻齐齐威王使章子将而应之与秦交和而舍【孙子两军相对曰交和楚记注军门曰和】使者数相往来章子为变其徽章【徽帜也以绛帛着於背章其别也补曰此引说文又左传杨徽注若今救火衣又按王莽传殊徽帜注通谓旌旗属】以杂秦军候者言【齐之侦者】章子以齐入秦威王不应顷【衍之字】之【正曰有顷之间也句奇下顷间】

变文】间候者复言章子以齐兵降秦威王不应而此者三【而犹如】有司请曰言章子之败者异人而同辞王何不废将而击之【废谓罢之补曰废一本作发是既降矣安用废为】王曰此不叛寡人明矣曷为而击之顷间言齐兵大胜秦兵大败於是秦王称【元作拜】拜西藩之臣【按威王与秦献公孝公同时齐虽强而秦不弱此语未详】而谢於齐左右曰何以知之曰章子之母啓【其母名】得罪其父其父杀之而埋马栈之下【栈为棚以立马正曰高注栈牀也补曰章子通国称不孝孟子以为父子责善而不相遇者恐因此事也後语马屎之中】吾使【衍者字】者【补曰姚云一本无】章子将也勉之曰夫子之强全兵而还必更葬将军之母对曰臣非不能更葬先妾也臣之母啓得罪臣之父臣之父未教而死【未有教命补曰後语未赦】夫不得父之教而更葬母是欺死父也故不敢【彪谓君父一也虽无父命而以君命更葬何损於义凡章子之孝皆过所谓过孝正曰此是章予言所以不更葬之故未见其终拒威王之命】夫为人子而不欺死父岂为人臣欺生君哉【彪谓周衰齐威不世之主也列子曰君非自知我也以人之言赐我其罪我又将以人之言故人君於其臣欲其自知之也威王之於章子有马夫如是虽百市虎不摇也岂以三告而投杼乎哉】楚将伐齐鲁亲之【亲楚】齐王患之张丐曰【齐人疑即张丑】臣请令鲁中立【於两国之间无所亲疎】乃为齐见鲁君【康公正曰无考】鲁君曰齐王惧乎曰非臣所知也臣来吊足下鲁君曰何吊乎曰君之谋过矣君不与胜者而与不胜者【楚时未败而云然者盖楚有胜齐之势楚虽胜士卒多死鲁合齐以两国击之楚必败故言其不胜】何故也鲁君曰子以齐楚为孰胜哉对曰鬼且不知也然则子何以吊寡人曰齐楚之权敌也【补曰言其力适均】不用有鲁与无鲁足下岂如全衆而合二国之後哉楚大胜齐其良士选卒【材武见选者】必殪【殪死也】其余兵足以待天下齐为胜其良士选卒亦殪而君以鲁衆合战胜後【合合败者也胜者虽合之不必见德今以全衆合败者彼胜者既士卒多死可胜也败者因见德矣】此其为德也亦大矣【德败者】其见恩德也亦甚大矣【败者德之】鲁君以为然乃退师【补曰为齐楚为去声】成侯邹忌为齐相【补曰高注成齐邑按史曰封以下邳号为成侯】田忌为将不相说公孙闱【齐人补曰闱史作阅】谓邹忌曰公何不为王谋伐魏胜则是君之谋也君可以有功战不胜田忌不进战而不死曲挠而诛【曲挠言师不直前而败】邹忌以为然乃说王而使田忌伐魏田忌三战三胜邹忌以告公孙闱公孙闱乃使人操十金而往卜於市曰我田忌之人也吾三战而三胜声威天下【天下畏其威声正曰其声畏惧天下】欲为大事【反齐而王】亦吉否卜者出【田忌之人正曰公孙闱所使者】因令人捕【捕取也】为人卜者亦验其辞於王前田忌遂走【齐记三十五年有彪谓齐威贤王也其知章子察阿墨大夫明矣独於是失之然忌之走亦非威王遣之也正曰史以公孙闱为邹忌云云附战桂林之前文小异操十金卜市以下在威王三十五名下云田忌闻之率其徒袭攻临淄求成侯不胜而奔宣王召复位遂有马陵之战按策言忌伐魏三战三胜忌战可见者桂陵马陵二役策并言之也後章记忌系太子申禽龐涓孙子谓忌曰若是则齐君可正成侯可走忌不听遂不入齐又记田忌亡齐之楚楚封之江南则忌之出奔在战马陵後宣王之世明矣史载其奔在前故谓召复位忌既袭齐岂得再复成侯犹在岂宜并列而马陵後忌无可书之事知其必有误也以威王之明成侯公孙闱之诈岂能行其间其为宣王无疑也大事记谓桂陵马陵二事多混而书忌出奔在威王时亦仍史之旧耳】

邹忌修八尺有余而形貌昳丽【昳徒结切目侧也故有光艷意又疑作佚正曰高注昳读曰

逸】朝服衣冠窥镜谓其妻曰我孰与城北徐公美其妻曰君美甚徐公何能及君也城北徐公齐国之美丽者也忌不自信而复问其妾曰吾孰与徐公美妾曰徐公何能及君也旦日【旦明也】客从外来与坐谈问之【补曰一本问之客曰一无客字】吾与徐公孰美客曰徐公不若君之美也明日徐公来熟视之自以为不如窥镜而自视又弗如远甚暮寝而思之曰吾妻之美我者私我也【私犹亲】妾之美我者畏我也客之美我者欲有求於我也於是入朝见威王曰臣诚知不如徐公美臣之妻私臣臣之妾畏臣臣之客欲有求於臣皆以美於徐公今齐地方千里百二十城宫妇左右莫不私王朝廷之臣莫不畏王四境之内莫不有求於王由此观之王之蔽甚矣王曰善乃下令羣臣吏民能面刺寡人之过者受上赏上书谏寡人者受中赏能谤讥於市朝闻寡人之耳者受下赏令初下羣臣进谏门庭若市数月之後时时而间进【进谏者有暇隙】暮年之後虽欲言无可进者燕赵韩魏闻之皆朝於齐此所谓战胜於朝廷【坐朝廷之上匹国朝之不待兵也彪谓邹忌尝以诈走田忌则其人亦倾险士耳惟此言者万世之言也补曰大事记威烈王二十二年按外纪宋昭公出亡谓其御曰云云事与此类又新序齐有田巴先生贤王聘而问政巴改制新衣拂饰冠带顾谓其妾云云恐与邹忌事有讹舛】

宣王【威王子元年补曰名辟疆显王二十七年己卯】

南梁之难【鲁国蕃县有南梁水此二年魏伐赵赵与韩共击魏赵不利败於南梁正曰正义引括地志云故梁在汝州西南称南梁者别於大梁少梁高注韩邑大梁在北故曰南梁○大事记此魏伐韩也谓伐赵者往岁桂陵之战与此混而误尔】韩氏求救於齐田侯【犹上陈侯】召大臣而谋曰早救之孰与晚救之便张丐对曰晚救之韩且折而入於魏不如早救之田臣思曰【补曰索隐云策作田期思必别本也纪年谓之徐州子期即田忌也】不可夫韩魏之兵未敝而我救之我代韩而受魏之兵顾反听命於韩也且夫魏有破韩之志韩见且亡必东愬於齐【愬告也】我因陰结韩之亲而晚承魏之敝【承继其後也】则国可重利可得名可尊矣田侯曰善乃陰告韩使者而遣之【告者许之也】韩自以有齐国五战五不胜东愬於齐齐因起兵击魏大破之马陵【补曰虞喜云马陵在濮州鄆城东北六十里有涧深峻可以置伏龐涓败即此徐广云在魏州元城县东南司马彪引杜预说亦然按齐使田忌将直达大梁龐涓闻之去韩而归齐军已过而西则从汴州外黄退至濮州东北六十里是也岂合更渡河至元城哉】魏破韩弱韩魏之君因田婴北面而朝田侯【齐记有为两章一为桓公臣思一为宣王孙子彪谓臣思之策则幸中矣非仁义举也孟子谓行一不义而得天下不为也况朝韩魏乎正曰今按桓公田臣思事自与邯郸之难及韩齐为与国二章相乱非此章也说见後章】田忌为齐将【此二年召复位正曰说见前】系梁太子申禽龐涓【魏将】孙子【蒧也齐人武之孙为田忌军师】谓田忌曰将军可以为大事乎田忌曰奈何孙子曰将军无解兵而入齐使彼罢敝於先【罢疲同彼谓齐军已与魏战虽胜亦罢今使当前】弱守於主【弱弱卒也忌所自将使齐不疑也主地缺盖齐险隘补曰姚云曾先皆作老愚恐上句多於字谓以罢敝老弱守险敌衆而以精兵攻齐下云轻车锐骑者也】主者循轶之途也【轶辙同车迹也言其险狭不得方轨适相循耳】鑄击摩车而相过【鑄牵同车轴端键也路狭车密故相击相摩】使彼罢敝先弱守於主必一而当十【得地利故】十而当百百而当千然後背太山【在太山博县西北】左济右天唐【盖盼子所守所谓高唐属平原】

军重踵高宛【重輜重也後志高宛属乐安】使轻车锐骑冲雍门【始皇纪注在高陵正曰高注雍门齐西门名按左传襄十八年有雍去声】若是则齐君可正【正犹制治】而成侯可走不然则将军不得入於齐矣田忌不听果不入齐【彪谓臆非武流也武虽运奇用诡岂尝语人以是乎忌不听忌贤也补曰使田忌无间於齐孙子曷为而有是言必公孙閼成侯谗构之时也】

田忌亡齐而之楚邹忌代之相【补曰前云邹忌为相田忌为将田忌走此云代之相恐有差误】齐恐田忌欲以楚权复於齐【复犹返】杜赫曰臣请为留楚【为邹留田於楚补曰一本为下有君字留下有之字】谓楚王【威】曰邹忌所以不善楚者恐田忌之以楚权复於齐也王不如封田忌於江南以示忌之不返齐也邹忌必【补补曰当有缺字】以齐厚事楚田忌亡人也而得封必德王若复於齐必以齐事楚【言此示不为邹忌游说也】此用二忌之道也楚果封之於江南邹忌事宣王仕人衆【荐於王使之仕】宣王不说晏首【齐人】贵而仕人寡王说之邹忌谓宣王曰忌闻以为有一子之孝不如有五子之孝今首之所进仕者以几何人宣王因以晏首壅塞之【言其不荐达人】

楚威王战胜於徐州【後志鲁之薛六国时曰徐州事在楚威七年此十年补曰徐词余反正义云纪年梁惠王三十年下邳迁於薛改名徐州徐左氏作舒说文作?】欲逐婴子於齐【逐使齐逐之田婴时未封故曰婴子犹盼子】婴子恐张丑【齐人正曰丑又见韩魏燕中山等策】谓楚王曰王战胜於徐州也盼子不用也盼子有功於国百姓为之用婴子不善【不与盼善】而用申缚申缚者大臣弗【补补曰姚云一本有】与【史曰不附】百姓弗为用故王胜之也今婴子逐盼子必用复整其士卒以与王遇必不便於王也楚王因弗逐【楚记七年有】

权之难【後志南郡编注鬬缙以权叛又当阳注县东南有权城楚地也盖燕自北进齐自东进而战於楚境燕策为文公时正曰大事记燕齐交兵必非此地史记合燕策并载而取鲍三说文公末年云云并属中山云云燕齐合云云故於此条着其说而斥其非者不着鲍氏取长弃短之意也】齐燕战秦使魏冉之赵【冉传言自惠王时任职然则此役文公末年也】出兵助燕击齐薛公【婴时未封後人称之耳婴传言自威王时任职】使魏处之赵谓李向【赵人正曰大事记起用事者也】曰君助燕击齐齐必急急必以地和於燕而身与赵战矣然则是君自为燕束兵【东犹斂燕齐和成斂兵不战】为燕取地也【取齐地】故为君计者不如按兵勿出齐必缓【赵之助燕不力故齐无危急之势】缓必复与燕战战而胜兵罢敝【罢疲同】赵可取唐曲逆【并属中山国言二国战不暇北顾赵可以其间取中山也补曰高注唐今卢奴北卢县也曲逆今蒲陰】战而不胜命悬於赵【悬系也】然则吾中立【吾谓赵】而割穷齐与疲燕也【割割齐地正曰割齐燕地】两国之权悬於君矣苏秦为赵合从【赵肃侯十七年此当十年】说齐宣王曰齐南有太山东有琅邪【徐州郡补曰孟子注琅邪齐东南境上邑】西有清河【冀州郡补曰正义云今贝州】北有渤海【幽州郡补曰正义云今沧州】此所谓四塞之国也【言四方皆有险固】齐地方二千里【补曰史三千余里】带甲数十万粟如丘山齐车之良五家之兵【管仲军令始於五家为轨】疾如锥矢【锥铤也补曰吕氏春秋所贵锥矢者为其应声而至】战如雷电【其威大也】解如风雨

【言疾也】即有军役未尝倍泰山絕清河涉渤海也临淄之中【属齐郡补曰青州临淄县古营丘地城临淄故云见正义及水经注渤海後语北海今青州北海是也】七万户臣窃度之下【补曰史无下】户三男子三七二十一万不待发於远县而临淄之卒固已二十一万矣临淄甚富而实其民无不吹竽【似笙三十六簧】鼓瑟【似琴二十五弦】击筑【似竹曲五弦之乐】弹琴鬪鸡走犬六博蹴鞠者【刘向别録蹙鞠黄帝作盖因娱戏以练武士蹙即蹙也补曰王逸云投六着行六棋谓之六博蹙史作蹙说文徒盍反即蹙字】临淄之途车毂【元作?】?【正曰?者輦之讹说文輦车牵相击也周礼舟车輦互谷梁传輦者不得入释文音许又古的反此章史作毂击按秦策车毂击驰说苑齐人好毂击扬雄书辨者毂击读亦通】击人肩摩连衽成帷【帐属在旁者】举袂成幕【袂袖也】挥汗成雨家敦【补曰史作殷】而富志高而扬夫以大王之贤与齐之强天下不能当今乃西面事秦窃为大王羞之且夫韩魏所以【补补曰史此有以字】畏秦者以与秦接界也兵出而相当不至十日而战胜存亡之机决矣韩魏战而胜秦则兵半折【折犹败以秦敌强虽胜犹为失半也】四境不守战而不胜以亡随其後是故【元作後补曰姚本作故是史同】韩魏之所以重与秦战而轻为之臣也今秦攻齐则不然倍韩魏之地【倍言二国在其後】至卫【元作闻补曰姚云至闾一作过卫史作卫】阳晋之道【魏襄十六年秦拔魏蒲地阳晋张仪传刼取卫阳晋注皆不地盖卫地时属魏也正曰正义云卫曹濮等州阳晋在曹州乘氏县西北】径亢父之险【属东平补曰亢音刚又苦浪反高注任城县南】车不得方轨【尔雅方舟并两舟则此亦两也轨车辙】马不得并行百人守险千人不能过也秦虽欲深入则狼顾【惊貌正曰狼性怯走常还顾】恐韩魏之议其後也是故惴疑虚喝【元作惕惴痛也言疑之甚集韵喝呵也】惕【补曰高注惕喘息惧貌史作喝索隐云亦作惕并呼合反窃谓作恐惕亦通又注见赵策】高跃【补曰史作骄矜】而不敢进则秦不能害齐亦明矣夫不料秦之不奈我何也而欲西面事秦是羣臣之计过【补曰一本此有也字】今臣无事秦之名而有强国之实臣故【元作固】固【正曰策固故通】愿大王之少留计【留意计之】齐王曰寡人不敏【此敏谓犹明明则疾於事补曰一本注晁本此下有云远守海穷道东境之国也未尝得闻余教】今主君【补曰主君称苏秦恐衍主字史作足下】以赵王之诏告之【诏告也】敬奉社稷以从【凡苏张从横之说本传皆有此在说燕赵韩魏後】

淳于髡【齐人见滑稽传】一日而见七人於宣王王曰子来寡人闻之千里而一士是比肩而立【此谓肩相次也言士难得千里有一犹为并肩也】百世而一圣若随踵而至也今子一朝而见七士则士不亦衆乎淳于髡曰不然夫鸟同翼者而聚居兽同足者而俱行【补曰後语鸟同翼者聚飞兽同足者俱行】今求柴胡桔梗於沮泽【二草山生而沮水也故求不可得孟子注菹泽生草者水名出汉中正曰沮泽但言渐湿之地如汉书所谓坐於沮泽之中者不必因下文求地名以实之】则累世不得一焉及之辜黍【地缺疑为负黍盖此与梁父皆东地也补曰高注辜黍梁父皆山名愚按辜字或作辜】梁父之陰【梁父在泰山山北曰陰】则?车而载耳【?却言多获车重不前】夫物各有畴【耕治之田禾所聚也故为类正曰畴类也】今髡贤者之畴也王求士於髡若挹水於河【挹酌也】而取火於燧也【火燧鉴也】髡将复见之岂特七士也【补曰两见字贤遍反】

齐欲伐魏淳于髡谓【元作为】为【补曰此书为谓字通用】齐王曰韩子卢者天下之疾

犬也东郭逵者【逵?同狡兔名】海内之狡兔也【集韵狡狴也疾也】韩子卢逐东郭逵环山者三腾山者五兔极於前犬废於後犬兔俱罢各死其处田父见之无劳勸之苦而擅其功【擅者无与争也】今齐魏久相持以顿其兵【顿亦劳敝】敝其衆臣恐强秦大楚承其後有田父之功齐王惧谢将休士【谢辞去之言不用也补曰此与苏代鹬蚌陈轸虎争人之说异而同者也逵七伦反】齐欲伐魏魏使人谓淳于髡曰齐欲伐魏能解魏患唯先生也敝邑有宝璧二双文马二驷【文毛色成文马四匹为驷】请致之先生淳于髡曰诺入说齐王曰楚齐之仇敌也魏齐之与国也【魏策马陵之败魏请臣畜朝齐楚王怒伐齐则此所言也】夫伐与国使仇敌制其余敝【言楚将因齐兵劳而伐之】名丑而实危【伐与国丑也而有楚伐之危】为王弗取也齐王曰善乃不伐魏客谓齐王曰淳于髡言不伐魏者受魏之璧马也王以谓淳于髡曰闻先生受魏之璧马有诸曰有之然则先生之为寡人计之何如淳于髡曰伐魏之事不便魏虽刺髡於王何益【伐魏不便魏所欲也而髡止之故魏刺之虽刺髡而齐实不便非益也此设辞也正曰强注终不通说见下】若诚不便魏虽封髡於王何损【补曰姚云若诚下刘本无不字愚按上句当无不字义乃通恐有讹舛】且夫王无伐与国之诽魏无见亡之危百姓无被兵之患髡有璧马之宝於王何伤乎【元在魏策正曰为魏而说当从旧】

齐宣王见【补曰见贤遍反】顔觸【集韵音触引吕春秋齐有顔觸补曰春秋後语作王蠋】曰觸前觸亦曰王前【并使之即已】宣王不说左右曰王人君也觸人臣也王曰觸前觸亦曰王前可乎觸对曰夫觸前为慕势王前为趋士【趋就也】与使觸为慕势不如使王为趋士王忿然作色曰王者贵乎士贵乎对曰士贵耳王者不贵王曰有说乎觸曰有昔者秦攻齐令有敢去柳下季垄五十步而樵采者【鲁展禽字季食采柳下亦云居之垄其冢埽秦伐齐先经鲁故云】死不赦令曰有能得齐王头者封万户侯赐金千镒由是观之生王之头曾不若死士之垄也宣王默然不说左右皆曰觸来觸来大王据千乘之地而建千石鍾【一石百二十斤】万石簠【钟鼓之桴】天下之士皆为後处【役为之使处在其位补曰姚本天下之士仁义皆来役处恐仁义字当在之士上】辯智并进莫不来语东西南北莫敢不来服【元作服求】服求【补曰求属下句】万物无不备具而百姓无不亲附今夫士之高者乃称匹夫徒步而处农亩下则鄙野【五鄆为鄙郊外曰野亦所处也补曰鄙五百家】监门闾里【闾在乡里在野并五百家皆有门正曰周礼大司徒五家为比五比为闾遂人五家为邻五邻为里闾里皆二十五家乡谓之闾遂谓之里二十五家共有巷巷首有门】士之贱也亦甚矣觸对曰不然觸闻古大禹之时诸侯万国何则德厚之道得贵士之力也【言能贵士故德厚】故舜起农亩出於野鄙而为天子及汤之时诸侯三千当今之世南面称寡者乃二十四由此观之非得失之策与【昔诸侯多由得策也今失策故诛灭而寡得策贵士也】稍稍诛灭灭亡无族之时欲为监门闾里安可得而有也哉是故易传不云乎居上位未得其实而【元作以】以【补曰恐当作而】喜其为名者必以骄奢为行据【补曰倨据通借】慢骄奢则凶必从之是故无其实而喜其名者削【削地也正曰削弱也】无德而望其福者约【约穷也】无功而受其禄者辱祸必握【言祸辱随之不舍也】故曰矜功不立【言徒有矜大好功之志而不为故功不立】虚愿不至【不求不为而欲得之虚愿也物不自至】此皆幸乐其名而无其实德者也是以尧有九佐【九官也】舜有七友【雄陶方回续牙伯阳东不訾泰不虛灵甫见陶渊明曰七臣正曰雄陶云云又见皇甫谧逸士传不訾或云不识不虛

或云不空尸子无灵甫愚谓此类皆不可深考或後人所妄造之】禹有五丞【楚辞八师三后外有益稷臯陶垂契】汤有三辅【商书伊虺二相外有谊伯仲咎咎单岂此未详】自古及今而能虚成名於天下者无有是以君王无羞亟问【亟犹数也】不愧下学【学於臣下】是故成其道德而扬功名於後世者尧舜禹汤周文王是也故曰无刑【元并作刑】刑【补曰当作形下同古书字通形民之力家语作刑朱子谓当从家语】者形刑之君也【无形谓削约之未着者也】无端者事之本也【正曰无形无端皆指实德言也】夫上见其原下通其流至圣【衍人字】人明学【明学学之明者言上见下通圣明之事】何不吉之有哉老子曰虽贵必以贱为本虽高必以下为基是以侯王称孤寡不谷是其贱之本与非夫【犹言非邪补曰疑非字当在坎字上而夫音扶属下句与下文岂非下人而尊贵士坎夫尧云云同一本作本坎无非字义明】孤寡者人之困贱下位也而侯王以自谓岂非下人【以身下人】而尊贵士与夫尧传舜舜传禹周成王任周公旦而世世称曰明主是以明乎士之贵也宣王曰嗟乎君子焉可侮哉寡人自取病耳【补曰自取病谓觸言士贵王贱】及今闻君子之言乃今闻细人之行【细人王自称正曰细人前所谓无实德不贵士者也】愿请受为弟子且顏先生与寡人游食必太牢【牛羊豕具为太牢】出必乘车妻子衣服丽都【皆美称】顏觸辞去曰夫玉生於山制则破焉【制裁断之】非弗宝贵矣然太璞不完士生乎鄙野推选则禄焉非不尊遂也【遂犹达之】然而形神不全觸愿得归晚食以当肉【晚言饥而食也其美比於食肉补曰当敌也如字】安步以当车无罪以当贵清静贞正以自虞【虞娱同乐也】制言者王也【言谓命令】尽忠直言者觸也言要道已备矣愿得赐归安行反臣之邑屋则再拜【衍而字】而辞去君子【补二字】曰觸知足矣归真【补也】反璞则终身不辱【正曰曰者觸既辞而又自言也上言大璞不完以喻士之形神不全故曰归反璞云云文意甚明添字谬】

先生王斗【齐人补曰一本标文枢镜要作王升】造门而欲见齐宣王宣王使谒者延入【谒者掌宾赞受事延引也】王斗曰斗趋见王为好势王趋见斗为好士於王何如使者复还报王曰先生徐之【使待其至正曰使无趋至】寡人请从【就之也】宣王因趋而迎之於门与入曰寡人奉先君之宗庙守社稷闻先生直言正谏不讳王斗对曰王闻之过【不如所闻】斗生於乱世事乱君焉敢直言正谏宣王忿然作色不悦有间王斗曰昔先君桓公【此桓公虽非田氏之先斗齐人也得称为先】所好者五【补补曰一本标文枢镜要有五字】九合诸侯一匡天下天子授【元作受】受【补曰当作授字通借】籍【土地人民之籍犹赐也】立为太伯【二伯之伯】今王有四焉宣王说曰寡人愚陋守齐国唯恐夫殒之【殒失也春秋传殒子辱矣】焉能有四焉王斗曰先君好马王亦好马先君好狗王亦好狗先君好酒王亦好酒先君好色王亦好色先君好士而【元作是】是【正曰姚云刘本无是字】王不好士【补曰先君好马以下说苑以为淳于髡之言小异】宣王曰当今之世无士寡人何好王斗曰世无骐驎騄耳【字书不说骐驎不载惟玉篇云马黑脊亦不言良马陆玑疏麒麟行中律吕则此马以麒麟比也騄耳八骏之一正曰玉篇单言驎尔此二字单言如诗及说文尔雅不一】王之【补】驷已备矣世无东郭俊【补曰一本作遂前有】卢氏之狗王之走狗已具矣世无毛嫱西施【庄小疏毛嫱越王嬖妾西施越女吴王姬】王宫已充矣王亦不好士也何患无士王曰寡人忧国爱民固愿得士以治之王斗曰王之忧国爱民不若王爱尺穀也【穀细縻也正曰增韵穀约纱齐三服官轻绡注今纱下章曳绮穀又章帝省齐水纨

方空穀知齐产善也说文穀细綺恐此注字误】王曰何谓也王斗曰王使人为冠不使左右便辟【便顺其所好辟避其所恶】而使工者何也为能之也今王治齐非左右便辟无使也臣故曰不如爱尺穀也宣王谢曰寡人有罪国家於是举士五人任官齐国大治【彪谓王斗之义无所取造门求见自卑甚矣而徒以趋见於咫尺之间以为高此孟子所谓不能三年而缙小功之察者也抑其陈谊迂而不切独所谓爱穀者可知耳然不若魏牟之言之慤而彪为序舍牟而取斗为牟之言出於斗也正曰王斗造门求见徒以趋见於咫尺之间为高鲍论当矣其言王不好士不可谓不切也特桓公好狗马酒色之说亦管仲不害霸之意此其所以为辩士之言而非君子之正尔爱穀之言与魏牟合又何不若之有战国论说相类者甚多牟岂果出於斗乎正曰宣王喜文学游说之士赐列第为上大夫者七十六人不治而议论稷下学士至数百千人士非不盛也然邹衍淳于髡之徒类皆诡诞无实不治而议所养非所用国何赖焉故顔福劝以贵士王斗讥其不好士有以也然若斗与福者亦未知其何如也有一孟子而不能用安用彼数百千人哉】

齐人见田骈【齐处士】曰闻先生高议【补曰恐是义字】设为不宦【设者虚假之辞】而愿为役【为骈给使】田骈曰子何闻之对曰臣闻之邻人之女田骈曰何谓也对曰臣邻人之女设为不嫁行年三十而有七子不嫁则不嫁然嫁过毕矣【毕犹已言过於嫁已矣】今先生设为不宦譬养千鍾【譬资同所资所养也昭三年注四豆为区自四以登至於釜十则鍾又?氏注四升为豆则鍾凡六斛四斗也】徒百人【徒从车者】不宦则然矣而富过毕矣田子辞【谢之也】

管燕【齐人正曰无考新序作燕相】得罪齐王谓其左右曰子孰而与我赴诸侯乎【而辞也】左右默然莫对管燕连然流涕【连与涟同泣下也】曰悲夫士何其易得而难用也田需对曰士三食不得餍【饱也】而君鵲鹜有余食【鵲舒鳧】下宫糅罗纨【下宫後宫下列糅杂纨素也】曳綺縠【綺文繒】而士不得以为缘【缘衣纯】且财者君之所轻死者士之所重君不肯以所轻与士而责士以所重事君非士易得而难用也【补曰田需见魏策与公孙衍并相者岂即此人欤说苑宗卫相齐罢归召田饶等问饶对亦与此合】

闵王【宣王子元年显王四十六年戊戌正曰此据史通监闵王元年当赧王二年视史下移十年大事记同】

昭阳为楚伐魏覆军杀将得八城【楚怀六年此元年正曰宣王二十年】移兵而攻齐陈轸为齐王【衍使字史言轸为秦使齐齐问之为齐见阳】使见昭阳再拜贺战胜起而问楚之法覆军杀将其官爵何也昭阳曰官为上柱国爵为上执珪陈轸曰异贵於此者何也【问此外复有贵者不】曰唯令尹耳【楚相也】陈轸曰令尹贵矣主非置两令尹也臣窃为公譬可也楚有祠者【祠春祭正曰高注祠祭】赐其舍人【始皇纪注主殿内小史或云侍从宾客者正曰顔师古曰舍人亲近左右之通称後遂以为私属官号】卮酒【卮器也】舍人相谓曰数人饮之不足一人饮之有余请画地为蛇先成者饮酒一人蛇先成引酒且饮乃左手持卮右手画蛇曰吾能为之足未成一人之蛇成夺其卮曰蛇固无足子安能为之足遂饮其酒为蛇足者终亡其酒今君相楚而攻魏破军杀将得八城不弱兵【言恃其强】欲攻齐齐

畏公甚公以是为名亦【元作居】居【正曰因下足字衍恐讹姚云一本去此字】足矣官之上非可重也战无不胜而不知止者身且死爵且後归【言身死後爵归於国故史言爵夺】犹为蛇足也昭阳以为然解军而去【楚记同彪谓此策虽其指为齐亦持胜之善补曰为楚为齐为公之为去声】

秦攻赵赵令楼缓以五城求讲於秦而与之伐齐齐王恐因使人以十城求讲於秦楼子恐因以上党二十四县许秦王【惠文】赵足【凡赵皆赵人】之齐谓齐王曰王欲秦赵之解乎不如从合於赵赵必背秦背秦则齐无患矣齐将封田婴於薛【定封在此三年正曰宣王二十年又说见後补曰索隐云婴诸田之别子非宣王弟也】楚王【怀】闻之大怒将伐齐齐王有辍志【集韵辍止也】公孙闱曰封之成与不非在齐也又将在楚闱说楚王令其欲封公也又甚於齐婴子曰愿委之於子公孙闱为谓楚王曰鲁宋事楚而齐不事者齐大而鲁宋小王独利鲁宋之小不恶齐大何也夫齐之削地而封田婴是其所以弱也愿勿止楚王曰善因不止【彪谓此说不可行也婴齐相也虽得薛不决裂於外犹齐地耳齐薛为一如穰侯应侯之於秦也何弱小乎其初哉正曰史齐襄王立而孟尝君中立为诸侯王畏君与连和後卒诸子争立齐魏共灭之鲍谓分封不足以弱齐未睹末流之害也】靖郭君【田婴諡正曰此据史文索隐云靖郭或封邑号汉齐王舅父驷钩封靖郭侯】将城薛客多以谏靖郭君谓谒者无为客通齐人有请者曰臣请三言而已矣益一言臣请烹【所谓鼎鑊之诛】靖郭君因见之客趋而进曰海大鱼因反走君曰客有於此【言此言外应复有正曰高注如此止无走也】客曰鄙臣不敢以死为戏君曰亡【亡无同言无此也】更言之对曰君不闻大鱼乎网不能止钩不能牵荡而失水【集韵荡放也言自放肆】则蝼蚁得意焉【蝼蚁蛄一曰螯天蝼得意饫饱也】今夫齐亦君之水也君长齐【雄长之长正曰见下】奚以薛为夫齐虽隆薛之城到於天犹之无益也【正曰一本君长有齐姚氏奚以薛为夫齐句按新序作无齐虽隆云云是盖夫无音讹又因上夫齐字混】君曰善乃辍城薛靖郭君谓齐王曰五官之计【曲礼司徒司空司马司土司寇典司五衆计其事之凡也正曰注家谓此殷制非策所指按记曾子问诸侯出命国家五官而後行注云五官五大夫典事者高曰计簿书也】不可不日听也而数览王曰说吾而厌之【言汝既说我则不得自厌故以委之正曰也字当在览下王曰说吾有缺误姚云一本作王曰日说五官吾厌之通监云不可不日听而数览也王从之已而厌之悉以委婴婴由是得专齐权】今与靖郭君【以五官之计委之补曰姚云今一作令】

靖郭君善齐貌辩【齐人补曰姚云古今人表作昆辩师古引此按一本标云修文御览北堂书钞同吕览作剧貌辩元和姓纂崑弁】齐貌辩之为人也多疵【疵病也谓过失补曰此人盖有奇节而不修细行者吕览作訾】内人弗说士尉【齐人】以证靖郭君【证谏也】靖郭君不听士尉辞而去孟尝君【婴子文补曰孟尝乃邑名在薛旁按诗居常与许即此尝也】又窃以谏【窃犹私】靖郭君大怒曰剗而类【集韵剗翦也以翦草为喻而汝也类族类】破吾家苟可慊齐貌辩者【集韵慊慊也】吾无辞为之【言有可满貌辩之意虽家族破灭犹为之不辞也】於是舍之上舍【犹甲第正曰此本高注按田文传传舍幸舍代舍索隐云并当上中下三等之客所舍之名以此推之则代舍乃上舍也】令长子御之【集韵御侍也正曰为之御也】旦暮进食数年宣【元作威下同】威王薨闵【元作宣下同】宣王立【婴之封薛在闵王初下言之薛则此不得言宣王立也正曰说见下】靖郭君之交大不善

於閔宣王辭而之薛與齊貌辯俱留無幾何齊貌辯辭而行請見閔宣王靖郭君曰王之不说嬰甚公往必得死焉齊貌辯曰固不求生也請必行靖郭君不能止齊貌辯行至齊閔宣王聞之藏怒以待之齊貌辯見閔宣王曰子【元作子曰】子曰【補曰當作日子】靖郭君之所听愛夫【愛而听用其言】齊貌辯曰愛則有之听則無有王之方為太子之時辯謂靖郭君曰太子相不仁過頤豕視【過謂丰頤過人豕多反視補曰呂氏春秋過頤豕視注頤豕不仁之人其說未詳劉辰翁云過頤即俗所謂耳後見腮豕視即相法所謂下邪偷視】若是者信反【始信後反】不若廢太子更立衛姬嬰兒郊師【補曰高注郊師衛姬子宣王庶弟】靖郭君泣而曰不可吾不忍也若听辯而為之必無今日之患也此為一至於薛昭陽請以數倍之地易薛辯又曰必听之靖郭君曰受薛於先王【封嬰於薛閔王也而曰受於先王蓋宣王有旨封之正曰史以田嬰之封在湣王三年從通監則在宣王二十二年按嬰自威王時任職用事而文之言曰君用事相齊至今三王矣三王者威宣閔也故大事記以嬰卒文立附見於閔王元年此策曰受薛於先王先王之廟在薛則是威王之世嬰已受封史亦不合索隱引紀年梁惠後元十三年四月齊威王封田嬰於薛十月齊城薛十四年薛子嬰來朝十五年齊威王薨考之史梁惠王後元十三年在今封嬰前一年不得為威王之世亦皆不合惟梁惠前十三年則正當威王時疑此處有差互而嬰之封薛則實威王之世也】虽惡於後王吾獨謂先王何【言無以告於先王】且先王之廟在薛吾豈可以先王之廟與楚乎又不肯听辯此為二閔宣王太息【長出氣也】動於顏色曰靖郭君之於寡人一至此乎寡人少殊不知此客肯為寡人來靖郭君乎齊貌辯對曰敬諾靖郭君衣宣威王之衣冠舞其劍【先時所賜補曰姚云舞劉本作帶】閔宣王自迎靖郭君於郊望之而泣靖郭君至因請相之靖郭君辭不得已而受之七日謝病強辭【強猶固】不得三日而听【王听其辭】當是時靖郭君可謂能自知人矣能自知人故人非之不为沮【集韻沮止也】此齊貌辯之所以外生【以生為外物无所愛也】樂患趣難者也【彪謂知人之難貴於知其心齊人曰辯之為人多疵論其迹也靖郭君獨深善之不可奪知其心也士為知己者死此辯所以不求生欵正曰心迹之論未當說見章首條下補曰趣即趨】

秦伐魏陳軫合三晉而東謂齊王曰古之王者之伐也欲以正天下而立功名以為後世也今齊楚燕趙韓梁六國之遞甚也【遞言其更相伐】不足以立功名适足以強秦而自弱也非山東之上計也能危山東者強秦也不忧強秦而遞相罷弱【罷疲同】而兩歸其國於秦【兩彼我也】此臣之所以為山東之患天下為秦相割【以割肉喻其相伐】秦曾不出力【補曰北山何先生標大事記云力一作刀】天下為秦相烹【煮也】秦曾不出薪【喻秦无所事】何秦之智而山東之愚邪愿大王之察也古之五帝三王五霸之伐也伐不道者今秦之伐天下不然必欲反之【反古】主必死辱【死於辱】民必死虜今韓梁之目未嘗乾【戰死者多也】而齊民獨不也非齊親而韓梁疏也齊遠秦而韓梁近今齊將近矣今秦欲攻梁絛安邑【絛屬河東】秦得絛安邑以東下河必表里河山【補】而東攻齊舉齊屬之海【舉言得其地】南面而孤楚韓梁【三國在秦之南孤謂稱孤以臣之正曰諸國勢不得合故曰孤】北面而孤燕趙【絕句】齊无所出其計矣愿王熟慮之今三晉已合矣復為兄弟約而出銳師以戍梁絛安邑此萬世之計也齊非急以銳師合三晉必有後忧三晉合秦必不敢攻梁必南攻楚楚秦構難三晉怒齊不與已也必東攻齊此臣之所謂齊必有大忧不如急以兵合於三晉齊王敬諾果以兵合於三晉【秦惠後七年韓趙魏燕齊共攻秦此六年正曰

按大事记显王四十七年当秦惠後三年魏惠後十三年齐宣二十一年秦伐魏取曲沃平周
解题軫说齐不知在何年以其说明切附见於此軫与张仪相恶去秦事楚而怀王合六国伐
秦距此四岁軫说或在此时未可知也愚尝按赵策谓赵王章韩策或谓韩王章燕策或献书
燕王章皆劝三晋诸国合从其论秦之情与从国事势晓畅深切如虎即禽鱼比目引车同舟
之譬说殊而又合如秦之欲伐韩梁东闚周室甚惟寐忘之如约山东皆以锐师戍韩梁如秦
见三晋之坚必南伐楚其言皆合是必一时之事一人之言也考之此策秦伐魏陈軫合三晋
而东谓齐王其论山东之愚秦之智为秦相割而秦不出力为秦相烹而秦不出薪则亦三策
之取譬也秦欲攻梁绦安邑今三晋已合约出锐师以戍梁三晋合秦必南攻楚则亦三策所
言之事也况策无说楚魏之辞而说四国者皆有戍梁之约攻楚之料於是窃信其并为陈軫
之言无疑也楚怀王受张仪商於之欺軫谏不听谏攻秦又不听其後怀王入秦屈平昭睢谏
而軫无言意其必已去楚矣今言楚王入秦正诱会武关之时而軫力为魏说诸侯是时固在
魏也軫善楚者约从独遗楚又劝三晋之移祸於楚岂客不为楚计哉盖其知楚谋之不可为
入秦之不可止而诸国之摈秦非特为魏所以为楚所谓阳挤而陰助之者欤苏氏兄弟称说
多浮辞数策非軫不能大事记既着軫说附於显王四十七年於韩策谓论秦最得其情因其
言梁绦安邑附见於赧王二十九年魏献安邑之後皆不能的指其时今徵以楚王入秦一言
当在赧王十六年盖秦取曲沃平周距五国伐秦前四年慎靓王三年五国合从实怀王为长
苏秦之约而无与於軫也怀王入秦次年田文合韩魏伐秦犹能成一战之功未必不因軫之
说也反覆参合可决其为軫矣独燕策言秦伐韩而中山亡此事据史乃中山未亡四年之前
且年表灭中山在主父死後而出家先一年大事记取世家史迁所纪固不能无失赵武灵王
十九年初胡服二十年二十一年二十三年二十五年连岁攻中山略地得城邑二十六年复
攻中山怀地北至燕代西至云中九原二十七年传国子何称主父欲略胡地袭咸阳遂诈入
秦是後已不言攻中山矣惠文三年乃书灭中山迁其王於肤施意者攘地之时中山已定而
未废其君後四年始迁其君如西周既灭次年迁其君於 狐之类通监纲目武灵二十五年
书中山君奔齐而魏策云齐魏伐楚而赵亡中山政是年事则是其国已亡特其君未得後乃
得之燕策所谓中山亡非舛也故愚并着其说以候知者考焉中山余见燕策】

韩齐为与国张仪以秦魏伐韩【仪复相时补曰伐韩下有缺文必着韩之请救以下文许韩
使者知之】齐王曰韩吾与国也秦伐之吾将救之田臣思曰王之谋过矣不如听之子噲【
燕王】与子之国【之燕相】百姓不戴诸侯弗与秦伐韩楚赵必救之是天下【补曰下字
衍一本无大事记从之】以燕赐我也【我我齐】王曰善乃许韩使者而还【补曰一本作
遣是】之韩自以得交於齐遂与秦战楚赵果遽起兵而救韩齐因起兵攻燕三十日而举燕
国【燕噲七年此十年补曰此齐宣王所谓五旬而举之者大事记改三为五补曰按史田齐
世家桓公五年秦魏攻韩韩求救於齐桓公召大臣而谋驺忌曰不若勿救段干朋曰不救则
韩且折而入於魏田臣思曰秦魏攻韩楚赵救之是天以燕与齐也因袭燕取桑邱策即本章
○齐威王二十六年魏围邯鄲赵求救於齐威王召大臣而谋驺忌曰不如勿救段干朋曰不
救则不义且不利云云不如南攻襄陵以弊魏邯鄲拔而乘魏之敝王从其计败魏桂陵策邯
鄲之难章威王作田侯段干朋作纶余略同○宣王二年魏伐赵赵当作韩说见前赵与韩亲
共击魏赵不利战於南梁韩请救於齐宣王召大臣而谋驺忌子曰不如勿救田忌曰不如早
救之孙子曰云云宣王曰善起兵击之败之马陵策南梁之难韩请救於齐田召大臣而谋张

巧曰不如早救田臣思曰云云余皆略同○史凡三节与策三章互有同异邯鄲之难与威王条合南梁之难与宣王条合但史为张巧田臣思策为驺忌孙子惟桓公取桑丘与威王伐魏宣王伐燕相乱按威王二十一年邹忌始相上距桓公取桑丘之岁二十余年忌岂得已为大臣史误以邯鄲一章剿入之明矣田臣思即田忌宣王二年战马陵後出奔至二十九年子哙之役凡二十七年不应复见使忌果在齐则王安得弃之而将章子策或误载其名也且桓公时秦魏攻韩楚赵救之齐不救因而袭燕宣王时秦魏伐韩楚赵救之齐不救因而举燕何其事之脗合如此是必可疑考之桓公时秦魏攻韩事无见年表魏韩赵伐齐至桑丘齐伐燕取桑丘意者齐取桑丘而韩魏赵伐之韩且与赵魏攻齐则与求救於齐之文戾且田臣思之辞曰是天以燕与齐而仅为取桑丘乎是史亦误以宣王伐燕章附之桓公也故大事记书韩魏赵伐田齐至桑丘而不书齐取桑丘於宣王伐燕则引策之文谓秦伐韩楚赵救韩即岸门之邯而齐之取燕虽因子哙之乱亦由诸侯连兵不解无与竞者也故愚具列史策所载而着大事记之说俾览者得以考正焉正义云桑丘在易州遂城县东】

张仪为秦连横【仪传连横在郑袖出仪後说楚魏韩齐赵卒说燕归报而惠王死则此当秦十四年此十三年正曰湣王二年】说【补补曰此处当有说字】齐王曰天下强国无过齐者大臣父兄殷衆富乐无过齐者然而为大王计者皆为一时说而不顾万世之利从人说大王者必谓齐西有强赵南有韩魏负海之国也地广人衆兵强士勇虽有百秦将无奈我何大王览其说而不察其至实夫从人朋党比周【比周亲周相庇也与论语意异补曰犹传言相与比周】莫不以从为可臣闻之齐与鲁三战而鲁三胜国以危亡随其後【鲁战胜齐史传不书时鲁故在有亡形耳正曰此取譬之说犹孟子言邹人与楚人战与下文不同】虽有胜名而有亡之实是何故也齐大而鲁小今赵之与秦也犹齐之於鲁也秦赵战於河漳之上【史不书说文浊漳出上党长子鹿谷山东入清漳清漳出沽山大龟谷入河南漳出南郡】再战而再胜【絶句正曰误当以胜秦句下同】秦战於番吾之下【不书苏秦传注常山有蒲吾】再战而再胜秦四战之後赵亡卒数十万邯鄲仅存虽有胜秦之名而国破矣是何故也秦强而赵弱也今秦楚嫁子取妇为昆弟之国【仪说怀王亦云然】韩献宜阳魏效河外赵入朝龟池【属弘农补曰今河南府龟池县水经注谷水出崤东马头山谷阳谷东北流历龟池川汉景帝因崤龟之地以为县龟弥尽弥兗二反】割河间以事秦【据此则说赵当在齐前】大王不事秦秦驱韩魏攻齐之南地悉赵涉河关【悉悉起其兵河关属金城史作清河是也正曰河之关亦通】指博关【苏秦传注齐威六年晋伐齐至博陵东郡有博平以为博关今按秦山有博亦近齐地补曰後语注云今兗州博城县有古关是博关司马贞云在博州】临菑即墨【属胶东国补曰今莱州即墨县】非王之有也国一旦被攻虽欲事秦不可得也是故愿大王熟计之齐王曰齐僻陋隐居托於东海之上未尝闻社稷之长利今大客【礼大行人掌大客之仪】幸而教之请奉社稷以事秦献鱼盐之地三百於秦【三百里也补曰一本有里字○为秦之为去声】

张仪事秦惠王惠王死武王立左右恶张仪曰仪事先王不忠言未已齐让又至【仪尝曰仪之所甚憎无大齐王则仪齐所恶也而秦任之故齐以此责秦】张仪【补曰一本此下有闻之字】谓武王曰仪有愚计愿效之王王曰奈何曰为社稷计者东方有大变【言有兵】然後王可以多割地【割诸侯地】今齐王甚憎【衍张字】张仪仪之所在必举兵伐之故仪

愿乞不肖身而之梁齐必举兵伐之齐梁之兵连於城下【连谓不解】不能相去王以其间伐韩入三川出兵函谷而无伐以临周祭器必出【周有先周宗社礼器诸侯所不备今必出以赂秦】挟天子按图籍此王业也王曰善乃具革车三十乘纳之梁齐果举兵伐之梁王大恐【补曰後语作魏襄王】张仪曰王勿患请令罢齐兵乃使其舍人冯喜之楚藉使之齐齐楚之事已毕【事使事】因谓齐王王甚憎张仪虽然厚矣王之托仪於秦王也齐王曰寡人甚憎张仪仪之所在必举兵伐之何以托仪也对曰是乃王之托仪也仪之出秦因与秦王约曰为王计者东方有大变然後王可以多割地齐王甚憎仪仪之所在必举兵伐之故仪愿乞不肖之身而之梁齐必举兵伐梁梁齐之兵连於城下不能去王以其间伐韩入三川出兵函谷而无伐以临周祭器必出挟天子按图籍是王业也秦王以为然与革车三十乘而纳仪於梁而果伐之是王内自罢【音疲劳师故】而伐与国广邻敌以自临而信仪於秦王也此臣之所谓托仪也王曰善乃止【仪传有彪谓此计之必售策之必行者也仪之所说於时有妾妇之所羞市人之所不为者若誉南后以取金欺商於以卖楚皆可鄙也惟此为文无害仪亦明年死矣宜其言之善欤补曰大事记秦惠王死公孙衍欲穷张仪见秦策仪之逐其衍之力欤正曰鲍谓将死言善尔反覆诡诈之术死犹未已何善之可称】

犀首以梁与齐战於承匡【本宋地见陈留襄邑注补曰大事记襄陵故宋之承匡襄牛之地宋襄公所筑故曰襄陵】而不胜张仪谓梁王【哀正曰襄】不用臣言以危国王因相仪【魏九年此十四年正曰此四年】仪以秦梁之齐合横亲【补曰犹言从亲】犀首欲败【败其横事】谓卫君【嗣君】曰【时仪过卫】衍非有怨於仪值所以为国者不同耳【值适当也】君必解衍【解说衍於仪使之释怨】卫君为告仪仪许诺曰与之参坐於卫君之前【三人合坐】犀首跪行为仪千秋之祝明日张子行犀首送之至於齐疆齐王闻之怒於仪曰衍也吾讐【衍尝与齐战故】而仪与之俱是必与仪【补曰一本与衍】鬻吾国矣遂不听【彪谓此一时岌乎殆哉一言一动尽为机穽岂可与同羣哉此在衍术中而不悟是以知仪之疎也故其智暗於秦其辨屈於軫而此谋败於衍也补曰为仪之为如字】

楚王死【怀王】太子在齐质【楚二十九年使太子质於齐名横是为顷襄王按史楚三十年怀王入秦秦留之明年顷襄王立立三年怀王乃死与此駁】苏子【元作秦下并同秦死至是二十年矣此非代则厉也补曰字误下并同】秦谓薛公【田文】曰君何不留楚太子以市其下东国【楚策云与我东地盖楚国之东其地近齐楚地高而此下】薛公曰不可我留太子郢中立王然则是我抱空质而行夫不义於天下也苏子秦曰不然郢中立王君因谓其新王曰与我下东国吾为王杀太子不然吾将与三国共立之【齐尝与秦韩魏败楚三国谓此重立】然则下东国必可得也苏子秦之事【此着书者叙说】可以请行可以令楚王【楚新王】亟入下东国可以益割於楚可以忠太子而使楚益入地可以为楚王走太子可以忠太子使之亟去可以恶苏子秦於薛公可以为苏子秦请封於楚可以使人说薛公以善苏子可以使苏子【此二子字因旧】自解於薛公苏子秦谓薛公曰臣闻谋泄者事无功计不决者名不成今君留楚【补】太子者以市下东国也非亟得下东国者则楚之计变变则是君抱空质而负名於天下也【负荷不义之名】薛公曰善为之奈何对曰臣请为君之楚使亟入下东国之地楚得成【得犹与也齐求地而楚与之得成】则君无败矣薛公曰善因遣之故曰可以请行也【此七字元作注字此类亦着书者叙说补曰叙说者分其文而属

之故以此着例姚云曾此七字不作注】谓楚王【以为怀王则上言已死以为项襄则项襄即太子也以为新立王则项襄外无他王未详】曰齐欲奉太子而立之臣观薛公之留太子者以市下东国也今王不亟入下东国则太子且倍王之割【倍多於前】而使齐奉已楚王曰谨受命因献下东国故曰可以使楚亟入地也谓薛公曰楚之势可多割也薛公曰奈何请告太子其故【谓告苏子辞也告以楚献地之故】使太子谒之君【君薛公也使太子白以亦欲割地】以忠太子使楚王闻之可以益入地故曰可以益割於楚谓太子曰齐奉太子而立之楚王请割地以留太子齐少其地太子何不倍楚之割地而资齐齐必奉太子太子曰善倍楚之割而延齐【延长行也故有饶益意】楚王闻之恐益割地而献之尚恐事不成故曰可以使楚益入地也谓楚王曰齐之所以多割地者挟太子也今已得地而求不止者以太子权王也【权者轻重所在】故臣能去太子【使人去齐】太子去齐无辞必不倍於王也【多割】王因驰强齐而为交【驰亟往】齐辞【齐之说】必听王然则是王去讐而得齐交也楚王大喜曰请以国因【因苏子交齐】故曰可以为楚王使太子亟去也谓太子曰夫割楚者王也【割断齐也犹制补曰副本多丸反史汉作制字正义论字例云】以空名市者太子也齐未必信太子之言也而楚功见矣【功谓入地】楚交成太子必危矣太子其图之太子曰谨受命乃约车而暮去故曰可以使太子急去也苏子秦使人请薛公曰夫劝留太子者苏子秦也苏子秦非诚以为君也且以便楚也【太子去楚之便也】苏子秦恐君之知之故多割楚以灭迹也【没其使楚之迹】今劝太子去【补补曰一本标晁本有】者又苏子秦也而君弗知也臣窃为君疑之薛公大怒於苏子秦故曰可以使人恶苏子於薛公也奉王而代立楚太子者【代太子立为王】又苏子秦也割地因约者【因为之约齐补补曰一本固约】又苏子秦也忠王而走太子者又苏子秦也今人恶苏子秦於薛公之以其为齐薄而为楚厚也愿王之知之楚王曰谨受命因封苏子秦为武贞君【封以美名非邑正曰姚注楚邑】故曰可以为苏子秦请封於楚也又使景鲤请薛公曰君之所以重於天下者以能得天下之士而有齐权也今苏子秦天下之辩士也世与少有【言如之者少】君因【补补曰姚云刘作固】不善苏子秦则是围塞天下士而不利说途也夫不善君者且奉苏子秦而於君之事殆矣【於犹与】今苏子秦善於楚王而君不蚤亲则是与楚为讐也【此亦非薛公之恐楚王立未能自定安能难齐哉故彪於楚策谓苏子以此策干薛公不见用世犹载其语也正曰谓不亲楚则与楚为讐以事理言尔干薛公不用世犹载其语亦臆度之辞】故君不如因而亲之贵而重之是君有楚也薛公因善苏子秦故曰可以为苏子秦说薛公以善苏子秦【按此则怀王死楚立新王太子卒不得立而项襄非太子也史不谓然故其书东国之事亦略补曰史称怀王入秦而项襄立策独以为怀王死而项襄立前後屡见窃以事势言之楚人知怀王之必不归而秦要之以割地故立王以絶秦而丧君有君所以靖国项襄之立非怀王死後明矣史谓当时以诈赴之策犹仍之尔特所谓新王及太子不可晓然以逐节考之皆有事实又非饰说也或者太子未返之时郢中立王邪姑缺所疑○为之为交为武为讐之为如字】

齐王夫人死有七孺子者皆近【言其亲幸】薛公欲知王所欲立乃献七珥【珥也所以充耳】美其一明日视美珥所在劝王立为夫人【补补曰与楚策谓昭鱼云云类韩非子淮南子皆有】

孟尝君将入秦【传言秦昭王闻其贤求见之故将入】止者千数而弗听苏代【元作秦今

并从传】秦【补曰字误宜作代下同後语并作代】欲止之孟尝君曰人事者吾已尽知之矣吾所未闻者独鬼事耳苏代秦曰臣之来也固不敢言人事也固且以鬼事见君孟尝君见之谓孟尝君曰今臣来过於淄上【淄水出太山莱芜原】有土偶人【偶相人也比土为之正曰索隐云偶类於人也】与桃梗【集韵梗略也荒也此盖枯木海外经东海中有山名度索有大桃树屈蟠三千里枝间东北曰鬼门万鬼所由往来上有二神人曰神荼郁垒主治害鬼故使世人刻桃画其首正岁置门上辟鬼正曰梗枝梗也赵策苏秦说李兑作土梗木梗谓木梗曰汝非木之根则木之枝是枝根皆可言梗此谓刻桃木为人也史及说苑作土偶人木偶人索隐谓以土偶比涇阳君木偶比孟尝君时秦昭王使涇阳君为质以求孟尝○高诱注荼一本作余】相与语桃梗谓土偶人曰子西岸之土也挺子以为人【挺拔也拔於土中正曰挺他鼎反直也艺文类聚及晁本作延】至岁八月降雨下【降大雨自上下也异於飘洒】淄水至则汝残矣【残败坏也】土偶曰不然吾西岸之土也土则复西岸耳今子东国之桃梗也刻削子以为人降雨下淄水至流子而去则子漂漂者将如何耳【如往也不知其所在正曰如何止是语助】今秦四塞之国譬如虎口而君入之则臣不知君所出矣孟尝君乃止【传有补曰此时不行其入秦盖在後】

孟尝君在薛【史言文代立在薛时未相也正曰代立在薛归老亦在薛此不可知为何时】荆人攻之淳于髡为齐使於荆还反过薛孟尝君【补补曰姚云一本有君字】令人体貌【有礼容也】而郊迎之谓淳于髡曰荆人攻薛夫子弗忧文无以复侍矣【言且死】淳于髡曰敬闻命至於齐毕报【以使事悉报齐王】王曰何见於荆对曰荆甚固【言其不通】而薛亦不量其力王曰何谓也对曰薛不量其力而为先王立清庙【诗注祭有清德之宫正曰按本文有清明之德者之宫】荆固而攻之清庙必危故曰薛不量力而荆亦甚固齐王和其顔色曰嘻【集韵痛也正曰徐云痛而呼之言也和其顔色听其言也痛而呼之伤宗庙也初不相碍】先君之庙在焉疾兴兵救之颠蹶之请【此着书者词也言善说者不劳而功颠倒蹶偃也言其请救之遽】望拜之谒【望而拜之言谒之恭】虽得则薄矣【言他人请谒虽有得不如髡之厚】善说者陈其势言其方【方大略也】人之急也【言应之疾】若自在隘窘之中【隘险也】岂用强力哉

孟尝君奉夏侯章【齐人正曰无考下同】以四马百人之食【言飧之厚】奉之甚欢夏侯章每言未尝不毁之也或以告孟尝君孟尝君曰文有以事夏侯公矣勿言【言事之厚彼不害我】董之繁菁【齐人】以问夏侯公夏侯公曰孟尝君重非诸侯也而奉我四马百人之食我无分寸之功而得此然吾毁之以为之也君所以得为长者【贤有容之称高祖曰为其无不长者】以吾毁之也【补曰一本以吾毁之者也者字恐是长者字下脱衍在此】吾以身为孟尝君岂得待【元作持补曰姚云刘作岂待言也哉是持者待之讹得者待之讹也】言也【彪谓君子所以报知我者亦多术矣岂必毁之而後为为之哉此其说有似侯嬴而不及嬴非正议也】

孟尝君讌坐【讌合语也正曰讌即燕】谓三先生曰愿闻先生有以补文阙者也【补曰高注先生长老先已以生者也】一人曰訾天下之主【訾不称意也言孟尝有不得意於诸侯者】有侵君者【侵凌之也】臣请以臣之血湔其衽【湔溅同集韵水激也】田瞽曰车轶

之所能至【轶辙也】请掩足下之短【衍者字】者【补曰疑当在至字下】诵足下之长千乘之君万乘之相其欲有君也【有言欲得之】如使而弗及也【若有使之如恐弗及】滕【元作胜】胜臀【元作□字书无之亦可作股齐人】□【补曰姚云恐作□春秋传郑游贩或作□】曰臣愿以足下之府库财物收天下之士能为君决疑应卒【与猝同】若魏文侯之有田子方段干木也【二人文侯师友】此臣之所为君取矣【求以此为孟尝所取正曰为孟尝取此人也】

孟尝君舍人有与君之夫人相爱者【夫人姬媵之过称非其配也与下十妃同】或以问孟尝君曰为君舍人而内与夫人相爱者亦甚不义矣君其杀之君曰睹貌而相说者人之情也其错之【错措同也】勿言也居期年君召爱夫人者而谓之曰子与文游久矣大官未可得小官公又弗欲卫君【嗣君】与文布衣交【言交於未贵时】请具车马皮币【皮羔狐之属宗伯孤执皮帛正曰羔乃生贄狐皮无据礼注皮帛者束帛而表以虎豹皮为饰宗伯之制恐难引以言此高注皮鹿皮帛束帛】愿君以此从卫君游舍人【补三字】游於卫甚重齐卫之交恶卫君甚欲约天下之兵以攻齐是人谓君曰孟尝君不知臣不肖以臣欺君【欺者已不肖而孟尝言其贤也】且臣闻齐卫先君刑马压羊【杀马其血又压羊杀之以盟使谕者如此正曰高注压亦杀也】盟曰齐卫後世无相攻伐有相攻伐者令其命如此今君约天下之兵以攻齐是足下背先君盟约而欺孟尝君也愿君勿以齐为心君听臣则可不听臣若臣不肖也【言或以此人为不肖补曰若疑字讹】者辄以颈血湔足下衿【交衽也】卫君乃止齐人闻之曰孟尝君可语【言可与语正曰姚云语刘作谓宜至矣字句】善为事矣转祸为功【彪谓周衰礼义消亡以若孟尝者为能爱士爱则爱矣然非礼之爱也以若舍人者为能强争强则强矣然亦非义之强也补曰事亦可丑而论着者以为美谈邪袁盎从史事类此】

孟尝君有舍人而弗说欲逐之鲁连【齐人仲连】谓孟尝君曰猿猕猴错木【言自置木上补曰错木据水一句错舍置也】据水则不若鱼鼃【据犹处下衍处字】处【补曰姚本无或上据字讹而脱在此作处水胜】历险乘危则骐驎不如狐狸曹沫【衍之字】之奋三尺之劔一军不能当【鲁记庄公与齐桓公会柯沫执匕首劫桓公归鲁侵地】使曹沫释其三尺之劔而操铍鋸与农人居墉亩之中【墉田埒补曰铍七遥反与锹同鋸呼高反说文拔去田草也即薅】则不若农夫故物舍其所长之其所短【之犹於】尧亦有所不及矣今使人而不能则谓之不肖教人而不能则谓之拙拙则罢之不肖则弃之使人有弃逐不相与处【言党友以此士见弃逐不屑与处】而来害相报者【弃逐者必之他国自彼来而害我报其弃逐之怨】岂非世之立教首也哉【言後人视此为戒】孟尝君曰善乃弗逐【彪谓仲连立言士也言必有中】

孟尝君出行国【按行之行兼相他国故正曰行当去声】至楚献象床【象齿为床】郢之登徒【楚官也好色赋登徒子注以为姓非正曰屈平为左徒考烈王以左徒为令尹鲍见此故以登徒为官名未见所据然彼云大夫登徒子则非官名】直使送之【直犹当】不欲行见孟尝君门人公孙戍曰【补曰戍音恤】臣郢之登徒也直送象床象床之直千金伤此若髮漂【漂飘同言其细若丝髮补曰姚云别本作标】卖妻子不足偿之足下能使仆无行先

人有宝劔愿得献之公孙戍【补】曰诺入见孟尝君曰君岂受楚象床哉孟尝君曰然公孙戍曰臣愿君勿受孟尝君曰何哉公孙戍曰小国【补曰小国疑当作大国後语作五国盖首句作出行五国也】所以皆致相印於君者闻君於齐能振达贫穷有存亡继絶之义小国英杰之士【才出万人曰英千人曰杰】皆以国事累君【累犹缕缕之以事所以累之】说君之义慕君之廉也今君到楚而受象床所未至之国将何以待君臣戍愿君勿受孟尝君曰诺公孙戍趋而去未出至中闺【特立之户上圜下方】君召而返之曰子教文无受象床甚善今何举足之高志之扬也公孙戍曰臣有大喜三重之宝劔一【重言三喜外复有此】孟尝君曰何谓也公孙戍曰门下百数莫敢入谏臣独入谏臣一喜谏而得听臣二喜谏而止君之过臣三喜输象床【输亦送也】郢之登徒不欲行许戍以先人之宝劔孟尝君曰善受之乎公孙戍曰未敢曰急受之因书门版曰有能扬文之名止文之过私得宝於外者疾入谏【彪谓孟尝君於是能立德矣吾知欲止吾过而已彼得宝於我庸何伤且谏者士之所难因得宝而摧折之後孰敢以过闻乎吾哉】

齐人有冯煖【史作驩并况袁反补曰煖即媛故媛或作喧】者贫乏不能自存使人属孟尝君【属嘱同】愿寄食门下孟尝君曰客何好曰客无好也曰客何能曰客无能也孟尝君笑而受之曰诺左右以君贱之也食以草具【草不精也具馔具正曰草莱也陈平传恶草具注去肴肉云云】居有顷倚柱弹其劔【补曰下文例之疑当有缺字】歌曰长铗归来乎【铗劔把也欲与俱去补曰庄子音义铗从棱向刃】食无鱼左右以告孟尝君曰食之比门下之客【补曰列士传孟尝君厨有三列上客食肉中客食鱼下客食菜○一本比门下之鱼客】居有顷复弹其铗歌曰长铗归来乎出无车左右皆笑之以告孟尝君曰为之驾比门下之车客【乘车之客】於是乘其车揭其劔【集韵揭举也担也】过其友曰孟尝君客我【待我以客】後有顷复弹其劔铗歌曰长铗归来乎无以为家【补曰吴氏韵补家叶工乎反】左右皆恶之以为贪而不知足孟尝君问冯公有亲乎对曰有老母孟尝君使人给其食用无使乏於是冯煖不复歌後孟尝君出记【记疏也】问门下诸客谁习计会【计会会总合也正曰会古外反周礼司会注大计也小宰要会注计最之簿书月计曰要岁计曰会】能为文收责於薛者乎【贵债同集韵逋财也】冯煖署曰能【署书也】孟尝君怪之曰此谁也左右曰乃歌夫长铗归来者也孟尝君笑曰客果有能也【言果则孟尝固意其能也】吾负之未尝见也请而见之谢曰文倦於是【是谓国事正曰一本是作事盖因音而讹说闵王章则是作则事亦此类】愤於忧【愤溃同愤乱也以忧思昏乱】而性憊愚【憊当作懦集韵弱也】沈於国家之事开罪於先生【得罪於煖自我啓之补曰沉没溺也下沉於义同】先生不羞乃有意欲为收责於薛乎冯煖曰愿之於是约车治装载券契而行【券亦契契别书之以刀判其旁】辞曰责毕收以何市而反孟尝君曰视吾家所寡有者驱而之薛使吏召诸民当偿者悉来合券券徧合赴【凡券取者与者各收一责则合验之徧合矣乃来听命补曰一本赴作起则起属下文谓作起而矫命也合读起句亦通】矫命【汲黯传注矫托也托言孟尝之命】以责赐诸民因烧其券民称万岁【祝孟尝也】长驱到齐【行不留也】晨而求见孟尝君怪其疾也衣冠而见之曰责毕收乎来何疾也曰收毕矣以何市而反【孟尝问也】冯煖曰君云视吾家所寡有者臣窃计君宫中积珍宝狗马实外廐美人充下陈【陈犹列也】君家所寡有者以义耳窃以为君市义孟尝君曰市义奈何曰今君有区区之薛不拊爱子其民【拊循犹摩也】因而贾利之臣窃矫君命以责赐诸民因烧其券民称万岁乃臣所

以为君市义也孟尝君乃【补曰一本作不】说曰诺先生休矣【休息也】後期年齐王谓孟尝君曰寡人不敢以先王之臣为臣【补曰此遣其就国而为之辞犹汉世所谓列侯亦无由教训其民】孟尝君就国於薛未至百里民扶老携幼迎君道中终【元作正】正日【补曰一本无此一字】孟尝君顾谓冯煖先生所为文市义者乃今日见之冯煖曰狡兔有三窟仅【元作今补曰姚本今作仅】得免其死耳今有一窟未得高枕而卧也请为君复凿二窟孟尝君予车五十乘金五百斤西游於梁谓梁【元作惠】惠王【昭正曰文奔魏在昭王时此固辞不往事必在前史作秦王】曰齐放其大臣孟尝君【此非当时所称追书云尔】於诸侯先迎之者富而兵强於是梁王虚上位以故相为上将军【补曰徙故相为上将军而虚相位以待孟尝也】遣使者黄金千斤车百乘往聘孟尝君冯煖先驱诫孟尝君曰千金重币也百乘显使也齐其闻之矣梁使三反孟尝君固辞不往也齐王闻之君臣恐惧遣太傅【本周官此齐大臣也】齎黄金千斤文车二驷【文彩绘也】服劔一【王所自佩者】封书【补曰一本书下无一字则上当以封字句】谢孟尝君曰寡人不祥被於宗庙之崇沈於谄谀之臣开罪於君寡人不足为也愿君顾先王之宗庙姑反国统万人乎【集韵统摄理也】冯煖诫孟尝君曰愿请先王之祭器立宗庙於薛【前自靖郭君时既立庙矣今又请立则所谓宗庙者非一主也】庙成还报孟尝君曰三窟已就君姑高枕为乐矣孟尝君为相数十年无纖介之祸者【介独也独则不衆故为微细之词一说喻草介也正曰介芥通】冯煖之计也【孟尝传有彪谓能者客之人孰不能客无能者孟尝於是为不可几也煖之市义贤矣而为之营窟则亦声利之客耳嗟乎气俗之移人莫觉悟也以煖之贤而不能自擢於衆况不贤者乎补曰史文稍异末无三窟之说为胜正曰冯公自言无能非真无能也孟尝盖已知之故闻其署则曰客果有能也魏子子栗冯公焚券孟尝卒蒙其力百乘之家不畜聚敛之臣岂迂也哉○食以食之之食音嗣为君为文足为之为去声】

孟尝君逐於齐而复反【此三十年孟尝奔薛此言复反传言王召之因谢病老於薛与此駁正曰二十年】譚拾子【齐人】迎之於境谓孟尝曰君得无有所怨於齐士大夫孟尝君曰有君满意杀之乎【拾子借以杀之为愜乎】孟尝君曰然譚拾子曰事有必至理有固然君知之乎孟尝君曰不知譚拾子曰事之必至者死也理之固然者富贵则就之贫贱则去之此事之必至理之固然者请以市谕市朝则满夕则虚非朝爱市而夕憎之也求存故往【所求者存故往趋之】亡故去愿君勿怨孟尝君乃取所怨五百牒【牒札也书所怨人】削去之不敢以为言【冯驩传略同以此策及驩传考之盖反而後谢病也】

苏子【元作秦史作代是】秦【补曰字误】自燕之齐【此三十六年正曰二十六年】见於章华【补曰姚及一本作华章】南门【史作东门注齐都赋小城北门不知是一门非也补曰括地志齐城东有闾门武鹿章华之门】齐王曰嘻【集韵有所多大之声正曰叹声】子之来也秦使魏冉致帝【致帝号於齐】子以为何如对曰王之问臣也卒而【与猝同】而患之所从往【补曰一本作生是也】者微【患在後故言从往与从来异也今未着故言微】今不听是恨秦也【违秦秦恨之】听之是恨天下也不如听之以为【元作卒也】卒秦【为犹善正曰卒成秦之事】勿庸称也【庸用也】以为天下秦称之天下听之王亦称之先後之事帝名为无伤也【虽称有先后无害於帝】秦称之而天下不听王因勿称【衍其字】其於以收天下此大资也【齐记三十六年有彪谓此策自为智则明为人谋则忠苏

张之巨擘也正曰受帝号以顺秦而不称以收天下无非诈谋耳补曰子以为之为如字】

苏子【元作秦】秦【补曰字误史作代】谓齐王曰齐秦立为两帝王以天下为尊秦乎且尊齐乎王曰尊秦释帝【苏子问】则天下爱齐乎且爱秦乎王曰爱齐而憎秦两帝立【亦问辞】约伐赵孰与伐宋之利也对曰伐宋利【补此五字正曰姚云刘本有王曰不如伐宋六字】对曰夫约然【然其伐宋之约补曰史作夫约钧然言齐秦俱相约如此一本无然字愚恐约钧字讹无然字而以约与连下文读为是】与秦为帝而天下独尊秦而轻齐齐释帝则天下爱齐而憎秦伐赵不如伐宋之利故臣愿王明释帝以就天下倍约侯秦【倍背同侯侯同集韵弃也补曰侯侯侯古通用策多有後放此】勿使争重而王以其间举宋夫有宋则卫之阳城危【汝南颍川皆有正曰非卫地史作阳地注濮阳之地】有淮北【淮水之北淮出平氏桐栢正曰淮出南阳平氏县胎簪山禹自桐栢导之东会泗沂入海】则楚之东国危有济西【庄十八注济水之西】则赵之河东危【赵河之东非郡也】有陰平陆【陰属南阳正曰陰即陶说见赵策】则梁门不啓【大梁之门】故释帝而貳之以伐宋之事【貳不与秦合也秦约伐赵而此伐宋】则国重而名尊燕楚以刑服【刑犹威也言畏威而服补曰姚本刑作形】天下不敢不听此汤武之举也敬秦以为名【非实敬之】而後使天下憎之此所谓以卑易尊者也愿王之熟虑之也【齐记与上为一章今详上章犹欲听秦此章决欲侯之非一日之谈为二章可也】

苏子【元作秦】秦【补曰字误说见後姚云一本无此二字】说齐闵王曰臣闻用兵而喜先天下者忧【为天下先】约结而喜主怨者孤【为约以结与国而伐人人必怨之又为之主衆所不与也故孤】夫後起者藉也【藉言有所资权是也】而远怨者时也【得其时也有人怨之则虽欲乘时不能也】是以圣人从事必藉於权【权者事之宜重之所在也上言後起者藉藉此而已】而务兴於时夫权藉者万物之率也【率帅同犹长也】而时势者百事之长也故无权藉倍时势【倍背同】而能事成者寡矣今虽干将莫邪【博物志干将阳龙文莫邪陰漫理此二劒吴王使干将作干将越人莫邪其妻亦善作劒】非得人力则不能割剗矣【剗利伤也】坚箭利金不得弦机之利则不能远杀矣矢非不銛【集韵利也】而劒非不利也何则权藉不在焉何以知其然也昔者赵氏袭卫车舍人【主车者】不休传【传驿递也言其警急】卫国城割平【言城守割地求成平成也】卫八门土而二门堕矣【补曰堕许规反】此亡国之形也卫君跣行告遯於魏【遯愬同】魏王【补曰魏武侯也时未称王此辩士之词犹下称孝公为秦王】身被甲底劒【底砥同砺也】挑赵索战邯鄲之中骛【骛乱驰也】河山之间乱卫得是藉也亦收余甲而北面残刚平堕中牟之郭【中牟属河南赵献侯自耿徙此赵记注详正曰此据地里志赞及索隐以为非正义云中牟赵邑在相州荡陰县西有牟山邑在山侧】卫非强於赵也譬之卫矢而魏弦机也藉力魏而有河东之地【赵敬侯四年筑刚平以侵卫五年齐魏为卫败赵刚平】赵氏惧楚人救赵而伐魏战於州西【州属河内】出梁门军舍林中【魏记注宛有林乡】马饮於大河赵得是藉也亦袭魏之河北【属河东】烧棘蒲【元作沟下同敬侯六年借兵楚取魏棘蒲不注宣二年注大棘在陈留襄邑南蒲南蒲蒲坂也谓此正曰正义云今赵州平棘县古棘蒲邑】沟【补曰史赵世家作蒲】队黄城【八年拔魏黄城陈留外黄是正曰正义云括地志故黄城在魏州冠氏县南十里因黄沟为名按陈留外黄城非陌所别也大事记从上说当考】故刚平之残也

中牟之墮也黃城之隊也棘蒲沟之燒也此皆非趙魏之欲也然二國勸行之者何也衛明於時權之藉也今世之為國者不然矣兵弱而好敵強國罷而好衆怨【罷疲同音下同樂與衆為怨】事敗而好鞠之【鞠窮也言遂事】兵弱而憎下人【衍也字補曰姚云曾本無此字】地狹而好敵大事敗而好長詐【長益之】行此六者而求霸則遠矣臣聞善為國者順民之意而料兵之能然後從於天下【從謂後之】故約不為人主怨伐不為人挫強【不以兵為人挫強敵】如此則兵不費權不輕地可廣欲可成也昔者齊之與韓魏伐【衍秦字】秦楚也【正曰齊閔王十一年楚懷二十六年齊與韓魏為楚負其從親而合秦遂共伐楚閔王十六年合韓魏以伐秦秦昭王九年也】戰非甚疾也分地又非多韓魏也【言得地等耳】然而天下獨歸咎於齊者何也以其為韓魏主怨也【是楚懷二十六年此二十一年正曰此十一年】且天下徧用兵矣齊燕戰而趙氏兼中山秦楚戰韓魏不休而宋越專用其兵【未詳】此十國者皆以相敵為意而獨舉心於齊者何也約而好主怨伐而好挫強也且夫強大之禍常以王人為意也【欲為人王】夫弱小之殃常以謀人為利也【補曰恃謀人以為利而致殃】是以大國危小國滅也大國之計莫若後起而重伐不義【不義雖可伐亦不可輕正曰主於後起藉權不以伐不義為急也】夫後起之藉與多而兵勁【人之之多】則是【元作事補曰姚云劉本作是】以衆強敵【元作適】適【補曰敵適通】罷寡也兵必立【補曰疑有缺字】也事不塞天下之心則利必附矣大國行此則名號不攘而至【攘猶取】霸王不為而立矣小國之情莫如謹【元作僅下同】僅【補曰字訛疑謹下同】靜而寡信諸侯【信猶恃也莒蔡是矣】謹僅靜則四鄰不反寡信諸侯則天下不賣外不賣內不反則穢積【元作?禍】?禍【補曰改穢積亦當是積穢此書多穢字】朽腐而不用帛帛矯蠹【矯揉箭箝也故有變意此言變其初也正曰別本注矯一作燒去尧切火行也○姚及別本此下皆有而不服矣一句文義明白今添】而不服矣小國道此【道猶行】則不祠而福矣不貸而財足矣【貸音代從人求物也】故曰祖仁者王立義者霸用兵窮者亡何以知其然也昔吳王夫差以強大為天下先【衍強字補曰姚云曾本無強字】襲郢而栖越身從諸侯之君【諸侯從之】而卒身死國亡為天下戮者何也此夫差平居而謀王強大而喜先天下之禍也昔者萊莒好謀【東萊故萊子國補曰春秋齊侯滅萊傳萊恃謀也】陳蔡好詐莒恃越而滅【莒蔡皆恃遠忽近而亡正曰策但言有恃】蔡恃晉而亡此皆內長詐外信諸侯之殃也由此觀之則強弱大小之禍可見於前事矣語曰騏驥之衰也弩馬先之孟賁之倦也女子勝之夫弩馬女子筋力骨勁非賢於騏驥孟賁也何則後起之藉也今天下之相與也不并滅【與猶恃也言與之相恃亦不皆亡在所处耳】有能【元作同】而【補曰字或悞衍】案兵而後起寄怨而誅不直【寄言假手於人不為主也】微用兵而寄於義【猶假也補曰寄怨而誅不直者使人誅之而已不主怨即所謂重伐不義也微用兵而寄於義者隱其用兵之真情而寄寓於義以為名也】則霸天下可局足而須也【局不伸也】明於諸侯之故察於地形之理者不約親不相質而固【質質子】不趨而疾衆事而不反【衆事猶共事】交割而不相憎【交言彼此割地】俱強而加以親何則形同仇而兵趨利也【補曰衆事宜多反覆交割地者宜相憎俱強者宜不相下今皆不然以其同仇趨利故也】何以知其然也昔者燕齊戰於桓之曲【家語所謂桓山蓋在齊魯之間】燕不勝十萬之衆盡胡人襲燕樓煩數縣【樓煩屬鴈門】取其牛馬【此蓋之吟敗時】夫胡之與齊非素親也而用兵又非約質而謀燕也然而甚於相趨者何也【衍何字】何則形同仇而兵趨利也由此觀之約於同形則利長後起則諸侯可趨役也【可使趨我而為我役】故明主察相【相之明察者】誠欲

以霸王【衍也字】也为志则战攻非所先战者国之残也【有害於国】而都县之费也【隐元年注邑有宗庙之主曰都周制二千五百家为县正曰周礼四甸为县四县为都又五鄙为县又礼小曰邑大曰都】残费已先而能从诸侯者寡矣彼战者之为残也士闻战则输私财而富军市【士衆所聚有市井焉】输饮食而待死士令折辕而炊之【辕輶也】杀牛而觴士【觴实曰觴盖以饮之】则是路窘之道也【路疑作露言国中所有悉出於路又疑作路窘言财用窘於道路正曰正是道路之路】中人祷祝【国中之人为行者祈】君翳酿【翳华盖也故有隐义言酿於中以待饮至】通都小县置社【戮不用命者正曰亦言祷祀之事】有市之邑莫不正事而奉王【事谓财赋警备之事】则此虚中之计也夫战之明日死扶伤【屍未殓也】虽若有功也军出费中哭泣则伤主心矣死者破家而葬夷伤者空财而共药【夷亦伤共供同】完者内酺而华乐【酺大饮也华犹奢也】故其费与死伤者钧【与均同】故民之所费也十年之田而不偿也军之所出矛戟折【矛首矛也兵车所建补曰诗二矛注酋矛长二丈夷矛长二丈四尺戟注见前】鏃铉絶【鏃刀鏃补曰铉姚本作弦】伤弩破车罢马亡矢之大半甲兵之具宫之所私出也【宫如父子异宫之宫古者寓兵於农故私家出之】士大夫之所匿厮养士之所窃【厮折薪养马者】十年之田而不偿也天下有此再费者而能从诸侯者寡矣攻城之费百姓理檐蔽【檐衣蔽前者檐蔽叠言也言士作苦衣易蔽故亟治之】举冲櫓【冲陷阵车正作?补曰城土露屋为櫓战阵高巢车亦为櫓此与冲并言亦车也】家杂总【全家并作】身窟穴中【谓地道】罢於刀金【兵器也】而士困於土功将不释甲期数而能拔城者【数数月】为亟耳上倦於教士断於兵【断音短截也】故三下城而能胜敌者寡矣故曰彼战攻者非所先也何以知其然也昔智伯瑤攻范中行氏杀其君灭其国又西围晋阳吞并二国而忧一主【赵襄子】此用兵之盛也然而智伯卒身死国亡为天下笑者何谓也兵先战攻而灭二子之【补】患也【患在灭二子】昔者中山悉起而迎燕赵南战於长子败赵氏北战於中山克燕军杀其将夫中山千乘之国也而攻万乘之国二再战比胜【比相次】此用兵之上节也【节犹等】然而国遂亡君臣於齐者【此二十九年书佐赵灭中山补曰说见前及燕策】何也不啻於战攻之患也【啻吝也】由此观之则战攻之败可见於前事矣【补补曰事下或有缺字】今世之所谓善用兵者终战比胜【终谓穷兵】而守不可拔【守城期於不拔】天下称为善一国得而保之【得所称为善者保持之】则非国之利也臣闻战大胜者其士多死而兵益弱守而不可拔者其百姓罢而城郭露【外无居人故暴露】夫士死於外民残於内而城郭露於境则非王之乐也今夫鹄的【的即鹄也所谓侯中补曰栖皮曰鹄】非咎罪於人也【补曰姚云咎一作枢刘作喜按吕春秋亦有枢罪於先王之语】便弓引弩而射之【便谓巧审弓得便巧乃发】中者则善【人善之补曰一云刘作喜】不中则愧少长贵贱则同心於贯之者何也恶其示人以难也【的以难中人争欲贯之如恶之然人如的者人所恶也】今穷战比胜而守必不拔则是非徒示人以难也又且害人者也然则天下仇之必矣夫罢士露国而多与天下为仇则明君不居也素用强兵而弱之【素犹常也言兵常用虽强必弱】则察相不事【不从事於此补曰事下当有也字】彼明君察相者则五兵不动【五兵注刀劒矛戟矢正曰此据淮南子注今按诸说不一周礼司右月令注弓矢殳矛戈戟司兵车注戈殳戟夷矛酋矛谷梁注矛戟钺楯弓矢】而诸侯从辞让而重赂至矣故明君之攻战也甲兵不出於军而敌国胜冲櫓不施而边城降士民不知而王业至矣彼明君之从事也用财少旷日远而利长者【旷濶也日虽濶远其利不穷】故曰兵後起则诸侯可趋役也臣之所闻攻战之道非师者【

师旅也言不用师】虽有百万之军比之堂上【言谋之於堂彼自败也补曰此当作北诸本皆作比不知何故此注亦作败释矣章本字同】虽有阖闾吴起之将【阖闾将孙武也此以君臣互言之正曰将若阖闾之善用兵】禽之户内千丈之帟拔之尊俎之间【俎肉在豆上】百尺之冲折之衽席之上【郑玄记注衽卧席也】故钟鼓竽瑟之音不絶於前地可广而欲可成和乐倡优侏儒之笑【倡优倡乐也侏儒短小人】不乏诸侯可同日而致也故名配天地不为尊利制海内不为厚【言其功德之崇虽名利若此犹不足称也】故夫善为王业者在劳天下而自逸乱天下而自安诸侯无成谋【图我之谋不成】则其国无宿忧也【言无一夕之忧正曰宿留也犹宿诺】何以知其然也【补补曰上文例宜有也字】佚治在我劳乱在天下则王之道也锐兵来则拒之患至则趋之【趋言往应之也】使诸侯无成谋则其国无宿忧矣何以知其然也【元作矣】矣【补曰上文例当作也】昔者魏王【惠】拥土千里带甲三十六万恃【补】其强而拔邯郸【十八年】西围定阳【属上党】又从十二诸侯朝天子以西谋秦秦王恐之【此孝公也此史秦人故尊称之正曰说见前】寝不安席食不甘味令於境内尽堞中【堞城上女墙】为战具竟【元作竟】竟【补曰即上文境字也堞中为战具境内为守备】为守备为死士置将以待魏氏卫鞅谋於秦王曰夫魏氏其功大而令行於天下有十二诸侯而朝天子其与必衆故以一秦而敌大魏恐不如王何不使臣见魏王则臣请必北魏矣秦王许诺卫鞅见魏王曰大王之功大矣令行於天下矣今大王之所从十二诸侯非宋卫也则邹鲁陈蔡此固大王之所以鞭箠使也【箠马策】不足以王天下大王不若北取燕东伐齐则赵必从矣西取秦南伐楚则韩必从矣大王有伐齐楚心而从天下之志【使天下从】则王业成矣大王不如先行王服【王者服饰】然後图齐楚魏王说於商鞅之言也故身广公宫制丹衣柱【以丹帛为柱衣正曰丹柱犹衣之也】建九旂【旗旒】从七星之旛【鸟隼为旛又绘星马正曰按考工记并注龙旗九旂诸侯所建鸟旛七旂鸟隼为旛州里所建弧旌柱矢画柱矢此与曲礼合龙旗即青龙鸟隼即朱雀柱矢恐即招摇注所谓画七星者又礼百官载旛此言七星之旛而又以天子言战国不可以古制準也】此天子之位也而魏王处之於是齐楚怒诸侯奔齐齐人伐魏杀其太子覆其十万之军魏王大恐跣行【跣足亲地也】按兵於国而东次於齐【过信为次往服齐也】然後天下乃舍之当是时秦王垂拱而受西河之外【垂衣拱手言无所事西丧地於秦谓此欵】而不以德魏王故【衍故字补曰姚云一本无】卫鞅之始与秦王计也谋约不下席言於尊俎之间谋成於堂上而魏将已擒於齐矣冲櫓未施而西河之外已【补】入於秦矣此臣之所谓比【补曰见上】之堂上擒将户内拔帟於尊俎之间折冲席上者也【彪谓此策辗转皆中事机而不诡於圣虽钟竽倡乐非所以啓人主者亦孟子色货之比闵王骄不能听以及鼓里之祸百世之戒也正曰此策谈兵主於後起藉权不為人主怨其云案兵而後起寄怨而诛不直微用兵而寄於义最其术之深者是岂仁义之师正大之论乎虽其後极言战之害何救於失哉钟鼓倡乐之云视孟子与民同乐之意不类鲍之不察甚矣补曰苏秦佯为得罪燕而亡走齐说湣王厚葬以明孝高宫室大苑囿以明得意欲敝齐而为燕苏代继之实祖秦之故智大事记云齐之伐宋也苏代实啓之秦之救宋也苏代复止之代为燕反间骄其君劳其民而速其亡也其说燕曰齐王长主也而自用也南攻楚五年蓄积散西困秦三年民憔悴士罢弊又以余兵举五千乘之劲宋而包十二诸侯此其君之欲得也其民力竭也云云此策之谋既中而劝燕伐齐也此策旧为苏秦实误前章代误为秦或遂以此为代则亦不然代之谋如彼岂能劝齐王後战哉一本每章首二字者是矣抑是言也当在灭中山後取淮北灭宋侵三晋之

前此士之明盖已逆知闵王之败矣○策文甚佳首以用兵後起约结远怨二端为言而以权藉时势明之今虽干将以下止求霸则远矣言先天下之祸後藉之得也臣闻善为国以下止好挫强也言远怨之得主怨之祸也且夫以下至强弱大小之祸可见於前事矣为一节语曰以下至战攻之败可见前事为一节今世所谓善用兵以下至篇终为一节三节皆推言用兵不为天下先之意而不主怨之意在其中错综起应变化不穷只何以知其然也一语六用而不觉其复○剗姑卫反分扶问反鹄工毒反射食亦反为人为韩为死之为王天下之王去声】齐负郭之民【负犹背】有孤狐咥者【补曰孤狐咥孤因狐字误衍大事记去之吕春秋贵直论狐援云云即谓此正义也古今人表作狐爰】正议闵王斲之檀衢【斲斩也檀衢盖齐市名】百姓不附齐孙室子陈举【公孙家子犹宗室云】直言杀之东闾宗室离心司马穰苴【田完之裔为景公将去此时远甚盖误其名正曰大事记引苏氏谓史称齐景公时晋伐阿鄆燕侵河上晏子荐穰苴斩监军庄贾因以成功春秋左氏无此事意穰苴尝为闵王却燕晋而战国杂记妄以为景公时】为政者也杀之大臣不亲以故燕举兵使昌国君【乐毅魏乐羊之後】将而击之齐使向子【及下达子史不书补曰吕春秋作触子】将而应之【後起为应】齐军破向子舆一乘亡达子收余卒复振与燕战求所以赏【元作偿】偿【补曰吕春秋作赏】者闵王不肯与军破走王奔莒【此四十年正曰三十年】淖齿数之曰夫千乘【青州郡】博昌之间【属千乘】方数百里雨血沾衣王知之乎王曰不知嬴博之间【二县属太山补曰礼檀弓注今泰山县】地坼至泉王知之乎王曰不知人有当阙而哭者【阙门观】求之则不得去之则闻其声王知之乎王曰不知【补曰三不知字春秋後语皆作知之通监从之】淖齿曰天雨血沾衣者天以告也地坼至泉者地以告也人有当阙而哭者人以告也天地人皆以告矣而王不知戒焉何得无诛乎於是杀闵王於鼓里【莒中里也】太子【名法章是为襄王】乃解衣免服逃太史之家为溉园【溉灌注】君王后太史后氏女【后姓也以其姓后不可曰后后故曰君王后也正曰姚本作太史氏女无后字後策正云太史氏】知其贵人善事之田单以即墨之城破亡余卒破燕兵给骑刼【给欺也刼燕将代乐毅者毅传言单设诈诳燕军】遂以复齐【襄五年】遽迎太子於莒立之以为王【时立五年迎而立之齐耳】襄王即位立【补补曰位下有缺字】君王后以为后生齐王建【补曰雨音预为溉之为去声】

王孙贾年十五事闵王王出走失王之处其母曰女朝出而晚来则吾倚门而望女暮出而不还则吾倚闾而望女今事王王出走女不知其处女尚何归【责其亲王不如我之亲女】王孙贾乃入市中曰淖齿乱齐国杀【衍闵字】闵【正曰追书之辞】王欲与我诛者袒右【右肩】市人从者四百人与之诛淖齿刺而杀之【补曰袒荡旱反今循习作徒案反说文杨也露臂】

襄王【闵王子元年慎靓王三十二年戊寅】

燕攻齐取七十余城唯莒即墨未下齐田单以即墨破燕杀骑刼初燕将【史亦不名】攻聊城【属东郡高纪注在平原正曰括地志云故聊城在博州聊城县西】人或谗之【补曰姚氏曰三同集无初燕止谗之十一字则知此章首有误脱】燕将惧诛遂保守聊城不敢归田单攻之岁余士卒多死而聊城不下鲁连乃为【补】书约之矢【纏束书於矢上】以射城

中遺燕將曰吾聞之智者不倍时而弃利【倍背同】勇士不怯【补曰史记作却】死而灭名忠臣不先身而後君今公行一朝之忿不顾燕王之无臣【惠王】非忠也杀身亡聊城而威不信於齐非勇也功废名灭後世无称非智也故智者不再计勇士不怯死【补曰一本云晁本无此二句而云此三者世主不臣说士不载】今死生荣辱尊卑贵贱此其一时也【此释上不再计故史云时不再至】愿公之详计而无与俗同也且楚攻南阳【史云齐之南阳然则此荆州郡时属齐补曰索隐云南阳即齐淮北泗上之地也】魏攻平陆【补曰平陆见前】齐无南面之心【楚魏在齐之南齐有燕难不急此二县故不南面与争补曰正义云齐无南面攻楚魏之心以为南阳平陆之害小不如聊城之利大】以为亡南阳之害不若得济北之利故定计而坚守之今秦人下兵【此时齐善秦故下兵救之】魏不敢东面【不攻齐也】横秦之势合【齐善秦为横】则楚国之形危且弃南阳断右壤【谓平陆断亦弃也】存济北计必为之今楚魏交退【言其皆退】燕救不至【不救聊城】齐无天下之规【规犹谋也秦救之而楚魏退无谋齐者】与聊城共据期年之敝【据相持也】即臣见公之不能得也【不能胜齐】齐必决之於聊城公无再计彼燕国大乱君臣过计【过犹失】上下迷惑栗腹【燕将】以十万之衆五折於外万乘之国被围於赵壤削主因为天下戮【按燕王喜四年赵孝成十五年廉颇围破燕杀栗腹在齐襄燕惠聊城事二十八年以为此时则自骑劫败死外不书他将及赵国也正曰说见章末详之】公闻之乎今燕王方寒心独立大臣不足恃国敝旤多民心无所归今公又以聊城之民【补曰一本以敝聊】距全齐之兵【距拒同扞也】期年不解是墨翟之守也【墨子曰公输般为云梯将以攻宋墨子闻之见般以带为城以牒为械般九设机变墨九距之般之械尽墨之守固有余】食人炊骨士无反北之心是孙臆吴起之兵也能已见於天下矣故为公计不如罢兵休士全车甲归报燕王燕王必喜士民见公如见父母交游攘臂而议於世【攘言推臂前也正曰汉书邹阳传攘袂顔云犹今人言将臂按攘臂字见孟子即此义】功业可明矣上辅孤主以制羣臣下养百姓以资说士【辨说之士资以藉口正曰资给说士】矫国革俗於天下【矫革言变其国俗】功名可立也意者亦捐燕弃世【捐亦弃】东游於齐乎请裂地定封富比陶卫【陶穰侯邑卫自梁襄王後称君正曰索隐引延笃云陶陶朱卫卫公子荆非也王劭云魏冉封陶商君姓卫谓此云尔姚氏亦引】世世称寡【补曰一本称孤寡】与齐久存此亦一计也二者显名厚实也愿公熟计而审处一也【补曰下无历数之辞疑一字讹或衍】且吾闻效小节者不能行大威恶小耻者不能立荣名昔管仲射桓公中鈎篡也遗公子纠【遗忘也】而不能死怯也东缚桎梏【桎足械梏手械】辱身也此三行者乡里不通也世主不臣也使管仲终穷抑【抑按也人所按故为困】幽囚而不出慙耻而不见穷年没壽不免为辱人贱行矣然管子并三行之过【补曰一本云并晁作弃】据齐国之政一匡天下九合诸侯为五霸首名高天下光照邻国曹沫为鲁君将三战三北而丧地千里使曹子之足不离陈计不顾後出必死而不生【出计所出也】则不免为败军禽将曹子以败军擒将非勇也功废名灭後世无称非智也故去三北之耻退而与鲁君计也曹子以为遭【正曰遭字句谓曹沫忍耻而与鲁君计以为遭遇也史无此句则尤明】齐桓公有天下朝诸侯【此霸者之事欲兴霸则可责以义故沫与鲁君计言此正曰说见上补曰有天下有字恐误史作朝天下会诸侯朝天下谓率天下朝王也】曹子以一劒之任劫桓公於坛位之上顔色不变而辞气不悖三战之所丧一朝而反之天下震动惊骇威信吴楚传名後世若此二公者非不能行小节死小耻也以为杀身絶世功名不立非智也故去忿恚之心【恚恨也】而成终身之名除感忿之耻而立累世之功故

业与三王争流名与天壤相敝也【言天壤敝此名乃敝】公其图之燕将曰敬闻命矣因罢兵倒?【元作到读】到读【正曰未详或误字衍文】而去【垂弓衣倒示无弓】故解齐国之围救百姓之死仲连之说也【仲连传有彪按此书以齐闵为宣王苏代为苏秦事时不合如此者甚衆殆为後人传録之误至於此章引栗腹之事说聊城之将则非後人谬矣盖好事者闻约矢之说惜其书不存拟为之以补亡而其人意气横溢肆笔而成不暇检校细处太史公亦爱其千里而略其牝牡骊黄至於今二千岁莫有知其非者也又按燕昭二十八年书齐之不下者惟聊莒即墨聊即聊城也徐广注此栗腹事去长平十年而不论其在聊城事後苏氏古史亦因之疏矣故备论之正曰鲁仲连说燕将下聊城史不着年其书引栗腹之败此事在其後故通监大事记载於秦孝文元年当燕王喜五年齐王建十五年自赧王三十一年燕率五国伐齐闵王死襄王立三十六年燕昭王卒明年惠王立越武成王孝王而至王喜凡三十四年此盖二事误乱为一自燕攻齐止杀骑劫二十五字或他策脱简而初燕将止谗之十一字亦他本所无也且单由即墨起七十余城即复为齐不闻聊城尚为燕守以齐之事势岂有舍之三十余年而不攻单之兵力三十余年而不能下欤今日攻之岁余不下可见为此时燕将守聊城事也史称毅破齐不下者独莒即墨单纵反间亦言二城而燕世家书聊莒即墨策亦有三城不下之言果一时事则聊城亦为齐守而非燕将为燕守者此误因聊城不下而引与莒即墨乱也考之单传自复齐之後无可书之事齐襄王十九年当赵孝成王元年赵割地求单为将次年遂相赵必不复返齐矣距聊城之役凡十六年单岂得复为齐将哉此因岁余不下之言聊莒即墨之混而误指以为单也夫仲连之言正谓栗腹败燕国乱聊城孤守齐方并攻势将必拔其言初不涉湣昭惠之际所谓楚攻南阳魏攻平陆闵王时楚取淮北单复齐後盖已复之不闻楚魏交攻之事二事必在後也燕将被谗惧诛连书亦无此意此因乐毅而讹也史又称燕将得书自杀单遂屠聊城尤非事实齐前所杀燕将惟骑劫尔不闻其他此因骑劫而讹也连之大意在於罢兵息民而其料事之明劝以归燕降齐亦度其计之必可者排难解纷又素所蓄积也迫之於穷而致之於死岂其心哉夫其劝之正将以全聊城之民而忍坐视屠之哉燕将死聊城屠连何功美之称而齐欲爵之哉策所云解兵而去者当得其实而史不可信也故论此事者一考之仲连之书则史策之舛误彀混者皆可得而明矣鲍不此之察见其不通遂谓好事者闻约矢之说惜其书不存拟之以补亡二千余年莫有觉者何其谬哉史误因策通监大事记称田单误因史真文忠公反据鲍氏为断而谓鲁连之说不可为训皆失考也】

燕攻齐齐破闵王奔莒淖齿杀闵王田单守即墨之城破燕兵复齐墟襄王为太子徵【徵犹信也太子初易姓名为庸人疑之至是始有状可信也】齐已破燕田单之立疑【人疑单也】齐国之衆皆以田单为自立也襄王立田单相之过菑水【菑淄同】有老人涉菑而寒出不能行坐於沙中田单见其寒欲使後车分衣无可以分者单解裘而衣之襄王恶之曰田单之施将欲以取我国乎不早图之恐後之【恐单先发】左右顾无人岩下有贯珠者【齐人补曰姚云别本岩字作声句絶无下字元和姓纂引策作贯珠人姓名】襄王呼而问之曰女闻吾言乎对曰闻之王曰女以为何若对曰王不如因以为已善王嘉单之善下令曰寡人忧民之饥也单收而食之寡人忧民之寒也单解裘而衣之寡人忧劳百姓而单亦忧之称寡人之意【称犹副】单有是善而王嘉之虽单之善亦王之善已王曰善乃赐单牛酒嘉其行後数日贯珠者复见王曰王至朝日宜召田单而揖之於庭口劳之乃布令察百姓之饥寒者收

谷之【谷犹养】乃使人听於闾里闻丈夫之相【衍举字】举【补曰此因与字误衍在此此本在曰字上】与语曰田单之爱人嗟乃王之教泽也【彪谓单之取疑所谓威震主者坎襄王亦不明甚矣使单有异志阖城阳而王孰敢不听岂俟今日哉贯珠者可谓君子人矣为是言也上足以掩王之非下足以救单之死一言而齐国定君子哉补曰斯人者又能免其身不然王惧其以前言告单必杀之矣】

貂勃【齐人】常恶田单曰安平君小人也【补曰徐广云北海东安平正义云在青州临淄县东古纪国之□邑索隐云单初起安平故以为号】安平君闻之故为酒而召貂勃曰单何以得罪於先生故常见誉於朝【不欲正言其毁】貂勃曰跖之狗吠尧【跖柳下季之弟盗跖正曰此庄生寓言惠跖时不相及蒯通之言出於此】非贵跖而贱尧也狗固吠非其主也且今使公孙子贤而徐子不肖然而使公孙子与徐子鬪徐子之狗犹【元作由】由【补曰由犹通一本作犹】将攫公孙子之腓而噬之也【攫持腓胫腓噬啗也正曰噬啗也】若乃得去不肖者而为贤者狗岂特攫其腓而噬之耳哉安平君曰敬闻命明日任之於王【白王使任用之】王有所幸臣九人之属欲伤安平君相与语於王曰燕之伐齐之时楚王【顷襄】使将军【淖齿也】将万人而佐齐今国已定而社稷已安矣何不使使者谢於楚王王曰左右孰可九人之属曰貂勃可【欲去单之助】貂勃使楚楚王受而觴之数日不返九人之属相与语於王曰夫一人身而牵留万乘者岂不以据势也哉【言勃据单势正曰言单据势】且安平君之与王也君臣无礼【补曰通监君臣无异】而上下无别且其志欲为不善【谓反畔】内收百姓循抚其心振穷补不足【振举救也】布德於民外怀戎翟天下之贤士【怀翟与士】陰结诸侯之雄俊豪英【诸侯之人】其志欲有为也【为不善】愿王之察之异日而王曰召相单来田单免冠徒跣肉袒而进【肉袒露肢体示欲受刑正曰袒即裼也去上衣曰裼】退而请死罪五日而王曰子无罪於寡人子为子之臣礼吾为吾之王礼而已矣貂勃从楚来王赐诸前【补曰本王觴赐诸前愚恐赐乃觴之讹】酒酣【酣酒乐】王曰召相田单而来貂勃避席稽首曰王恶得此亡国之言乎王上者孰与周文王王曰吾不若也貂勃曰然臣固知王不若也下者孰与齐桓公王曰吾不若也【补曰此下姚本有貂勃曰然臣固知王不若也十一字今增】貂勃曰然臣固知王不若也然则周文王得吕望以为太公桓公得管夷吾以为仲父今王得安平君而独曰单且有天地之辟【开也】民人之治【补曰姚云曾本作始】为人臣之功者谁有厚於安平君者哉而王曰单单恶得此亡国之言乎且王不能守乎王之社稷燕人兴师而袭齐墟王走而之城阳之山中【城阳兖州国莒其县也】安平君以惴惴之即墨【惴惴忧惧也】三里之城五里之郭敝卒七千禽其司马【主兵之官谓骑刼】而反千里之齐安平君之功也当是时也阖城阳而王【不通王而自王补曰春秋後语阖作合】城阳天下【城阳与天下之人正曰城阳二字因上文衍】莫之能止然而计之於道归之於义以为不可故为栈道木阁【木阁栈道皆以通险】而迎王与后於城阳山中【元作中山】中山【补曰当作山中】王乃得反子临百姓今国已定民已安矣王乃曰单单【补正曰与前连举不同】且婴儿之计不为此王不亟杀此九子者以谢安平君不然国危矣王乃杀九子而遂其家益封安平君以夜邑万户【夜一作剧属淄州又东来有掖有不夜疑夜字为掖不全或不夜省不补曰括地志剧城在青州壽光县南三十里顔师古云齐地记古有日夜出见於东莱故莱子立此邑以不夜为名○使者使楚之使去声】

田单将【为大将】攻狄【狄北胡正曰史田儋狄人徐广注今乐安临淄县正义云淄州高苑县西北狄故城】往见鲁仲子【连也】仲子曰将军攻狄不能下也田单曰臣以五里之城七里之郭破亡余卒破万乘之燕复齐墟攻狄而不下何也上车弗谢而去遂攻狄三月而不克之也齐婴儿谣曰大冠若箕【箕簸器】修劔柱颐攻狄不能下垒枯邱【垒军壁也言大不能降一垒小不能枯一邱言无人物补曰吴氏韵补能叶年题反邱叶一其反庐陵刘氏读垒枯邱谓空守一邱为垒说苑攻狄不能下垒於梧邱齐景公田於梧地名也一本引北堂书钞同说苑无能字一本垒枯骨成邱通监从之各有不同似梧邱义长】田单乃惧问鲁仲子曰先生谓单不能下狄请问其说鲁仲子曰将军之在即墨坐而织蓐【蓐草器】立则杖插【插插同刺土器】为士卒倡曰【倡导也】可往矣宗庙亡矣亡日尚矣【尚犹久也言见亡之兆其日已久】归於何党矣【党犹乡也言无所归补曰姚氏云别本无可往矣宗庙亡矣今日尚矣归何党矣皆叶平声读说苑宗庙亡矣魂魄丧矣归何党矣】当此之时将军有死之心而士卒无生之气闻若言【若如此也】莫不挥泣奋臂而欲战此所以破燕也当今将军东有夜邑之奉西有菑上之虞黄金横带而驰乎淄澠之间【昭十二年注澠水出临淄入时水】有生之乐无死之心所以不胜者也田单曰单有心先生志之矣明日乃厉气循城【厉激昂也】立於矢石之所乃援枹鼓之【枹击鼓杖】狄人乃下【补曰马谡对诸葛亮曰用兵之道攻心为上攻城为下其言出於此○夜说苑作掖澠音黽枹音孚○按史赵孝成王元年田单将攻燕拔中阳又攻韩注又拔之次年单为相孝成之元年齐襄之十九年也赵王新立秦攻赵求救於齐齐人使以长安君为质齐师乃出秦师退又策云赵王割济东三城城邑市五十七与齐求安平君为将攻燕亦是年事盖齐赵方睦也考之史单自复齐之後惟有伐狄之战大事记并书於一年而襄王十年赵燕周取齐昌国高唐十三年蔺相如伐齐至平邑秦客卿竈暨楚仍岁攻刚壽以单之在齐而丧地被兵不闻其却战而克敌也而一为赵用遂以立功意者单以功高被谗齐襄虽为之杀譖者所以任单者不能展尽欤不然则单之惧祸特怯而自悔也秦策云田单将齐之良横行於中十四年终身驰於封内考之杀骑劫之岁至襄王十八年凡十四年次年而单为赵将是年襄王死单不复返齐明年遂为相然单之在赵自二战之後不闻他功盖既试其端而亦终不忍背宗国以为赵用也单之心亦可见矣】

孟尝君为从【文以襄王初中立为诸侯楚顷襄二十三年天下合从此八年正曰文以襄王五年中立为诸侯其後遂卒襄王八年诸侯无合从事此闵王十六年文怨秦约韩魏伐秦事也当秦昭九年鲍见策有薛地百里之文遂以为文中立为诸侯时误矣】公孙弘【齐人】谓孟尝君曰君不如【元作以】以【补曰姚云刘本君何不】使人先观秦王【昭】意者【设疑之辞】秦王帝王之主也君恐不得为臣【为秦臣】奚暇从以难之意者秦王不肖之主也君从以难之未晚孟尝君曰善愿因请公往矣公孙弘敬诺以车十乘之秦昭王闻之而欲愧之以辞【使弘愧】公孙弘见昭王曰薛公之地大小几何公孙弘对曰百里昭王笑而曰寡人地数千里犹【元作由下同】由【补曰由犹通姚本犹下同】未敢以有难也【为人之难】今孟尝君之地方百里而因欲以难寡人犹由可乎公孙弘对曰孟尝君好人【人贤人】大王不好人昭王曰孟尝君之好人也奚如公孙弘曰义不臣乎天子不友乎诸侯得志不慙为人主不得志不肯为人臣如此者三人而治【补曰而字疑衍治当属下句或而字上有缺文】可为管商之师【管仲商鞅】说义听行【所说有义或能听而行之】能致

其主霸王如此者五人万乘之严主也辱其使者退而自刎【集韵刎断也】必以其血洿其衣如臣者十人昭王笑而谢之曰客胡为若此寡人直与客论耳寡人善孟尝君欲客之必谕寡人之志也【以己之志晓告孟尝】公孙弘曰敬诺公孙弘可谓不倭矣【着书者美其不可侵辱】昭王大国也孟尝千乘也立千乘之义而不可陵可谓足使矣【足犹能彪谓公孙所陈亦士之一槩尔自曹沫刼桓公辩说士莫不以藉口彼盖未学礼也夹谷之会孔子诏之士付之有司耳矣岂厓柴若世之獬狗然哉帝曰晓人不当如是乎此说客之所当知也】

鲁仲连谓孟尝君曰君好士未【补】也【补曰一本谓孟尝好士也一本谓孟尝君君曰好士也】雍门子【补子字此士以所居为称正曰雍门下有缺文说苑有雍门子狄雍门子周今日雍门子则亦无考雍门见前】养椒亦【养犹公养之养椒姓亦名雍门子之所养正曰未知果椒姓亦名不】阳得子养【此下脱所养人】饮食衣裘与之同皆得其死【并未详】今君之家富於二公【雍门阳得】而士未有为君尽游者也【游犹友也言不尽於交游之道】君曰文不得是二人故也【椒亦等】使文得二人文岂独不得尽对曰君之廐马百乘无不被绣衣而食菽粟者岂有麒麟騄耳哉後宫十妃皆缟紵【缟鲜色縵也紵麻属细者正曰书注缟白也】食粱肉【粱米名本草注青粱粟类正曰粱米之善者有黄青白三种】岂有毛嫱西施哉色与马取於今之世士何必待古哉【补曰君之廐马至此与王斗云云合正曰连上章有孟尝君序次亦不当在此】故曰君之好士未也【补曰孟尝君之门高者如冯驩魏子能免难市誉而已昔人讥其未尝得士特鸡鸣狗盗之雄世以为名言今观鲁连曰君之好士未也则当时已有是论矣仲连之言亦引以自谓而非区区於孟尝君鸡鸣狗盗之出其门宜仲连之不止也】

王建【襄王子元年赧王五十一年丁酉】

秦攻赵长平【此五年】齐楚救之秦计曰齐楚救赵亲【其交亲】则将退兵不亲则且遂攻之赵无以食请粟於齐而齐不听苏子【元作秦】秦【补曰字齐史作周最】谓齐王曰不如听之以却秦兵不听则秦兵不却是秦之计中而齐楚【元作燕】燕【补曰史作楚通监从之】之计过矣且赵之於齐楚【元作燕齐】燕齐【补曰史作齐楚】隐蔽也【赵居二国西北秦攻二国必先径赵赵存则二国得以自隐而有蔽障】犹齿之有唇也唇亡则齿寒今日亡赵则明日及齐楚矣且夫救赵之务【务趣也事也】宜若奉漏瓮沃焦釜【喻救之急】夫救赵高义也却秦兵显名也义救亡赵威却强秦兵不务为此而务爱粟则为国计者过矣【齐记有云周子谓最是也此最时三十余年矣正曰索隐云周子盖齐之谋臣史失其名不必强为之说】

或谓齐王曰周韩西有强秦东北有赵魏秦伐周韩之西赵魏不伐【不从秦伐周韩】周韩为割【割地与赵魏正曰割地与秦】韩却周害也【言赵魏徒不伐而不救韩则韩兵必却周有秦害】及韩却周害【元作割】割【补曰害割字恐有误混】之後【补】赵魏亦不免与秦为患矣【秦以其不应已又无周韩之扞秦伐必及】今齐应【补补曰今齐下恐有缺字】秦伐赵魏则亦不果於赵魏之应秦而伐周韩【赵魏近秦其应秦不得不果齐则远矣应秦必不果也】今齐入於秦而伐赵魏【今就令也入言应之果补曰令恐亦今字】赵

魏亡之後秦东面而伐齐齐安得救【补补曰一本有救字是下无於字非】於天下乎【此言赵魏近秦畏之不得不应齐不可以其应而伐之也正曰此士之策正谓秦伐周韩赵魏虽不应秦然周韩既割而赵魏亦不免况齐可以不应秦今应秦伐赵魏赵魏既亡而齐亦不免矣所以言此者欲齐之援赵魏也】

国子【齐大夫】曰秦破马服君之师围邯郸齐魏亦佐秦伐邯郸齐取淄鼠魏取伊氏【皆赵地缺】公子无忌【魏信陵君】为天下循便计【循行顺也正曰行便宜之计言窃符夺兵事补曰齐魏佐秦伐因取二地今云公子无忌云云魏实救赵者不应先佐之伐恐当时无忌虽急於平原之请而魏王实畏秦如止晋鄙壁邲未欲真欲救赵或先取其地也】杀晋鄙【魏将】率魏兵以救邯郸之围【魏安厘二十年使鄙将以救赵畏秦不敢进赵急平原君使责无忌无忌盗晋鄙兵符杀之将进兵秦军解去补曰按史年表魏世家公子无忌传公子矫杀晋鄙破秦兵皆在安厘王二十年通监以矫杀晋鄙在前一年大事记以晋鄙留军壁邲在前一年谓以传修今按传亦止作一年事也当考】使秦弗有而失天下是齐入於魏而救邯郸之功也【齐与魏亲初虽佐秦今魏救赵亦同救也】安邑者魏之柱国也【言其於国如室有柱】晋阳者赵之柱国也鄢郢者楚之柱国也故三国【衍欲字】欲【补曰疑欲字即故字而上衍故字故者旧也】与秦壤界【境土界境也言其地相接】秦伐魏取安邑伐赵取晋阳伐楚取鄢郢矣覆【元作福】福【补曰姚云刘偁曾一作覆愚按福乃偁之讹偁义长】三国之军【元作君】君兼二周之地举韩氏取其地且天下之半【且犹几】今又刳赵魏疏中国【疏言离其友】封卫之东野【封割也东野犹东地正曰封疆之地】兼魏之河内絶赵之东阳则赵魏亦危矣赵魏危则非齐之利也韩魏赵楚之志恐秦兼天下而臣其君故专兵一志以逆秦【逆谓拒之】三国之与秦壤界而患急齐不与秦壤界而患缓是以天下之势不得不事齐也故秦得齐则权重於中国赵魏楚得齐则足以敌秦故秦楚【补补曰叠举上文宜有楚】赵魏得齐者重失齐者轻齐有此势不能以重於天下者何也其用者过也【补曰三策大槩略同谓三晋诸国为齐之屏蔽相依为唇齿秦攻诸国而齐不救诸国灭亡势必及齐第三章谓三国与秦界而患急齐不与秦壤而患缓秦得齐则权重赵魏楚得齐则足以敌秦说尤明切初策攻长平时次策周韩未亡时三策则韩既亡後也始皇十八年灭韩自秦人行远交近攻之术善齐而不加兵君王后谨事秦王建不修战备不助五国其堕秦计中久矣长平之战当王建五年灭韩当三十五年三十余年间士之为齐谋者其智非不及此而卒不用宜其及於亡也】

齐王使使者问赵威后【惠文后孝威太后】书未发【补曰未发其封】威后问使者曰岁亦无恙邪【恙忧也】民亦无恙邪王亦无恙邪使者不说曰臣奉使使威后今不问王而先问岁与民岂先贱而後尊贵者乎威后曰不然苟无岁何有民苟无民何有君故有问舍本而问末者耶乃进而问之曰齐有处士曰锺离子【锺离属九江正曰路史云沂之承音恁有锺离城乃晋吴会处成十五年杜云淮南县今属濠州者非应劭云锺离子国在九江盖其後徙於此吴灭之】无恙耶是其为人也有粮者亦食无粮者亦食有衣者亦衣无衣者亦衣是助王养其民者【补】也何以至今不业也【言不得在位成其职业】叶阳子【诸书叶阳皆不地范睢传注叶一作叶补曰正义云叶阳今许州叶县又见魏策】无恙乎是其为人哀鰥寡恤孤独振困穷补不足是助王息其民者也【息生也】何以至今不业也北宫之女婴儿

子无恙耶彻其环璜【集韵彻去也通作彻】至老不嫁以养父母是皆率民而出於孝情者也【情犹诚】胡为至今不朝也【命妇则朝】此二士弗业一女不朝何以王齐国子万民乎於陵子仲【於陵属济南皆以所居为号此自一人若孟子所称已是七八十年矣补曰路史於陵今淄之长山正曰此言於陵仲子之行与孟子所称者合恐即此人也赵惠文王与齐闵王同时惠文后用事实孝成之世其在惠文时则仲子犹相及】尚存乎是其为人也上不臣於王下不治其家中不索交诸侯此率民而出於无用者何为至今不杀乎【彪谓威后贤矣其是非乃不诡於圣齐有此数士不能察至使邻国老女子愧之王建不足道也时君王后故无恙胡为亦无察乎正曰问王而不及后必非君王后王建时鲍因策言谓后为贤智故曲说至此○王使之使如字璜它典它甸二反】

齐闵王之遇杀其子法章变姓名为莒太史家庸夫【庸佣同均直也】太史敦女【敦音跃补曰徐广云一音皎】奇法章之状貌以为非常人怜而常窃衣食之与私焉莒中及齐亡臣【臣之出亡者】相聚求闵王子欲立之法章乃自言於莒共立法章为襄王襄王立以太史氏女为王后生子建太史敦曰女无媒而嫁者非吾种也污吾世矣终身不覩君王后贤不以不覩之故失人子之礼也襄王卒子建立为齐王君王后事秦谨与诸侯信以故建立【衍一四字】四十有余年不受兵【正曰此要其终而言之建立字可见建四十四年为秦灭补曰秦远交齐而善之故齐事秦谨不悟其计也与诸侯信此恐未然史称齐亦东边海上秦日夜攻三晋燕楚五国各自救以故四十余年不受兵此实录也齐与诸侯信则安得不助五国乎】秦昭王【元作始皇按后卒於庄襄之时不逮始皇也】始皇【补曰字误】尝遣使者遗君王后玉连环【两环相贯】曰齐多智而解此环不君王后以示羣臣羣臣不知解君王后引锥椎破之谢秦使曰谨以解矣及君王后病且卒诫建曰羣臣之可用者某建曰请书之君王后曰善取笔牍受言【牍书版也】君王后曰老妇已忘矣【详其指盖怒建之不心受托以病昏耳】君王后死後后胜【疑即后之族】相齐多受秦间金玉使宾客入秦皆为变辞【变故之辞盖使者还以恐动王也】劝王朝秦不修攻战之备【彪谓君王后贤智妇人也惜其不能正始乃其父正烈男子也义不能疚利不能回其斯人乎正曰策云君王后贤不失人子之礼又秦王令解环以齐多智为言故鲍以贤赞之不能正始既不足言贤信秦之谋不助诸侯又何智之有】

齐王建入朝於秦雍门司马前曰所为立王者为社稷耶为王立王耶王曰为社稷司马曰为社稷立王王何以去社稷而入秦齐王还车而反即墨大夫闻【元作与补曰姚云一本作闻】雍门司马谏而听之则以为可【衍可字】可【补曰姚云一作以】为谋【又疑可为谋本注字】即入见齐王曰齐地方数千里带甲数十【元作百下同】百万夫三晋大夫皆不便秦而在阿鄆之间者百数王收而与之十百【补曰通监作数下同】万之衆使收三晋之故地即临晋之关可以入矣【临晋属左冯翊】鄆郢大夫不欲为秦【不属之也】而在城南下者百数【齐城】王收而与之十百万之师使收楚故地即武关可以入矣【始皇纪注武关秦南关在陕西弘农东】如此则齐威可立秦国可亡矣舍南面之称制【此亦秦人之辞时未有此正曰谓其弃王而为臣也】乃西面而事秦为大王不取也齐王不听秦使陈驰【齐客之入秦者正曰上章谓齐宾客入秦皆为变乱又陈为齐姓故云然不可考】诱齐王内之约与五百里之地【盖伪许之】齐王不听即墨大夫而听陈驰遂入秦处之共松柏之

间【共属河内补曰卫州共城县】饿而死先是齐为之歌曰松耶栢耶住建共者客邪【客谓陈驰自秦称之曰客彪谓建之听雍门似矣而不卒於即墨惟不明故也不明以亡国有国家者可不以正心诚意为先乎正曰专指陈驰非自齐称之曰客尔史谓建听奸人宾客以亡秦策秦王资顿弱以游齐王入朝知客非一也○鲍出正心诚意一语论虽正而不切上言不明而此曰以为先乌睹大学之序】

凡五十九章

战国策校注卷四

卷五

<史部,杂史类,战国策校注>

钦定四库全书

战国策校注卷五 宋 鲍彪 原注

元 吴师道 补正

楚【今之南郡江夏零陵桂阳武陵长沙汉中汝南皆其分也江陵故郢都西通巫巴东有云梦之饶】宣王【肃王子元年烈王七年王子】

齐楚构难宋请中立齐急宋【告急於宋补曰请字宜任急下穀脱於此中立岂待请邪】宋许之子象【楚人】为楚谓宋【补补曰姚本有此字】王【公剔成正曰剔成未尝称王此偃也与怀襄相接】曰楚以缓失宋将法齐之急也齐以急得宋後将常急矣是从齐而攻楚之未必利也齐战胜楚势必危宋不胜是以弱宋干强楚也【言以助齐犯楚之怒补曰将法齐之急言楚今结於宋齐後将常急言楚之攻齐未已齐战胜楚势必危宋言齐强必并宋】而令两万乘之国常以急求所欲国必危矣

邯郸之难【赵成侯二十一年魏拔邯郸此十六年补曰大事记昭奚恤为相附宣王十五年谓此章争论乃明年事按史年表围邯郸在此年拔邯郸齐败魏在次年】昭奚恤谓楚王曰王【元作里补曰姚本作王】不如无救赵而以强魏【使魏为强】魏强其割赵必深矣赵不能听则必坚守是两敝也【两国相持必俱敝】景舍曰不然昭奚恤不知也夫魏之攻赵也恐楚之攻其後也今不救赵赵有亡形而魏无楚忧是楚魏共赵也【如与魏共攻之】害必深矣【赵之害】何以两敝也且魏令兵以割赵【补曰一本以深割赵】赵见亡形而有楚之不救已也【言虽有楚而不见救正曰姚云有刘作知愚按见有二字恐穀舛上下文可证】必与魏合而以谋楚故王不如少出兵以为赵援赵恃楚劲必与魏战魏怒於赵之劲而见楚救之不足畏也必不释赵赵魏相敝而齐秦应楚【应言乘此起兵耳非与楚合也】则魏可破也楚因使景舍起兵救赵邯郸拔【楚兵少故】楚取睢澣之间【後志梁国睢阳注征北记南进有睢陵梁国有澣阳南临澣水补曰大事记取澣阳作睢阳澣呼外乌外反】

江乙为魏使於楚【乙魏人时居魏後乃仕楚故其譖昭奚恤曰臣居魏知之正曰据居魏语以为魏人未知果不】谓楚王曰臣入境闻楚之俗不蔽人之善不言人之恶诚有之乎王曰诚有之江乙曰然则白公之乱得无遂乎【遂犹成白公太子建子胜哀十六年建以谗奔郑郑杀之胜请伐郑子西不从胜怒杀子西劫惠王】诚如是臣等之罪免矣楚王曰何也江乙曰州侯相楚贵甚矣而主断【谓其专决】左右俱曰无有【言世无如之】如出一口矣

荆宣王问羣臣曰吾闻北方之畏昭奚恤也果诚何如羣臣莫对江乙对曰虎求百兽而食之

得狐狐曰子无敢食我也天帝使我长百兽今子食我是逆天帝命也子以我为不信吾为子先行子随我後观百兽之见我而敢不走乎虎以为然故遂与之行兽见之皆走虎不知兽畏己而走也以为畏狐也今王之地地方五千里带甲百万而专属之昭奚恤故北方之畏奚恤也其实畏王之甲兵也犹百兽之畏虎也【补曰大事记江乙之言如此则昭奚恤为敌国所畏可知一本标十二国史春秋後语食我作噉我又云人臣见畏者君威也君不用而威亡矣注尹文子有】昭奚恤与彭城君【彭城属楚知为楚人】议於王前王召江乙而问焉江乙曰二人之言皆善也臣不敢言其後【补曰姚云一本更有言其後三字】此谓虑贤也【虑犹疑也贤者言善已复言之将使王疑彼思虑之也正曰谓使我疑虑贤者为疑词以两倾之也】

江尹【乙也】欲恶昭奚恤於楚王而力不能故为梁山阳君【山阳属魏知为魏人正曰策文明曰梁山阳君注赘】请封於楚【知其无功奚恤必谏而山阳怨可以为党】楚王曰诺昭奚恤曰山阳君无功於楚国不当封江尹因得山阳君与之共恶昭奚恤

魏氏恶昭奚恤於楚王【以山阳君故补曰疑即山阳君】楚王告昭子昭子曰臣朝夕以事听命【言其亲近】而魏入吾君臣之间【以恶奚恤之言入】臣大惧臣非畏魏也夫泄吾君臣之交而天下信之是其为人也近苦矣【苦犹恶也此指江乙】夫苟不难为之外【为其泄外谓魏也】岂忘为之内乎臣之得罪无日矣【无几日也】王曰寡人知之大夫何患

江乙恶昭奚恤谓楚王曰人有以其狗为有执而爱之【执言善守】其狗尝溺井【溺去音正曰奴吊反】其邻人见狗之溺井也欲入言之狗恶之当门而噬之邻人憚之遂不得入言邯鄲之难楚进兵大梁取矣昭奚恤取魏之宝器臣居魏知之故昭奚常恶臣之见王【此言邯鄲事在乙居魏时故升邯鄲之难於前】江乙欲恶昭奚恤於楚谓楚王曰下比周则上危下分争则上安【分则不比争则不周为扬恶张本】王亦知之乎愿王勿忘也且人有好扬人之善者於王何如王曰此君子也近之江乙曰有人好扬人之恶者於王何如王曰此小人也远之江乙曰然则且有子杀其父臣弑其主者而王终已【补曰姚云曾刘作已】不知者何也以王好闻人之美恶闻人之恶也王曰善寡人愿两闻之【彪谓两闻之是也然必以明夫苟不明则适为江乙谗口之资耳补曰大事记曰乙之言术数家之论也下比周上固危矣苟下皆分争如齐之田阚唐之牛李土亦岂能安乎愚按此与前章言州侯云云意同】

江乙说於安陵君【名坛失其姓楚之幸臣按魏记注召陵有安陵应属楚而魏策亦有同号者别一人也正曰按说苑作安陵纒艺文类聚同坛纒字有讹彼以为得幸於楚共王今次之宣王非也正义云鄢陵故城在许州鄢陵县西北李奇谓六国时为安陵按鄢陵召陵皆属魏又按元和姓纂安陵小国後氏之安陵纒楚王妃则以为女子】曰君无咫尺之功【元作地】地骨肉之亲处尊位受厚禄一国之衆见君莫不敛衽而拜抚委而服【抚物委物必下其手皆卑下意正曰抚犹伛也委曲也补曰衽衣衿也】何以也曰王过举以【元作而】而【正曰一本而已姚云已一作色按已以通色已字类恐当作而以色为文】色【言谬以色见举】不然无以至此江乙曰以财交者财尽而交絶以色交者华落而爱渝【华英华渝变也】是以嬖色不敝席【嬖贱而幸者席不及敝而爱弛】宠臣不避轩【避犹退轩曲輶藩车】

也车敝则退去今不及然补曰姚本作嬖女又云不敝言不久之意避是敝字无疑真诰曰女宠不敝席男爱不尽轮或出于此】今君擅楚国之势而无以自结於王窃为君危之安陵君曰然则奈何愿君必请从死以身为殉【此乙辞补曰姚云奈何下曾有江乙曰字】如是必长得重於楚国曰谨受令三年而弗言江乙复见曰臣所为君道至今未効君不用臣之计臣请不敢复见矣安陵君曰不敢忘先生之言未得间也於是楚王游於云梦【泽名在南郡华容补曰楚辞集注云梦泽名方八九百里跨江两岸云在江北今潜江监利景陵等县是也梦在江南今公安石首建寧等县是也梦音蒙亦作去声】结驷千乘【补曰结连也四马曰驷】旌旗蔽天野火之起也若云蜺【蜺虹也】兕虎嗥之声若雷霆【兕若牛而青补曰一角重千斤】有狂兕【元作?】?车【集韵?音详趋行也若?则羊耳补曰字书有牂字兹郎反又戕与牂通?也】依轮而至王亲引弓而射一发而殪【补曰宋玉招魂青骊结驷兮齐千乘悬大延起兮玄顔烝云云与王趋梦兮课後先君王亲发兮殪青兕文颇与此合】王抽旌旄【旌曲柄旗旄幢也补曰尔雅旄牛尾着竿头】而抑兕首仰天而笑曰乐矣今日之游也寡人万岁千秋之後谁与乐此矣【问安陵与谁】安陵君泣数行下而进曰臣入则编席【编次简也言与王相次如之】出则陪乘【陪重乘也此言二人同车】大王万岁千秋之後愿得以身试黄泉蓐蝼蚁【愿为蓐以辟二物蓐陈草也补曰姚云试钱刘曾又作式李善引同延叔坚论云为王先用填黄泉为王作蓐以御蝼蚁艺文类聚引拭黄泉驱蝼蚁】又何如得此乐而乐之王大说乃封坛为安陵君君子闻之曰江乙可谓善谋安陵君可谓知时矣【彪谓此非君子之言也安陵妾妇也江乙为之谋又其卑者安有君子而美此流哉】

郢人有狱三年不决者故令人请其宅以卜其罪【有罪则宅入官故可请卜测知之也】客因请【元作谓下同】谓【补曰姚本作为之谓又云钱作客因谓刘作客因请之】之【补曰依姚本则此上讹一字此下缺一字】昭奚恤曰郢人某氏之宅臣愿之昭奚恤曰郢人某氏不当服罪故其宅不得客辞而去昭奚恤已而悔之因谓客曰奚恤得事公公何为以故与奚恤【故谓设事以探己意】客曰非用故也曰请【补曰姚云刘曾作请】而不得有说色非故如何也【补曰如犹而】

威王【宣王子元年显王三十年壬午】

苏秦之楚三日【补曰一本标後语十二国史皆作三年】乃得见乎王谈卒辞而行王曰寡人闻先生若闻古人今先生乃不远千里而临寡人曾不肯留愿闻其说对曰楚国之食贵於玉薪贵於桂谒者难得见如鬼王难得见如天帝今令臣食玉炊桂因鬼见帝王曰先生就舍寡人闻命矣【正曰一本标类要引百乘书钞作宣王】

苏秦为赵合从【此在连激仪入秦後当为七或八年正曰大事在威七年】说楚威王曰楚天下之强国也大王天下之贤王也楚地西有黔中巫郡【属南郡补曰徐广云黔中今武陵巫郡南郡之西界】东有夏州【车胤云夏口城上有州曰夏州补曰左传楚庄伐陈乡取一人焉以归谓之夏州即此正义云夏水口在荆州江陵县一本标卢藏用注後语云屈原离骚过夏口而西浮盖是山也】海阳【海之南耳非辽西郡也正曰卢藏用云在广陵东今扬州海陵县刘氏云楚之东境】南有洞庭【补曰洞庭在今巴陵】苍梧【交州郡正曰正义云

苍梧山在道州南按此乃楚粤穷边处交州苍梧则粤地也【北有汾陁之塞【陁召陵陁亭补曰陁见秦策汾陁乃韩地此句有误四字连郇阳读亦不顺史作陁塞是大事记亦谓即陁山也】郇阳【徐注今顺阳属汝南正曰正义云顺阳故城在邓州穰县西索隐云郇音荀郇阳当汝南颍川之界当是新阳声近字变尔汝南有新阳县在新水之阳徐说盖疎】地方五千里带甲百万车千乘骑万疋粟支十年此霸王之资也夫以楚之强大王之贤【补曰一本与大王】天下莫能当也今乃欲西面而事秦则诸侯莫不西【元作南】南面而朝於章台之下矣【秦台在咸阳见楚记】秦之所害於天下莫如楚楚强则秦弱楚弱则秦强此其势不两立故为大王计莫如从亲以孤秦大王不从亲秦必两军一军出武关一军下黔中若此则鄢郢动矣【补曰鄢郢见前】臣闻之治之其未乱为之其未有也患至而後忧之则无及矣故愿大王之早计之大王诚能听臣臣请令山东之国奉四时之献以承大王之明制委社稷宗庙【言诸侯轻去其国以从楚正曰委置其宗庙社稷以托於楚】练士厉兵在大王之所用之大王诚能听臣之愚计则韩魏齐燕赵之妙音美人必充後宫矣赵代良马橐驼【匈奴奇畜】必实於外廐故从合则楚王横成则秦帝今释霸王之业而有事人之名窃为大王不取也夫秦虎狼之国也有吞天下之心秦天下之仇讐也横人皆欲割诸侯之地以事秦此所谓养仇而奉讐者也夫为人臣而割其主之地以外交强虎狼之秦以侵天下卒有秦患不顾其祸夫外挟强秦之威以内劫其主以求割地大逆不忠无过此者故从亲则诸侯割地以事楚横合则楚割地以事秦此两策者相去远矣有亿兆之数两者大王何居焉故敝邑赵王【肃侯】使臣效愚计奉明约在大王命之楚王曰寡人之国西与秦接境秦有举巴蜀并汉中之心秦虎狼之国不可亲也而韩魏迫於秦患不可与深谋与深谋恐反人以入於秦故谋未发而国已危矣寡人自料以楚当秦未见胜焉内与羣臣谋不足恃也寡人卧不安席食不甘味心摇摇如悬旌【旌析羽注竿首以精进士卒】而无所终薄【薄泊同】今君欲一天下安诸侯存危国寡人谨奉社稷以从【传有在说五国後彪谓五国之听苏子也革面而已非能深究横从之利害也唯威王雅有难秦之心念之熟矣异夫患诸国之不可合徒称从命者也补曰大事记取】

威王问於莫敖【楚官】子华曰自从先君文王以至不谷之身亦有不为爵劝不为禄勉以忧社稷者乎莫敖子华对曰如华不足以知之矣王曰不於大夫无所闻之莫敖子华对曰君王将何问者也彼有廉其爵贫其身以忧社稷者有崇其爵丰其禄以忧社稷者有断脰决腹【脰项也】一瞑而万世不视【瞑不视也谓死】不知所益【志於死耳不求利也】以忧社稷者亦有【补补曰姚本有此字】不为爵劝不为禄勉以忧社稷者王曰大夫此言将何谓也【言谓谁】莫敖子华对曰昔令尹子文【鬬谷於菟】缁帛之衣以朝鹿裘以处未明而立於朝日晦而归食朝不谋夕无一日【元作月】月之积故彼廉其爵贫其身以忧社稷者令尹子文是也昔者叶公子高【名诸梁】身获於表薄【表野外薄林也言其初贱】而财於柱国【财材同柱国以子高为材】定白公之祸【见哀公十六年】寧楚国之事恢先君以揜方城之外【恢大也集韵揜覆取也言取地以大先君之封】四封不廉【封封城廉犹礼不廉言无事故不察治正曰廉隅之廉谓四境完固不见廉隅也补曰一本四封不侵】名不挫於诸侯当此之时也天下莫敢以兵南乡叶公子高食田六百畛【畛井田间陌补曰周礼十夫有沟沟上有畛朱子曰沟间千亩畛为阡】故彼崇其爵丰其禄以忧社稷者叶公子高是也昔者吴与楚战於柏举【定四年注楚地】两军【补补曰姚本有御字】之间夫

卒交【千夫百夫之夫】莫敖大心抚其御之手顾而太息曰嗟乎子乎【一本子作予】楚国亡之日【元作月补曰姚云月一作日】至矣吾将深入吴军若扑一人【若犹扑击也正曰若发语辞扑普卜反】若摔一人【摔持髮也】以与大心者也社稷其庶几乎【以是为可以厉衆也】故断脰决腹一瞑而万世不视不知所益以忧社稷者莫敖大心是也【传不书正曰左传柏举之战楚大夫史皇以其乘广死司马沈尹戌伤而死句卑刳而裹之司马戌即大心也叶公诸梁之父也王氏应麟谓鲍失考】昔吴与楚战於柏举三战入郢寡君身出【昭王】大夫悉属【属连俱亡】百姓离散焚冒勃苏【定四年以为申包胥补曰焚冒即蚡冒勃苏包胥声近岂蚡冒之裔欤焚符分反冒亡北反索隐云蚡古本作粉音愤亦符分反】曰吾被坚执锐【坚甲锐兵也】赴强敌而死此犹一卒也不若奔诸侯於是羸粮潜行上崢山【崢嶸之山】踰深溪跼穿膝暴【跼足下暴伤也】七日而薄秦王【襄公】之朝雀立不转【雀立踊也】昼吟宵哭七日不得告水浆无入口瘖而殫闷【瘖狂殫气絶也正曰诗瘖我注病也非癡狂之癡】旄不知人【旄眊同无目也正曰旄眊耄字通并昏也】秦王闻而走之【走去音疾趋也】冠带不相及左奉其首右濡其口勃苏乃苏【苏死更生也】秦王身问之子孰谁也焚冒勃苏对曰臣非异【言非它人】楚使【去音】新造盍【楚官正曰鲍见秦官有上造大良造遂为此谬说按字书盍张留反引击也山曲曰盍此无义盍音戾盍通又音列罪也当是此字新造盍似言始构难今降戾之云文当有讹舛或在吴字下】焚冒勃苏吴与楚人战於柏举三战入郢寡君身出大夫悉属百姓离散使下臣来告亡且求救秦王顾令之【元作不】不【补曰字误或衍】起寡人闻之万乘之君得罪一士社稷其危今此之谓也遂出革车千乘卒万人属之子满与子虎下塞以东与吴人战於洧水【出齐郡广之妨山东盖齐楚壤界】而大败之亦闻於遂浦【楚地缺或吴夫遂也盖间一说在彼一在此补曰子满左传子蒲云在稷与沂注楚地当考夫遂见前秦策】故劳其身愁其思以忧社稷者焚冒勃苏是也吴与楚战於柏举三战入郢君王身出大夫悉属百姓离散蒙谷【楚将】结鬪於宫唐之上【结犹交宫唐岂高唐邪】舍鬪奔郢曰若有孤【时未知昭王存亡故意其子】楚国社稷其庶几乎遂入大宫负鸡次之典【楚国法也鸡一作离是所以治离局者正曰姚本鸡一作离是时典守者皆离其局故负其典以逃】以浮於江逃於云梦之中昭王反郢五官失法百姓昏乱【补曰五官见齐策】蒙谷献典五官得法而百姓大治此蒙谷之功多与存国相若封之执圭田六百畛蒙谷怒曰谷非人臣社稷之臣苟社稷血食【血谓牲牢】余岂患无君乎【补曰余当作余】遂自弃於磨山之中【後志磨城子胥所造盖以此山名城也正曰高云汉注引历山姚氏引李通传论曰昔蒙谷负书不狗楚难注引策吴楚战于栢举蒙谷奔入宫负离次之典浮江云云苟利社稷余岂患无君乎遂弃於历山也磨字说见秦策】至今无冒【冒谓犯法正曰一本无位】故不为爵劝不为禄勉以忧社稷者蒙谷是也王乃太息曰此古之人也今之人焉能有之邪莫敖子华对曰昔者先君灵王好小腰楚士约食【约犹节】冯而能立【冯依也】式而能【式小低貌补曰轼车前横木有所敬则俯冯之据而後能立冯而後能起言以约食故无力也或疑士不当言细腰荀子云楚庄王好细腰故朝有饿人一本標墨子云楚灵王好士细腰故其臣皆三饭为节脇息而复带渊墙而後起尹文子韩非子皆言一国有饥色饿人今按墨子三卷中无此文三卷者别本也古墨子篇数不止此】食之可欲忍而不入死之可恶然而不避【补曰姚云一作就而】华【元作章】章【补曰当作华】闻之其君好发者【发发矢】其臣决拾【车攻注决钩弦拾遂也遂发也补曰诗注无此三字决以象骨为之着於右手大指所以鈎弦开体拾以皮为

之着於宏臂以遂弦亦名遂】君王直不好若君王诚好贤此五臣者皆可得而致之

苏子谓楚王曰仁人之於民也爱之以心事之以善言孝子之於亲也爱之以心事之以财忠臣之於君也必进贤人以辅之今大王之大臣父兄好伤贤以为资【为已资藉】厚赋歛诸臣百姓使王见疾於民非忠臣也大臣播王之过於百姓多赂诸侯以王之地是故退王之所爱【王所爱者必不播割与大臣异趣故大臣退之】亦非忠臣也是以国危臣愿无听羣臣之相恶也慎大臣父兄【言不轻用之】用民之所善节身之嗜慾以与【补补曰此下有缺文】百姓人臣莫难於无妬而进贤为主死易垂沙之事【未详兵略训楚兵殆於垂沙亦不注】死者以千数【补曰为主死易止千数下句同如此则意明】为主辱易自令尹以下事王者以千数至於无妬而进贤未见一人也故明主之察其臣也必知其无妬而进贤也贤臣之事其主也亦必无妬而进贤夫进贤之难者贤者用且使已废贵且使已贱故人难之【此策本次苏秦之楚之上知苏子秦也然不可先於之楚故次之此彪谓此策人主所当先务人臣之上节也苏氏弟兄言之若此者二三策而已正曰苏子未知果秦否序次无据进贤之说而出於苏氏不过欲时君用已而发言是而意则非也】

怀王【威王子元年顯王四十一年癸巳】

韩公仲相【衍韩公仲相四字章内初不涉韩也补曰此四字必错简】齐楚之交善秦与魏遇且以善齐而絕齐乎楚楚【补】王使景鲤之秦鲤与於秦魏之遇【於其遇时与焉秦策有其事在惠九年後怀王初也】楚王怒景鲤恐齐以楚遇【楚谓鲤】为有陰於秦魏也【恐齐以此谓楚有私於二国】且罪景鲤为谓楚王曰臣贺鲤之与於遇也秦魏之遇也将以合齐秦而絕齐於楚也今鲤与於遇齐无以信魏之合已於秦而攻於楚也【将絕齐於楚而楚使与焉故齐疑之】齐又畏楚之有陰於秦魏也必重楚故鲤之与於遇王之大资也今鲤不与於遇魏之絕齐於楚信明矣齐【衍楚字】楚【补曰疑衍】信之必轻王故王不如无罪景鲤以视齐於有秦魏【视示同示齐以楚有二国】齐必重楚而且疑秦魏於齐【疑楚使之疑】王曰诺因不罪而益其列【列位次也下衍王曰向也止孰便也凡九十字元在韩策】王曰乡也子曰天下无道今也子曰乃且攻燕者何也对曰今谓马多力则有矣若曰胜千钧则不然者何也夫千钧非马之任也今谓楚强大则有矣若越赵魏而鬪兵於燕则岂楚之任也哉且非楚之任而楚为之是敝楚也强楚敝楚其於王孰便也【正曰姚本凡九十七字在韩策自为一章乃楚策虞卿谓春申之文脱简误衍略有不同鲍於韩策既删去全不见其文而於此复不明言在楚策后章补曰与魏之与为有之为如字】

楚王逐张仪於魏【使魏逐之仪初相魏时此七年】陈轸曰王何逐张子曰为臣不忠不信曰不忠王无以为臣不信王勿与为约且魏臣不忠不信於王何伤忠且信於王何益逐而听则可若不听是王令困也且使万乘之国免其相是城下之事也【此言魏耻之相十三年主城下之盟诸侯所耻正曰十二年】

五国约以伐【衍齐字】齐【补曰字疑误】秦【秦惠後七年赵韩魏燕齐共攻秦此十一年正曰五国伐秦可考策并言齐不可考怀王为从长率五国伐秦之明年齐败魏赵于观津

即策所谓齐反赵魏者欤】昭阳谓楚王曰五国已破秦必南图【图楚】楚【正曰楚句】王曰然则奈何对曰韩氏辅国也【言可为楚之助】好利而恶难好利可营也【营犹求可使求我】恶难可惧也我厚赂之以利其心必营我悉兵以临之其心必惧彼惧吾兵而营我利五国之事必可败也约絶之後虽勿与地可楚王曰善乃命大公事【楚人正曰无考一本大作太】之韩见公仲曰夫牛阑之事【未详】马陵之难【魏三十年齐破魏马陵正曰注缺惠王字】亲主之所见也【主谓公仲此言齐强不可使益强补曰亲字疑当在见字上一本主作王】王苟无以五国用兵请効列城五请悉楚国之衆【衍也字】也以图【元作嗇】嗇【补曰字讹当作图上有图楚】於齐【此下着书者云】齐人反赵魏之後而楚果弗与地则五国之事困也

五国伐秦魏欲和【补曰大事记此六国既败求和於秦之事也】使惠施【魏相】之楚楚将入之秦【纳施於秦】而使行和杜赫谓昭阳曰凡为伐秦者楚也【据此则楚时与伐罪燕也正曰凡为伐秦者楚也指为从长而言余说见秦策义渠君章】今施以魏来而公入之秦是明楚之伐而信魏之和也公不如无听惠施而陰使人以请听秦【以和请於秦而听其命补曰姚云刘作德秦】昭子曰善因谓惠施曰凡为攻秦者魏也今子从楚为和楚得【元作将】将【补曰当作得大事记改】其利魏受其怨子归吾将使人因魏而和惠子反魏王【哀正曰襄】不说杜赫谓昭阳曰魏为子先战折兵之半【补曰折閱之折减损也食列反】谒病不听请和不得魏折而入齐秦【此折犹屈】子何以救之【救其折】东有越累【元作累此言越有伤楚之心越近楚故】累【正曰此书累累通】北无晋而交未定於齐秦是楚孤也不如速和【赫此言盖两忠楚魏正曰赫陈楚陰请秦之谋以诳魏今恐魏之折入秦而复为是说非有忠魏之心也】昭子曰善因令人请和於魏【补曰为子之为去声】

秦招楚而伐齐冷向【补曰冷平声冷伦氏之後】谓陈轸曰秦王【惠】必外向【言合他国不一於楚】楚之齐者【与齐善者】知西不合於秦必且务以楚合於齐齐楚合燕赵不敢不听齐以四国敌秦是齐不穷也【兵力不屈】向曰秦王诚必欲伐齐乎不如先收於楚之齐者楚之齐者先务以楚合於齐则楚必即秦矣【秦能收楚之善齐者则其初虽欲合齐楚今必背齐合秦】以强秦而有【衍晋字】晋楚则燕赵不敢不听是齐孤矣向请为公说秦王【元在韩策】张仪之楚贫【初至王未之重】舍人怒而欲归张仪曰子必以衣冠之敝故欲归待我为子见楚王当是之时南后【怀王后】郑褒【美人补曰袖褒同周紫芝楚辞说云郑国之女多美而善舞楚怀王幸姬郑袖当是善舞故名者所以舞也】贵於楚张子见楚王楚王不说【前尝欲逐之於魏正曰彼此前後不可考疑此为初见楚王时事当在前】张子曰王无所用臣臣请北见晋君楚王曰诺张子曰王无求於晋国乎王曰黄金珠玕犀象【玕珠不圆者】出於楚寡人无求於晋国张子曰王徒不好色耳王曰何也张子曰彼郑周之女粉白墨黑【黑言其髮正曰墨别本作黛画眉墨也】立於衢间非知而见之者以为神楚王曰楚僻陋之国也未尝见中国之女如此其美也寡人见【补补曰此当有见字】之独何为不好色也乃资之以珠玉南后郑褒间之大恐令人谓张子曰妾闻将军之晋国偶有金千斤进之左右以供刍秣【秣饲马】郑褒亦以金五百斤张子辞楚王曰天下闭关不通未知见日也愿王赐之觴王曰诺乃觴之中饮【补曰上林赋酒中乐酣注饮酒半醉半醒也中直衆反】再拜而请曰非有他人於此也愿王召所便习而觴之【便所安者习所昵者补

曰便习犹便嬖便毗连反】王曰诺乃召南后郑襄而觴之张子再拜而请曰仪有死罪於大王王曰何也曰仪行天下徧矣未尝见人如此其美而仪言得美人是欺王也王曰子释之【释犹置】吾固以为天下莫若两人也【仪自辱於楚相未尝至楚其至楚在复相秦之四岁此十六年正曰不可考补曰大事记引苏氏云仪之所以求用者其术至此此所以言必信而功多也可不悲乎愚谓此正孟子所谓妾妇之道庄生所谓所治愈下则所得愈多者也策南后郑襄为二人苏氏止为郑袖一人 为子之为去声】

楚怀王拘张仪【以其欺楚以商於故】将欲杀之靳尚【楚人】为仪谓楚王曰拘张仪秦王必怒天下见楚之无秦也楚必轻矣又谓王之幸夫人郑襄曰子亦自知且贱於王乎郑襄曰何也尚曰张仪者秦王【惠】之忠信有功臣也今楚拘之秦王欲出之秦王有爱女而美又简择宫中佳【衍翫字正曰一本无】丽好翫【人之可好可翫者书曰翫人丧德】习音者以懽从之【习音所谓懽也以从爱女正曰习於音声者】资之金玉宝器奉以上庸六县为汤沐邑【以邑为女汤沐之贝】欲因张仪内之楚王楚王必爱【絶句】秦女资强秦以为重挟宝地以为资势必【补补曰此下疑有缺字】为王妻以临于楚王惑於虞乐必厚尊敬亲爱之而忘子子益贱而日疏矣郑襄曰愿委之於公为之奈何曰子何不急言王出张子张子得出德子无已时秦女必不来而秦必重子子内擅楚之贵外结秦之交畜张子以为用子之子孙必为楚太子矣此非布衣之利也【利在为王】郑襄遽说楚王出张子【此十八年补曰史楚愿得张仪而献黔中秦王欲遣之口弗忍言仪请行曰臣善靳尚尚得事郑襄襄所言皆从遂使楚仪固已料是谋之必中矣】

楚王将出张子【正曰姚本自为一章今从之】恐其败已也【补曰姚云败一作欺】靳尚谓楚王曰臣请随之仪事王不善臣请杀之楚小臣靳尚之仇也谓张旄【魏之用事者】曰以张仪之智而有秦楚之用君必穷矣君不如使人微要靳尚而杀之【微不顯也使若仪杀之】楚王必大怒仪也彼仪穷则子重矣楚秦相难则魏无患矣张旄果令人要靳尚刺之楚王大怒秦楚【补正曰怒秦句】掇兵而战秦楚争事魏张旄果大重【彪谓张旄欲穷仪则如杀仪斯已矣今不杀仪顾从说者杀尚以仪之智为足以免於死也补曰大事记靳尚之出张仪欲以求福也反以杀身事变之来亦安可逆料哉此可为小人之戒屈原曰前大王见欺於张仪仪至臣以为大王烹之吁岂惟屈原虽庸人孰不谓然怀王听靳尚郑袖之言而出之既出之又恐其欺已而使尚随之不悟其诳尚之见杀则虽怒而终不能诛仪也杜忠言惑邪说玩弄於仪掌握之上召寇衄师丧国亡身死有余责特以为秦人诈诱天下反从而怜之计其愚闇强愎六国之主无与辈也】

张仪为秦破从连横说楚王【在郑?出仪後】曰秦地半天下兵敌四国【四方之国】被山带河【补曰姚及别本有四塞字史同此脱】以为固【被寝衣也喻其亘延】虎贲之士百余万【汉官仪虎贲戴鷩冠属中郎将正曰牧誓注若虎贲兽言其猛也周礼有虎贲氏非始汉】车千乘骑万匹粟如丘山法令既明士卒安难乐死【死难兵革之事】主严以明将智以武虽无出兵甲席卷常山之险【收取之如卷席之易无遗也恒山属赵之元氏此作常刘向避文帝讳也补曰正义云常山在镇州西正曰史记已作常汉时传写所改】折天下之脊天下後服者先亡且夫为从者无以异於驱羣羊而攻猛虎也夫虎之与羊不格明矣【格犹

敌】今大王不与猛虎而与羣羊窃以为大王之计过矣凡天下强国非秦而楚非楚而秦两国敌侔交争【侔齐等也】其势不两利大王不与秦秦下甲兵据宜阳韩之上地不通【上流之地补曰後语作上党地】下河东取成臯韩必入臣於秦韩入臣魏则从风而动秦攻楚之西韩魏攻其北社稷岂得无危哉且夫约从者聚羣弱而攻至强也夫以弱攻强不料敌而轻战国贫而骤举兵此危亡之术也臣闻之兵不如者勿与挑战粟不如者勿与持久【持相持】夫从人者饰辩虚辞【饰缘饰非实也】高主之节行言其利而不言其害卒有楚祸【秦伐楚之祸史作秦祸意同】无及为已是故愿大王之熟计之也秦西有巴蜀方船积粟起於汶山【居贫切属蜀都湔氏道即岷山故唐志茂州汶山注有岷山】循江而下至郢三千余里舫船载卒【舫平音并舟也正曰舫甫望切】一舫载五十人与三月之粮下水而浮一日行三百余里里数虽多不费汗马之劳不至十日而距扞关【距本鸡足故训至楚记晋伐楚楚为扞关以距之仪传注巴郡鱼复有扞水关正曰徐广云鱼复有扞水扞关史楚肃王四年蜀伐楚取兹方於是楚作扞关拒之】扞关惊则从竟陵以东尽城守矣黔中巫郡非王之有已秦举甲出之武关南面而攻则北地絶【北境之地非幽州郡】秦兵之攻楚也危难在三月之内而楚恃诸侯之救在半岁之外此其势不相及也夫恃弱国之救而忘强秦之祸此臣所以为大王之患也且大王尝与吴人五战【史不书】三胜而亡之陈卒尽矣【陈犹故正曰陈古阵字姚云曾作阵】有偏守新城【一偏之戍缮筑之城】而居民苦矣臣闻之攻大者易危而民敝者怨於上夫守易危之功而逆强秦之心臣窃为大王危之且夫秦之所以不出甲於函谷关十五年以攻诸侯者陰谋有吞天下之心也【补曰攻大即下功字攻诸侯自当作攻不出甲函谷关十五年此辩士夸词非实史作攻齐赵按此前二年五年六年皆有攻赵之事而攻齐则无之若云不攻齐则犹可通也陰谋一本无谋字】楚尝与秦构难战於汉中楚人不胜通侯执珪【彻侯汉讳武帝作通此亦刘向所易也正曰说见前】死者七十余人遂亡汉中楚王大怒兴师袭秦【补曰诸本有此四字鲍本无今依诸本增】与秦战於蓝田又却【秦惠十三年取汉中又败之蓝田此十七年此处与上章所称楚王皆後人追书耳】此所谓两虎相搏者也夫秦楚相敝而韩魏以全制其後计无过【一作危】於此者矣是故愿大王熟计之也秦下兵攻卫阳晋必关【元作开补曰姚云一本作关史同按诸本多作开或作大开不若关义长】扞天下之匈【上二邑天下之中也故喻之匈秦下兵二邑必拒之则闭不通故楚可以此时举宋正曰索隐云以常山为天下脊则卫及阳晋当天下匈其地是秦晋齐楚之交道也据之是关天下匈他国不得动也】大王悉起兵以攻宋不至数月而宋可举举宋而东指则泗上十二诸侯尽王之有已凡天下所信约从亲坚者苏秦封为武安君而相燕即陰与燕王谋破齐共分其地乃佯有罪出奔入齐齐王【闵】因受而相之居二年而觉齐王大怒车裂苏秦於市【按史秦事觉在其死後仪以此明其以诈死耳补曰苏秦为客所刺设计以取贼故车裂而得贼今仪言如此盖借事为说破从亲也】夫以一诈伪反覆之苏秦而欲经营天下混一诸侯其不可成也亦明矣今秦之与楚也接境壤界固形亲之国也【其势当亲】大王诚能听臣臣请秦太子入质於楚楚太子入质於秦请以秦女为大王箕帚之妾【帚粪也以洒扫之役自居补曰大事记其说诸侯皆曰事秦独楚曰云云以楚取强故尔】効万家之都以为汤沐之邑长为昆弟之国终身无相攻击臣以谓计无便於此者故敝邑秦王【惠】使使臣献书之从车下风【书国书非此书将迎之际必有风焉不敢当立故言下风】须以决事楚王曰楚国僻陋托东海之上寡人年幼【言其为从时】不习国家之长计今上客幸教以明制【秦王之制诰】寡人闻之敬以国从乃遣使车百乘献

鸡骇之犀【抱朴子通天犀中有一白理如线置米其上以饲鸡见之惊故名骇鸡犀】夜光之璧【邹阳言魏文侯归白圭夜光之璧】於秦王【传在诸国之先补曰大事记六国连衡魏先听仪说事秦故楚赦仪之後所说止五国仪说楚王与秦和亲楚王既得张仪而重出黔中地欲许之屈原谏不听卒许仪遂说韩齐赵燕皆听仪归报未至惠王薨而约亦解为秦两为大之为去声挑上声】

张仪相秦【复相时】谓昭睢曰楚无鄢郢汉中有更得乎【此皆楚之要地无此则危亡安能有他】曰无有曰无昭过陈轸有所更得乎曰无所更得【二臣楚之良臣无此二臣不能复得良臣此仪为秦谋去楚谋臣也】张仪曰为仪谓楚王逐昭过陈轸请复鄢郢汉中【秦惠十三年取汉中故至是许复之鄢郢此时不书此策仪知楚王重地轻人故使睢言之二人逐则楚无良臣睢必得其处也】昭?归报楚王【睢盖畔楚善仪者】楚王说之有人谓昭过曰甚矣楚王不察於人者也韩求相工陈轸【周策陈作师求周使相之】而周不听魏求相綦毋恢而周不听何以也周曰【补补曰姚云一本有曰字】是列县畜我也【待我如县吏】今楚万乘之强国也大王天下之贤王也今仪日逐君与陈轸而王听之是楚自待【元作行】行【补曰当是待字】不如周而仪重於韩魏之王也且仪之所行有功名者秦也【欲立功名於秦】所欲富贵者魏也【取富贵於魏】欲为攻於魏【为魏伐人】必南伐楚故攻有道外絶其交【交谓与国】内逐其谋臣陈轸夏人也【夏中国也】习於三晋之事故逐之则楚无谋臣矣今君能用楚之衆故亦逐之则楚衆不用矣此所谓内攻之者也而王不知察今君何不见臣於王请为王使齐交不絶【补曰姚本叠齐交不絶四字】仪闻之其効鄢郢汉中必缓矣【齐楚大国也仪恶其合今合而与之地则楚益劲仪必不为也】是昭睢之言不信也王必薄之

楚王令昭睢之秦重张仪【说秦使重之】未至惠王死武王逐张仪王因收昭睢以取齐【收捕系之也睢善仪而齐恶仪秦既逐仪楚故捕击?以外仪而合於齐补曰以收为捕系则与收韩魏字义顿异恐有差误】桓臧【楚人】为睢谓楚王曰从【元作横】横亲之不合也仪贵惠王【为王所贵】而善睢也今惠王死武王立仪走公孙郝甘茂贵甘茂善魏公孙郝善韩二人固不善睢也必以秦合韩魏韩魏之重仪【言昔重之】仪有秦而睢以楚重之今仪困秦而睢收楚【困谓见逐於秦】韩魏欲得秦必善二人者【郝与茂】二人者【补三字补曰姚云一本复有二人字】将收韩魏轻仪而伐楚【以楚尝重仪故】方城必危王不如复睢【复其位】而重仪於韩魏仪据楚势挟魏重以与秦争魏不合秦【絶句】王亦不从【不从秦补曰姚云王三本同作韩愚谓此义长】则方城无患

张仪逐惠施於魏【仪时隙秦相魏此十九年】惠子之楚楚王受之冯郝【楚人】谓楚王曰逐惠子者张仪也而王亲与约【与施相结】是欺仪也臣为王弗取也惠子为仪来者【元作者来】者来而恶王之交於张仪惠子必弗行也【此设辞也施以仪逐之而来必有恶仪之言使施善仪为仪而来岂行此恶仪之言哉正曰谓逐惠施者张仪而王与施结约则是欺仪臣所以为王不取惠施为仪逐来归而使王与仪交恶施亦不必行此】且宋王【君偃】之贤惠子也天下莫不闻也今之不善张仪也【今谓施】天下莫不知也今为事之故【今为楚国事】弃所贵於讎人【贵谓仪讎谓施不善仪也楚王尝贵仪而今受施是为仪之

讎而弃仪也】臣以为大王轻矣且为事邪【诚有意为国事者】王不如举惠子而纳之於宋而谓张仪曰请为子勿纳也今必德王【今谓仪补曰一本仪必德王】而惠子穷人而王奉之又必德王此不失为仪之实而可以德惠子王曰善乃奉惠子而纳之宋【补曰以为之为如字】

陈轸云【元作告】告【补曰恐当作去】楚之魏张仪恶之於魏王【哀正曰当是惠王】曰轸犹善楚为求地甚力左爽【未详】谓陈轸曰仪善於魏王魏王甚信之公虽百说之犹不听也公不如以仪之言为资【仪言已为楚因以其言闻之楚】而得复楚【楚闻其为楚故复之】陈轸曰善因使人以仪之言闻於楚楚王喜欲复之【补曰魏策有同】魏王【哀正曰无考】遣楚王美人楚王说之夫人郑襄知王之说新人也甚爱新人衣服玩好择其所喜而为之宫室卧具择其所善而为之爱之甚於王王曰妇人所以事夫者色也而妬者其情也今郑襄知寡人之说新人也其爱之甚於寡人此孝子之所以事亲忠臣之所以事君也郑襄知王以己为不妬也因谓新人曰王爱子美矣虽然恶子之鼻子为见王【为此恶鼻故正曰为如字】则必揜子鼻新人见王因揜其鼻王谓郑襄曰夫新人见寡人则揜其鼻何也郑襄曰妾知也王曰虽恶必言之郑襄曰其似恶闻王之臭也【王盖有臭疾】王曰悍哉令剿之无使逆命【不通新人之言补曰虽恶之恶如字】

楚王后死【自张仪拘时独言郑襄则后死久矣正曰无据使真为怀王郑襄必不待视珥所在矣】未立后也谓昭鱼曰公何以不请立后也昭鱼曰王不听是智困而交絶立后也【新所立后补曰一本立作於】然则【说者辞】不买五双珥令其一善而献之王明日视善珥所在因请立之【补曰不买上宜有何字说见齐策此等何足纪载】

齐明说卓滑【疑即淖滑】以伐秦滑不听也齐明谓卓滑曰明之来也【盖自秦来】为樗里疾卜交也明说楚大夫以伐秦皆受明之说也唯公弗受也臣有辞以报樗里子矣卓滑因重之【此明因败为成之说也樗里滑之所欲交也滑不听明明惧见轻为善於疾而言以此报疾故滑重之】

或谓黄齐曰人皆以谓公不善於富摯【皆楚人】公不闻老莱子【楚有道之士】之教孔子事君乎示之其齿之坚也【补曰姚云一本齿下有曰齿二字】六十而尽相靡也【靡摩同研也】今富摯能【有材能】而公重不相善也【重犹甚】是两尽也【补曰谓两强俱毙若齿之相厚以就尽也】谚曰【传言曰谚】见君之乘下之【乘马也在车则下】见杖起之【在坐则起补曰下音户?音去上声】今也王爱富摯而公不善也是不臣也【彪谓王之所爱诚善人也正人也尊之敬之礼也如不善不正方当为王力排而亟去之今日王爱之亦爱何义也此正益以富摯能为足爱也夫能之不善不正亦多矣不可不察也补曰说苑常摠告老子曰舌之存也岂非以其治之柔邪齿之亡也岂非以其刚邪孔丛子云老莱子谓子思曰子不见夫齿乎虽坚刚卒尽相摩舌柔顺终以不敝按史记及汉志并云孔子与老子老莱子同时孔丛子所记舛也】

秦伐宜阳【此二十一年】楚王谓陈轸曰寡人闻韩朋【元作侈下同】侈巧士也习诸侯

事殆能自免也【免於危亡也公仲时守宜阳】为其必免吾欲先据之以加德焉陈轸对曰舍之王勿据也以韩朋侈之智於此困矣今山泽之兽无黠於麋【鹿属补曰黠慧也慧者儼敏也】麋知猎者张网前而驱已也因还走而冒人【蒙犯即人不趋网】至数猎者知其诈【补曰数音朔】伪举网而进之【伪举网使其进而即人乃以网网之】麋因得矣今诸侯明知此多诈伪举网而进者必衆矣舍之王勿据也韩朋侈之智於此困矣楚王听之宜阳果拔陈轸先知之也【此策亦可作韩侈以公仲实守宜阳故作朋正曰说见秦韩等策】

四国伐楚【楚记二十八年秦齐韩魏共攻楚】楚令昭睢将以距【拒同】秦楚王欲击秦昭睢不欲桓臧为昭睢谓楚王曰睢战胜三国恶楚之强也恐秦之变而听楚也必深攻楚以劲秦【坚其伐楚之心】秦王【昭】怒於战不胜必悉起而击楚是王与秦相罢【音疲】而以利三国也战不胜秦秦进兵而攻不如益昭睢之兵令之示秦必战秦王恶与楚相敝而令天下利【补正曰令天下谓以相敝令於天下使知】秦可以少割而收害也【秦见楚将必战必割地与楚和战伐之害可息也收犹息正曰秦恶与楚相敝而不战则楚可以少割地而收秦一本无害字是】秦楚之合而燕赵魏不敢不听三国可定也

城浑【周人】出周【自周出正曰出周下连三人之文疑为人名有误字故大事记止云城浑南游於楚】二【元作三补曰二字恐有误】三人偶行【偶耦同二人曰耦两也此盖一人先二人後】南游於楚至於新城【庄六年注新城郑新密今荥阳密也汉北海河南皆有此属楚盖河南密也正曰僖作庄误新城说见秦策下章言新城阳人阳人在汝州当是与此近者】城浑说其令曰【补曰周显王十九年秦置令丞赵策受冯亭上党亦云千户封县令今楚亦有此称变古者非特秦矣】郑魏者楚之夷国【集韵夷弱也补曰而兗反】而秦楚之强敌也郑魏之弱而楚以上梁应之【此山阳济阳故梁近楚故也正曰故梁在汝州西南说见齐策此云上梁非是】宜阳之大也【时秦已得之】楚以弱新城图【元作围】围之蒲坂平阳相去百里秦人一夜而袭之安邑不知【此言百里之地不相知况于五百里邪】新城上梁相去五百里秦人一夜而袭之上梁亦不知也今边邑之所恃者非江南泗上也【汉志楚分野言江南地广云此皆远哉故非所恃汉志言楚分野云江南平地故知其稽正曰策语难晓注强解尤甚】故【衍楚字】楚王何不以新城为主郡也【主犹守也为郡则士马盛可以备秦正曰大事记郡者县之主故谓之主郡又郡县说见秦策】边邑甚利之【此浑言其欲说楚王大意】新城公【楚县尹称公】大说乃为【衍王字补曰姚本无王字】具驷马乘车五百金之楚【衍尽字】尽【补曰赆也字通借姚本无】城浑得之遂南交於楚楚王果以新城为主郡【城书作成补曰当作成从改文】

韩公叔有齐魏【得二国之援】而太子有楚秦【太子几瑟也韩襄十二年苏代曰公叔伯婴恐秦楚之纳几瑟是也此二十九年】以争国【补曰公叔主咎公仲主几瑟也伯婴说见韩策】郑申为楚使於韩矫以新城阳人【秦记注南阳县有阳人聚补曰正义引括地志云阳人在汝州叶县西】予太子楚王怒将罪之对曰臣矫予之以为国也臣为太子得新城阳人以与公叔争国而得之【得其国事】齐魏必伐韩韩氏急必悬命於楚又何新城阳人之敢求太子不胜【不胜公叔】幸【元作然】然而不死今将倒冠而至【言其归楚之疾】又安敢言地楚王曰善乃不罪也【韩襄策语同】

楚杜赫说楚王以取赵王曰与【补曰一本作且与】之五大夫【楚官】而令私行陈轸谓楚王曰赫不能得赵五大夫不可收也是【元作得补曰姚云得一作是】赏无功也得赵而王无加焉是无善也【不赏其善如不有之】王不如以十乘行之杜赫怒而不行陈轸谓王曰是不能得赵也

楚王问於范环曰寡人欲置相於秦孰可对曰臣不足以知之【补曰史楚怀王新与秦婚而懽素闻甘茂在楚使人谓楚王曰愿送甘茂於秦云云环史作崐】王曰吾相甘茂可乎范环对曰不可王曰何也曰夫史举上蔡之监门也大不知【元作如下同补曰姚云一作知下同】事君小不知处室以苛廉闻於世【苛小节】甘茂事之顺焉【言大不失其意】故惠王之明武王之察张仪之好譖甘茂事之取十官而无罪茂诚贤者也然而不可相秦秦之有贤相也非楚国之利也且王尝用召【补】滑【补曰史作召滑】於越【召滑见甘茂传】而纳句章【属会稽】昧之难【昧唐昧楚将此二十八年秦齐韩魏共攻楚杀昧】越乱故楚南察瀨湖【察犹治也言楚有而治之南阳有厉音赖正曰察瀨湖史作塞厉门地皆未详恐有误字察作塞胜】而野江东【以江之东为野此言楚虽有唐昧之难而能得越地以召滑乱之也】计王之功所以能如此者越乱而楚治也今王已用之於越矣而忘之於秦臣以为王钜速忘矣【钜大也正曰钜诘通】王若欲置相於秦乎若公孙郝者可夫公孙郝之於秦王【昭】亲也【补曰史作向寿】少与之同衣长与之同车被王衣以听事【言其素重】真大王之相已【秦相而曰王之相盖秦相之必右楚也】王相之楚国之大利也【甘茂传有人地小异补曰上蔡史俱作下蔡末云楚使使请秦相向寿茂竟不得入卒於魏】魏相翟强死为甘茂谓楚王曰魏之几相者【言危欲相之】公子劲也【秦人】劲也相魏魏秦之交必善【劲秦人而魏相之故正曰俱无考】秦魏之交完则楚轻矣故王不如与齐约相甘茂於魏齐王【闵】好高人以名今为其行人【楚为齐请如其使者礼行人使适四方】请魏之相齐王必喜魏氏不听交恶於齐齐魏之交恶必争事楚魏氏听甘茂与樗里疾贸首之讎也【贸言欲易取其首】而魏秦之交必恶【疾相秦茂相魏故】又交重楚也

齐秦约攻楚楚令景翠以六城赂齐太子为质【此二十九年太子横】昭睢谓景翠曰秦恐且因景鲤苏厉而效地於楚公出地以取齐【取犹收犹悦】鲤与厉且以收地取秦【收前所効者盖二人之辞曰楚出地取齐楚既弱矣何足与地秦收所効必说二人也正曰景鲤乃楚臣秦可因之以责地见楚弱而劝秦收所効之地恐非】公事必败【楚不得秦地景翠赂齐楚必怨翠】公不如令王重赂景鲤苏厉使入秦【二人得楚赂不复为秦收地矣】秦恐【以齐楚合故】必不求地【不收所効】而合於楚若齐不求是公与约也【两国各不取地而止攻是约者复和也与如与国之与和好也言翠能和两国之约正曰战国之时秦之割地希矣惟赧王十七年割三城和齐韩魏一事尔怀王末年楚益以弱虽合齐秦未必遽惧而割也効地於楚者令楚効地恐者恐或如此之辞也景翠必与景鲤苏厉不合者故睢言翠既以地赂齐则秦恐或且因苏厉景鲤而令楚効地是翠出地取齐而二人收所出之地以取秦翠事岂不败乎今不如重赂二人使入秦为解则秦恐或必不求地而与楚合齐见秦楚之合若不求地则是公能和好结约也秦恐必不求地秦字疑当作齐谓重赂二人入秦则齐知秦楚之和恐不敢求所赂之地若果不求是公能和好结约也说亦通】

术视【秦人】伐楚楚令昭鼠以十万军汉中昭睢胜秦於重丘【属平原正曰恐非】苏厉谓宛公昭鼠【鼠为宛尹】曰王欲昭睢之乘秦【王楚王乘犹淩】必分公之兵以益之秦知公兵之分也必出汉中【出兵伐此】请为公令芋【元作辛】辛【元作辛】辛【补曰当作?】戎谓王【戎楚人贵於秦如以私告楚王者】曰秦兵且出汉中则公之兵全矣【欲其备秦故不分其兵】

秦败楚汉中【此三十年秦伐楚取八城宜得汉中】楚王入秦秦王【昭】留之游腾为楚谓秦王曰王挟楚王而与天下攻楚则伤行矣不与天下共攻之则失利矣王不如与之盟而归之楚王畏【畏畏秦】必不敢背盟背盟【补二字补曰宜复有背盟二字】王因与三国攻之义也【彪谓此言亦可听也而秦志在乱楚不为之动所以卒并天下後人守此】

顷襄王【怀王子元年赧王十七年癸亥】

楚襄王为太子之时质於齐怀王薨太子辞於齐王【闵】而归齐王隘之【隘犹阻未即许求地也补曰隘从厄音下同】予我东地五百里乃归太子子不予我不得归太子曰臣有傅请退【元作追】追【补曰退字讹】而问傅傅慎子曰献之地所以为身也爱地不送死父不义臣故曰献之便太子入致命齐王曰【致命归诚之言正曰送致命令如项羽使人致命怀王】敬献地五百里齐王归楚太子太子归即位为王齐使车五十乘来取东地於楚楚王告慎子曰齐使来求东地为之奈何慎子曰王明日朝羣臣皆令献其计上柱国子良入见王曰寡人之得求反【求反国而得】主坟墓复羣臣【复见之】归社稷也以东地五百里许齐令使来求地为之奈何子良曰王不可不与也王身出玉声许强万乘之齐而不与则不信後不可以约结诸侯请与而复攻之与之信攻之武臣故曰与之子良出昭常入见王曰齐使来求东地五百里为之奈何昭常曰不可与也万乘者以地大为万乘今去东地五百里是去我国之半也有万乘之号而无千乘之用也不可臣故曰勿与常请守之昭常出景鲤入见王曰齐使来求东地五百里为之奈何景鲤曰不可与也虽然楚不能独守王身出玉声许万乘之强齐也而不与负不义於天下楚亦不能独守【补曰姚云鲁本圈去王身止独守二十七字】臣请西索救於秦景鲤出慎子入王以三大夫计告慎子曰子良见寡人曰不可不与也而与而复攻之常见寡人曰不可与也常请守之鲤见寡人曰不可与也虽然楚不能独守也臣请索救於秦寡人谁用於三子之计慎子对曰王皆用之王怫然作色曰【怫郁也正曰怫音拂常与孟子皤然之皤同义怒变色也】何谓也慎子曰臣请効其说而王且见其诚然也王发上柱国子良车五十乘而北献地五百里於齐发子良之明日遣昭常为大司马令往守东地遣昭常之明日遣景鲤车五十乘西索救於秦王曰善乃遣子良北献地於齐遣子良之明日立昭常为大司马使守东地又遣景鲤西索救於秦子良至齐齐使人以甲受东地昭常应齐使曰我典主东地【典犹职主犹守】且与死生【地有则生失地则死之】率吾之士卒三十余万敝甲钝兵愿承下尘【凡人相趋则有尘战亦有尘不敢与齐抗故言下也】齐王谓子良曰大夫来献地今常守之何如子良曰臣身受命敝邑之王是常矫也王攻之齐王大兴兵攻东地伐昭常未涉疆秦以五十万临齐右壤曰夫隘楚太子弗出不仁又欲夺之东地五百里不义其缩甲则可【缩蹙也盖束之】不然则愿待战齐王恐焉乃请子良南道楚西使秦解齐患士卒不用东地复全【彪谓此四臣皆国士也襄王无若人岂能反国慎子能兼用

之其最优乎方之晋五臣其舅犯欤此书三书怀王薨而太子归史记独谓太子归而王乃薨又谓王逃归不達薨夫秦能劫留之岂不能卫之孟尝之逃先以计免犹危不脱楚王何以能逃可疑也楚王亡死太子在外郢中必立王以絕秦望太子以齐之重归义嗣也其谁敢干之於是王乃定齐策乃云忠王而走太子则是太子卒不得位亦非也盖郢中立王时苏子以此策干田文而语人以九可文不之用世犹载其语也正曰顷襄之辞於齐齐隘之以割地虽不与非不信也齐使之来当直拒之昭常之不与是矣然不知出地而较计於大小之间抑未矣子良之与而复攻繆矣景鲤为之索救於秦夫不共戴天之讎王所当絕尚忍乞哀而求援哉鲤罪特甚也慎子不知择其是非决以大义请皆用之则兼其失矣且秦之责齐曰隘楚太子不仁夺东地不义斯言也出於讎国之口而四人皆无一语及之尚何足称乎余说并见齐策春秋战国之时在他国而逃归者多矣岂无卫之者邪以此疑怀王之逃不可也补曰使车使人之使如字为身之为去声】

女阿【未详】谓苏子曰秦栖楚王【怀王见劫客秦如栖】危太子者公也今楚王归【以此书及史考之王皆不归今此盖其丧归正曰此谋度之言】太子南【自齐归楚为南】公必危公不如令人谓太子曰苏子知太子之怨已也必且务不利太子太子不如善苏子苏子必且为太子入矣【入言其归之之深正曰使太子得入也】苏子乃令人谓太子太子复请於苏子【详此亦无走太子之事补曰疑此乃齐策苏子说薛公章脱简首女阿二字又他章错脱文说薛公策未欠苏子自解於薛公一节此为苏子自解於太子也疑亦有差舛】

长沙之难【长沙荆州国怀二十九年秦大破楚楚王恐使太子质齐楚盖破於此】楚太子横为质於齐楚王死薛公归太子横因与韩魏之兵随而攻东国太子惧【本其初言之亦明此非新立王也】昭盖曰不若令屈署以新东国为和於齐【新字疑衍】以动秦秦恐齐之败东国【上言齐兴兵攻故地此恐其败】而令行於天下也必将救我太子曰善遽令屈署以东国为和於齐【此即子良之策盖与署也】秦王【昭】闻之惧令芊【元作辛】辛【补曰当作?】戎告楚曰毋与齐东国吾与子出兵矣

有献不死之药於荆王者谒者操以入中射之士【射人之在中者正曰韩非子注中射士官有上中下】问曰可食乎曰可因夺而食之王怒使人杀中射之士中射之士使人说王曰臣问谒者曰可食臣故食之是臣无罪而罪在谒者也且客献不死之药臣食之而王杀臣是死药也王杀无罪之臣而明人之欺王王乃不杀【彪谓此射士乃不可不杀荆王赦之以不能答之也於答是也何有谒者曰可食非谓汝可食也药之能不死者乎人耳非能使刑者不死且人以献王何与汝而问之是安得无罪也正曰人献药於王夺而食之固不得为无罪而罪不至於死者世岂有不死之药哉明臣之欺王此士之欲以悟王也其志则忠矣鲍谓不可不杀悖哉补曰自齐威宣燕昭使人入海求三神山而方士盛楚臣有献不死之药者知当时此术蔓延浸淫不独燕齐然也屈平远游之篇曰一气孔神兮於中夜存虚以待之兮无为之先长生久视之方无以易此惜乎楚王之不知也此策时亦无考】

齐以淖齿之乱事【补补曰姚云一本添讎字】秦其後秦欲取齐【与齐合】故使苏?之楚【?固皆秦人】令任固之齐秦明谓楚王曰秦王【昭】欲楚不若其欲齐之甚也其使?来

以示齐之有楚【以有楚之亲示齐】以资固於齐【为任固资】齐见楚【见其纳?】必受固是楚【补补曰一本此有王字】之听?也适为固驱以合齐秦也【所谓资固】齐秦合非楚之利也且夫?来【补曰一本此下有之辞二字】之辞必非固之所以之齐之辞也【?之辞必厚楚而薄齐固之辞必厚齐而薄楚】王不如令人以?之辞谩固於齐【慢欺也以?薄齐之辞告齐则固言厚齐者非实齐必以固为欺已】齐秦必不合齐秦不合则王重矣王欲收齐以攻秦汉可得也王即欲以秦攻【补补曰一本有攻字】齐淮泗之间亦可得也【元在齐策正曰从旧可】

庄辛【楚人补曰元和姓纂庄辛楚庄王之後以諡为号】谓楚襄王曰君王左州侯右夏侯轸从鄢陵君与寿陵君【皆楚之宠幸臣也轸从谓轸出则二人从之】专淫逸侈靡不顾国政郢都必危矣襄王曰先生老悖乎【悖皆道也正曰悖乱也言老而耄乱也】将以为楚国妖祥乎庄辛曰臣诚见其必然者也非敢以为国妖祥也君王卒幸四子者不衰楚国必亡矣臣请避於赵淹留以观之【淹亦留】庄辛去之赵留五月秦果举鄢郢巫上蔡陈之地【此二十一年白起拔郢置南郡】襄王流擢於成【元作城】城阳【流谓走擢覆也谓自匿城阳属汝南若城阳乃齐也补曰史东北保於陈城当是指此城尔】於是使人发驲【驲车御也】徵庄辛於赵【徵谓召也】庄辛曰诺庄辛至襄王曰寡人不能用先生之言今事至於此为之奈何庄辛对曰臣闻鄙语曰见兔而顾犬未为晚也亡羊而补牢【牢闭养之圈】未为迟也臣闻昔汤武以百里昌桀纣以天下亡今楚国虽小断长续短犹以数千里岂特百里哉王独不见夫蜻蛉乎【虫一名桑根也】六足四翼飞翔乎天地之间俛啄蚤?而食之仰承甘露而饮之自以为无患与人无争也不知夫五尺童子方将调飴【元作鈇】鈇【补曰鈇当作飴】胶丝【飴米蘖所煎调以餌之又施胶於丝以击之正曰顔师古急就章注以蘖消米取汁而煎之湮弱者为飴形怡怡然此谓调以胶丝也淮南子柳下惠见飴曰可以养老盗跖见飴曰可以黏牡吕氏春秋仁人得飴以养疾侍老跖躄得飴以开闭取榘皆以黏也补曰一本标胶或作缪言纠缪纏统也】加已乎四仞之上【八尺曰仞】而下为蝼蚁食也【补曰姚本此有夫蜻蛉其小者也七字】黄雀因是以俯嚙白粒【嚙啄也盖以喙啄补曰一本嚙作囓】仰栖茂树鼓翅奋翼【翅强羽】自以为无患与人无争也不知夫公子王孙左挟弹右摄丸【摄引持也】将加已乎十仞之上以其类为招【补曰一本标後语云以其颈为的的或为招】昼游乎茂树夕调乎酸醢【以为饌也】倏忽之间坠於公子之手夫雀其小者也黄鹄因是【鹄鸿也正曰水鸟也】以游乎江海淹乎大沼俯嚙鳣【元作?】?鲤【字书无?字】仰嚙陵衡【衡香草正曰周礼菱芰菱?菱字通凡将篇菱从遴今俗书作菱武陵记云四角三角曰菱两角曰菱衡与菱并言即荇接余水草也】奋其六翮【翮羽本】而凌清风飘摇乎高翔自以为无患与人无争也不知夫射者方将修其矰【元作□】□卢【字书无□字矰与□声近集韵矰可为矰卢旅同黑弓也正曰下文矰即矰此不当复有矰号把中恐是此字形声讹耳】治其矰【元作矰】矰【正曰矰通见三辅黄图】缴【矰戈射矢缴生缕补曰缴音灼也】将加已乎百仞之上被?【元作礲】礲礲【无礲字集韵监利也礲以石着惟缴也正曰广韵礲力甘反治玉之石】引微缴折清风而殒矣【以系矢从高集韵殒下也如折然补曰礲补左补何二反殒羽粉反徐按吕春秋与陨同】故昼游乎江河夕调乎鼎鼐【鼐鼎絶大者也】夫黄鹄其小者也蔡灵【元作圣下同】圣侯之事【春秋及史无圣侯补曰圣当作灵或者古通称□下同】因是以南游乎高陂【陂阪也正曰池也此

引说文上一句】北陵乎巫山饮茹溪流【茹饮马也故与吐反正曰姚云驳语饭茹溪之疏注云茹溪巫山之溪】食湘波之鱼【湘水出零陵属长沙】左抱幼妾右拥嬖女与之驰骋乎高蔡之中【即上蔡】而不以国家为事不知夫子发方受命乎灵【元作宣】宣【补曰宣当作灵】王系已以朱丝而见之也【昭十一年楚子诱蔡侯般杀之于申经传不书子发盖使子发召之楚子灵王若宣王蔡灭八十年矣道应训子发伐蔡宣王郊迎人间训又言获罪威王者皆失考也】蔡灵圣侯之事其小者也君王之事因是以左州侯右夏侯辇从鄢陵君与寿陵君饭封祿之粟【所封之祿】而载方府之金【方四方金其所贡也】与之驰骋乎云梦之中而不以天下国家为事而不知夫穰侯方受命乎秦王【昭】填崑塞之内【填兵满也江夏有郢即魏策郢隘之塞补曰策本韩鲍改作魏故云然燕策亦有按左氏定四年左司马成谓子常直轅冥軹注漠东隘道史春申传秦踰郢隘之塞而攻楚苏秦传塞郢厄正义云申州罗山县本漠郢县州有清平関盖古郢县之厄塞又云石城山楚母家涉郢云亦指此而正义误以为河东太阳鄢城初不与楚相涉何遽忘前说也大事记作鍾山县按唐志申州有鍾山罗山两县申州今信阳军也崑郢字同謨萌反隘当从厄音】而投已乎崑塞之外襄王闻之顔色变作身体战栗於是乃以执珪而授之为阳陵君与淮北之地【彪谓此策天下之善规也襄王虽失之东隅而收之桑榆故其季年保境善邻差为无事此策为有力焉补曰与淮北云云句上有缺文新序曰身体悼栗曰谨受令乃封庄辛为成陵君而用计焉与举淮北之地十二诸侯後语云而与谋秦复取淮北之地鄢陵新序作新安大事记顷襄既失郢都复召庄辛闻其言至於色变体栗此其所以能稍复故地也复取江南十五邑在顷】

【襄二十三年新序又载楚襄用庄辛计举淮北之地十二诸侯盖丧乱之後补败扶倾之计皆出於辛特不能大有所为耳刘辰翁极诋辛小人谓何策之有皆失之】

齐韩魏共攻燕【燕惠七年书韩魏楚共伐燕他不书则楚当是齐此二十七年正曰策有宋书宋未?时岂得改楚为齐】燕使太子请救於楚楚王使景阳将而救之【景阳後至考烈六年犹为将史同补曰世家景阳救燕楚齐威宋当顷襄十三年至考烈王六年凡三十年犹相及唐裴行俭讨突厥徙营事类此】暮舍使左右司马各营壁地【壁军垒】已植表【如华表以别所舍】景阳怒曰女所营者水皆至?表【?犹没也此欲用其教因已示神】此焉可以舍乃令徙明日大雨山水大出所营者水皆?其表军吏乃服於是遂不救燕而攻魏離立【離雍同属陈留】取之以与宋【宋时已为齐未晓】三国惧乃罢兵魏军其西齐军其东楚军欲还不可得也景阳乃开西和门昼以车骑暮以烛通使於魏【补曰姚本车作军通作见】齐师恠之以为燕楚与魏谋之乃引兵而去齐兵已去魏失其为国无与共击楚乃夜遁楚师乃还【元在燕策正曰以救燕故在燕补曰離及通使之使去声】

考烈王【襄王子元年赧王五十三年己亥】

唐睢【元作且从秦策】旦见春申君【黄歇楚相】曰齐人饰身修行得为益【益谓有祿位】然臣羞而不学也不避絶江河【言虽险不避】行千余里来窃慕大君之义【大言其高义】而善君之业臣闻之责诸怀锥刃【孟贲专诸诸吴人刺王子庆忌者言二人不待盛兵而後称勇】而天下为勇【补曰为当作谓】西施衣褐【褐粗衣补曰说文编臬鞮一曰

粗衣诗国风孟子注褐寬博注并云毛布】而天下称美今君相万乘之楚御中国之难所欲者不成所求者不得臣等少也夫梟棊之所以为能【元作能为】能为者【补曰正义云?头有刻梟鸟形者】以散棊佐之也【散谓衆棊】夫一梟之不如不胜五散【独善不如衆智补曰当云一梟之不胜不如五散】亦明矣今君何不为天下梟而令臣等为散乎

客说春申君曰汤以亳【皇览今梁谷熟补曰史正义引括地志云宋州谷熟县西南南亳故城即汤都宋州北大蒙城为景亳汤所盟地所谓北亳河东偃师为西亳帝喾及汤所都盘庚亦徙都云汤即位後都南亳後徙西亳】武王以镐【元作郾属京兆】郾【正曰镐通史复都丰郾国语杜伯魁

王放郾郾一音霰尧反考鲁桓十三年公会齐侯于郾常山有邑志阙上林即今长安县昆明池北高邑县】皆不过百里以有天下今孙子【荀卿】天下贤人也【补曰荀作孙避宣帝讳也】君藉之以百里之【?】势【时为兰陵令】臣窃以为不便於君何如春申君曰善於是使人谢孙子孙子去之赵【史言孙子春申君死而贫困家兰陵不言之赵】赵以为上卿客又说春申君曰昔伊尹【补补曰缺尹字】去夏入殷殷王而夏亡管仲去鲁入齐鲁弱而齐强夫贤者之所在其君未尝不尊国未尝不荣也今孙子天下贤人也君何辞之春申君又曰善於是使人请孙子於赵孙子为书谢曰病人怜王【病虽恶疾犹愈於刼弑故反怜王补曰病癰也刘辰翁曰此韩非语孙不应用不知非正用孙语也】此不恭之语也虽然【补曰一本此下有古无虚谚四字】不可不审察也此为刼弑死亡之主言也夫人主年少而矜材无法术以知奸则大臣主断国【专断其国】私以禁诛於已也【察其私则恐人诛已故主断以禁之】故弑贤长而立幼弱废正适而立不义春秋戒之曰楚王子围聘於郑未出竟闻王病反问疾遂以冠纓绞王杀之因自立也【昭元年】齐崔杼之妻美庄公通之崔杼帅其君党而攻庄公庄公请与分国崔杼不许欲自刃於庙崔杼不许庄公走出踰於外墙射中其股遂杀之而立其弟景公【襄二十五年】近代所见李兑用赵饿主父於沙丘百日而杀之淖齿用齐擢闵王之筋【擢引也】悬於其庙梁宿夕而死夫病虽?肿胞疾【补曰?委勇切胞当披交切】上比前世未至绞纓射股下比近代未至擢筋而饿死也夫刼弑死亡之主也心之忧劳形之困苦必甚於病矣由此观之病虽怜王可也因为赋曰【补曰赋曰以下即侏诗文小异】宝珍隋珠【隋侯见大蛇伤疗而愈之蛇衔明珠报之世之所宝所珍】不知佩兮禕衣与丝【礼后服禕衣谓画袍】不知异兮閭姝子奢【姝好也奢即子都美人也补曰荀子作閭姬韦昭云梁王魏罃之美女楚辞注云奢或作都故以为郑之美人】莫知媒兮嫫母求之【嫫母丑妇也正曰丑妇人楚辞注云黄帝妻】又甚喜之兮以瞽为明以聋为聪以是为非以吉为凶呜呼上天曷惟其同【言举世皆然正曰朱子谓此言衰乱之极人怀私意乖异反易至於如此故呼天而问之曰何为而可使之同乎同则合乎天理之公是非善恶皆当於理而天下治矣明天意悔祸则转祸为福拨乱反正不难矣】诗曰上天甚神无自瘵也【瘵病也言天理甚明如是者必有患祸彪谓春申君之愚昏甚矣人惟不知贤故不能用岂有知之以一人言去之又以一人言召之其持操安在也荀卿絶之宜哉卿书有与赵孝成王论兵而史不言之赵失之卿礼义人也使卿而在楚春申必无李园之祸此书盖知之矣补曰按诗曰以下荀子无之二句乃菀柳之辞神诗作蹈传谓当从策也诗作焉本言人谁不欲朝事王而王甚神朝之无不自取病今借以言天之威神甚可畏不可不畏天而自取祸也朱子

谓黄歇乱人卿乃以为托身行道之所则已误矣愚谓卿虽非孟子比然以诗书礼义言治禁暴除害言兵要为异於战国之士者此篇不载於其书赋即俛诗未章其言弑贤良而立幼弱废正适而立不义远引楚围崔杼近述李兑淖齿齟切春申甚然首以法术知奸为言则亦出申商可谓惑流俗而不笃於自信者也策独载此而不及其他其人又可知矣 史荀卿年五十始游学於齐襄王时最为老师齐尚修列大夫之 而卿三为祭酒刘向曰方齐宣王威王之时聚天下贤士於稷下尊宠之若邹衍田骈淳于髡之属号曰列大夫是时荀卿年十五始游学至襄王时最为老师齐尚修列大夫之 而卿三为祭酒焉据二书之文则襄王时三为祭酒也大事记取史又书卿为列大夫祭酒在襄王五年是也朱子采刘向而文稍异曰卿少游学於齐历威宣至襄王三为稷下祭酒按史春申君死而卿家兰陵春申之死在考烈王二十五年齐王建之二十七年也上历襄王二十九年湣王宣王通五十九年乃及威王之世自王建二十九年至宣王元年已为一百有五年卿之不逮事威王明矣盖向之言但为历叙威宣之多士其言犹先宣而後威不主为卿言也祭酒者古人饮食必祭席中之尊者一人当祭後因以为官号髡衍为列大夫之时卿年尚少其徒既死齐修其 而卿与焉故卿在襄王时最为老师而三处衆士之上也向之言视史犹明朱子偶未之察耳史云五十始游学向云十五史字倒置无疑朱子改之当矣】

虞卿【史不书何所人】谓春申君曰臣闻之春秋【补曰此二字恐因下文衍】於安思危危则虑安今楚王春秋高矣而君之封地不可不早定也为主君虑封者莫如远楚秦孝公封商君孝公死而後王【补】不免杀之秦惠王封冉子【穰侯也宣太后弟子男子】惠王死而後王夺之公孙鞅功臣也冉子亲姻也然而不免夺死者封近故也太公望封於齐邵公封於燕为其远王室矣今燕之罪大而赵怨深【赵自燕王喜以栗腹之谋伐赵起燕四年至十二年无岁不战十二年此二十一年正曰不可考补曰一本赵怒深】故君不如北兵以德赵践乱燕【践奄之践】以定身封此百代之一时也【补曰此数语与秦策谓穰侯章赵策齐将攻宋章齐攻宋章皆相类】君曰所道攻燕非齐则魏魏齐新怨楚【昭阳救燕之役正齐韩魏共攻燕楚使景阳救之 昭攻魏雍丘以与宋云云时犹有宋去此时远甚鲍指以为怀王二十七年此为考烈王二十一年就使果然则相去亦皆远策固云魏齐新怨楚岂得为彼时事哉】楚军【元作君】君虽欲攻燕将道何哉对曰请令魏王可【景闵王可言听其道魏】君曰何如对曰臣请到魏而使所以信之【为所可信者】廼谓魏王曰夫楚亦强大矣天下无敌乃且攻燕魏王曰【补曰王曰以下脱简误衍在前章】乡也子云天下无敌今也子云乃且攻燕者何也对曰今谓马多力则有矣若曰胜千钧则不然者【钧三十斤】何也夫千钧非马之任也今谓楚强大则有矣若越赵魏而鬪兵於燕则岂楚之任也哉【元作我补曰姚云我一作哉】非楚之任而楚为之是敝楚也敝楚是强魏也其於王孰便也【补曰按史考烈王元年封歇春申君赐淮北地後十五年以地边齐言於王以为郡请封江东因城吴故墟大事记谓利吴之安富也此策言楚王春秋高君之封地不可不早定则在未封之前顷襄之时乎顷襄之三十四年赵尝伐燕岂或此时劝以践燕定封亦欲其取地於它国如魏冉乎淮北边齐犹难之况燕地乎亦非计之便也然远楚徙封卒用於城吴之时皆斯言有以啓之也】

或谓楚王曰臣闻从者欲合天下以朝大王臣愿大王听之也【燕昭末年用苏代说复约从

此二十二年春申遂为从长正曰此策时不可考以为春申合从无明缘与下章不同】夫因拙为信【拙谓怀王刼死正曰不专指此】奋患有成【奋於患难以能有成】勇者义之摄祸为福【补曰摄收也】裁少为多智者官之【官尊荣之称正曰义之谓制其宜也官之为主其事也】夫报报之反【报犹反也言屈伸祸福相反也】墨墨之化【墨默同化犹治也言治之其未着正曰报报之反言反复相寻墨墨之化言变化无形惟大君能之者言其转旋变化之妙又非勇智者所可及也新序晋平公谓师旷甚矣子之墨墨也旷曰天下有五墨墨史商君传殷纣墨墨以亡汉书窦婴传墨墨不得意皆同此字义或有异】唯大君能之祸与福相贯【贯犹通】生与亡为邻不偏於死【偏犹专也死谓患难】不偏於生【专於卫生如两臂重於天下者】不足以载大名【正曰载承也不专一於致死不专一於求生者不足以承载大名】无所寇艾【寇外兵艾已所惩创正曰寇犹贼害艾即刈不遭贼害而惩创则不足以横行於世】不足以横世【横言莫之敌】夫秦捐德絶命之日久矣而天下不知今夫横人噬口【集韵噬声也言声说所利之事】利机【正曰噬力暂反食貌利机者利其发动之机】上干主心下牟百姓【牟取也】公举而私取利【举谓举措】是以国权轻於鸿毛而积祸重於丘山【补曰此主从而黜横者之说然意多未详】

天下合从赵使魏加【赵人全晋旧姓正曰鲍见策云赵使故云尔无据】见楚春申君曰君有将乎曰有矣仆欲将临武君【未详补曰荀子议兵篇临武君与卿议兵於赵孝成王前注楚将刘向称卿至赵与孙臆议兵於孝成王前臆为齐宣王军师世远非是】魏加曰臣少之时好射臣愿以射譬之可乎春申君曰可加曰异日者更羸【人姓名】与魏王处京台之下【京高也正曰或台名】仰见飞鸟更羸谓魏王曰臣为君引弓虚发而下鸟魏王曰然则射可至此乎更羸曰可有间鴈从东方来更羸以虚发而下之魏王曰然则射可至此乎更羸曰此孽也【有隐痛於身犹孽正曰徐错曰妾隶之子曰孽孽之言孽也女没废而有所生若木既伐而生栱故於文子薛为孽孽者罪也按此则取废而复生之义以譬伤弓之鸟乎】王曰先生何以知之对曰其飞徐而鸣悲飞徐者故疮痛也鸣悲者久失羣也故疮未息而惊心未去也【补曰一本未忘】闻弦者音烈而高飞【烈猛也高飞欲避箭补曰姚及一本无者字烈作引其义为是者音之讹而衍也烈引之讹也】故疮陨也【以疮痛而坠】今临武君尝为秦孽【尝败於秦未详】不可为拒秦之将也

汗明【未详】见春申君候问【补曰姚云问一作间】三月而後得见谈卒春申君大说之汗明欲复谈春申君曰仆已知先生先生大息矣【异於小休】汗明蹙【元作愀】愀【补曰即愀】焉【字书无愀字蹙蹙惊貌正曰愀不安貌蹙蹙之蹙非蹙】曰明愿有问君而恐固【固陋也】不审君之圣孰与尧也春申君曰先生过矣臣何足以当尧汗明曰然则君料臣孰与舜春申君曰先生即舜也汗明曰不然臣请为君终言之君之贤实不如尧臣之能不及舜夫以贤舜事圣尧三年而後乃相知也今君一旦而知臣是君圣於尧而臣贤於舜也春申君曰善召门吏为汗先生着客籍五日一见【着者书此语也正曰着其名字於宾客之籍】汗明曰君亦闻骥乎夫骥之齿至矣【至言可服乘之时】服盐【元作檻】檻【补曰字讹当作盐】车【服在车前】而上太行蹄申膝折【申犹展皆用力故然】尾湛附溃【湛沉同汗多故然附当作肤与肤同亦汗出於肤如溃】漉汗【元作汁】汁洒地【参漉之汗正曰下有汗字汁与汗对汁言其重者】白汗交流【白汗不缘暑而汗也正曰白言其色】

外阪迁延【阪坡也迁延不进貌正曰姚本中阪】负棘而不能上【负所载也棘言步蹇正曰负在背姚本作负辕是】伯乐遭之【补曰伯乐姓孙名阳秦穆公时人】下车攀而哭之解紵衣以羃之【羃覆也】骥於是俛而喷仰而鸣声達於天若出金石声【补曰此声字宜衍】者何也【问其声何以然】彼见伯乐之知己也今仆之不肖厄於州部【集韵部统也界也】堀穴穷巷【堀窟也以穷巷为窟穴】沉湍鄙俗之日久矣【湍浊溽也】君独无意湔祓仆【湔手浣也祓去也】使得为君高鸣屈於梁乎【声已之屈梁南梁彪谓世之怀材抱德之士陆沉於时若此骥者不少而伯乐之不世有长鸣之无其时可不为之大哀邪故招延不可不博试用不可不详也补曰高鸣屈於梁疑明尝困於梁者一本标云类要高鸣作长鸣李善注广絶交论曰翦拂使其长鸣引策云】

楚考烈王无子【补曰此时无子也右史云楚幽王悍卒同母弟犹立犹庶兄负刍之徒袭杀犹而立负刍司马贞云犹有庶兄负刍及昌平君刘向列女传犹乃考烈王遗腹子】春申君患之求妇人宜子者进之甚衆卒无子赵人李园持其女弟欲进之楚王闻其不宜子恐又无宠李园求事春申君为舍人已而谒归故失期【後於所期日】还谒【自赵还入谒】春申君问状【状事状】对曰齐王遣使【诡言王建】求臣女弟与其使者饮故失期春申君曰聘入乎对曰未也春申君曰可得见乎曰可於是园乃进其女弟即幸於春申君知其有身园乃与其女弟谋园女弟承间说春申君曰楚王之贵幸君虽兄弟不如今君相楚王二十余年而王无子即百岁後将更立兄弟即楚王更立【王後王】彼亦各贵其所亲君又安得长有宠乎非徒然也君用事久多失礼於王兄弟兄弟诚立【补曰兄上恐亦当有王字叠上文】祸且及身奈何以保相印江东之封乎【补曰後语云江东十二县之封湖州图经有春申君封邑】今妾自知有身矣而人莫知妾之幸君未久诚以君之重而进妾於楚王王必幸妾妾赖天而有男则是君之子为王也楚国封尽可得【四封之内】孰与其临不测之罪乎春申君大然之乃出园女弟谨舍而言之楚王楚王召入幸之遂生子男立为太子以李园女弟立为王后楚王贵李园李园用事李园既入其女弟为王后子为太子恐春申君语泄而益骄陰养死士欲杀春申君以?口而国人颇有知之者春申君相楚二十五年考烈王病朱英【楚人正曰後语云观人朱英注观地在河北平原史观津人朱英班志信都国观津县观古玩反正义以为魏州观城县观音馆者非是又见韩策观鞅章鲍移在魏作魏鞅】谓春申君曰世有无妄之福【无妄言可必正曰朱子解易无妄云史作无望谓无所期望而有得焉者义亦通】又有无妄之祸今君处无妄之世以事无妄之主安不有无妄之人乎春申君曰何谓无妄之福曰君相楚二十余年矣虽名为相国实楚王也五子皆相诸侯今王疾甚旦暮且崩太子衰弱疾而不起而君相少主因而代立【谓摄也】当国如伊尹周公王长而反政不即遂南面称孤【不不反政】因而有楚国此所谓无妄之福也春申君曰何谓无妄之祸曰李园不治国【言非将相】王之舅也不为兵将而陰养死士之日久矣楚王崩李园必先入?主义【?言不移议欲杀春申也】制断君命【制断矫也君楚王也】秉权而杀君以?口此所谓无妄之祸也春申君曰何谓无妄之人曰君先仕臣为郎中君王崩【此章唯楚王更立楚王可曰楚王余皆後人称之正曰策中有当曰王当曰楚王亦有两称皆通者】李园先入臣请为君 其胸杀之【补曰 玉篇作 尺庸反刺也为君之为去声】此所谓无妄之人也春申君曰先生置之勿复言也李园软弱人也仆又善之又何至此朱英恐乃亡去後十七日【衍楚字】楚考烈王崩李园果先入置死士止於棘门之内【宫门以棘卫之】春申君後入止

棘门园死士夹刺春申君斩其头投之棘门外於是使吏尽?春申君之家而李园女弟初幸春申君有身而入之王所生子者遂立为楚幽王也是岁秦始皇立九年矣嫪毐【吕不韦所进以说始皇母帝太后者也】亦为乱於秦【不韦传毐与太后私乱生子二人与后谋曰王即薨以子为後补曰策於章末并叙嫪毐之事岂无意哉二国宗姓已?絶吕政虽一天下世仅再传奚异楚幽也赵与秦同姓王迁母倡族类不正亦以?亡盖伦纪渎乱其不永也固宜抑诸国运尽祚穷垂戾并於一时也欤】觉夷三族而吕不韦废【彪谓春申君所以至於此辄宠而暗於事也使万有一如李氏女所陈者归相印而老江东之封不已优乎春申於楚非若商君之於惠文又如不可则杖策而去扁舟五湖为世陶朱抑可矣春申不为此而计出於灭宗盖小人患失之祸势必有此不可不戒也朱英之言深矣然未闻道也春申之纳女前日事耳英不以此时匡之以大臣之义而以一卒自任虽多言亦何救於乱哉正曰凡鲍氏责春申以归老江东杖策扁舟之事在未纳女之前可也既纳之後又入其乘间之言祸根已牢异时纵欲归印杖策祸亦随之岂有脱理邪其论朱英以未闻道尤谬纳女事秘人岂知之英之事歇又浅观其说而不听可见责以匡正大臣之义岂其然乎补曰越絶书记李园女弟环谓圉王老无嗣可见我於春申君圉难之又令求谒於春申才人言之遂得幸云云烈王死幽王立环使园相春申後告园以吴封之三年徵春申为令尹自使其子亲为假君治十一年幽王徵假君与春申并杀之二君治吴凡十四年姚氏全注其文谓隋经籍志称越絶为子夏作今杂记秦汉事出後人不敢尽信史记国策列女传不载女环名乃见於此画策始终谓皆出环尤为异也其言烈王死後春申事亦皆不合姑记以广异闻云】

史疾为韩使楚楚王问曰客何方所循【方术也】曰治列子圉寇之言【圉御同】曰何贵曰贵正王曰正亦可为国乎曰可王曰楚国多盗正可以圉盗乎曰可曰以正圉盗柰何顷间有鹄止於屋上者曰请问楚人谓之何王曰谓之鹄谓之乌可乎曰不可曰今王之国有柱国令尹司马典令【皆楚官】其任官置吏必曰廉洁胜任今盗贼公行而弗能禁也此乌不为乌鹄不为鹄也【元在韩策正曰为韩使楚故在韩从旧可按此言循名任法有申韩之意而以为列圉寇所治何欤抑申韩原於道德本不异欤补曰为韩之为去声】

凡五十六章【正曰楚王将出张子章元与楚怀王拘张仪章相连为一章今别为】

战国策校注卷五

卷六

<史部,杂史类,战国策校注>

钦定四库全书

战国策校注卷六 宋 鲍彪 原注

元 吴师道 补正

赵【初分晋得赵国北有信都真定常山中山又得涿郡之高阳鄆州乡东有广平钜鹿清河河间渤海之东平舒中邑文安东州成平章武河以北南至浮水繁阳内黄斥丘西有太原定襄云中五原上党】

襄子【简子子补曰名无恤定王十六年戊子三晋灭智伯分其地】

智伯帅赵韩魏而伐范中行氏【补曰范氏士会之後荀林父将中行後因以官为氏】灭之休数年使人请地於韩韩康子欲勿与段规【韩人晋旧姓故魏亦有补曰姓谱段郑共叔段之後】谏曰不可夫智伯之为人也好利而鹜【鹜杀鸟也喻其残忍】复来请地不与必加兵於韩矣【补曰姚云复刘作愎韩子作鹜愎】君其与之彼狃【狃犬性骄也补曰狃习也】又将请地於他国他国不听必乡之以兵然则韩可以免於患难而待事之变康子曰善使使者致万家之邑一於智伯智伯说又使人请地於魏魏桓【元作宣下同】宣【补曰韩子说苑亦并作宣恐桓字讹下同】子欲勿与赵葭【魏人亦晋旧姓】谏曰彼请地於韩韩与之请地於魏魏弗与则是魏内自强而外怒智伯也然则其错兵於魏必矣不如与之桓宣子曰诺因使人致万家之邑一於智伯智伯说又使人之赵请藺【元作蔡】蔡皋狼之地【蔡非赵地皋狼属西河补曰恐名偶同汉志西河郡有皋狼县又有藺县蔡或藺字讹】赵襄子弗与智伯陰结韩魏将以伐赵赵襄子召张孟谈而告之曰夫智伯之为人阳亲而阴疎三使韩魏而寡人弗与焉【他日阴疎今则显矣】其移兵寡人必矣今吾安居而可张孟谈曰夫董阏安于简子【补曰一本作主】之才臣也世治晋阳而君泽循之【君泽赵臣继安于者补曰大事记晋阳汉太原郡所治龙山在西北晋水所出一本尹泽大事记谓泽字误韩子国语作尹铎】其余政教犹存君其定居晋阳君曰诺【君谓襄子】乃使延陵君【元作王此襄子臣不得称王】王【当作生正曰韩子云赵襄子召延陵生今将云云浚仪王氏谓鲍失考】将车骑先之晋阳君因从之至行城郭案府库【案按同行也】视仓廩召张孟谈曰吾城郭之完府库足用仓廩实矣无矢柰何张孟谈曰臣闻董子之治晋阳也公宫之垣【垣墙也】皆以荻蒿苦楚廕之【荻萑苇属尔雅萧荻注即蒿又繁丑狄为蒿苦盖也楚荆也以是为墙廕墙同】其高至丈余君发而用之於是发而试之其坚则籥籥之劲不能过也【补曰籥音窘籥即籥见禹贡】君曰矢足矣吾铜少若何张孟谈曰臣闻董子之治晋阳也公宫之室皆以链铜为柱质【质础也】请发而用之则有余铜矣君曰善号令已定备守已具三国之兵乘晋阳城遂战三月不能拔因舒军而围之决晋水而灌之围晋阳三年城中巢居而处

悬釜而炊财食将尽士卒病羸襄子谓张孟谈曰粮食匮财【元作城】城力尽士大夫病吾不能守矣欲以城下【谓将降】何如张孟谈曰臣闻之亡不能存危不能安则无为贵知士也君释此计勿复言也臣请见韩魏之君襄子曰诺张孟谈於是陰见韩魏之君曰臣闻唇亡则齿寒今智伯帅二国之君伐赵赵将亡矣亡则二君为之次矣二君曰我知其然夫智伯之为人麤中而少亲【麤粗同疏也正曰粗厉少仁爱】我谋未遂而知则其祸必至为之奈何张孟谈曰谋出二君之口入臣之耳人莫之知也二君即与张孟谈阴约三军与之期曰【补曰姚本原有日字】夜【日既夜】遣入晋阳张孟谈以报襄子襄子再拜之张孟谈因朝智伯而出【兵交使在其间故得朝之】遇智过【过一作果智伯之族补曰晋语智宣子将以瑶为後智果曰不如宵也弗听智果别族於太史为辅氏通监取此与策先後不同】辕门之外【以车为门而辕外向】智过入见智伯曰二主殆将有变君曰何如【君智伯】对曰臣遇张孟谈於辕门之外其志矜其行高智伯曰不然吾与主约谨矣破赵三分其地寡人所亲之【言亲与二国约】必不欺也子释之勿出於口智过出见二主入说智伯曰二主色动而意变必背君不如令杀之智伯曰兵着晋阳【着言附其城】三年矣旦暮当拔而飡其利乃有他心不可子慎勿复言智过曰不杀则遂亲之智伯曰亲之奈何智过曰魏桓宣子之谋臣曰赵葭韩【补补曰恐缺韩字】康子之谋臣曰段规【二諡皆非当时语】是皆能移其君之计君其与二君约破赵则封二子者各万家之县一如是则二主之心可不变而君得所欲矣智伯曰破赵而三分其地又封二子者各万家之县一则吾所得者少不可智过见君之不用也言之不听出更其姓为辅氏遂去不见张孟谈闻之入见襄子曰臣遇智过於辕门之外其视有疑臣之心入见智伯出更其姓今暮不击必後之矣【恐智伯以过之去之决有感动矣】襄子曰诺使张孟谈见韩魏之君日夜期杀守堤之吏而决水灌智伯军智伯军【补补曰姚本有军字】救水而乱韩魏翼而击之【左右夹击】襄子将卒犯其前大败智伯军而禽智伯智伯身死国亡地分为天下笑此贪欲无厌也夫不听智过亦所以亡也智氏尽灭惟辅氏存焉【彪谓段规之策智伯智过之察孟谈皆如在其目中可谓明也已矣此一时三晋智氏皆有士三晋之应之如响智氏独不用之而亡则士岂非天下之重宝乎虽然水灌晋阳城之不沈者三版於此时使智伯杀韩魏之君亦难听矣其次欲其分封二子是岂不可为与智伯惟没於利故昏於智故孟子之说曰何必曰利】

智伯从韩魏兵【二国兵从之】以攻赵围晋阳而水之城之【元作下】下【补曰设衍或是之字】不沈者三板郄疵【晋人补曰郄刺黎反孙本作郄说文作絺姚本注元和姓纂郄已姓青阳氏之後】谓智伯曰韩魏之君必反矣智伯曰何以知之郄疵曰以其人事知之矣【补曰一本作夫夫当属下句】从韩魏之君而攻赵赵亡难必及韩魏矣今约胜赵而三分其地今城不没者三板沈竈生鼃人马相食城降有日而韩魏之君无喜志而有忧色是非反如【补曰犹而】何也明日智伯以告韩魏之君曰郄疵言君之且反也韩魏之君曰夫胜赵而三分其地城今且将拔矣夫二【元作三补曰姚云钱刘作二】家虽愚不弃美利於前【补曰愚下恐当有必字】背信盟之约而为危难不可成之事其势可见也是疵为赵计矣使君疑二主之心【二主自称曰主亦非当时语】而解於攻赵也【解懈同】今君听谗臣之言而离二主之交为君惜之趋而出郄疵谓智伯曰君又何以疵言告韩魏之君焉智伯曰子安知之对曰韩魏之君视疵端而趋疾【视端畏之趋疾避之恐疵要之与见智伯而辞屈也】郄疵知其言之不听请使於齐智伯遣之韩魏之君果反矣【彪谓智伯至是眩於得而不

顾其祸殆天夺其魄者至以谋臣之言质人以反夫非狂昏痴瞽孰肯自承其反哉】

张孟谈既固赵宗庙封疆【补曰谈史作同太史公避父讳也一本庙作广是】发五霸【元作百下同伯业不振今复发之】百【补曰即伯古通】乃称简之涂【称者举其说也此土国地君之御】以告襄子曰昔者前国地君之御【国地犹武安之类御则之涂】有之曰五霸百之所以致天下者约【衍两字】两【补曰恐字有误】主势能制臣【约者自断之辞】无令臣能制主故贵为列侯者不令在相位自将军以上不为近大夫今臣之名显而身尊权重而衆服臣愿损【补曰一本作捐】功名去权势以离衆襄子恨然曰何哉吾闻辅主者名显功大者身尊任国者权重信忠在已而衆服焉此先圣之所以集国家安社稷乎【补曰姚云刘改乎作也】子何为然张孟谈对曰君之所言成功之美也臣之所谓持国之道也臣观成事闻往古天下之美同【有美而同必相疾】臣主之权均之【补曰外纪之作而】能美未之有也前事之不忘後事之师君若弗图则臣力不足怵然有决色【虽欲决去而犹怵然明不得已也一说决犹别】襄子去之卧三日使人谓之曰晋阳之政臣下不使者【不为国用】何如对曰死戮【戮戮同】张孟谈曰左司马【失其名】见使於国家安社稷不避其死以成其忠君其行之【行犹用也疑当作任补曰左司马恐孟谈自谓之辞行之者许之戮之惟阙也】君曰子从事乃许之【使谈自从其所欲之事以其荐贤自代故许其去】张孟谈【此下着书者美之也】便厚以便名【便安厚重也去权所以安其重损名所以安其名】纳地释事以去权尊而耕於负亲之邱【赵地缺】故曰贤人之行明主之政也【此美襄子】耕三年韩魏齐楚【元作燕】燕【补曰下文有楚无燕必有一误】负亲以谋赵【言五国昔约亲今背之正曰上言负亲之邱不应此义顿异恐负亲字衍或上有缺文】襄子往见张孟谈而告之曰昔者智氏之地赵氏分则多十城复来【言分地多自与韩魏尝以为言矣今复来也】而今诸侯【衍孰字正曰复来字恐舛误在上当云而今诸侯复来句似顺】孰谋我【补曰孰为我谋】为之柰何张孟谈曰君其负劔而御臣以之国【君自为御】舍臣於庙授吏大夫【授谈之吏以为大夫示尊显之也】臣试计之君曰诺张孟谈乃行其妻之楚【使妻之楚】长子之韩次子之魏少子之齐四国疑而谋败【谈赵之谋臣而其妻子分适四国故四国吏相疑以为厚赵也彪谓孟谈有道之士也国有危难不顾万死出入行阵以就其谋功成事遂则委而去之已去而复出以销国家之难非有道孰能出处语默若是之裕哉范蠡始终之际贤矣方之孟谈犹一间也正曰孟谈可谓谋智之士有道则未也】

晋毕阳【毕万之後正曰无明据晋魏伯宗索士疵州犁得毕阳及栾弗忌之难诸大夫害伯宗毕阳实送州犁于荆让乃其孙义烈有自来矣】之孙豫让始事范中行氏而说不去而就智伯智伯宠之及三晋分智氏赵襄子最怨智伯而将其头以为饮器【补曰史漆其头说苑异曰智伯与襄子饮而灌襄子之首後败智伯漆其首为饮器索隐云案大宛传匈奴以月支王头为饮器裴氏引韦昭云裊榼也晋灼曰虎子也皆非裊榼所以盛酒非用饮者晋以韩子吕氏春秋并云漆智伯头以为饮器故也】豫让遁逃山中曰嗟乎士为知己者死女为说己者容【修其容色补曰司马子长用此语死作用】吾其报智氏之讎矣乃变姓名为刑人入宫涂厕欲以刺襄子襄子如厕心动索问涂者则豫让也刃其扞【扞焊同集韵矛鐔谓之焊刃施刃其端】曰欲为智伯报讎左右欲杀之赵襄子曰彼义士也吾谨避之耳且智伯已死无後而其臣至为报讎此天下之贤人也卒释之豫让又漆身为厉【补曰索隐曰癩恶疮凡

漆有毒近之多患疮肿若癩病然故让以漆涂身令若癩厉癩声近假借】灭须去眉自刑以变其容为乞人而往【补曰史作行】乞其妻不识曰状貌不似吾夫其音何类吾夫之甚也又吞炭为哑变其音其友谓之曰子之道甚难而无功谓子有志则然矣谓子智则否以子之才而善事襄子襄子必近幸子子之得近而行所欲此甚易而功必成豫让乃笑而应之曰是为先知报後知为故君贼新君大乱君臣之义者无此矣【补曰无字下恐有缺字】吾所谓为此者以明君臣之义非从易也且夫委质而事人而求弑之是怀二心以事君也吾所为难亦将以愧天下後世人臣怀二心者居顷之襄子当出豫让伏於过桥下【补曰一本伏所当过】襄子至桥而马惊襄子曰此必豫让也使人问之果豫让於是赵襄子面数豫让曰子不尝事范中行氏乎智伯灭范中行氏而子不为报讎反委质事智伯智伯已死子独何为报讎之深也豫让曰臣事范中行氏范【补补曰姚本有此字】中行氏以衆人遇臣臣故衆人报之智伯以国土遇臣【国土名盖一国者】臣故国土报之【为国土所为以报之】襄子乃喟然叹泣曰嗟乎豫子【衍子字】子之为智伯名既成矣寡人舍子亦已足矣子自为计寡人不舍子使兵环之豫让曰臣闻明主不掩人之义忠臣不爱死以成名君前已寛舍臣天下莫不称君之贤今日之事臣故【补曰故固通】伏诛然愿请君之衣而击之虽死不恨非所望也【言有此心望不及此】敢布腹心於是襄子义之乃使使者持衣与豫让豫让拔劔三跃呼天击之曰而可以报智伯矣【而自呼也】遂伏劔而死死之日赵国之士闻之皆为涕泣【刺客传有彪谓襄子豫子皆千载人也豫子能报旧君能厉天下後世之为臣使他人为之必一失於此矣或以其无成事为空自苦夫壮士能行其志而已成不成则有命焉吾何以必之哉智伯有如此臣以国土遇之而不免於亡殆与郭君善善为辈者欤补曰让义士也史迁列之刺客而苏秦氏古史亦谓之非贤失之矣朱子纲目附见於三晋始命之下则以其事在前不得特书以表之尔大事记解题略见而记不书未知吕子之旨按索隐引策云衣尽出血襄子回车车轮未周而亡今无此文或以其怪而删之欤】

烈侯【名籍襄子孙元年威烈王十八年癸酉】

魏文侯借道於赵攻中山【魏十七年此元年】赵侯将不许赵利曰过矣魏攻中山而不能取则魏必罢【音疲】罢则赵重魏拔中山必不能越赵而有中山矣是用兵者魏也而得地者赵也君不如许之许之大劝彼将知赵利之也必辍君不如借之道而示之不得已【补曰姚本彼将知矣利之也又注刘无矣字此本赵利又举人姓名皆难解疑有舛误】

肃侯【成侯子元年补曰世本名言索隐云名语成侯名种显王二十年壬申】

苏秦从燕之赵【此十六年】始合从说赵王曰天下之卿相人臣乃至布衣之士莫不高贤大王之行义皆愿奉教陈忠於前之日久矣虽然奉阳君妬【秦传言肃侯令其弟成为相号奉阳君妬嫉贤也正曰奉阳君说见後】大王不得任事是以外宾客【外疏之也】游谈之士无敢尽忠於前者今奉阳君捐馆舍【礼妇人死曰捐馆舍盖亦通称】大王乃今然後得与士民相亲臣故敢进其愚忠为大王计莫若安民无事请无庸有为也安民之本在於择交【与诸侯交】择交而得则民安择交不得则民终身不得安【终赵王身】请言外患齐秦为两敌【为赵敌】而民不得安倚秦攻齐而民不得安倚齐攻秦而民不得安故夫谋人之

主伐人之国常苦出辞【苦言其力】断絶人之交【横人盖然】愿大王慎无出於口也请屏左右白言所以异【补曰史作请别白黑所以异大事记谓阙策按索隐引策作白言尤明】阴阳而已矣【阴阳言事止有两端指谓从横】大王诚能听臣燕必致羶裘狗马之地齐必致海隅鱼盐之地楚必致橘柚云梦之地韩魏皆可使致封地【封内之地正曰下文封侯之类】汤沐之邑贵戚父兄皆可以受封侯夫割地效实【实如羶裘之类】五霸之所以覆军禽将而求也封侯贵戚汤武之所以放杀而争也【补曰此非所以言汤武盖游士之辞】今大王垂拱而两有之是臣之所以为大王愿也大王与秦则秦必弱韩魏与齐则齐必弱楚魏魏弱则割河外【补曰正义云河外同华等地此即西河之外也】韩弱则効宜阳【皆以地与秦】宜阳効则上郡絶【并州郡正曰正义云上郡在同州西北则阙广记云今鄜延安定中部宁夏绥德保安之地】河外割则道不通楚弱则无援此三策者不可不熟计也夫秦下轲道【秦纪注亭名在霸陵正曰故轲城在怀州济源县东南以下言修武之南阳知之按大事记显王十一年韩使计息以枳道易鹿於魏水经注年表赧王三十六年秦伐魏至轲取城大小六十一皆魏之轲也枳枳通策又作咫苏秦传云秦下轲道则南阳危又云我下轲道南阳封冀亦指此其言秦者在雍州万年县东北去霸水百步轲道亭秦王降处也苏代云楚得枳而国亡则巴郡之枳也】则南阳动【修武者】刼韩包周则赵自销铄据卫取淇则齐必入朝秦欲已得行於山东则必举甲而向赵秦甲涉河踰漳据番吾【补曰正义云番音婆又音蒲音盘徐广云常山蒲吾县淇常山河漳清河皆见前】则兵必战於邯鄲之下矣此臣之所以为大王患也当今之时山东之建国莫如赵强赵地方三千里带甲数十万车千乘骑万匹粟支十年西有常山南有河漳东有清河北有燕国燕固弱国不足畏也且秦之所畏害於天下者莫如赵【言秦於天下独畏赵害已】然而秦不敢举兵甲而伐赵者何也畏韩魏之议其後也然则韩魏赵之南蔽也秦之攻韩魏也则不然无有名山大川之限稍蚕食之傳之国都而止矣【傳附同止兵止於此】韩魏不能支秦必入臣於秦秦无韩魏之隔祸必中於赵矣【犹射中的】此臣之所以为大王患也臣闻尧无三夫之分【一夫有田百亩此未为唐侯时正曰此说士无据之辞且舜顓頊後有国於虞其侧微特在下尔禹乃崇伯鯀子亦有国土者今日云云岂足信哉枚乘书舜无立锥之地禹无十户之聚李善注义引韩子云云皆此类】舜无咫尺之地以有天下禹无百人之聚以王诸侯汤武之卒不过三千人车不过三百乘而为天子诚得其道也是故明主外料其敌国之强弱内度其士卒之衆寡贤与不肖不待两军相当而胜败存亡之机节【节节目】固已见於胷中矣岂掩於衆人之言【掩犹蔽】而以冥冥决事哉臣窃以天下地图案之诸侯之地五倍於秦料诸侯之卒十倍於秦大国并力为一西面而攻秦秦【补补曰一本复有秦字姚同】破必矣今【补补曰一本今见破於秦西面云云姚云一无见破於秦四字】西面而事之见臣於秦夫破人之与破於人也臣人之与臣於人也岂可同日而言之哉夫横人者皆欲割诸侯之地以与秦成与秦成则高台榭【补台有木曰榭】美宫室听竽笙琴瑟之音【补曰史有台榭一本无笙琴字】察五味之和前有轩轅【天文志权轩轅象後宫此言美人之处也】後有长庭美人巧笑卒有秦患【卒猝同】而不与其忧是故横人日夜务以秦权恐喝【元作猓】猓【正曰喝猓通见齐策此章史作惕相恐胁也前三子汝表坐恐猓并许葛反】诸侯以求割地愿大王之熟计之也臣闻明王絶疑去谗屏流言之迹塞朋党之门故尊主广地强兵之计臣得陈忠於前矣故窃为大王计莫如一韩魏齐楚燕赵六国从亲以俟畔秦令天下之将相相与会於洹水之上【补曰洹水见秦策】通质刑白马以盟之约曰秦攻楚齐魏各出锐师以佐之韩絶食

道赵涉河漳燕守常山之北秦攻韩魏则楚絕其後齐出锐师以佐之赵涉河漳燕守云中【并州郡】秦攻齐则楚絕其後韩守成臯魏塞午道【王莽传注今京城直南山有谷通汉梁道者名子午谷又宜州西庆州东有山名子午岭南北直相当此则北山是子南山是午共为子午道详此则午道秦南道也塞之使不得通莽所通者因秦也正曰索隐云当在赵东齐西午道地名也郑玄云一从一横为道谓交道也按下张仪说赵王章亦有】赵涉河漳博关【补曰博关见齐策】燕出锐师以佐之秦攻燕则赵守常山楚军武关齐涉渤海韩魏出锐师以佐之秦攻赵则韩军宜阳楚军武关魏军河外齐涉渤海燕出锐师以佐之诸侯有先背约者五国共伐之六国从亲以候秦【侯元作候无异义今并从前作侯正曰说已见前】秦必不敢出兵於函谷关以害山东矣如是则霸业成矣赵王曰寡人年少莅国之日浅未尝得闻社稷之长计今上客有意存天下安诸侯寡人敬以国从乃封苏秦为武安君饰车百乘黄金千镒白璧百双锦绣千纯以约诸侯【秦传有在说燕後彪谓从约者天下之心亦其势也夫秦有吞天下之心不尽不止诸侯皆病之而欲侯之此其心也同舟遇风胡越之相救如手足於其头目此其势也以天下之心行天下之势如水之就下孰能御之故谓之从从者从也顺也其所不可者诸侯之心不一夫其心不一者非明计智筭也或见小利而相侵或修小怨而相伐或眩於名实而为横人之所恐喝此张仪所以投隙而起使诸侯之智少灵於连鸡则秦人自保之不给安能图并吞之举即仪谓秦地形势便兵强士武足以横天下然则天时人和道德之威仁义之泽举无与於兴亡之数乎虽然一从一横皆一偏之论有王者作则从横皆废而天下定而非所以论於此时也补曰璧纯并见秦策】苏秦为赵王使於秦【本传不书】反三日不得见谓赵王曰秦乃者过柱山【盖砥柱正曰无考】有两木焉一盖呼侣【招其徒】一盖哭问其故对曰吾已大矣年已长矣吾苦夫匠人且以绳墨案规矩刻镂我一盖曰此非吾所苦也是故吾事也【事犹分补曰故固通】吾所苦夫铁鉋【元作钻下同】钻然自入【鉋言铁之利若钻则铁鉋也义不合此正曰钻玉篇其沾敕淹二反鉋音镊後汉章帝诏有钻锁字苍颉篇钻持也盖字与钳同以铁有所刼束也】而出夫人者【人谓木屑自铁言之为人正曰难通其义未详】今臣使於秦而三日不见无有为【元作谓补曰钱刘作为】臣为铁鉋钻者乎【无有言得无有也】

武灵王【肃侯子元年显王四十四年丙申】

齐破燕【子吟之乱燕七年此十二年】赵欲存之乐毅谓赵王曰今无约而攻齐齐必讎赵【不约与国而独攻齐故齐怨若有与同攻则怨有所分矣】不如请以河东易燕地於齐【齐破燕所谓地近赵赵以河东易之】赵有河北齐有河东【此二非郡】燕赵必不争矣是二国亲也以河东之地强齐【言齐得河东则益强】以燕以赵辅之【与之易地是辅之也】天下憎之【害其强】必皆事王以伐齐是因天下以破齐也王曰善乃以河东易齐楚魏憎之令淖滑惠施之赵请伐齐而存燕【补曰大事记按乐毅传毅贤好兵赵人举之及武灵王有沙丘之乱乃去赵适魏毅尝事赵也又云赵纳公子职於燕世家不书其立盖燕人不受也】

张仪为秦连横说赵王曰敝邑秦王【惠】使臣敢献书於大王御史【周宗伯属官秦因之而赵亦有言此者不斥王也补曰御史周官以中士下士为之特小臣之传命者战国其职益

亲故此云云秦赵之会御史书事而淳于髡亦云御史在前掌记事综察之任也秦益重矣】大王收率天下以俟秦秦兵不敢出【元作去】去【补曰疑出字】函谷关十五年矣大王之威行於天下山东【补曰一本无山东字】敝邑恐惧慑伏缮甲厉兵饰车骑习驰射力田积粟守四封之内愁居慑处不敢动摇唯大王有意督过之也【高纪注督视责也】今秦以大王之力【因畏赵而饰兵故】西举巴蜀并汉中东收两周而西迁九鼎【史不书正曰迁鼎之说大言之也】守白马之津秦虽僻远然而心忿悁【悁亦忿】含怒之日久矣今寡【元作宣】宣【补曰字讹当作寡】君有敝【元作微】微【补曰史作敝】甲钝兵军於渑池愿渡河踰漳据番吾迎战邯郸之下愿以甲子之日合战以正殷纣之事敬使臣先以闻於左右凡大王之所信以为从者恃苏秦之计秦【补补曰史有苏秦字】荧惑诸侯【荧火光也犹眩】以是为非以非为是欲反覆齐国而不能自令车裂於齐之市【补曰说见楚策】夫天下之不可一亦明矣今楚与秦为昆弟之国而韩魏称於东藩【补曰一本东藩之臣史同】齐献鱼盐之地此断赵之右臂也夫断右臂而求与人鬪失其党而孤居求欲无危岂可得哉今秦发三将军一军塞午道【补曰说见前章】告齐使兴师渡清河军於邯郸之东一军军於成臯【成臯同】而军於河外【补曰正义云河外谓郑滑州北临河】一军军於渑池约曰四国为一以攻赵破赵而四分其地是故不敢匿意隐情先以闻於左右臣窃【元作切】切为大王计莫如与秦遇於渑池面相见而身相结也臣请案兵无攻愿大王之定计赵王曰先王之时奉阳君相【补曰奉阳君说见後】专权擅势蔽晦先王独制官事寡人宫居属於师傅不得与国谋先王弃群臣寡人年少奉祠祭之日浅私心固窃疑焉以为一从不事秦非国之长利也乃且愿变心易虑割地谢前过以事秦方将约车趋行【趋趣同】而适闻使者之明诏於是乃以车二百乘入朝渑池割河间以事秦【传在楚韩齐後盖此十五六年彪谓约从以难秦者赵也使秦得诸侯力足以制赵不告赵也告之者是力不足也此时诸侯惑於横人之说皆辞屈貌从心不与也使季子可作则三国横约可立解而坐破也武灵此时血气未定而苏氏兄弟适不在赵故仪得以售其恐喝之说加之数年如议服之时其必有以折仪也燕昭末年苏代重燕而从约复举岂非天下之心之势矣哉】

甘茂为秦约魏以攻韩宜阳【秦武王三年此十八年】又北之赵冷向谓强国【赵人】曰不如令赵拘甘茂勿出以与齐韩秦市齐王【闵】欲求救宜阳必效县狐氏【地缺】韩欲存宜阳必以路涉【地缺】端氏【属河东】赂赵秦王【武】欲得宜阳不爱名宝【宝之名世者齐韩之赂欲拘茂败其约也秦赂则欲出之】且拘茂也且以置公孙赫樗里疾【茂不还秦则二人用】

武灵王平昼【无事之日犹平日】间居肥义【赵相也余并公族正曰鲍指公子成王孙縶赵文赵造言文造无他据元和姓纂引策云肥义赵贤人】侍坐曰王虑世事之变权甲兵之用【权犹度】念简襄之迹计胡狄之利【补曰姚云曾本利下有乎字】王曰嗣立不忘先德君之道也错质务明主之长【错犹委】臣之论也是以贤君静而有道民便事之教动而【补补曰姚云一本静下无而字】有明古先世之功【先犹高】为人臣者穷有弟长辞让之名【弟顺也】通有补民益主之业此两者君臣之分也今吾欲继襄王之业啓胡翟之乡而卒世不见也【卒世犹举世言举世无能察此正曰正义云卒尽也愚谓犹言没世】敌弱者【与弱为敌谓胡翟】用力少而功多可以无尽百姓之劳而享往古之勲夫有高世之功

者必负遗俗之累【不与俗同俗所遗也】有独智之虑者必被庶人之恐【所谓黎元惧焉补曰一本标恐刘作怨】今吾将胡服骑射以教百姓而世必议寡人矣【补曰正义云胡服今时服废除裘裳也姚云曾本改矣字作奈何】肥义曰臣闻之疑事无功疑行无名今王即定负遗俗之虑【定言自定於心不为俗移】殆母顾天下之议矣夫论至德者不和於俗成大功者不谋於衆昔舜舞有苗【不用兵而舞干羽欲以服人亦异於俗正曰舞羽非为服苗苗格非因舞羽舜修德教苗至适当其时】而禹袒入裸国【非中国之礼】非以养欲而乐志也欲以论德而要功也愚者暗於成事智者见於未萌王其遂行之王曰寡人非疑胡服也吾恐天下笑之狂夫之乐智者哀焉愚者之笑贤者戚焉【以此异趣知俗必见遗】世有顺我者则胡服之功未可知也虽毆世以笑我胡地【元作服补曰姚本作地史同依服字则句】中山我必有之王遂胡服使王孙緤告公子成曰寡人胡服且将以朝亦欲叔之服之也家听於亲国听於君古今之公行也子不反亲臣不逆主先王之通谊也今寡人作教易服而叔不服吾恐天下议之也夫制国有常而利民为本从政有经而令行为上故明德在於论贱行政在於信贵【信伸同所谓行法自近始正曰信如字言必行於贵者】今胡服之意非以养欲而乐志也事有所出功有所止【止犹至补曰姚云曾本改互出止字愚按此据史文】事成功立然後德可见也今寡人恐叔逆从政之经【补曰叔字疑衍】以辅公叔之议且寡人闻之事利国者行无邪因贵戚者名不累故寡人愿慕公叔之义以成胡服之功使緤谒之叔【补曰索隐句】请服焉公子成再拜曰臣固闻王之胡服也不佞寝疾不能趋走是以不先进王今命之臣固敢竭其愚忠臣闻之中国者聪明睿智之所居也万物财货之所聚也圣贤之所教也仁义之所施也诗书礼乐之所用也异敏技艺之所试也【异出类敏疾於事也】远方之所观赴也蛮夷之所义行也【以中国为有义有行补曰自中国者至此似周官大司徒文】今王释此而袭远方之服变古之教易古之道逆人之心畔学者离中国臣愿大王图之使者报王王曰吾固闻叔之病也即之公叔成家自请之曰夫服者所以便用也礼者所以便事也是以圣人观其乡而顺宜因其事而制礼所以利其民而厚其国也被发文身错臂左衽【以两臂交错而立言无礼容补曰索隐云错臂亦文身谓其丹青错画其臂孔衍作右臂谓右袒其臂也愚谓既言文身则画臂为复恐後说是错或袒字讹姚云刘无错臂字一作柝面吴世家断发文身应劭注常在水中故以象龙子不见伤害劭语本说苑被字姚云三本作祝史作翦】瓠越之民也【即汉东瓠闽粤补曰汉东瓠闽中也輿地志交趾周为骆越秦为西瓠索隐云今珠厓儋耳谓之瓠人是有瓠越文选三越注吴越南越闽越东瓠即闽越骆越瓠人即南越也姚云後语作临越注云临亦百越之一名】黑齿雕题【史注以草染齿为黑雕题者刻其肌以丹青涅之】鯢冠毵缝【鯢大鮓以其皮为冠毵綦鍼也言女工之拙补曰毵即鉞字通借时补反鯢大计反】犬戎之国也礼服不同其便一也是以乡异而用变事异而礼易是故圣人苟可以利其民不一其用果可以便其事不同其礼儒者一师而礼异中国同俗而教离又况山谷之便乎故去就之变智者不能一远近之服贤圣不能同穷乡多异【异异俗】曲学多辨不知而不疑【言各不知其异而不疑之】异於已而不非者公於求善也今卿之所言者俗也吾之所言者所以制俗也今吾国东有河薄洛之水【史记安平涇水西有漳水津名薄洛津後志安定乌枝谷名补曰淮南子嶢山崩而薄洛之水涸注谓薄洛在冯翊临晋今按本文谓在赵东与齐中山同之恐皆非此所指未详】与齐中山同之而无舟楫之用自常山以至代上党东有燕东胡之境西有楼烦秦韩之边【补曰正义云东胡乌丸之先也後为鲜卑在匈奴东故曰东胡括地志云东胡汉初冒顿灭之余保乌丸山因号乌丸

又曰林胡楼烦即岚胜之北也岚胜以南石州离石藁等赵边邑也秦隔河也晋洛潞泽等州皆七国时韩地赵西境也】而无骑射之备故寡人且聚舟楫之用求水居之民以守河薄洛之水变服骑射以备燕【元作其】其【补曰史作燕姚引】参胡楼烦秦韩之边【言参错居其边地正曰参史作三因音而讹也据上文则参当作东字讹】且昔者简主不塞晋阳以及上党【不塞者志在远略】而襄主兼戎取代以攘诸胡此愚智之所明也先时中山负齐之强兵侵掠吾地系累吾民【累累同】引水围鄣【属常山补曰光武即位於此改高邑】非社稷之神灵即鄣几不守先王忿之其怨未能报也今骑射之服近可以备上党之形远可以报中山之怨而叔也顺中国之俗以逆简襄之意恶变服之名而忘国事之耻非寡人所望於卿公子成再拜稽首曰臣愚不达於王之议敢道世俗之闻【补曰一本闻作问与下文同】今欲继简襄之意以顺先王之志臣敢不听令再拜乃赐胡服赵文进谏曰农夫劳力【补正曰劳下恐有缺字】而君子养焉政之经也愚者陈意而智者论焉教之道也臣无隐忠君无蔽言【蔽犹伏】国之禄也【禄犹福】臣虽愚愿竭其忠王曰虑无变扰【言能定虑则不乱於物】忠无过罪【过者罪之小者】子其言乎赵文曰当世辅俗【当犹顺】古之道也衣服有裳礼之制也循【元作修补曰姚云一作循礼商君传正作循朱子韩文考异着方氏说云唐人书修近循楚辞亦有误者则此字古已混矣此下文两有循法字为循无疑】法无愆民之职也三者先圣之所以教今君释此而袭远方之俗变古之教易古之道故臣愿王之图之王曰卿言世俗之间【言其所言不能出俗】常民溺於习俗学者沈於所闻此两者所以成官而顺政也非所以观远而论始也【若今胡服自我始也】且夫三代不同服而王五霸不同教而政【政言治行於下】智者作教而愚者制焉贤者议俗不肖者拘焉夫制於服之民不足与论心拘於俗之衆不足与致意故势与俗化而礼与变俱圣人之道也承教而动循法无私【不敢用私意】民之职也知学之人能与闻迁【有所闻则改前之为】达於礼之变能与时化故为已者不待人制今者不法古子其释之赵造谏曰隐忠不竭奸之属也以私诬国贱之类也【贱谓轻国】犯奸者身死贱国者族宗【族灭其宗】有【元作反】反【补曰姚云刘本无反字】此两者先王之明刑臣下之大罪也臣虽愚愿尽其忠无遁其死王曰竭意不让【补曰一本让作讳】忠也上无蔽言明也忠不辟危明不距人子其言乎赵造曰臣闻之圣人不更易民而教智者不变俗而动因民而教者不劳而成功据俗而动者【据犹依】虑径而易见也【径以步道喻其省便】今王易初不循俗胡服不顾世非所以教民而成礼也且服奇者志淫俗僻者乱民是以涖国者不袭奇辟之服中国不近蛮夷之行非所以教民而成礼者也且循法无过修礼无邪臣愿王之图之王曰古今不同俗何古之法帝王不相袭何礼之循伏羲神农教而不诛黄帝尧舜诛而不怒及至三王观时而制法因事而制礼法度制令各顺其宜衣服器械各便其用故礼世不一其道【礼施於世补曰宜从商君传作治世】便国不必法古圣人之兴也不相袭而王夏殷之衰也不易礼而灭然则复古未可非而循礼未足多也且服奇而志淫是邹鲁无奇行也【邹属鲁国言二国虽无奇服不无奇行正曰赵造言服奇者志淫俗僻者乱民涖国者不袭奇辟之服中国不近蛮夷之行故此举其言而诘之按索隐云邹鲁好长纓是奇服也服非其志皆淫辟也而有孔门顔冉之属岂无奇行哉方俗僻处山谷而人皆改易不通大化则是吴越无秀士何得有季札大夫种之属哉今欲略改云方俗僻陋刊处山谷三字】俗僻而民易是吴越无俊民也是以圣人利身之谓服便事之谓教进退之谓节衣服之谓制所以齐常民非所以论贤者也【此谓进退以下补曰史进退之节衣服之制无两谓字接下文为是】故圣与俗流【言其顺俗】贤与变俱

谚曰以书为御者不尽马之情以古制今者不达事之变故循法之功不足以高世法古之学不足以制今子其勿反也【赵记十九年有无二赵谏词彪谓拓地开边非有国之所先也不得已而有攘却之事严兵而已兵严而士用命虽不胡服其无成功如其不然虽易服变古何益於败哉孟子曰行一不义而得天下不为也武灵之志欲得中山胡地而已遂举国而夷甚矣其不权於轻重小大之差也且其所称复古之说皆钩金一舆羽之类古所谓以辩言乱旧政者也何足取哉而史无讥故备论之补曰史卫鞅传与此章多同今考列於后卫鞅曰疑事无功疑行无名肥义曰同】

【有高人之行者固见非於世有独知之虑者必见教於民王曰有高世之功者必负遗俗之累有独智之虑者必被庶人之恐】

【愚者闇於成事智者见於未萌 论至德者不和於俗成大功者不谋於衆肥义曰同圣人苟可以强国不法其故苟可以利民不循其礼王曰圣人苟可以利其民不一其用果可以便其事不同其礼】

【甘龙曰圣人不更易民而教智者不变法而动因民而教者不劳而成功缘法而治者吏习而民安之赵造曰圣人不更易民而教智者不变法而动因民而教者不劳而成功据俗而动者虑怪而易见】

【卫鞅曰龙之所言世俗之言也常人安於故俗学者溺於所闻以此两言居官守法可也非所以论於法之外也三代不同礼而王五伯不同法而霸智者作法愚者制焉贤者更礼不肖者拘焉王曰卿言世俗之间常民溺於习俗学者沈於所闻此两者所以成官而顺政也非所以观远而论始也且夫三代不同服而王五伯不同教而政智者作教而愚者制焉贤者议俗不肖者拘焉】

【杜摯曰法古无过循理无邪赵造曰循法无过修礼无邪】

【卫鞅曰治世不一道便国不法古故汤武不循古而王夏殷不易礼而亡复古者不可非而循礼者不足多王曰礼世不一其道便国不必法古圣人之兴也不相袭而王夏殷之衰也不易礼而灭然则复古未可非而循礼未足多也卫鞅赵武灵所称民不可虑始治不必相袭者初不全】

【非但所以行是言者悖耳商君传语策具有之唯民不可与虑始而可与乐成语不袭用而用其意也史迁於赵世家所不载者二赵谏词耳二事皆变古者也当时纪载与迁所录固不能无混欤然商君传文法而简策文错以他语奇而肆可以参观汉韩安国王恢议伐匈奴辩难之辞亦类此亦间采其数语 史云赵文赵造周绍赵俊皆谏按周绍即後章周绍傳王子何者绍辞傳而未尝谏易服也赵俊即赵燕後服者王让之即受服史误云谏也牛赞尝有谏而史不言】

王立周绍为傅曰寡人始行【补曰去声】县过番吾当子为子之时践石以上者【践石谓能骑乘者礼洗王石注乘马石】皆道子之孝故寡人问子以璧【问以礼遗之】遗子以酒食而求见子子谒病而辞人有言子者曰父之孝子君之忠臣也故寡人以子之智虑为辩足以道人危足以持难【危言有危苦之时正曰危高峻也】忠可以写意【写犹宣】信可以远期【久而不渝】谚【元作诗】诗云服难以勇治乱以智事之计也立傅以行【去音】教少以学义之经也循计之事【先计而当行之】佚【元作失】失而不【补补曰以下句例之此恐缺不字】累访议之行穷而不忧【穷言尽事之情正曰上言勇智为事之计指胡服言行学为义之经指傅言循计谋之事虽有过失而无累访议之行虽有穷急而不忧访议文疑放义谓放於义也】故寡人欲子之胡服以傅王子【元作乎补曰乎当作子大事记改】周绍曰王失论矣非贱臣所敢任也王曰选子莫若父论臣莫若君君寡人也周绍曰立傅之道六王曰六者何也周绍曰智虑不躁达於变身行宽惠达於礼威严不足以易於位【素位而行不为威严所移】重利不足以变其心恭於教而不快【快谓纵逸】和於下而不危六者傅之才而臣无一焉隐中不谒【隐自匿也中谓情实此疑与赵造谏本一说补曰不谒一作不竭中一作忠即赵造语】臣之罪也傅命仆官【傅附同比也仆犹辱】以烦有司吏之耻也王请更论王曰知此六者所以使子周绍曰乃国未通於王之【补】胡服虽然臣王之臣也而王重命之臣敢不听令乎再拜赐胡服王曰寡人以王子为子任欲子之厚爱之无所见丑御道之以行义勿令溺苦於学【溺苦皆劳也劳於学以无导之者故也正曰丑言恶事也学言诵习也谓厚爱教之母使见丑事以行义道之母沈溺困苦於诵习之末也武灵安知行义盖习闻古语犹昭之论立傅尔方务胡服骑射宜以诵习为溺苦也秦异人不习於诵而王罢之当时气习类是焚书之祸兆矣】事君者顺其意不逆其志事先者【先先君】明其高不倍其孤故有臣可命其国之禄也子能行是所【补】以事寡人者毕矣书云去邪勿疑任贤勿贰【禹谟】寡人与子不用人矣遂赐周绍胡服衣冠具带【带饰之备也犹带劔正曰史记匈奴传黄金具带音义云侍中大带补曰淮南子云赵武灵王贝带鵄□而朝此以贝作具汉书佞幸传孝惠时郎侍中皆冠鵄?贝带注以贝饰带】黄金师比【未详盖依章主术训武灵王贝带鵄□而朝注鵄?读曰私鉏头三字与此小异正曰汉书黄金犀毗师古云胡带之钩也延笃说同大事记引又谓师比史记胥卼师犀胥一也】以傅王子【补曰大事记书赵惠后卒使周绍胡服傅王子解题云惠后吴娃也娃方死怜其子而将立之废长立少之意已见於此而其论傅时有古之遗言愚谓命胡服而诵古之遗言岂其然乎】

赵燕後胡服【服後於衆】王令让之曰事主之行竭意尽力微谏而不譁【謹也】应对而不怨不逆上以自伐不立私以为名子道顺而不拂臣行让而不争子用私道者家必乱臣用私义者国必危反亲以为行慈父不子逆主以自成惠主不臣也【惠犹慈】寡人胡服子独弗服逆主罪莫大焉以从政为累【政胡服之政】以逆主为高行私莫大焉故寡人恐亲犯刑戮之罪【燕公族也故称亲正曰亲身犯之也】以明有司之法赵燕再拜稽首曰前吏命胡服【前前日】施及贱臣臣以失令过期更不用侵辱教【更犹反侵辱刑也言已宜服刑王反不刑而教之正曰更改也侵辱教刑也】王之惠也臣敬循衣服以待令甲【令善也补曰施以豉反更居行反】

王破原阳【属云中】以为骑邑【居骑士於此正曰破者破卒散兵以为骑】牛赞【赵人

】进谏曰国有固籍【固言不变籍犹令甲正曰固故通】兵有常经变籍则乱失经则弱今王破原阳以为骑邑是变籍而弃经也且习其兵者轻其敌【习於敌人之兵则玩而易之】便其用者【此言本国械用】易其难【补曰易以?反】今民便其用而王变之是损君而弱国也故利不百者不变俗功不什者不易器【补曰此亦商君传杜挚语俗作法】今王破卒散兵以奉骑射臣恐其攻获之利不如所失之费也王曰古今异利远近易用【易入音】阴阳不同道四时不一宜故贤人观时而不观於时【时犹俗也视俗而变不为俗所视】制兵而不制於兵子知官府之籍不知器械之利知甲兵之用不知阴阳之宜【赵居胡之南阳也欲攻胡而用赵兵非其宜也正曰阴阳之宜言天地气化之运人事刚柔之节其详则若范蠡之所以答越王者语见国语大事记解题周元王元年载之】故兵不当於用何兵之不可易教不便於事何俗之不可变昔者先君襄王与代交地【交犹接】城境封之【筑城境上为之封城】名曰无穷之门所以诏【元作昭】昭後而期远也今重甲循兵【赵甲重不若新甲之轻循言其因旧正曰循行也言被重甲执兵而行不可以踰险不若胡服骑射之便利】不可以踰险仁义道德不可以来朝【此言胡者】吾闻信不弃功智不遗时今子以官府之籍乱寡人之事非子所知牛赞再拜稽首曰臣敢不听令乎王遂胡服率骑入胡出於遗遗之门【此门义取胡者古今所遗正曰无据而繆】踰九限之固絶五径之险至胡中辟地千里【补曰胡中一本榆中世家二十年王西略胡地至榆中正义云胜州所治榆林大事记谓赐周昭胡服衣冠具带黄金师比此胡服也又引水经注竹书纪年邯鄲命将军大吏适子代吏皆貂服即胡服之事按胡广曰赵武灵王改胡服以金璫饰前前摇貂尾为贵职或以北土多寒胡人以貂皮温额後代效之亦曰惠文汉曰武弁曰衣冠武官冠之侍中中常侍加黄金璫附蝉为文貂尾为饰汉官仪又名鷄冠愚谓貂服者此类也今之靴亦武灵所制云一本标春秋後语云武灵王十九年春正月大朝信武宫乃召肥义与议天下事五日而毕遂北略中山登黄华之上注云黄华山名也战国策云武灵王游於大陵梦见处女鼓瑟而歌登黄华之上今按史十六年游大陵梦处女十九年大朝信武宫召肥义议事略中山至房子之代地至无穷西至河登黄华之上先後不同所载战国策云云者今缺姑记以俟广闻】

魏败楚於陘山禽唐明【楚威十一年魏败我陘山时武灵未立怀二十八年秦齐韩魏攻楚杀唐昧此二十五年明岂昧之字邪】楚王惧令昭应奉太子以委和於薛公【怀二十九年使太子质於齐】主父欲败之乃结秦连楚宋之交令仇赫【元作郝下章同】郝【补曰即赫】相宋楼缓相秦楚王合【元作禽】禽【补曰字恐讹】赵宋【楚与二国合正曰无据】齐【元作魏】魏之和卒败【楚得二国之援故不与齐和正曰楚王禽以下有缺误】

赵使仇【元作机下同史作仇液】机【补曰仇讹】赫郝之秦请相魏冉宋突【齐人郝客正曰无据史作宋公索隐引策云宋交】谓仇赫机郝曰秦不听楼缓必怨公【秦时已相缓】公不若阴辞楼子【辞告之也】请无急秦王【昭王言为缓故请之不力】秦王见赵之相魏冉之不急且不听公言也【公谓郝】是事而不成以德楼子事成【以史补此六字补曰史此下有以德楼子事成六字恐策有脱文】魏冉固德公矣【穰侯传有云秦昭七年此二十六年补曰史赵人楼缓来相秦数不利乃使仇液云云於是仇液从之而秦果免楼缓而魏冉相】

谓赵王曰三晋合而秦弱三晋离而秦强此天下之所明也【补曰明下疑有缺字】秦之有燕而伐赵有赵而伐燕有梁而伐赵有赵而伐梁有楚而伐韩有韩而伐楚【补曰有者善之也】此天下之所明见也然山东不能易其路【言易横秦之路以合三晋正曰山东六国不能易其合秦之道以合】兵弱也弱而不能相一是何秦【元作楚】楚【补曰当作秦】之智山东之愚也是臣所为山东之忧也虎将即禽【走兽总名】禽不知虎之即已也而相鬪两罢【补曰音疲】而归其死於虎故使禽知虎之即已决不相鬪矣今山东之主不知秦之即已也而尚相鬪两敝而归其国於秦智不如禽远矣愿王熟虑之也今事有可急者秦之欲伐韩梁东關於周室甚惟寐忘【元作亡补曰姚云刘本作忘】之今南攻楚者恶三晋之相合也【合合楚也楚强晋弱先攻其强则弱者沮不敢合矣】今攻楚休而复之【休罢兵复复攻补曰复扶又反】已五年矣【先是秦取汉中取召陵又败之重丘】攘地千余里今谓楚王【怀】苟来举玉趾而见寡人必与楚为兄弟之国【楚怀三十年秦昭去然此二十七年】必为楚攻韩梁反楚之故地楚王美秦之语怒韩梁之不救已必入於秦秦【补】有谋故发【元作杀补曰姚云杀刘作发】使之赵以燕饵赵【言欲与赵攻燕】而离三晋【韩魏时不合秦而赵合之必不善赵】今王美秦之言而欲攻燕攻燕食未饱而祸已及矣楚王入秦秦楚为一东面而攻韩韩南无楚北无赵【美秦反地饵燕之说故不救韩亦离三晋之策也】韩不待伐割挈马兔【补曰一本作免下同】而西走【割地挈而走秦疾於马兔】秦与韩为上交秦祸安移於梁矣【祸兵祸安言其不劳正曰姚云改安作案】以秦之强有楚韩之用梁不待伐【衍矣字】矣【补曰姚云一无矣字】割挈马兔而西走秦与梁为上交秦祸案环中赵矣【案安同故荀卿书多用案字此言秦视赵在其度内如物在环中环中一作移於字可也正曰姚本案攘於赵愚以攘即移字讹当作移於鲍本说是补曰姚注引荀子上不能好其人下不能隆礼安将将学杂识志顺诗书而已耳云云注安语助犹言抑也或作案荀子多用此字礼记三年问作焉吕氏春秋吴起谓商文曰今置质为臣其主安重释玺辞官其主安轻盖当时人通以为语助或方言耳】以强秦之有韩梁楚与燕之怒【秦有三国赵之患也燕又怒之】割必深矣【秦割赵地】国之举此【国谓赵举犹行】臣之所为来臣故曰事有可急为者及楚王之未入也三晋相亲相坚【坚其约】出锐师以戍韩梁西边楚王闻之必不入秦秦必怒而循攻楚【循前而攻】是秦祸不离楚也便於三晋若楚王入秦秦【补】见三晋之相合而坚也必不出楚王【恐其合晋】即多割【楚求出故】是秦祸不离楚也有利於三晋愿王之熟计之也急【重言急以促之补曰一本无急字是此下盖叙述者之辞】赵王因起兵南伐山戎【戎近秦伐之以偪秦】戍【元作翟补曰一本作戍】韩梁之西【元作恶补曰一本作西】边【补曰姚本有戍无伐山戎三字是】秦见三晋之坚也果不出楚王【衍印字】印【补曰字误衍姚云刘改作印亦难通】而多求地【彪谓从横之说未有善於此者也赵少尝之其效已见是以知张仪之可折也然其效不大见於後则是诸侯之不一也非其计之不明不智也吁惜哉补曰此策自割必深矣以上其论从横之利害当矣自事有可急者以下劝三晋之相坚而移祸於楚亦未得为尽善盖陈轸不得已之计也愚考齐策秦攻魏陈轸合三晋而东章及韩燕策与此章多合此章言楚王入秦正秦诱怀王武关之岁在赧王十六年详见齐策 所为为楚为来之为去声】

富丁【赵人】欲以赵合齐魏楼缓欲以赵合秦楚富丁恐主父之听楼缓而合秦楚也司马浅【赵人】为富丁谓主父曰不如以顺齐【齐本欲伐秦今顺之】今我不顺齐伐秦秦楚

必合而攻韩魏【无齐之难因得取其邻也】韩魏告急於齐齐不欲伐秦【上言顺齐伐秦此又言齐不欲伐者前时秦楚未合今合故也】必以赵为辞【以赵不顺齐伐秦告二国】则不【补补曰则下宜有不字】伐秦者赵也韩魏必恐赵齐之兵不西【不伐秦】韩必听秦违齐【畏秦故】违齐而亲【秦亲韩】兵必归於赵矣今我顺而齐不西韩魏必絶齐絶齐则皆事我且我顺齐齐无不【元作而】而【补曰字讹或上文有误】西日者【言昔日】楼缓坐魏【时欲离齐魏坐言有所待】三月不能散齐魏之交【言二国本亲宜与之伐秦】今我顺而齐魏果西是罢齐敝秦也【罢疲同】赵必为天下重国主父曰我与三国攻秦【韩魏齐为三】是俱敝也曰不然我约三国而告之【衍秦字】秦【补曰恐衍】以未讲【元作构】构中山也【此言可以少出兵也此二十七年赵破中山未灭也赵宜自备】三国欲伐秦之果也必听我欲和我【使赵与中山讲】中山听之是我以三国【元竹王因】王因【补曰当作三国字讹】饶中山而取地也【饶犹益也以三国欲和我故益得取地於中山】中山不听三国必絶之是中山孤也三国不能和我虽少出兵可也我分兵而孤【衍乐字】乐【补曰字误或衍】中山必之我【之犹去补曰一本之作亡是】已亡中山而以余兵与三国攻秦是我一举而两取地於秦中山也【补曰中山说见齐策此策当在上章之前多误字为富之为去声】

魏因富丁且合於秦【丁本欲以赵合齐魏今魏欲因以合秦赵不听故】赵恐请效地於魏而听薛公【文时合齐魏】教子欵【或者教之欵赵人正曰无考】谓李兑曰赵畏横之合也【合秦故言横】故欲効地於魏而听薛公公不如令主父以地资周最而请相之於魏周最以天下厚秦者也今相魏魏秦必虚矣【厚秦而舍之相魏秦必恶之故二国不合虚言其不合也】齐魏虽劲无秦不能伤赵魏王【哀正曰襄】听是轻齐也【齐亦恶最故正曰最於齐厚语见周策魏用齐所厚以为相是轻齐也】秦魏虽劲无秦不能得赵此利於赵而便於周最也

惠文王【武灵王子元年补曰名子何赧王十七年癸亥】

三国攻秦【魏哀二十一年与齐韩共攻秦此元年正曰襄】赵攻中山取扶柳【属信都补曰汉志其地有扶泽泽中多柳故名】五年以擅呼沱【擅言固有之】齐人戎郭宋突【虽齐人而倍齐】谓仇赫【元作郝】郝曰不如尽归中山之新地【元作坻武后时字耳今并从此古此谓扶柳正曰姚云窋唐史释音云坻地字见战国策今策中间作坻安知非自武后时传写相承如臣作?之类然古文乃作坻又鷩冠子亢仓子皆有坻字恐有自来愚按郑氏书略籀文地作坻武后盖有所本意本书坻而後转从坻欵後多此字以义通不复出】坻中山案此言於齐【案犹据】曰四国【赵与上三】将假道於卫以过章子之路【地缺盖章子以齐军守此正曰无考】齐闻此必効鼓【莒鼓里是也济南又有二鼓】腹击【他国人仕赵】为室而钜荆敢【楚人仕赵正曰无据荆轲卫人荆岂专为楚姓】言之主谓腹子曰何故为室之钜也腹击曰臣羈旅也爵高而禄轻宫室小而帑不衆【帑金币所藏正曰帑孥通诗注子孙也金币与衆义不协】主虽信臣百姓皆曰国有大事击必不为用今击之钜宫将以取信於百姓也主君曰善【此曰主曰主君主父故在也然则上章五当作三正曰齐侯使高张言公称主君子家子曰齐卑君矣主君大夫之称也秦策甘茂引乐羊曰主君之功魏策

鲁侯择言称主君之尊云云盖三晋以大夫为诸侯故犹仍之赵称襄主简主是也策後亦多称主武灵自称主父与称主者不同此策时不可考鲍妄置於惠文时故为之说又齐韩魏攻秦在惠文元年灭中山在三年大事记从世家以年表为误愚考中山亡实在前见齐策主父死在四年上章五年自有所指初不与此相涉安得以此改彼文也补曰钜宫以信百姓诳主甚矣】

苏子【元作秦下同】秦【补曰字误下同】说李兑曰雒阳乘轩车苏子【元作秦】秦【补曰一本乘轩里既曰乘轩车而下又云无罢车弩马则此作里字为是河南志洛阳城东御道北孝义里西北隅有苏秦冢】家贫亲老无罢车弩马【罢疲同犹敝也车劳则敝】桑轮蓬篚羸【元作羸】羸【正曰说见秦策苏秦章】膺负书担囊【补曰姚本负担橐】触尘埃蒙霜露越河漳【元作漳河】漳河【补曰浊漳合清漳东北至阜城入北河汉初漳犹入河其後河徙入东而漳自入海策中凡言漳河河漳者以漳入河相连也此下又有漳河字】足重茧【茧足胝也】日百而舍【日行百里乃就舍】造外阙愿见於前口道天下之事李兑曰先生以鬼之言见我则可若以人事兑尽知之矣苏子秦对曰臣固以鬼之言见君非以人之言也李兑见之苏子秦曰今日臣之来也暮後郭门【郭门後至不及其开时】藉席无所得【藉谓借】寄宿人田中旁有大丛【补曰丛见秦策】夜半土梗与木梗【土亦言梗因木为类也补曰说见齐策】鬬曰汝不如我我者乃土也【补曰姚云曾去者字愚谓有者字语胜】使我逢疾风淋雨【淋言其大能沃物】坏阻乃复归土今汝非木之根则木之枝耳汝逢疾风淋雨漂入漳河东流至海泛滥无所止臣窃以为土梗胜也【此喻不切於兑之事盖以鬼事发其言耳】今君杀主父而族之【杀在四年言族则其宗多死者】君之立於天下危於累卵君听臣计则生不听臣计则死李兑曰先生就舍明日复来见兑也苏子秦出李兑舍人谓李兑曰臣窃观君与苏公谈也其辩过君其博过君君能听苏公之计乎李兑曰不能舍人曰君即不能愿君坚塞两耳不听其谈也明日复见终日谈而去舍人出送苏君苏子秦谓舍人曰昨日我谈粗而君动今日精而君不动何也舍人曰先生之计大而规高吾君不能用也乃我请君坚塞两耳不听谈者虽然先生明日复来吾请资先生厚用【言使兑厚而用之正曰用财费也】明日来抵掌而谈李兑送苏子秦明月之珠【览冥训注隋侯珠云】和氏之璧【卞和所献楚文王者补曰赵得楚和氏璧秦昭王欲以十五城易之李兑所送必非】黑貂之裘黄金百镒【元作溢】溢苏子秦得以为用西入於秦【补曰苏秦之死在慎靓王四年去主父见杀时远甚此策言杀主父事非秦明矣其代厉坎首尾亦与秦策苏秦章类抑本言秦事而剿入後事坎土梗木梗之喻与齐策上田文说同彼亦秦死後事而指为秦皆不合太史公所谓异时事有类之者皆谓之苏秦其此类耶】

赵王封孟尝君以武城【属清河即下东武城北当田文奔薛後正曰无考】孟尝君择舍人以为武城吏而遣之曰鄙语岂不曰借车者驰之【借车与衣固将驰且被也今云然盖常常驰被而弗爱也】借衣者被之哉【补曰被姚叶音披】皆对曰有之孟尝君曰文甚不取也夫所借衣车者非亲友则兄弟也夫驰亲友之车被兄弟之衣文以为不可今赵王不知文不肖而封之以武城愿大夫之往也毋伐树木毋发屋室訾然使王悟而知文【誓不思称意也言其不期得知而见知知其善任人也补曰一本知文也】谨使【遣吏之辞】可全而归之【正曰谨使属下句使如字补曰一本标御览发作废谨作仅】

齐欲攻宋【闵三十八年此十三年正曰闵二十八年】秦令起贾【人姓名】禁之齐乃援【元作掾】掾【补曰姚云掾一作收大事记取】赵以伐宋【以赵自助补曰齐欲攻宋乃收赵以助已实未伐也故赵李兑合五国以伐秦大事记梁王二十九年先书赵李兑约五国伐秦後书齐灭宋解题云此大事记见於策者前後非一章史乃略不载策亦不载伐秦之年然兵端起於秦怨赵助齐伐宋故附齐灭宋年】秦王【昭】怒属怨於赵李兑约五国以伐秦【韩赵魏燕齐也史不书独赵策见之补曰大事记书楚齐赵韩魏按魏策五国约而攻秦楚王为从长不能败秦兵罢而留成臯与此李兑约五国攻秦无功留天下兵於成臯相合文谓兑虽主谋楚犹以大国为从长据此故也按楚王为从长乃怀王十一年苏秦约楚齐赵韩魏燕伐秦也秦纪无楚年表无齐故以五国称楚世家书特详诸侯至函谷关击秦不胜而归其事又相类兵罢留成臯一语记者遂误附之非李兑合从时也按兑伐秦时当楚顷襄王十二年七年楚迎妇於秦十四年与秦昭王好会於宛中间未尝构兵大事记据下章书楚齐赵韩魏又据魏策国遂长楚考之下章虽有楚而不明言在五国之数後亦屡言燕是时固有燕矣又此章劝齐劫天下未及秦而后楚下章云齐将攻宋秦楚禁之可见秦楚方睦必无楚伐秦之事矣鲍以五国为韩赵魏燕齐者得之然赵当首书】无功留天下之兵於成臯而陰讲【元从手从菑补曰姚云曾作讲大事记同以下有已讲字故也】於秦又欲与秦攻魏以解其怨【解秦怨】而取封焉【自封之封非封地正曰下文言取陰定封】魏王【昭】不说之齐人【补正曰大事记魏王不说齐人谓王云云愚谓之齐上有缺文当是人姓名】谓齐王曰臣为足下谓魏王曰三晋皆有秦患今之攻秦也为赵也【本以秦属怨於赵故】五国伐赵【此设辞也言赵初约伐秦今乃与秦讲若同伐赵赵可亡也】赵必亡矣齐逐李兑【讲秦背齐不伐宋者兑也正曰姚本作秦逐大事记取】李兑必死今之伐秦也以救李子之死也今赵留天下之甲於成臯而陰鬻之於秦已讲则令秦攻魏以成其私封王之事赵也何得矣且王尝济於漳而身朝於邯郸抱阴成【成属涿郡又孔子世家注太山钜平有武城正曰陰成未详鲍注皆非魏地】负蒿【地缺】葛孽【元作薛赵记注在马丘又葛城在高阴属涿郡】薛【补曰当作藁正曰抱负言其势按魏魏策叶阳君约魏魏王将封其子谓魏王曰王尝身济漳朝邯郸抱葛薛阴成以为赵养邑据此文则蒿字因葛而误衍四邑皆魏

地赵世家遇於葛孽则知此文薛字误也徐广云荐三阙则丘正义引括地志云二阙 魏县西南】为赵蔽而赵无为王行也今又以河阳【属河内】姑密【阙地未详】封其子【兑子正曰说见後】而乃令秦攻王以便取阴【正曰平下

二章俱有三其文则时阙文本而取此乃宋地也传昭十九年公尹赤迁阴於下阴乃襄之阙非此阙指也齐策三子说齐王伐宋之三曰有太平陆则梁阙不啓阙南阳则亦指在六成者误矣史记作

阙平陆盖平陆兖州县定陶今阙州皆大梁之东时皆阙宋阙之定阙也济阴之名後出抑阙欵按史阙陶徐广曰陶一作阙曰阴必亡史作陶邑必亡魏策阴啓史作陶阙】

【陶阴字易盛定陶见有魏冉冢作阴者谋是有以阙字误此说是也刘歆七略云古文阙

以陶为阴然则】

【阴之为陶信矣】人比然而後知贤不【言人必以类相比乃可知】如王【言如今王者正曰下有若字如王若用不成文当以王字句言人以类相比知贤不如王】若用所以事赵之半收齐天下有敢谋王者乎王之事齐也无入朝之辱无割地之费齐为王之故虚国於燕赵之前【虚国谓悉出兵】用兵於二千里之外故攻城野战未尝不为王先被矢石也得二都割河东尽効之於王自是之後秦攻魏齐未尝不岁至於王之境也【补曰一本齐甲】请问王之所以报齐者可乎韩珉【元作眠从韩策後并同】眠【正曰珉眠未知孰讹且当各依本文】处於赵【眠下皆齐人之去齐者正曰韩眠必韩人韩策云眠相齐赵策有韩珉赵世家惠文十三年虞高无见除薛公为齐人余无考】去齐三千里王以此疑齐【眠处赵意别有谓以其在赵疑齐相赵】曰有秦陰【疑齐亲赵因私於秦以赵尝讲秦也】今王又挟故薛公以为相【史称文去齐如魏在闵王三十八年後按此则其如魏以齐王骄也伐宋前已去齐矣正曰大事记孟尝君去齐相魏附赧王二十九年齐伐宋前说见东周策】善韩徐以为上交尊虞商以为大客【皆齐人之去齐者】王顾【元作固】固可以反疑於齐乎【用齐之所不善失在魏也安可疑齐补曰此语大事记取】於【补曰此下恐当有是字】魏王听此言也甚拙【此下此士自陈其说魏之效拙犹顺正曰韵书拙辞塞也】其欲事王【齐王】也甚循其怨於赵【言其事齐比於怨赵则又顺也正曰循姚云曾作修则当属上文愚谓以甚循句文势顺於赵下有缺文或其怨於赵句因下文衍】臣愿王之【补曰臣愿王之王谓齐王下并同】亟【元作日】日【补曰一本作重是】闻魏【与魏相闻】而无庸见恶也臣请为王推其怨於赵【推犹移怨魏怨】愿王之阴重【元作日】日【补曰上列字当是重】赵而无使秦之见王之重赵也秦见之且亦重赵【天下得赵则强使秦知齐重赵恐齐强亦必重之】齐秦交重赵臣必见燕与韩魏亦且重赵也皆且无敢与赵治【治犹校】三国事赵【补曰姚作五国】赵从亲以合於秦必为王高矣【言赵居齐上】臣故欲王之徧劫天下而皆私甘之也【私则所谓无使见也甘言说之补曰徧劫者衆胁之以威私甘者独说之以言】王使臣以韩魏与燕劫赵使丹也甘之【丹顺皆人名】以赵劫韩魏【此下皆且甘且劫】使臣也甘之以三晋劫秦使顺也甘之以天下劫楚使珉眠也甘之则天下皆偪秦以事王【自以见偪於秦也秦於天下有偪而已不如齐之有劫有甘也正曰相与偪秦也偪者侵迫也】而不敢相私也交定而後王择焉【此章亦可为齐姑因旧】

齐将攻宋而秦楚禁之【补曰姚本楚作陰】齐因欲与赵赵不听齐乃令公孙衍说李兑以攻宋而定封焉李兑乃谓齐王【闵】曰【正曰下李兑二字必误下云使公孙衍说奉阳君即述上文令公孙衍说李兑也其下岂得为兑言乎又後有循燕观赵语以为兑言则不通】臣之所以坚三晋以攻秦者非以为齐得利秦之毁也【不以毁秦为齐之利】欲以使攻宋也而宋置太子以为王下亲其上而守坚臣是以欲足下之速归休士民也今太子走诸善太子者皆有死心【太子为王及走史不书太子为王矣而走必王之党逐之故太子之人以死报之】若复攻之其国必有乱而太子在外此亦举宋之时也已臣为足下使公孙衍说奉阳君【苏秦从时已言奉阳死岂或袭称如马服者乎补曰按史苏秦传赵肃侯令其弟成为相号奉阳君弗说秦秦去之燕秦阳君死秦复说肃侯称奉阳君捐館舍而张仪之说武灵王亦谓先王时奉阳君相专权擅势蔽晦先王然武灵胡服请於公叔成而成与李兑弑主父则是

肃侯之世成未亡何其前後相戾邪故大事记从古史定以奉阳君为公子成而削去捐馆之语考之策屡言奉阳君而赵策尤着见於李兑约五国伐秦後谋取宋之时苏秦说赵当肃侯十六年而五国伐秦在惠文十三年相去五十年公子成执国柄何久也史策明言捐館舍岂得皆误武灵易服之请犹惓惓敬事其荅张仪岂得公言其罪而无所讳哉荀子以奉阳君为阙臣而杨伟注亦疑非公子成苏秦所值者必别一奉阳君非公子成明矣然则奉阳君果公子成乎曰谓奉阳君为公子成亦史迁之言而策无明文也五国攻秦时成兑方并用以成为奉阳君其时则可矣愚尝反覆策文而有疑焉赵策言李兑约伐秦无功陰讲於秦欲与秦攻魏以解怨取阴以定封又云齐令公孙衍说李兑以攻宋定封又云公孙衍说奉阳君封地莫善於宋莫如於阴又苏代谓齐王臣为足下说奉阳君天下散而争秦阴必不可得既言李兑取阴又言奉阳君取阴不应为二人事窃以为李兑即奉阳君也何以明之赵策说魏之辞曰李兑留天下之甲於成臯令秦攻魏以成其私王尝身朝邯鄲抱阴成负葛孽为赵蔽今又以河阳姑密封其子魏策则曰叶阳君约魏魏王将封其子谓魏王曰云云正与前同则知叶阳者奉阳之讹奉阳君之为李兑其徵一也赵策苏代说奉阳之辞曰五国愿得赵与韩氏大吏东勉齐王必无召元作名有说见本条民燕策代举奉阳君之辞曰齐王使公王曰命说曰必不反韩氏今召之矣其事亦同奉阳自称说说者兑之讹奉阳君之为李兑其徵二也燕策又有奉阳君李兑甚不取苏秦之言奉阳君李兑者并举其封邑姓名言之也其下误以苏代为苏秦则亦因苏秦所云而然说见本传奉阳君之为李兑其徵三也按赵世家公子成李兑既杀公子成田不礼而定王室公子成为相号安平君则安平乃成之封史表安平属上郡吾志深州有安平县元属定州皆赵地也奉阳则未有考而非奉阳矣史迁不明奉阳君为二人又误以为公子成是以纷纭舛论者莫知所从今以策文考之而得其说如此余见各章可参观也】曰君之身老矣封不可不早定也为君虑封莫若於宋他国莫可夫秦人贪韩魏危【近秦故】燕楚僻【元作辟】辟中山之地薄【补曰时中山已灭此言其故地尔】莫如於阴失今之时不可复得已宋之罪重齐之怒深残乱宋德【元作得】得【补曰得字讹】夫早定身封此百代一时也已奉阳君甚贪【元作食】食【正曰恐贪字讹】之唯得大封齐无大异【言奉阳欲得阴以大其封而齐待之未有异数不可】臣愿足下之大发攻宋之举而无庸致兵以观奉阳君之应足下也县阴以甘之【许之而未与故曰县】循有燕以临之【循言与燕顺临犹制也不徒甘之必或制之】而臣待忠之封【待犹将忠犹实也王许之封而已实之正曰劝之定封故曰臣且将忠之以封】事必大成臣又愿足下有地効於襄安君【盖赵人正曰无考】以资臣也足下果残宋此两地之时也【言有齐又得宋正曰两地言齐与赵可并得宋地此谓齐王言岂得言有齐乎】足下何爱焉若足下不得志於宋与国何敢望也【与国赵也言奉阳襄安不敢望封正曰上言两得地此言齐不得志则赵不敢望】足下以此资臣也臣循燕观赵【观言其无所事】则足下击溃而决天下矣【溃溃痛也盖喻其制天下之易也决犹制正曰溃坏也此喻宋击溃坏之宋而决制天下矣补曰公孙衍为秦相而逐在秦武王四年武灵王之十九年也後为魏所杀虽不知何年然去李兑合从时已远此公孙衍恐非犀首也考之秦策亦有宋罪重止百世之一时已数语彼以为穰侯之言亦此时事也说见後为足为君之为去声】

齐攻宋奉阳君不欲客谓奉阳君曰君之春秋高矣而封地不定不可不熟图也秦之贪韩魏危燕【元作卫】卫【补曰上章作燕】楚僻【元作正盖僻匹声近匹又讹作正字补曰宜

注元文下】正中山之地薄宋罪重齐怒深残伐乱宋定身封德强齐此百代之一时也【补曰赵策说奉阳君取阴之辞自宋罪重以下至百世之一时已凡两见而秦策亦有之以以为谓穰侯赵策又曰魏冉必妬君之有阴按阴即陶宋地冉所封也秦纪昭王十二年楼缓免穰侯魏冉为相十六年冉免封公子市宛公子慳邓魏冉陶为诸侯冉传云免楼缓而魏冉相冉谢病免以烛寿为相烛免复相冉乃封於穰後益封陶号曰穰侯大事记先书穰侯魏冉为相封陶後书复以魏冉为丞相封於穰与陶谓之穰侯又封公子市为宛侯公子慳为邓侯又谓三子之封皆取於他国秦去年取宛今年取邓穰陶虽不载何年得之盖亦近岁按赧王十四年秦伐韩取穰大事记已书之矣独以陶为近岁所取则眩於史文未考其实且据秦纪则冉始相已封穰後相封陶於传则复相时封穰後益以陶已有不合大事记从之亦偶未察独见於策者可考李兑约五国伐秦後欲取阴定封说穰侯者亦劝之策文容有复混而其事实并一时是时齐欲攻宋秦禁之齐欲与赵故说者劝李兑上距冉复相秦五岁尔使冉已封陶兑安得欲之而言者亦安得云冉妬君之有阴因此言而知冉之未封陶而欲得之也其後齐灭宋两年而为五国所破赵既不取陶而齐亦卒不能有穰侯之取陶在此时欤或谓魏策谓穰侯云君攻楚取宛穰以广陶封似封陶在前窃谓秦之取穰冉之封穰固无疑矣独取陶定封岁月不载而史所谓後益封陶号曰穰侯者辞亦不明意者陶之封大而入厚冉国於陶如取刚寿之类皆云广陶封故魏策之言如此而宛亦非冉封不足据信使冉封陶当曰陶侯而称穰侯知始封穰必并误也】

五国伐秦无功罢於成臯赵欲讲【元从才从葍下同】构【正曰本又惟坚约而讲君必无讲二处作讲字今当悉从旧】於秦楚与韩魏将应之齐弗欲苏代谓齐王【闵】曰臣已为足下见奉阳君矣臣谓奉阳君曰天下散而争秦【争一作事争先事之】秦必据宋魏冉必妬君之有阴也秦王贪魏冉妬则阴不可得已矣君无讲构齐必攻宋齐攻宋则楚必攻宋魏必攻宋燕赵助之五国据宋不至一二月阴必得矣得阴而讲构秦虽有变君无患矣【赵非不可以与秦讲而不可独讲独讲则示秦弱秦必轻之今助四国攻宋而得阴是五国为一也不惧秦矣】若不得已而必讲构【据此时赵可以无讲故云正曰不得已而必讲非可以无讲也疑此句已字误上句得阴而讲此句当云不得阴而必讲乃顺】则愿五国复坚约【同伐秦也先伐後讲则不示弱】五国【补两字】愿得赵【时赵强故】足下雄飞【雄者衆雌所从】与韩氏大吏东勉【元作免】免【补曰免即勉通】齐王必无名禁【补正曰姚本必无召氓也此名字讹当作召】氓氓也【元作民下同前齐尝使韩氓处赵有秦私也今王国约讲秦勉齐同之诸国必无辞止氓使无私秦正曰燕策苏代说燕之辞曰奉阳君告朱轸与赵足曰齐王云云必不反韩氓今召之矣此名字当作召无疑前策言韩氓处赵魏疑齐有秦私韩策秦王曰韩氓与我交又云韩氓相齐此下文云天下争秦秦内韩氓於齐氓盖韩人之善於齐秦者今代劝奉阳君合诸侯与韩氏大吏勉齐王共合从则齐必不召氓也】使臣守约若与国【秦本非与今讲必使之如与也正曰与国言五国也故云有倍约者则四国攻之无倍约者而秦侵败约则五国复坚摈之】有倍约者【倍并音背】以四国攻之无倍约者而秦侵约五国复坚而摈【元作宾】宾【补曰摈通庄子宾於乡里】之今韩魏与齐相疑也若复不坚约而讲【此因旧】臣恐与国之大乱也齐秦非复合也必有畸【元作踦下同】踦重者矣【角一俯一仰曰踦言有偏重正曰公羊传踦间何休说开一扇合一扇一人在内一人在外曰踦说苑切踦即倚字义皆训偏】後合与踦踦重者皆非赵之利也【补

曰後合即上复合】且天下散而事秦是秦制天下也秦制天下将何以天下为【天下自为秦用赵无所用之也】臣愿君之蚤计也天下争秦有六举【补曰争秦一本此下皆作事秦】皆不利赵矣天下争秦秦王【昭】受负海【衍内字】内之国【山东皆负海正曰三晋非负海也恐负字因下文衍】合负亲之交【天下尝横而亲秦矣已而负之今复合之】以据中国而求利於三晋是秦之一举也秦行是计不利於赵而君终不得阴一矣天下争秦秦王内韩珉眠於齐内成阳君於韩相魏怀於魏【此皆其国人之与秦事者故秦纳之正曰韩珉非齐人】复合衍【公孙衍时相魏雅不善秦今相怀因使合之正曰公孙衍非犀首说见前】交两王【秦魏正曰上言齐韩魏此两王谓燕赵也】王赍韩佗之楚【元作曹此皆秦人】曹【正曰曹辈也下有皆字文势宜然五国必无楚韩佗恐韩人余无考】皆起而行事是秦之一举也秦行是计也不利於赵而君不得阴二矣天下争秦秦王受齐受赵三强三亲【此三皆强国自相亲】以据魏【据犹临之】而求安邑【秦求之】是秦之一举也秦行是计齐赵应之魏不待伐抱安邑而倍秦【此倍益也补曰姚本倍作信】秦得安邑之饶魏为上交韩必入朝秦过赵已安邑矣【过犹胜也言秦行此策不论其他止得安邑已胜於赵矣补曰已以通言秦之胜赵以得魏之安邑按魏献安邑在赧王二十九年大事记书於五国伐秦之前据此策则伐秦後事也此下姚本复有是秦之一举也六字】秦行是计不利於赵而君必不得阴三矣天下争秦秦坚燕赵之交以伐齐收楚与韩珉眠而攻魏【伐齐得之则珉为用正曰前言内韩珉於齐者谋如此也珉自善於秦者前时魏疑其有秦私必不合於魏故使之攻魏】是秦之一举也秦行是计而燕赵应之燕赵伐齐兵始用【交锋之初】秦因收楚而攻魏【三国交锋势不得解故得以此时收攻二国】不至一二月魏必破矣秦举安邑而塞女戟【地缺正曰女戟地名在太行西】韩之太原絶【补曰太原正义以为太行当是说见燕策】下軹【元作𡳗】𡳗【补曰说见前】道南阳而【元作高】高【补曰疑字有误】伐魏絶韩包二周即赵自消烁矣国燥於秦【燥犹烁补曰姚本注燥一作烁】兵分於齐非赵之利也而君终身不得阴四矣天下争秦秦坚三晋之交攻齐国破财【元作曹补曰一本作财】屈【三晋破屈也】而兵东分於齐【兵分谓魏正曰谓三晋】秦按兵攻魏取安邑【此与上始用兵而攻收同正曰不同】是秦之一举也秦行是计也君按救魏【按谓安然正曰即上文按兵之按】是以攻齐之已敝救之而【补两字正曰一本无救字救即敝字讹衍】与秦争战也君不救也韩魏焉免西合【合合秦补曰焉於?切】国在谋之中【在秦谋中】而君有终身不得阴五矣【有犹又补曰姚云刘作又】天下争秦秦案为义存亡继絶固危扶弱定无罪之君必起中山与胜焉【胜中山之後正曰无据】秦起中山与胜而赵宋同命【此时宋小弱言赵失中山听命於秦与宋同也】何暇言阴六矣故曰君必无讲则阴必得矣奉阳君曰善乃絶和於秦而收齐魏以成取阴【补曰苏代为燕反间劝齐伐宋将以敝齐其劝赵之共攻者恐赵之合秦而齐秦方恶尔然赵卒不合齐伐宋者害齐之骄而止欤抑别有故也按燕策苏代说燕於赵以伐齐奉阳君不听乃入齐恶赵令齐絶於赵又代谓燕昭王曰臣离齐赵齐赵已孤矣赵之不合齐其後竟合燕以破齐殆以此欤大事记齐湣王与魏楚灭宋三分其地魏得其梁陈留齐得其济陰东平楚得其沛考之史年表齐魏世家皆止言齐灭宋独宋世家称与楚魏伐宋三分其地此大事记所据也按苏代说燕之辞曰齐王南攻楚西困秦又以其余兵举五千乘之劲宋谓秦之辞曰攻宋所以为王也齐强辅之以宋楚魏必恐恐西事秦使当时齐与楚魏合其言岂若是乎史称齐既灭宋南割楚之淮北西侵三晋是其乘灭宋之强并夺楚魏地而谓与之分宋地岂其实哉乐毅劝燕昭王约赵楚

魏伐齐其言曰王若欲攻齐莫若结於赵且又淮北宋地楚魏之所欲也年表燕破齐之年书楚赵取齐淮北大事记因之按此言则楚魏分地当是乐毅破齐後事宋世家所记者岂非得邪】

赵收天下且以伐齐苏厉【元作秦】秦【补曰史作厉】为【补曰去声】齐上书说赵王曰臣闻古之贤君德行非施於海内也教顺慈爱非布於万民也祭祀时享非当於鬼神也甘露降风雨时农夫登【谷熟曰登】年谷丰盈衆人善之而贤主恶之【恶心不安也以其无以致之故补曰一本喜之】今足下功力【谓战伐】非数痛加於秦国而怨毒积恶非曾深陵於韩也【补曰曾恐即增姚云曾本作非素深於韩】臣窃外闻大臣及下吏之议皆言主前专据【言行之不疑】以秦为爱赵而憎韩臣窃以事观之秦岂得爱赵而憎韩哉欲亡韩吞两周之地故以韩为饵【赵时恶韩故秦以亡韩悦赵赵遂以为爱己也补曰秦两憎韩及以韩为饵之韩史并作齐说见後且亡韩吞两周文义明作齐则不顺】先出声於天下欲邻国闻而观之也【观其爱赵】恐其事不成故出兵以佯示赵魏【虚以伐韩示之】恐天下之惊觉故微伐【补补曰微下有缺文史作微兵於韩以威之】韩以貳之【貳犹疑】恐天下疑已故出质以为信声德於与国而实伐空韩【如上文则伐韩非秦所急也此言实伐者韩之在秦掌握中物耳故不急於伐恐赵不以为德故终伐之其伐之亦欲以吞周而非爱赵也正曰实欲伐空虚之韩】臣窃观其图之也议秦以谋计【议犹意正曰一本议以为秦计谋】必出於是且夫说士之计皆曰韩亡三川魏灭晋国【晋国谓安邑】是【元作恃】恃【补曰恃非所恃也】韩未穷而祸及於赵【三晋唇齿之国故韩亡则魏灭魏灭而祸及於赵不待言也】且物固有势异而患同者又有势同而患异者昔者楚人久伐而中山亡【此言楚受秦伐赵无秦患故破中山灭之故秦昭八年再败楚遂言赵破中山正曰大事记中山恃魏楚魏久连兵中山失助而亡今详此言亦失考年表武灵王二十五年攻中山而秦韩魏齐击楚败唐昧亦此时也说见燕魏等策】今燕尽韩之河南【尽言得其地补曰尽韩之河史作燕尽齐之北地】距沙丘而至钜鹿之界【钜鹿冀州郡】三百里【自此皆言近赵】距於扞关至於榆中【属金城下衍千字】千五百里【补曰距於云云史作秦之上郡近扞关至於榆中千五百里榆中上郡见前自上郡至榆中则千五百里为是楚有扞关说见前策大事记云扞者扞敌之扞非关名也此赵扞敌之关非独楚有之赵之扞关陆地之关楚之扞关水道之关也】秦尽韩魏之上党则地与国都【国谓赵】邦属而壤挈者【言为秦所取挈言取之易】七百里秦以三军强弩坐羊肠【元作唐】唐之上即地去邯郸二十里且秦以三军攻王之上党而危其北则勾注之西【属鴈门补曰括地志云勾注山在雁门县西北】非王之有也今踰【元作鲁】鲁【补曰字义未详】勾注禁常山而守【守犹闭】三百里通於唐曲遇【元作吾】吾【正曰当作逆曲遇者不顺史注中牟曲遇聚郑州县非此所指按齐策权之难章云燕战胜兵罢赵可以取唐曲逆唐即唐县曲逆蒲阴县并属中山此曲下必逆字也一本止作唐曲亦缺误】此代马胡驹不畜【补曰胡驹史作胡犬郭璞云胡地野犬似狐而小】而崑山之玉【後志金城临羌有崑山正曰禹贡雍州贡球琳琅玕尔雅崑仑虚之璆琳琅玕李斯传崑山之玉正义云崑冈在于阗国东北出玉按武帝以于阗山出玉故号玉所出曰崑仑】不出也此三宝者又非王之有也今从於强秦与【元作国】国之伐齐臣恐其祸出於是矣五国之王【齐楚魏韩燕补曰姚本五国上有昔者字】尝合横而谋伐赵三分赵国壤地着之盘盂【取太公为武王作盘盂之铭补曰言其目见而不忘】属之

雋柞【雋柞酬酢同言其相属伐赵於酬酢之间】五国之兵有【曰】矣齐【元作韩下并同】韩乃西师以禁秦国【禁闭拒之】使秦发令素服而听【言令其国素服者兵败以丧礼自居也吏不书】反温軹【元作枳并属河内】枳高平於魏【高平属临淮安定亦有正曰括地志云高平故城在怀州河阳县西言临淮者缪安定秦地亦非温枳皆河内故当以怀州者为正】反三公什清於赵【公字疑误安定有三水朔方有三封渤海有三户皆近赵张仪塞什谷之口当屯留之道则什近屯留後志中牟注有清口皆赵地也正曰三公二字有误史云反高平根柔於魏反豎分先俞於赵根柔未阙反文已明括地志云勾注山一名西陞山尔雅云北陵西隩鴈门疑此豎分乃豎山先俞即西俞也】此王之明知也夫齐韩事赵宜为上交【以其有志为赵闭秦】今乃以邸罪取伐【邸抵同坐也正曰姚本作抵当也】臣恐其後事王不敢自必也【补曰一本事王者之云云】今王收齐【补】天下必以王为得齐韩齐【补】危社稷以事王【补曰姚云危曾作抱】天下必重王然则齐韩义王以天下就之【赵得天下之交而屈就齐故齐以为义】下至齐韩慕王以天下收之【就之上也故收言下正曰就者屈就之收者收结之】是一世之命制於王已臣愿大王深与左右羣臣卒计而重谋先事成虑而熟图之也【赵惠文十六年有正曰史赵世家惠文十五年燕昭王与赵韩魏秦共击齐齐败走燕独深入取临淄十六年秦复与赵数击济齐人患之苏厉为齐遗赵王书云云於是赵乃辍谢秦不击齐大事记是时齐地皆入燕独莒即墨仅存苏厉之书皆不及之恐非此时事按策多为韩言乃赵藉击韩而厉为韩止之者其间事实皆明指韩而首云伐齐为齐殊不合决有误而史一切以韩为齐抑马迁之所改欤然赵伐韩事亦不知在何时其文及地名亦多舛异不可强为之说鲍专据史文辄改大不然也】

秦攻赵蔺离石祁拔赵以公子郢【补曰音吾】为质於秦而请内焦【弘农郡有焦城正曰大事记据此愚疑非此地姚云一作应下同】黎【东郡有黎即黎阳】牛狐之城【地缺】以易蔺离石祁於秦【元作赵】赵赵背秦不予焦黎牛狐秦王昭怒令公子繒请地赵王乃令郑朱对曰夫蔺离石祁之地旷远於赵而近於大国有先王之明与先臣之力故能有之今寡人不逮【不及先王】其社稷之不能恤安能收恤蔺离石祁乎寡人有不令之臣实为此事也非寡人之所敢知【补曰郑朱之对辞气类左氏】卒背秦秦王大怒令卫胡易【史无易字补曰秦纪中更胡伤说见後】伐赵攻阙与【後志上党涅有阙与补曰大事记潞州铜阙县西北阙与震阙阿葛切与音预】赵奢将救之【此二十九年破赵阙与下】魏令公子咎以锐师居安邑以挟秦【挟牵制之正曰夹持之】秦败於阙与反攻魏几【魏将正曰几邑名正义云或属齐或属魏当在相潞之间几音机一音祁】廉颇救几大败秦师【补曰按西周策苏厉谓周君曰败韩魏杀犀武攻赵取蔺离石祁者皆白起则此举乃起将也按显王四十一年秦败赵杀赵蔺取离石赧王三年秦拔赵蔺虜赵庄蔺弓而此言取二城在伊阙战後史载於赧王三十二年岂战国地里不常後复属赵而今为秦所拔乎赧之三十四年当惠文十八年前一年秦拔我两城是年秦拔我石城岂即此三邑而石城即离石邪末言战阙与攻几事皆因此按史赵奢败秦阙与在惠文二十九年廉颇攻几在惠文二十三年今策战阙与而後攻几前後不同大事记谓几本属魏廉颇取之自是遂属赵秦师既为赵奢所败师还因击几故下文称救几也又按秦纪中更胡伤攻赵阙与在赵奢破秦次年年表秦击我阙与城不拔是再攻阙与也与策亦异大事记从史书之而不辨当详之】

郑同北见赵王赵王曰子南方之博士也【同郑人郑在赵之南博士辩博之士补曰秦官有博士或战国儒士有此称姚本作博士】何以教之郑同曰臣南方草鄙之人也【鄙犹野】何足问虽然王致之於前安敢不对乎臣少之时亲尝教以兵赵王曰寡人不好兵【补曰故为反辞也】郑同因抚手仰天而笑之曰【抚摩也】兵固天下之狙喜也【狙獾属而狡黠言兵家如之而可喜正曰狙犹扬雄所谓狙诈也言此固诈者之所喜】臣故意大王不好也【补曰故固通】臣亦尝以兵说魏昭王【昔日】昭王亦曰寡人不喜臣曰王之行能如许由乎许由无天下之累故不爱【元作受】受也今王既受先王之传欲宗庙之安壤地不削社稷之血食乎王曰然【此下同对】今有人操隋侯之珠持【下脱一字】丘之环【未详】万金之财时【补曰一本标作特】宿於野内无孟贲之威荆庆之断【荆成荆范睢传注古勇士又庆卿古字通应训荆有饮非斩蛟孔子闻之博物志以为荆轲非也又或是成荆庆忌二人说林训曰王子庆忌足蹑麋鹿手搏兕虎补曰吴越春秋庆忌吴王僚子】外无弓弩之御不出宿夕【一宿二夕夕初夜】人必危之矣今有强贪之国临王之境索王之地告以理则不可说以义则不听王非战鬪守御之具【御亦守】其何以当之王若无兵邻国得志矣赵王曰寡人请奉教【彪谓郑同陈喻甚高然自春秋至是天下未尝无兵故孔孟皆以兵为讳今舍俎豆之事仁义之说而专谈兵此益多之论也】

楼缓将使伏事辞行【伏犹隐也将出使恐王疑之於辞日以隐伏之事要王使信己也正曰伏事乃隐秘之事也】谓赵王曰臣虽尽力竭智死不复见於王矣王曰是何言也固且为书而厚寄卿楼子曰王不闻公子牟夷【宋公子】之於宋乎非肉不食【言其贵庄十年注肉食在位者】文张【他国人正曰无考】善宋【宋王善之正曰此引前事】恶公子牟夷宋【元作寅】寅然之【补之字言牟夷之亲而文张以游客能使宋听其说况已乎正曰寅然上下有缺误】今臣之於王非宋之於公子牟夷也而恶臣者过文张故臣死不复见於王矣王曰子勉行矣寡人与子有誓言矣楼子遂行後以中牟反入梁【史不书补曰中牟赵邑也见前策赵败长平後欲割地构秦楼缓自秦来赵王与之计云云此章皆不可考以中牟反入梁或者秘谋之事欤】侯者来言而王弗听曰吾已与楼子有言矣【此言奸人不可尽信】

燕封宋人荣蚡【补曰蚡符分反】高阳君使将而攻赵赵王因割济东三城合【元作令下同】令卢【属泰山】高唐【属平原】平原陵地城市邑五十七【平原青州】命以与齐而以求安平君而将之马服君谓平原君曰国奚无人甚哉君致安平君而将之乃割济东三城【补】合令【补曰姚云一本无大事记去令】城市邑五十七以与齐此夫【夫辞也谓三城】予【补曰字误姚本作子】子【补曰大事记并删夫予二字】与敌国战覆军杀将之所取割地於敌国者也【此取之彼割之也】今君以此与齐而求安平君而将之国奚无人甚哉【补曰一本此作甚也应上甚哉盖反覆叹惜之辞也】且君奚不将奢也奢尝抵罪居燕燕以奢为上谷守燕之通谷要塞奢习知之百日之内天下之兵未聚奢已举燕矣然则君奚求安平君而为将乎平原君曰将军释之矣仆已言之仆主矣仆主幸已听仆也将军无言已马服君曰君过矣君之所以求安平君者以齐之於燕也茹肝涉血之仇邪【谓即墨之役也】其於奢也不然【奢於燕之仇正曰今以为不然】使安平君愚固不能当荣蚡使安平君智必不肯与燕人战此两言者安平君必处一焉虽然两者有一也使安平君智则奚以赵之强为赵强则齐不复霸矣今得强赵之兵以杜燕将【杜犹拒】旷日持久【兵相持曰

久】数岁令士大夫余子之力尽於沟垒车甲羽毛□敝【羽毛谓箭□即裂字正曰羽毛即羽旄】府库仓廩虚两国交以习之【习言玩其兵】乃引其兵而归夫尽两国之兵无明此者矣是【元作夏】夏军也悬釜而炊【补曰未详恐上下文有缺误悬釜而炊前章围晋阳云此时或有水害大事记无夏止炊七字云已而得三城】得三城【衍也字】也城大无能过百雉者【隐元年注方丈曰堵三堵为雉】果如马服之言也【彪谓马服之请将自明知也其策安平知彼明也夫安平齐宗也其不强赵以夺齐之霸人之情也此言若易听而不见听孰谓平原君智乎】

赵惠文王三十年相平都都平君田单【元作都平按史单无都平之称魏策三言平都今从之又按孝成元年单将赵师攻燕二年为相盖相平都而将之实自惠文至孝成乃攻燕复相也正曰史赵世家惠文王三十三年卒孝成王元年田单将赵师攻燕及韩二年田单为相此称都平君是仍齐相之称都平即安平也故大事记俱作安平君魏策长平之役平都君云云不言是田单也惠文三十年正赵奢破秦军阨与後一岁单未至赵也疑三十年下有缺文】问赵奢曰吾非不说将军之兵法也所以不服者独将军之用衆用衆者使民不得耕作粮食挽赁【赁所税於民者】不可给也此坐而自破之道也非单之所为也单闻之帝王之兵所用不过三万而天下服矣今将军必负十万二十万之衆乃用之此单之所不服也马服君曰【补曰马服注见秦策张华曰赵奢塚在邯郸西山上谓之马服山】君非徒不达於兵也又不明其时势【兵则吴干之喻时势则万国七国之异】夫吴干之劔【吴王使干将铸之故云】肉试则断牛马金试则截盘匝【匝盥器补曰荀子作□盘孟注铜器引策文】薄之柱上而击之【薄犹迫补曰薄音搏】则折为三质之石上而击之【质以石为鑕】则碎为百今以三万之衆而应强国之兵是薄柱击石之谓也【补曰言劔虽利然薄之於柱质之於石而击之则不敌於柱石之坚必折且碎一本之谓作之类荀子注引吴干将】且夫吴干之劔材难【材谓脊脾之类不易得也】夫无【元作母】母【补曰无通】脊之厚而锋不入无脾之薄【脾近刃处】而刃不断兼有是二者无鈎竿【元作竿下同】竿【正曰一本作罕是下同罕即𠂔字𠂔同刃锋也】鐔蒙须之便【鈎劔头鐔竿与□同集韵柄也鐔珥鼻也蒙须疑为劔绳犹蒯缞也尔雅草有夫须盖以草为绳正曰鈎亦劔属姚云曾本须作项亦未详补曰鐔徐心反】操其刃而刺则未入而手断君无十余【补曰恐即上文万字】二十万之衆而为此鈎竿罕鐔蒙须之便而徒以三万行於天下君焉能乎且古者四海之内分为万国城虽大无过三百丈者人虽衆无过三千家者而以集兵三万【集言平时团集非乌合也】距此奚难哉今取古之为万国者分以为战国七不【补】能具数十万之兵旷日持久数岁即君之齐已【言以三万拒数十万必败亡也齐尝为燕昭所破故云正曰能具云云即下云齐以二十万衆攻荆五年之事】齐以二十万之衆攻荆五年乃罢赵以二十万之衆攻中山五年乃归【此言虽衆犹不亟得志况三万乎】今者齐韩相方【方犹比方敌也】两国围攻焉【两国或围或攻】岂有敢曰我其以三万救是者乎哉今千丈之城万家之邑相望也而索以三万之衆【索犹求也】围千丈之城不存其一角【言城大兵少曾不处城之一角岂能合围】而野战不足用也【既不能围亦不可战】君将以此何之平都都平君喟然太息曰单不至也【至犹及也言虑不及此彪谓兵不期少多商敌为数耳单也以少击衆奇兵也奢也以衆敌衆正兵也论兵者当以正为常而用之则务出奇奇不可论也单也狃於即墨之胜欲以奇为常而废正此其论所以屈也补曰兵不期多少商敌为数此论是矣而有所未

尽以其论兵而不论将也单之破燕盖乘衆之愤懈而设奇骇之奢之侵阨与曰道远险狭犹两鼠鬪穴中将勇者胜其後卒以计败秦而长平之役括以四十五万之衆而不免於白起将善则能以少而胜不善则虽多而亦败尔虽然人知少之害而未知多之累曹操以八十万而败於赤壁将非不善也故韩信之论高帝曰不过能将十万而多多益办独信能之论兵者可以不知将哉】

孝成王【惠文王子元年补曰名丹赧王五十年丙申】

赵太后【惠文王威后】新用事秦急攻之赵氏求救於齐齐曰必以长安君为质【长安孝成母弟补曰索隐云赵亦有长安今地缺按赵世家封长安君以饶正义云即饶阳也明长安是号】兵乃出太后不肯大臣强谏太后明谓左右有复言令长安君为质者老妇必唾其面左师【官名】触讐愿见太后盛气而揖之入而徐趋至而自谢曰【补曰触讐姚云一本无言字史亦作龙按说苑鲁哀公问孔子夏桀之臣有左师触龙者谄谀不正人名或有同者此当从讐以别之愿见太后姚本复有太后字史同史云胥之入徐趋而坐胥字当是】老臣病足曾不能疾走不得见久矣窃自恕【久不见宜得罪今自寬而求见】恐太后玉体之有所郤也【郤郤同以己病足因恐后不能前亦自恕以及人也】故愿望见太后曰老妇恃辇而行【补曰望见太后姚本复有太后字史同】曰日食饮得无衰乎曰恃鬻耳【补曰鬻粥同姚云一本去鬻字】曰老臣今者殊不欲食乃自强步曰三四里少益嗜食和於身曰老妇不能太后之色少解左师公曰老臣贱息舒祺【息其子舒祺名也】最少不肖而臣衰窃爱怜之愿令补黑衣之数【屍祝之服所谓衮服又萧望之传注朝时皆着皂衣正曰衮服韵书好衣也按晋輿服志秦人以衮玄为祭服鲍其误以衮为衮乎增韵黑衣戎服左氏均服振振均即衮以下文卫王宫推之戎服是也补曰数史作缺愿令一本愿得】以卫王宫没死以闻【没者沈溺之辞补曰没史作昧】太后曰敬诺年几何矣对曰十五岁矣虽少愿及未填沟壑而托之【死则填壑】太后曰丈夫亦爱怜其少子乎对曰甚於妇人太后曰妇人异甚【异於丈夫而有甚焉】对曰老臣窃以为媼之爱燕后【媼女老称后太后女补曰一本标媼一本作太后太后称媼非也春秋後语并作太后媼乌老反】贤於长安君曰君过矣不若长安君之甚左师公曰父母之爱子则为之计深远媼之送燕后也持其踵为之泣念悲其远也【念且悲】亦哀之矣已行非弗思也祭祀必祝之祝曰必勿使反【失意於燕乃反尔】岂非计久长有子孙相继为王也哉太后曰然左师公曰今三世以前至於赵之为赵赵王之子孙侯者其继有在者乎曰无有曰微独赵【微犹非】诸侯有在者乎曰老妇不闻也【此下左师对补曰史此下有曰字】此其近者祸及身远者及其子孙岂人主之子侯【补曰一本作孙】则必不善哉位尊而无功奉厚而无劳而挟重器多也【重器谓名位金玉正曰位字上下文可考】今媼尊长安之位而封以膏腴之地多予之重器而不及今令有功於国一旦山陵崩长安君何以自托於赵老臣以媼为长安君计短也故以为其爱不若燕后太后曰诺恣君之所使之於是长安君约车百乘质於齐齐兵乃出子义【赵之贤士】闻之曰人主之子也骨肉之亲也犹不能恃无功之尊无劳之奉以守金玉之重也而况人臣乎【赵记元年有彪谓触讐諒毅皆以从容纳说而取成功与夫强谏於廷怒骂於坐上冲冠自待必死者力少而功倍矣元帝谓张猛曰晓人不当如是邪二士有焉补曰程子释易纳约自牖曰左师触讐因其明而导之故其听也如响谓张良招四皓辅太子亦然愚谓二事同传可也燕策陈

翠说太后章与触讐类亦可并观谅毅事不同後亦失对辩说见後】秦王【昭】谓公子他曰昔岁穀下之事【即秦惠七年五国攻函谷事函穀地近故云补曰按赵世家孝成二年受韩上党长平之败在七年秦惠七年五国攻秦至孝成二年凡五十四年秦惠十三年败楚蓝田距此四十九年又韩襄五十四年与齐魏共击秦於函谷河渭絕一日距孝成二年为三十五年稍近然远引前事者祇欲言韩之不可不伐耳年表破长平在孝成六年与世家异】韩为中军以与诸侯攻秦韩与秦接境壤界其地不能千里展转不可约【展转犹反覆】日者秦楚战於蓝田【秦惠文後十三年】韩出锐师以佐秦秦战不利因转与楚不固信盟唯便是从韩之在我心腹之疾吾将伐之何如公子他曰王出兵韩【军於其地】韩必惧惧则可以不战而深取割王曰善乃起兵一万临荥阳一军临太行韩【补补曰姚本有此字】恐使阳城君【疑当作成阳秦昭十七年入朝者也】入谢於秦请効上党之地以为和令韩阳告上党之守靳黈【元作□字书无此字下同】□曰秦起二军以临韩韩不能支今王【桓惠】令韩兴兵【恐守不効地故】以上党入和於秦使阳言之太守太守其効之【补曰索隐云汉景时始称太守大者衍字愚按史文止一称太守故索隐云然此策凡五言之决非衍当时已有此称矣】靳黈□曰人有言挈瓶之智【挈瓶之人之智】不失守器【所守之器谓瓶】王则有令而臣太守虽王与子其亦【元作亦其】亦其猜焉【嫌其不能守】臣请悉发【发兵】守以应秦【正曰悉发守兵】若不能卒【言战败不终事】则死之韩阳趋以报王王曰吾始已诺於应侯矣今不与是欺之也乃使冯亭代靳黈□冯亭守三十日阴使人请赵王曰韩不能守上党且以与秦其民皆不欲为秦而愿为赵今有城市之邑七十【补曰史作十七下同】愿拜纳之於王惟王才之【才财裁同】赵王喜召平原原君【元作平原史作平阳君赵豹是也若果平原下文不应复云召赵胜补曰原当作阳】而告之曰韩不能守上党且以与秦其吏民不欲为秦而皆愿为赵今冯亭令使者以与寡人何如赵豹对曰圣人甚祸无故之利【无故得利圣人以为祸】王曰人怀吾义何谓无故乎对曰秦蚕食韩氏之地中絕不令相通故自以为坐受上党也且夫韩所以内赵者欲嫁其祸也秦被其劳而赵受其利虽强大不能得之於小弱而小弱顾能得之强大乎今王取之可谓有故乎且秦以牛田水通粮【牛田秦地缺因其水为漕正曰牛耕积谷水漕通粮秦於渭水漕运入河洛或以为汉武始用牛耕窃以为古用木耜未有金耜用人耕未用牛耕耦耕者二人并耕或一人一牛亦可汉始专用牛耕也尚书犁从牛冉耕字伯牛司马牛名犁不可谓牛耕非古也】其死士皆列之於上地【韩之上流正曰地之上者】令严政行不可与战王自图之王大怒曰夫用百万之衆攻战踰年历岁未见一城也今不用兵而得城七十何故不为赵豹出王召赵胜赵禹而告之曰韩不能守上党今其守以与寡人有城市之邑七十二人对曰用兵踰年未见一城今坐而得城七十【补此二字补曰史此有七十二字】此大利也乃使赵胜往受地胜至曰敝邑之王使使者臣胜告【补】太守有诏【补曰诏告也谓太守有告】使臣胜【有诏秦人语耳】谓曰请以三万户之都封太守千户封县令【补曰县令说见楚策】诸吏皆益爵三级民能相集者赐家六金冯亭垂涕而免【元作勉免辞也】勉【补曰此书勉免通】曰是吾处三不义也为主守地不能死而以与人不义一也主内之秦不顺主命不义二也卖主之地而食之【食食封户也】不义三也辞封而入韩【补曰汉书赵封冯亭为华阳君与赵将兵拒秦战死长平与此异】谓韩王曰赵闻韩不能守上党今发兵已取之矣韩告秦曰赵起兵取上党秦王怒令公孙起王齮以兵遇赵於长平【赵记四年有冯亭下彪谓平阳嫁祸之言岂不易晓而孝成怒之昏於利也胜禹入而顺旨以济其欲不几於一言而丧邦坎

故为邦者以远佞人为急正曰胜禹浅谋非佞也补曰公孙起即白起史王齕非齕秦将有桓齕此恐讹舛】

秦赵战於长平赵【补曰姚本此有不胜二字】亡一都尉【军尉也】赵王召楼昌与虞卿曰军战不胜尉系死【系尉名正曰姚本系作复史同】寡人使卷甲而趋之【袭之也】何如楼昌曰无益也不如发重使而为讲【元从女从葍求和也与讲无异义而此书两字互用今以构并作讲】媾【补曰说见前】虞卿曰夫言讲媾者以为不讲媾者军必破而制讲媾者在秦【制言听否由之】且王之论秦也欲破王之军乎其不邪王曰秦不遗余力矣必且破赵军虞卿曰王聊听臣发使出重宝以附楚魏楚魏欲得王之重宝必入吾使赵使入楚魏秦必疑天下合从也且必恐如此则讲媾乃可为也赵王不听与平阳君为讲媾【与从之也】发郑朱入秦秦内之赵王召虞卿曰寡人使平阳君讲媾秦秦已内郑朱矣子以为奚如虞卿曰王必不得讲媾军必破矣天下之贺战胜者皆在秦矣郑朱赵之贵人也而入於秦秦王【昭】与应侯必显重以示天下楚魏以赵为讲媾必不救王秦知天下不救王则讲媾不可得成也赵卒不得讲媾军果大败王入秦秦留赵王而後许之讲媾【虞卿传有】

秦攻赵於长平大破之引兵而归因使人索六城於赵而讲【元作构史书此事在邯郸围解後按邯郸之围非秦德赵而解也赵赖魏之力尔何事朝秦而讲以六城此策以长平破惧而赂之是也】媾赵计未定楼缓新从秦来赵王与楼缓计之曰与秦城何如不与何如楼缓辞让曰此非【衍人字】人臣之所能知也王曰虽然试言公之私楼缓曰王亦闻夫公甫文伯母乎公甫文伯官於鲁病死妇人为之自杀於房中者二人其母闻之不肯哭也相室曰焉有子死而不哭者乎其母曰孔子贤人也逐於鲁是人不能随【称是人不予之也】今死而妇人为死者十六人【补曰正义云相室傅姆之类愚按檀弓文伯之丧敬姜据其床而不哭曰云云与楼缓之言相出入辩士之言或过史及新序并作二八是上文人字乃八字之讹】若是者其於长者薄而於妇人厚故从母言之为贤母也从妇言之必不免为妬妇也故其言一也言者异则人心变矣今臣新从秦来而言勿与则非计也言与之则恐王以臣之为秦也故不敢对使臣得为王计之不如予之王曰诺虞卿闻之入见王王以楼缓言告之虞卿曰此饰说也【犹饰辩此下衍秦既解邯郸至六县而讲二十四字】秦既解邯郸之围而赵王入朝使赵郝约事於秦割六县而媾【补曰此二十四字脱简误在此史以为章首者此策实非邯郸围解後事也】王曰何谓也虞卿曰秦之攻赵也倦而归乎王以其力尚能进爱王而不攻乎王曰秦之攻我也不遗余力矣必以倦而归也虞卿曰秦以其力攻其所不能取倦而归王又以其力之所不能攻而资之是助秦自攻也来年秦复攻王王无以救矣王以虞卿之言告楼缓【史云楼缓事正曰史云赵郝新序同止其势必无赵矣】楼缓曰虞卿能尽知秦力之所至乎【至犹及也虞卿言秦力倦而归谓秦力所及止是耳秦力岂止是而已乎】诚不【补】知秦力之所【元作不】不至此弹丸之地犹不予也令秦来年复攻王得无割其内而讲媾乎王曰诚听子割矣子能必来年秦之不复攻我乎楼缓对曰此非臣之所敢任也昔者三晋之交於秦相善也今秦释韩魏而独攻王王之所以事秦必不如韩魏也今臣为足下解负亲之攻【赵尝亲秦而复负之故秦攻之今为讲所以解也】啓关通币【元作敞】敞【补曰当作币】齐交韩魏【使其交秦与韩魏等】至来年而王独不取於秦【不为秦所取】王之所以事秦者必在韩魏之後也此非臣之所敢任也王以楼缓之言告虞卿虞卿【补两

字补曰史此下复有虞卿字】曰楼缓言不讲媾来年秦复攻王得无更割其内而讲媾今讲媾楼缓又不能必秦之不复攻也虽割何益来年复攻又割其力之所不能取而讲媾也此自尽之术也不如无讲媾秦虽善攻不能取六城赵虽不能守亦【元作而】而不至失六城秦倦而归兵必罢【并音疲】我以六【元作五下同正曰此五城与後五城赂齐得王五城之五且当从本文】五城收天下以攻罢秦是我失之於天下而取偿於秦也吾国尚利孰与坐而割地自弱以强秦今楼缓曰秦善韩魏而攻赵者必王之事秦不如韩魏也是使王岁以六城事秦也即坐而地尽矣来年秦复求割地王将予之乎不予则是弃前资【元作贵】贵【补曰恐作资史作功】而挑秦祸也【史记挑战为致师则此言祸自我致也】与之则无地而给之语曰强者善攻而弱者不能自守今坐而听秦秦兵不敝而多得地是强秦而弱赵也以益【衍愈字】愈【补曰新序同史作益强然有愈字亦通益谓增益之也】强之秦而割愈弱之赵其计固不止矣【言割不止】且秦虎狼之国也无礼义之心其求无已而王之地有尽以有尽之地给无已之求其势必无赵矣故曰此饰说也王必勿与【补曰按此饰说二字与前相应则文有乱脱无疑】王曰诺楼缓闻之入见於王王又以虞卿之言告之楼缓曰不然虞卿得其一未知其二也夫秦赵构难而天下皆说何也曰我将因强而乘弱【乘犹陵】今赵兵困於秦天下之贺战胜【补补曰史有胜字】者则必在於秦矣故不若亟割地求和以疑天下慰秦心不然天下将因秦之怒乘赵之敝而瓜分之【分其地如破瓜然】赵且亡何秦之图王以此断之勿复计也虞卿闻之又入见王曰危矣楼子之为秦也【为秦计深而赵危也】夫赵兵困於秦又割地为和是愈疑天下而何慰秦心哉不亦大示天下弱乎且臣曰勿予者非固勿予而已也秦索六城於王王以六五城赂齐齐秦之深讎也【尝争为帝正曰不特此】得王六五城并力而西击秦也齐之听王不待辞之毕也是王失於齐而取偿於秦一举结三国之亲【韩魏本赵与国与齐为三】而与秦易道也赵王曰善因发虞卿东见齐王【王建】与之谋秦虞卿未反秦之使者已在赵矣楼缓闻之逃去【虞卿传有次第不同先云秦既解邯郸与今所衍二十四字同次虞卿谓赵王曰秦之攻王也倦而归乎止势必无赵矣次赵王计未定楼缓从秦来止此饰说也次王必勿与楼缓闻之止缓闻之逃去彪谓虞卿可谓见善明者矣当赵以四十万覆於长平之下凡在赵庭之臣孰不魄夺气丧愿讲秦以偷须臾之宁卿独为之延虑却顾折楼缓之口挫强秦之心反使秦人先赵而讲於此亦足以见从者天下之势七国辩士策必中计必得而不失其正唯卿与陈轸有焉贤矣哉正曰大事记引苏氏云虞卿终始事赵专持从说非说客也鲍以卿与陈轸并称轸料事明切不下於卿其励怀王赂秦而取偿於齐意亦类此他虽辩给可善而言稍浮至其往来秦楚争宠张仪激贵犀首未离说客之习也岂卿比哉】

秦围赵之邯郸【此九年】魏安厘王使将军晋鄙救赵畏秦止於荡阴【属河内补曰姚云钱刘改荡作汤正义云荡天郎反相州县】不进魏王使客将军辛垣衍【称客则衍他国人仕魏也补曰元和姓纂衍毕公高之後】间入邯郸【间谓微行】因平原君谓赵王曰秦所以急围赵者前与齐闵王争强为帝已而复归帝以齐故【由齐不称秦亦去之】今齐【衍闵王字今乃襄王尔史亦误】闵王益弱【正曰谓今之齐视闵王已益弱姚本作已益弱】方今唯秦雄天下此非必贪邯郸其意欲求为帝赵诚发使尊秦昭王为帝【称諡非当时语补曰追书之辞】秦必喜罢兵去平原君犹豫未有所决此时鲁仲连适游赵会秦围赵闻魏将欲令赵尊秦为帝乃见平原君曰事将奈何矣平原君曰胜也何敢言事百万之衆折於外

今又内围邯郸而不去魏王使客将军辛垣衍令赵帝秦今其人在是胜也何敢言事鲁连曰始吾以君为天下之贤公子也吾乃今然後知君非天下之贤公子也梁客辛垣衍安在吾请为君责而归之平原君曰胜请为召而见之於先生平原君遂见辛垣衍曰东国有鲁连先生【东国谓齐补曰一本先生者】其人在此胜请为介绍【郭璞曰介绍相佐助也补曰索隐曰礼宾至必因介以传辞绍者继也故礼云介绍而传命】而见之於将军辛垣衍曰吾闻鲁连先生齐国之高士也衍人臣也使事有职吾不愿见鲁连先生也平原君曰胜已泄之矣【泄言已白之】辛垣衍许诺鲁连见辛垣衍而无言辛垣衍曰吾视居此围城之中者皆有求於平原者也今吾视先生之玉貌非有求於平原君者曷为久居此【元作若】若【补曰若疑居字讹衍史作此无亦可】围城之中而不去也鲁连曰世以鲍进【周之介士见庄子补曰韩诗外传云周时隐者无子胤不臣天子不友诸侯】无从容而死者皆非也【其人介故人谓之然】今衆人不知则为一身【不知者以其抱才死为无以自养不知其非世也明已今亦然】彼秦弃礼义上首功之国也【秦制爵二十战获首级者计功受爵时所尊上也】权使其士虏使其民【视民如所虏获】彼则肆然而为帝过而遂正於天下【过犹不幸补曰正义云旧读帝过句谓偏行天子之礼过失也愚按此句亦难通过即过甚之义史作过而为政】则连有赴东海而死耳【元作矣】矣【补曰史作耳】吾不忍为之民也所为见将军者欲以助赵也辛垣衍曰先生助之柰何鲁连曰吾将使梁及燕助之齐楚固助之矣辛垣衍曰燕则吾请以从矣若乃梁则吾乃梁人也先生恶能使梁助之邪鲁连曰梁未睹秦称帝之害故也使梁睹秦称帝之害则必助赵矣辛垣衍曰秦称帝之害将柰何鲁仲连曰昔齐威王尝为仁义矣率天下诸侯而朝周周贫且微诸侯莫朝而齐独朝之居岁余周烈王崩诸侯皆吊齐後往周怒赴於齐曰天崩地拆天子下席东藩之臣田婴齐後至则断之威王勃然怒曰叱嗟【嗟咨也】而母婢也【补曰正义云赴告也今文作讞索隐云下席言其寝苦居庐谓烈王太子安王骄也正义云而母婢骂烈王后也】卒为天下笑故生则朝周死则叱之诚不忍其求也彼天子固然【固犹必】其无足怪辛垣衍曰先生独未见夫仆乎十人而从一人者宁力不胜智不若邪畏之也鲁仲连曰然梁之比於秦若仆邪辛垣衍曰然鲁仲连曰然则【补】吾将使秦王烹醢梁王【醢肉酱也】辛垣衍快然不说曰嘻亦太甚矣先生之言也【补曰嘻叹言也句】先生又恶能使秦王烹醢梁王鲁仲连曰固也待吾言之昔者鬼侯【徐曰邳县有九侯城九一作鬼】鄂侯【鄂属江夏正曰左传隐六年纳诸鄂注晋别邑路史云在大夏世本云叔虞居鄂未知即此否】文王纣之三公也鬼侯有子而好故入之於纣纣以为恶醢鬼侯鄂侯争之急辩之疾故脯鄂侯文王闻之喟然而叹故拘之於牖里之库【牖里在荡陰】百日而欲令之死【补曰姚本牖里之拘欲令之死】曷为与人俱称帝王卒就脯醢之地也齐闵王将之鲁夷维子执策而从【策马箠也补曰索隐云维东莱之邑其居夷也号夷维子故晏子为莱之夷维人愚按维即维地志维水出密州莒县东北维山北至今维州昌邑海莱夷即今莱州也】谓鲁人曰子将何以待吾君鲁人曰吾将以十太牢待子之君夷维子曰子安取礼而来待吾君彼吾君者天子也天子巡狩诸侯避舍纳【衍于字】于【补曰疑衍史无】筦键【筦钥也键其牡避纳者示不敢有其国】摄衽抱几【几所据也】视膳於堂下天子已食而听退朝也【补曰一本天子已食退而听朝也史同退上有乃字】鲁人投其翥【翥钥同关下牡也投者下其牡】不果纳不得入於鲁将之薛假涂於邹当是时邹君死闵王欲入吊夷维子谓邹之孤曰天子吊主人必将倍殡柩【倍言背之去正曰索隐云主人不在殡东将背其殡棺立西阶上北面哭是倍也天子乃於阼阶上南面吊之也】

】设北面於南方然後天子南面吊也邹之羣臣曰必若此吾将伏劔而死故不敢入於邹鲁之臣生则不得事养【齐时强二国不纳必见伐国人不得养老事幼正曰索隐云谓时君弱臣强邹鲁君生时臣不得尽事养死不得行赙襚之礼然齐欲行天子礼於邹鲁其臣皆不果纳之是犹秉礼而存大体也】死则不得饭含【以珠玉实死者口曰含此谓邹补曰饭扶晚反含胡紺反】然且欲行天子之礼於邹鲁之臣不果纳今秦万乘之国梁亦万乘之国交有称王之名睹其一战而胜欲从而帝之是使三晋之大臣不如邹鲁之仆妾也且秦无已而帝【无已言无止之者正曰无已必欲为之而不止也】则且变易诸侯之大臣彼将夺其所谓不肖而予其所谓贤【补曰史无两谓字】夺其所憎而与其所爱彼又将使其子女谗妾为诸侯妃姬处梁之宫梁王安得晏然而已乎而将军又何以得故宠乎於是辛垣衍起再拜谢曰始以先生为庸人吾乃今日而知先生为天下之士也吾请去不敢复言帝秦秦将闻之为却军五十里适魏公子无忌夺晋鄙军以救赵击秦秦军引而去【补曰秦将闻仲连之言为却军五十里说者以为辩士夸辞愚窃以为信盖仲连毅然不肯帝秦则魏救必至声天下之大义以作三军之气不战而自倍矣是时公子无忌且至连之智足以知其事之克济不然则且有俶傥非常之画以佐赵之急彼秦将者必闻其言而憚其谋故尔不然岂为虚言却哉】於是平原君欲封鲁仲连鲁仲连辞让者三终不肯受平原君乃置酒酒酣起前以千金为鲁连寿鲁连笑曰所【元作此】此【补曰史作所】贵於天下之士者为人排患释难解纷乱而无所取也即有所取者是商贾之人也仲连不忍为也遂辞平原君而去终身不复见【仲连传有彪谓仲连孔子之所谓逸民非周衰辩者之口也太史公赞之贬矣夫说人者不可一槩或委而顺之若触讐或折而服之若仲连然後济天下之务不然谀且佞矣正曰史迁论仲连谓指意不合大义固未当鲍以为孔子所谓逸民连虽贫贱肆志然时出而救时亦非逸也大事记引苏氏曰辩过仪秦气凌髡衍从横之利不入於口因事效言切中机会排难解纷不终日而成功逃避爵赏脱屣而去战国一人而已斯言蔑以加矣愚谓仲连事皆可称而不肯帝秦一节尤伟战国之士皆以势为强弱而连独以义为重轻此其所以异尔补曰请为所为为却之为去声】

秦攻赵平原君使人请救於魏信陵君发兵至邯郸城下秦兵罢虞卿为平原君请益地谓赵王曰夫不鬪一卒不顿一戟【顿劔之顿正曰顿二见秦策】而解二国患者平原君之力【补曰一本有也字】用人之力而忘人之功不可赵王曰善将益之地公孙龙【赵人着坚白论庄子称之距是远甚岂同姓名如公孙弘者乎正曰庄子称公孙龙之学合同异离坚白而史平原传称公孙龙善为坚白同异之辩荀卿传未以为赵人又见列子等书同此人也史称庄子与梁惠齐宣同时楚威王欲以为相威王元年当显王三十年故大事记以楚相之事附见下至赧王十七年赵胜封平原君则周距平原未远也庄子书称之子吟之事当宣王末年赧王元年也下至魏破秦军邯郸时以为赧王五十八年则周之称公孙龙龙在平原君门皆相及也惟以为仲尼弟子公孙龙者则误盖相去远尔】闻【补补曰姚云刘添闻字史有】之见平原君曰君无覆军杀将之功【言初封时以公子耳】而封以东武城赵国豪杰之士多在君之右【右者人道所尊补曰秦汉以前用右为上如云位在廉颇右】而君为相国者以亲也【补正曰故句史作亲戚故也】故夫君封以东武城不让无功【不以无功辞之】佩赵国相印不辞无能一解国患欲求益地是亲戚受封而国人计功也【国人受封必计其功与平原异补曰胜本无功向之受封也已不当得今又欲益地是在亲戚则无功受封国

人则计功乃受赏轻重不伦也汉光武封陰天识引此语】为君计者不如勿受便平原君曰谨受令乃不受封【彪谓平原失计於冯亭以挑秦祸几丧赵国之半驯致邯鄲之围何功之足论哉然因人成事亦又桑榆之收不可忘也虞卿之请帝王懋赏之举公孙龙之辞明哲让功之谊皆君子之善言也正曰赵胜功不赎罪虞卿此为失言】

秦攻魏取宁邑【秦昭王十年拔宁魏地邑徐以为赵非也後志朝歌有宁乡盖秦围邯鄲魏信陵救之秦怒故解邯鄲而取宁此九年正曰按秦纪王齮取邯鄲不拔还奔汾军取汾城即从唐拔宁新中宁新中更名安阳正义云今相州外城年表止书新中大事记因之又齐韩魏楚救赵新中此策秦攻魏取宁邑非宁新中也宁乡在朝歌属魏或如鲍所云然以策文称赵豹平原君为母弟推之知为惠文之世而与孝成邯鄲围後取宁新中事不相涉也秦昭王少而魏冉为政叶阳涇阳贵四十一年冉免而二贵衰赵惠文王元年平原始封二十七年豹封平阳君此策不称豹封则在其未封之前按魏策秦拔宁邑魏冉曰云云此策正冉用事时也鲍误次於孝成之世而不察母弟之云何也】诸侯皆贺赵王使贺三反不得通赵王忧之谓左右曰以秦之强得宁邑以制弱赵诸侯皆贺吾往贺而独不得通此必加兵我为之奈何左右曰使者三往不得通者必所使者非其人也曰諒毅者【曰犹有】辯士也大王可试使之諒毅亲受命而往至秦献书秦王【昭】曰大王广地宁邑诸侯皆贺敝邑寡君亦窃嘉之不敢宁居使下臣奉其币物三至王廷而使不得通使若无罪愿大王无絶其懽若使者有罪愿得请之秦王使使者报曰吾所使赵国者小大皆听吾言则受书币若不从吾言则使者归矣諒毅对曰下臣之来固愿承大国之意也岂敢有难大王若有以令之请奉而【衍西字】西【补曰疑西字讹或衍】行之无所敢疑於是秦王乃见使者曰赵豹平原君数欺弄寡人赵能杀此二人则可若不能杀请令率诸侯受命邯鄲城下【欲战而言受命谦辞也】諒毅曰赵豹平原君亲寡君之母弟也犹大王之有叶阳涇阳君也【史注叶阳一作华阳华阳芋戎也此言叶阳为王之母弟则非戎矣叶不可作华补曰叶阳公子慳涇阳公子市大事记谓范雎论四贵王弟二人曰高陵曰涇阳独无所谓叶阳者高陵或其别名又按赵惠文王元年封公子胜平原君二十七年封赵豹为平阳君魏公子传称胜为惠文王弟而豹无纪其为王弟以策知之也武灵王元年阳文君赵豹相彼又一赵豹欤不然则有舛误也大事记解题引此而止云平原君亲寡君之母弟岂有所疑而别之欤】大王以孝治闻於天下衣服【衍使字】使【正曰姚本膳啗下大有使字注云刘本并无】之便於体膳啗之嚙於口【啗食也味之可食者集韵慳慳也补曰嚙口簞反口有所衔也鸟兽颊贮食通作慳】未尝不分於叶阳涇阳君叶阳君涇阳君之车马衣服无非大王之服御者臣闻之有覆巢毁卵而凤凰不翔刳胎焚夭【夭么同小貌正曰王制不殀夭注殀断杀少长曰夭夭乌老反少诗照反又母杀胎夭疏胎腹中未出者夭胎已出者正曰麟凤两语史孔子世家将西见赵简子闻竇鸣犊舜华之死亦云梅福书?鵲遭害则仁鸟增逝类此】而麒麟不至今使臣受大王之令以还报敝邑之君畏惧不敢不行无乃伤叶阳君涇阳君之心乎秦王曰诺勿使从政諒毅曰敝邑之君有母弟不能教诲以恶大国请黜之勿使与政事以称大国秦王乃喜受币而厚遇之【彪谓諒毅可谓有专对之材矣观其辞令如见晋叔向郑子产相与周旋於一堂之上而折论豹胜之事何甚似萧同叔子也毅其深於春秋者乎是举也不辱君命不失秦之心与触讐同传可也正曰惠文王之世赵势尚强秦虽屡夺赵地而赵亦屡伐秦阙与之败秦终不能逞志於赵当时之臣外则廉颇赵奢为之御侮内则藺相如之徒一璧之微一鼓瑟之耻为之死争今而告

其使曰必杀而二母弟以听命则虽垂亡之国犹有所不受而秦岂能必赵之从哉特大言以虚喝之耳諒毅之对婉而不迫称譬当於人心秦知其不可夺故转而言曰勿使从政其情亦穷矣毅因而顺其意则未免失辞使毅应之曰敝邑之君之有母弟而授之以政也亦惟先王之故以共卫社稷大国冯恃其威日寻於兵是以二子大惧殄灭之及以与寡君周旋其获戾於大国则职此之由忠而不贰臣之职也讨贰劝忠大国之义也今将讨二子之忠而使之释敝邑之政其何以为劝虽大国亦将有利焉臣不知所命以是告之庶几不失其对矣萧同叔子云云此传语 所使试使王使所使今使勿使之使如字】

赵使姚贾约韩魏【正曰姚贾说见秦策此章时不可考】韩魏【衍以字】以友之【补曰两友字姚云刘作反】茅举【元作举茅赵人】举茅为姚贾谓赵王曰贾也王之忠臣也韩魏欲得之故友之将使王逐之而已因受之今王逐之是韩魏之欲得而王之忠臣有罪也故王不如勿逐以明王之贤而折韩魏之招【元作招之补曰姚云刘点此二字皆作之招】

谓皮相国【赵相】曰以赵之弱而据之建信君【据犹任建信赵幸臣】涉孟【盖为横者与建信异趣故赵讐之补曰涉孟之讐四字未详或言建信涉孟二人以其反有害於赵故以讐称】之讐然者何也【补曰然者下章亦有此文法当至也字句】以从为有功也齐不从【正曰句】建信君【此从如字】知从之无功建信者【补曰姚云一作君】安能以无功恶秦哉【恶犹害也从有功乃能害秦尔】不能以无功恶秦则且出兵助秦攻魏以楚赵分齐【为从无功则反助秦不则分齐齐虽不为从然与秦争衡故助秦则分齐之地分分其地】则是强毕矣【言建信图强之计尽於此补曰谓不能害秦则可助秦攻魏怒齐之不从则合楚以分齐二策必居一焉则图强之计毕於此矣】建信春申从【春申悼襄四年主从约发议於此时也】则无功而恶秦【言楚赵合则虽未见功有害秦之形】秦合【元作分】分齐【秦见二国合亦与齐合】齐亡魏则有功而善秦【齐本不从建信今秦来合故助之攻魏以善之】故两君者奚择有功之与【补】无功为知哉【两齐赵也赵知据建信而不知其不合楚不能成功齐不从建信而不知其合楚足以成功不知所择也补曰之字疑当在无功下正曰秦分齐齐亡魏语不可解疑有舛误当是分齐亡魏而衍秦齐二字盖曰建信春申从则虽无功而其势可以恶秦此合楚赵之策也分齐亡魏则有功而可以善秦此助秦之策也两君指皮相国建信君诚指建信君涉孟将何所择於有功无功二者而为智哉】谓皮相国曰【补曰章首姚本有或字】魏杀吕辽【魏臣秦所重者正曰魏臣无考後章作吕遗未知孰是又言收河间何异杀吕遗则吕为秦重者】而卫兵【正曰卫兵句】亡其比阳【属南阳卫附秦者也故魏杀秦重卫为之亡魏之鄙以危之正曰卫附魏者也卫兵卫被兵也兵秦兵也一本比作北】而梁危河间封不定而赵【元作齐】齐【正曰河间近齐後言攻齐必此时并欲攻齐】危【时魏赵欲以封文信而不果正曰秦策所谓不果攻赵赵赂以河间十二县在前事也战国封地往往取之他国是时秦以河间地封不韦秦策称不韦欲攻赵以广河间是也时赵方与诸侯合从欲收河间故言封不定】文信不得志【文信吕不韦也庄襄元年封此十七年也未得河间故不得志正曰按史封文信侯食河南洛阳十万户河间後封】三晋倍之忧也【文信欲得河间必伐赵韩魏赵之与国故其忧倍正曰倍犹背也三晋之忧也倍字疑信字讹衍】今魏耻未灭【言尝分魏之忧正曰见上文】赵患又起【患文信也】文信之忧大矣【文信为三晋之忧补曰文信之忧未详恐字有误】齐不从【不

与山东约从】三晋之言疑矣【疑从之不可合】忧大者不计而讲【元作御名下同】构【言赵必求和於秦不待计也正曰下文言秦魏无赵】心疑者事秦急秦魏之讲构不待割而成【凡讲必割地今急於成不待已割盖先讲也】秦从楚魏攻齐独吞赵【赵近秦秦攻之不待楚魏】齐赵必俱亡矣【此说欲赵以河间广文信封也下有一章合此】

魏使人因平原君请从於赵三言之赵王不听从出遇虞卿曰为入必语从【为为我】虞卿入王曰今者平原君为魏请从寡人不听其於子何如虞卿曰魏过矣王曰然故寡人不听虞卿曰王亦过矣王曰何也曰凡强弱之举事强受其利弱受其害今魏求从而王不听从是魏求害而王辞利也臣故曰魏过王亦过【虞卿传有彪谓虞卿之言为皆不倍道非反覆揣摩为人缓颊说也从之利害正尔虽微平原之托卿亦必云尔终之赵利魏亦利矣惟不能必赵听已从而先有轻发则是有受害之形也】

平原君谓冯忌【後称外臣知非赵人】曰吾欲北伐上党出兵攻燕何如冯忌对曰不可夫以秦将武安君公孙起【补曰即白起前有】乘七胜之威【胜赵】而与马服之子战於长平之下大败赵师因以其余兵围邯郸之城赵以亡败之余衆收破军之敝守【敝守守邯郸】而秦罢於邯郸之下赵守而不可拔然者【言所以然】攻难而守者易也【补曰姚本无然字者下有以字】今赵非有七克之威也而燕非有长平之祸也今七败之祸未复而欲以罢【罢音疲】赵攻强燕是使弱赵为强秦之所以攻而使强燕为弱赵之所以守而强秦以休兵【休息之兵】承赵之敝此乃强吴之所以亡而弱越之所以霸故臣未见燕之可攻也平原君曰善哉

平原君谓平阳君曰公子牟【魏公子即下魏牟若庄子所称中山者不与应侯同时正曰按庄子中山公子牟谓瞻子下云魏牟万乘之公子也是中山公子牟即魏牟非二人也又云公孙竜问於魏牟公孙竜阙平原君之门正应侯同时也史赧王四十九年范雎为相封应侯赧王之元年之喻死庄子书及称之吟则魏牟之上及庄子下及应侯无疑说范载此以为公子牟谓穰侯】游於秦且东而辞应侯【东归魏】应侯曰公子将行矣独无以教之乎曰且微君之命命之也臣故且有效於君夫贵不与富期而富至富不与粱肉期而粱肉至粱肉不与骄奢期而骄奢至骄奢不与死亡期而死亡至累世以前坐此者多矣应侯曰公子之所以教之者厚矣仆得闻此【仆平原自称】不忘於心愿君之亦勿忘也平阳君曰敬诺【彪谓此言真富贵之金石也有能书诸绅铭之几杖勒之盘盂则何亡国败家之有补曰魏牟自言身居江海心在魏阙庄子告以重生则利轻则曰虽知而未能自胜於是又得大重伤之说焉故庄子许其虽未至道可谓有其意其人可知矣所以告范雎者亦以富贵骄奢警之是时雎方擅秦权广身封快意恩仇沈於富贵公子特自其所急者言之其微旨固非雎所得闻也正曰此二章平原君皆当与平原君不受封诸章相次旧策所载是矣】说张相国【盖梁人相赵尝怀梁而鄙赵者正曰无考】曰君安能少赵人而令赵人多君【少多犹薄厚】君安能憎赵人而令赵人爱君乎夫胶漆至黏也【补曰黏一本作?女乙反问礼注?黏也】而不能合远鸿毛至轻也而不能自举夫飘於清风【举鸿毛以见胶漆】则横行四海故事有简而功成者因也今赵万乘之强国也前漳滏【後志?水在邺】右常山左河间北有代带甲百万尝抑强秦【元作齐此言苏秦从时也】齐四十余年而秦不得所欲【正曰此不可知为何时

考之史自慎靓王四年齐败魏赵观津军二十六武灵九年是後赵伐齐则有之惠文之世而不闻齐伐赵也所谓强齐当是指闵王苏秦约从摈秦不久而解赵虽强非秦敌不得所欲亦大言耳然与抑强齐之言不能无轻重矣】由是观之赵之於天下也不轻今君易万乘之强赵而慕思不可得之小梁【不可复得归也意者相国以罪亡梁欤正曰无考】臣窃为君不取也君曰善【君字误正曰相国称君】自是之後衆人广坐之中未尝不言赵人之长者也未尝不言赵俗之善者也

建信君贵於赵公子魏牟过赵赵王迎之顾反至坐【迎客面之有顾则反】前有尺帛且令工人以为冠工见客来也因避【补曰句】赵王曰公子乃驱後车幸以临寡人愿闻所以为天下魏牟曰王能重王之国若此尺帛则王之国大治矣赵王不说形於顔色曰先王【元作生补曰姚云生一作王】不知寡人不肖使奉社稷岂敢轻国若此魏牟曰王无怒请为王说之曰王有此尺帛何不令前郎中以为冠王曰郎中不知为冠【补曰郎中官不独秦】魏牟曰为冠而败之奚亏於王之国【亏犹损】而王必待工而後乃使之今为天下之工【所与治国之人】或非也社稷为虚戾【补曰虚戾见秦策】先王不血食而王不以予工乃与幼艾【赵岐曰艾美好】且王之先帝【帝王者人君之尊称此与称秦孝公为先王者同也】驾犀首【驾驂以御马喻也陈轸传言衍与燕赵之王有故盖衍虽相魏实赵任之为外相也】而驂马服以与秦角逐【角有鬪争意】秦当时避【元作适】适【补曰适恐当作避】其锋今王憧憧【往来不絶貌】乃犂建信以与强秦角逐臣恐秦折王之轡【元作椅】椅也【轡车旁也以犂喻故云补曰诗猗重较兮猗隐绮反注依也此椅虽不同然义亦当与轡通余见齐策王斗章正曰旧本卫灵公近雍疽弥子瑕章在此章之後下章之前今按二臣皆卫幸臣亦建信之类宜属上下章不应自为章也阙延以其章置之卫非是】

或谓建信君君【补正曰当有缺字或曰君下有曰字】之所以事王者色也□之所以事王者智也【□赵人名补曰字书解葺字盖葺仪礼注壻俗作□晋唐人书葺多作□前章盛气胥之一本揖之魏策□中一本葺亡一本晋云韩策葺夫一本□臣盖月耳字易混也】色老而衰智老而多以日多之智而逐衰恶之色君必困矣建信君曰柰何曰并骥而走者五里而罢【音疲】乘骥而御之不倦而取道多君令□乘独断之车【不与之分治】御独断之势以居邯鄲令之内治国事外刺诸侯【刺言探候其事】则□之事有不言者矣【所治者多不暇悉言於上】君因言王而重责之□之轴今折矣【不胜多事之任】建信君再拜命入言於王厚任□以事而【元作能】能【正曰能字句犹言为】重责之未期年而□亡走矣【彪谓奸人之不可知甚矣智知所无柰何彼厚任以事□以为不世之遇矣殫力竭虑恐不给焉而不知建信之困之也故国有奸人贤智之得全者寡矣】

苦成帝【未详】谓建信君曰天下公从【公犹同补曰一本公作合】而独以赵恶秦【言从者皆恶秦也而世独言赵】何也魏杀吕辽【元作遗从上文】遗【正曰上章作辽未知孰是】而天下交之【天下恶秦秦重辽魏杀辽而诸国交之然则秦恶魏深矣补曰交下当有缺字即上章卫兵之事】今收河间【不封文信正曰不韦欲攻赵以广河间赵欲收河间】於是与杀吕辽遗何以异【文信亦秦所重今不与也秦必恶赵】君唯饰【元作释】释虚【惧秦觉也】伪文信侯【虚与之河间】犹且知之也【如是秦犹知其不善已况收河

间乎正曰一本侯作疾亦难通疑侯字当在文信下穀乱上文从伪字句意明】从而有功乎何患不得收河间从而无功收河间何益也【正曰君唯释虚伪谓合从之国虚伪难信君独释而不合则文信侯犹且知之也上言天下合从独以赵恶秦故此言文信侯知赵之不合犹可以免攻也补曰从皆之恭反】

希写【赵人】见建信君建信君曰文信侯之於仆也甚无礼秦使人来仕仆官之丞相【使为丞相官属】爵五大夫【补曰秦武王二年初置丞相秦爵五大夫第九刘昭曰军吏也据此策则不特秦官赵亦有之战国改制通相效也】文信侯之於仆也甚矣其无礼也【言已待之厚彼不免无礼】希写曰臣以为今世用事者不如商贾建信君勃然曰足下卑用事者而高商贾乎曰不然夫良商不与人争买卖之贾而谨司时【司伺时】时贱而买虽贵已贱矣时贵而卖虽贱已贵矣昔者文王【衍之字】之拘於牖里而武王羈於王门【项羽纪成臯北门注王门此事不经见】卒斩纣之头而悬於太白者【旗名】是武王之功也今君不能与文信侯相抗以权而责文信侯少礼臣窃为君不取也

魏【音介元作魑字书无之】魑【补曰一本标或作魑楚辞九魑北斗星名记文行不正貌公介公鑄二反字亦不从犯】谓建信君曰人有置系蹄者【用绳以系兽蹄】而得虎虎怒决蹠而去【蹠兽足补曰蹠音烦】虎之情非不爱其蹠也然而不以环寸之蹠害七尺之躯者权也今有国非直七尺躯也而君之身於王非环寸之蹠也【言王且以爱国故去之】愿公之熟图之也

秦攻赵鼓铎之音闻於北堂希卑【赵人】曰夫秦之攻赵不宜急如此此召兵也【兵赵兵内应者盖以鼓铎为信】必有大臣欲衡者耳【衡即横】王欲知其人旦日赞羣臣而访之【赞者美其事以开说者】先言横者则其人也建信君果先言横【补曰魏牟谓赵王曰王之先帝驾犀首骖马服今王乃辇建信君则在孝成之时明矣建信始欲合从今先言横为国召兵罪不容诛然以嬖幸小人委国听之罪在王尔大事记谓孝成虽有上党将赵括之失犹能用颇牧以持国李伯之事犹能驾御豪杰愚观其时秦兵日至疆宇日蹙客所谓贼在内者切中其病未有内治而国不强者也】

齐人李伯见孝成王成王说之以为代郡守而居无几何人告之反孝成王方馈不堕食【馈馈同方食而祭不堕失匕筯异矣正曰大事记不惊故食不堕也愚谓堕祭食犹放下也见仪礼堕许规反】无几何告者复至孝成王不应已乃使使者【伯之使】言齐举兵击燕恐其以击燕为名而以兵袭赵故发兵自备今燕齐已合臣请要其敝【两国战必有一疲因以兵邀击之】而地可多割自是之後为孝成王从事於外者无自疑於中者

为齐献书赵【补曰姚本此下有使臣与复丑五字注云曾本无愚按其文未详恐他简脱误】曰臣一见而能令王坐而天下致名实【元作宝即下致地】宝而臣窃怪王之不试见臣而穷臣也【穷犹困也困於不得见】羣臣必多以臣为不能者故王重见臣也【重犹难】以臣为不能者非他欲用王之兵者也【非若非也】则交有所偏者也【言卖赵与诸国为私】非然则智不足者也非然则欲以天下之重恐王而取行者也【王畏惧之必行其说补

曰姚本云欲用王之兵成其私者也非然则交有所偏者也非然则知不足者也非然则欲以天下之重恐王而取行於王者也愚按此文为是】臣以齐循事王王能亡燕能亡韩魏能攻秦能孤秦臣以【衍为字】为齐致尊名於王天下孰敢不致尊名於王臣以齐致地於王天下孰敢不致地於王臣以齐为王求名於燕及韩魏孰敢辞之臣之能也其前可见已【言可见於未效之前】齐先重王故天下尽重王【衍重字】重【补曰姚本并无下王字】王无齐天下必尽轻王也秦之强以无齐【衍之字】之故重王燕韩【补】魏自以无齐故重王【赵得齐故四国无齐】今王无齐独安能无重天下【犹四国重赵】故劝王无齐者非智不足则不忠者也非然则欲用王之兵成其私者也非然则欲轻王以天下之重取行於王者也非然则位尊而能卑者也愿王之孰虑无齐之利害也【补曰能卑者才能卑下也此策时不可考】

赵使赵庄合从欲伐齐齐请効地赵因贱赵庄齐明为谓赵王曰齐畏从人之合也故効地今闻赵庄贱张勲贵【勲盖败从者】齐必不効地矣赵王曰善乃召赵庄而贵之【正曰按史年表武灵王十三年秦拔我藺虜将赵庄此策必未虜之前岂得为孝成王将哉】

翟章从梁来甚善赵王赵王三延之以相翟章辞不受田驷谓柱国韩向【柱国楚官盖赵亦有】曰臣请为卿刺之客若死【客谓章】则王必怒而诛建信君【疑其杀章欲以专事】建信君死则卿必为相矣建信君不死以为交终身不敝【以杀章故建信交之】卿因以德建信君矣

冯忌【补曰姚本忌作□】为庐陵君【孝成母弟见赵记补曰赵记未见】谓赵王曰王之逐庐陵君为燕也王曰吾所以重者无燕秦也【无如二国正曰言不畏之也】对曰秦三【昭】以虞卿为言而王不逐也【前事尔非今正曰一本秦三以以下文一以字推之当是王字误】今燕一以庐陵君为言而王逐之是王轻强秦而重弱燕也王曰吾非为燕也吾固将逐之然则王逐庐陵君又不为燕也行逐爱弟【行所行】又兼无燕秦臣窃为大王不取也

冯忌请见赵王行人见之冯忌接手【交两手】俛【元作免】免【补曰此书俛免通】首欲言而不敢王问其故对曰客有见人於服子者【未详】已而请其罪服子曰公之客独有三罪望我而笑是狎也谈话而不称师是倍也【倍言背其师】交浅而言深是乱也客曰不然夫望人而笑是和也言而不称师是庸说也【言之常者人所同称非必师】交浅而言深是忠也昔者尧见舜於草茅之中席陇亩【席设席】而廕庇桑【桑之能庇人者於下取荫】阴移而受天下传伊尹负鼎俎而干汤姓名未着而受三公【补曰伊尹负鼎俎干汤孟子集注所谓战国时有为此说者指此说苑尧舜相见不违桑阴亦此类姚氏云天下传刘去传字】使夫交浅者不可以深谈则天下不传而三公不得也【衍赵王曰三字】赵王曰【补曰一本此下有甚善冯忌曰五字姚本同】今外臣交浅而欲深谈可乎王曰请奉教於是冯忌乃谈【此忌初见之谈也应在平原谓冯忌之上然亦得为此史本其初言之故因旧】

客见赵王曰臣闻王之使人买马也有之乎王曰有之何故至今不遣王曰未得买马之工也【补曰一本相马】对曰王何不遣建信君乎王曰建信君有国事又不知相马曰王何不遣

纪姬乎王曰纪姬妇人也不知相马对曰买马而善何补於国王曰无补於国买马而恶何危於国王曰无危於国对曰然则买马善而若恶皆无危补於国然而王之买马也必将待工今将【补曰姚本作治】天下举错非也【错置也有举有置】国家为虚戾而社稷不血食然而王不待工而与建信君何也赵王未之应也客曰燕郭之法有所谓桑雍【雍痛同桑中有蠹则外碨碨如人之痛正曰桑中有蠹以膏液流於外如痛溃然姚云曾刘并作柔雍下同补曰一本标刘本作郭偃之法晋掌卜太夫郭偃乃卜偃也】王知之乎王曰未之闻也所谓桑雍者便辟左右之人及夫人优爱孺子也【优饶也言爱之甚一曰倡补曰一本便辟左右之近者孺子见秦齐策】此皆能乘王之醉昏而求所欲於王者也是能得之於内则大臣为之枉法於外矣故日月暉於外其贼在於内【说林训月照天下食於蟾蠩补曰朱子云晦朔而日月之合东西同度南北同道则月揜日而日食望而日月之对同度同道则月亢日而月食又谓蟾兔桂树之说其惑久矣然策正以此为喻姚注云东坡本日月雕暉於内】谨备其所憎而祸在於所爱【彪谓王斗魏牟及此三士其言若出一口所谓理义人心之所同然者与至於此章肆直而慈惠尤可喜可爱有国有家者宜寘之座右】

悼襄王【孝成子元年补曰名偃始皇三年丁巳】

秦召春平侯【及平都皆赵人正曰徐广引年表云太子从质秦归正义云太子即春平君也】因留之泄【元作世】世【补曰史作泄】钧【秦人】为之谓文信侯曰春平侯者赵王之所甚爱也而郎中甚妬之故相与谋曰春平侯入秦秦必留之故谋而入之秦今君留之是空絶赵而郎中之计中也故君不如遣春平侯而留平都侯春平侯者言行於赵王必厚割赵以事君而赎平都侯文信侯曰善因与接意而遣之【赵记二年有】

幽王【悼襄子元年补曰名迁史作幽缪王始皇十二年丙寅】

文信侯出走【始皇十年免相就国十二年徙蜀饮酖死】与司空马【不韦吏也】之赵【补曰与字疑衍】赵以为守相【守假官也马为之】秦下甲而攻赵司空马说赵王曰文信侯相秦臣事之为尚书【秦官属少府】习秦事今大王使守小官习赵事请为大王设秦赵之战【设者无其事施陈为之】而亲观其孰胜赵孰与秦大曰不如民孰与之衆曰不如金钱粟孰与之富曰弗如国孰与之治曰不如相孰与之贤曰不如将孰与之武曰不如律令孰与之明曰不如司空马曰然则大王之国百举而无及秦者大王之国亡赵王曰卿不远赵而惠教以国事愿於因计【因非正为之犹秦王谓陈轸以其余为寡人计也正曰高注因犹受也】司空马曰大王裂赵之半以赂秦秦不接刃而得赵之半秦必说内恶赵之守【秦虽说於得地赵犹有守之者秦所患也】外恐诸侯之救秦必受之【患於有守有救则其受之不得不急】秦受地而却【元作郤】郤【补曰此书郤通姚本作?同】兵赵守半国以自存秦衔赂以自强山东必恐亡赵自危【赵亡则五国有唇亡之忧】诸侯必惧惧而相救则从事有成臣请为大王约从从事成则是大王名亡赵之半实得山东以敌秦秦不足亡赵王曰前日秦下甲攻赵赵赂之以河间十二县地削兵弱卒不免秦患今又割赵之半以强秦力不能自存因以亡矣愿卿更计【更犹易补曰王之言是马之计非更如字可】司空马曰臣少为秦刀笔【谓为尚书也笔以书札刀削其不当者】以官长而守小吏【其官之长任之为吏

补曰姚本作小官】未尝为兵【为犹治也马谦言】臣【元作百】百【补曰姚本作首当
属上文】请为大王悉赵兵以遇【与秦接战】赵王不能将【不用马为将】司空马曰臣
効愚计大王不用是臣无以事大王愿自请【犹乞骸骨】司空马去赵渡平原平原津令【
列女传有赵津吏盖此官也】郭遗劳而问秦兵下赵上客从赵来赵事何如司空马言其为
赵王计而不【元作勿】勿【补曰一本作弗胜】用赵必亡平原令曰以上客料之赵何时
亡司空马曰赵将武安君【李牧】期年而亡若杀武安君不过半年赵王之臣有韩仓者以
曲合於赵王【曲不正也】其交甚亲其为人疾贤妬功臣今国危亡王必用其言武安君必
死韩仓果恶之【恶牧】王令人代【使赵葱颜聚代收】武安君至使韩仓数之【数列其
罪】曰将军战胜王觞将军将军为寿於前【上赵王寿】而扞匕首【刃名盖其首如匕汉
盐铁论荆轲怀数年之谋而事不就者尺八匕首不足恃也扞卫也诬其以匕首自卫如欲刺
王然补曰姚本注扞刘一作捍按李善注文选引此说文捍两手击也希买反匕短劔也补履
反扞扞卫匕首也】当死武安君曰緇【牧名补曰此因高注緇子沾反说文结也】病钩【
短偃如钩正曰病钩即所谓臂短也】身大臂短不能及地起居不敬【起居问王起居也不
及地为不敬】恐惧死罪於前【不敬者其罪死故以死惧】故使工人为木材以接手上若
不信緇请以出示出之袖中以示韩仓状如振梱【梱就也盖为木接手可以就地因以举身
也集韵梱门櫪也又?拊也与櫪同音袞犁轅也疑此木类此故名正曰一本作梱集韵以因为
?今鲍本作梱而说乃作梱恐刊本误梱乃木名鲍先据梱字以就地因举身为说迂曲又以为
梱苦本反门櫪也此字颇近而通既又引相挥为言则汨矣挥呼归反梱自为胡本反也盖牧
右臂短故为木材接之如振动梱櫪也匕首挟以刺人牧为寿王前不敢出其振动有若扞匕
首故以挟匕首罪姚云梱曾本作櫪】纏之以布愿公入明之韩仓曰受命於王赐将军死不
赦臣不敢言武安君北面再拜赐死【拜赐死之命】缩劔将自诛【缩当作缩集韵引也抽
也】乃曰人臣不得自杀宫中过【元作遇补曰姚氏云刘作过】司【衍空字】空【补曰
字衍】马门【宫门】趋甚疾【此言牧之知礼也而史言牧不受命捕得斩之不知迁舍此
何所闻而云乎补曰大事记牧之恭如此传乃谓牧不受命赵使人微捕得斩之非也使不受
命韩仓安得不数之岂非因廉颇不受代事而误载乎愚按下章始明】出諺【元作?】?【
补曰未详姚本作諺】门也【諺别也】右举劔将自诛臂短不能及衔劔徵之於柱以自刺
【徵犹验也口衔劔不自知其可死即柱以为验也正曰衔劔於口因柱以自刺验其手之不
能及也】武安君死五月赵亡【此七年诛牧八年邯鄲为秦补曰终上文之日】平原令见
诸公必为之言【补曰一本言之】曰嗟嗟乎【嗟亦嗟也】司空马又以谓【元作为】为
司空马逐於秦非不智也去赵非不肖也赵去司空马而亡国国亡者【补曰一本而国亡】
非无贤人不能用也【元在秦策彪谓从横之说皆有所偏而从人欲合六弱以攻一强其势
若可为也患诸侯之不一耳使诸侯而明於事变不惑小利不修小怨并力合虑而西虽不可
以大有为其於蹙秦有余惜乎当时不知此也自苏秦死从终不坚秦兵四出诸侯挫於走北
其气夺矣司空马欲以此时割赵之半说秦而反其兵因以复合天下之从岂不谬哉夫以全
赵犹惴惴不自保安能守半赵以自存乎秦有并吞天下之心虽得半赵不尽不止而何以说
之诸侯势去自春申不能从以难秦司空马独能之乎故赵幽之亡罪在用韩仓而杀李牧无
与司空马平原令非笃论也补曰秦策秦王资顿弱以金北游燕赵而杀李牧史称秦多与赵
王宠臣郭开金为反间而杀牧而廉颇传称颇之仇郭开与使者金使毁颇以张释之传云赵
用李败几霸会赵王迁立其母倡也迁用郭开谗卒诛李牧列女传云赵悼后者邯鄲倡女前

嫁乱一宗族既寡悼襄王以其美而娶之李牧諫云云不听後生子迁立为幽闵王后通於春平君多受秦赂而使王诛其良将李牧赵亡後大夫怨倡后之譖太子喜杀李牧乃杀倡后灭其家诸说皆可互考但史因廉颇不受代事而误以为牧恐郭开韩仓亦有差互耳
三请为其为必为之为去声】

秦使王翦攻赵赵使李牧司马尚御【元作御】御【补曰御通诗亦以御冬】之李牧数破走秦军杀秦将桓齮王翦患之乃多与赵王宠臣郭开等金使为反间曰李牧司马尚欲与秦反赵以多取封於秦赵王疑之使赵葱及顔最【史作聚补曰一本葱作思注一作恩】代将斩李牧废司马尚後五【元作三】三【补曰据司空马云云则当作五】月王翦因急击大破赵杀赵军【补曰史作赵葱】虏赵王迁及其将顔最遂灭赵【牧传有补曰齮音蚁】

战国策校注卷六

卷七

<史部,杂史类,战国策校注>

钦定四库全书

战国策校注卷七 宋 鲍彪 原注

元 吴师道补正

魏【自高陵以陈尽河东河南南有陈留及汝南之名陵?强新汲西华长平颍川之舞阳鄆许鄢陵河南之开封中牟阳武酸枣卷】

桓子

智伯索地於魏桓子魏桓子弗予任章【魏人】曰何故弗予桓子曰无故索地故弗予任章曰无故索地邻国必恐重欲无厌【重犹多】天下必惧君与之地智伯必骄【元作僇】彼僇而轻敌邻国惧而相亲以相亲之兵待轻敌之国智氏之命不长矣周书曰将欲败之必姑归之将欲取之必姑与之【补曰王应麟曰周书云云此岂苏秦所读周书陰符者欤老氏之言出於此朱子曰老子为柱下史故见此书】君不如与之以骄智伯君何释以天下图智氏【释犹舍也何舍此而不为】而独以吾国为智氏资【元作质】质【正曰当音致】乎【舍此不图适足为智氏来伐之资正曰与之以地犹质也】君曰善乃与之万家之邑一智伯大说因索蔡皋狼【元作梁】梁【补曰赵策作狼】於赵赵弗与因围晋阳韩魏反於外赵氏应之於内智氏遂亡

文侯【桓子之孙补曰名斯元年威烈王二年丁巳】

韩赵相难韩索兵於魏曰愿得借师以伐赵魏文侯曰寡人与赵兄弟不敢从赵又索兵以攻韩文侯曰寡人与韩兄弟不敢从二国不得兵怒而反已乃知文侯已讲【补曰一本以讲】於已也【二国不伐知魏和之】皆朝魏

乐羊为魏将而攻中山其子在中山中山之君烹其子而遗之羹乐羊坐於幕下而啜之【啜饮也】尽一杯文侯谓覲斯赞【魏人补曰姚云後语作堵师愚按左传褚师段宋共公子石食采於褚其後可师号褚师後因氏焉又有堵师比堵亦姓也郑有堵汝父但此作堵师则恐字有讹】曰乐羊以我之故食其子之肉赞对曰其子之肉尚食之其谁不食乐羊既拔中山文侯赏其功而疑其心【彪谓乐羊所谓隐忍以成就功名者也子则既烹矣敌人遗之羹将以乱其心也有如不忍而以慈爱沮其杀敌之心则大事去矣何救於亡子故羊忍为此以怒衆而成功乃其情则非怱然无以天性为者也覲斯赞之言其谤书之渠乎虽然羊之义视分羹为有余比覆醢为不足使其投盃慷慨一鼓而摅家国之愤亦收功必矣介胄之士未可望

之以圣人之地也正曰舜窃负而逃林回弃千金之璧轻重之分审矣岂肯以彼易此哉刘子政以此事与西巴放麋并载而曰巧诈不如拙诚真名言也鲍虽为之曲说万端奚□哉项羽坐太公俎上高祖杯羹一语貽愧千古亦幸而不杀尔不然何以自立於天下乎】

西门豹为邺令【邺属魏郡】而辞乎魏文侯文侯曰子往矣【补曰一本子往子往矣】必就子之功而成子之名西门豹曰敢问就功成名亦有术乎文侯曰有之矣【补曰一本有之夫夫属下句】乡邑老者而先受坐之士【老者坐先於衆】子入而问其贤良之士而师事之求其好掩人之美而扬人之丑者而参验之夫物多相类而非也幽莠之幼也似禾【莠禾下生草幽言其色茂正曰说文本云禾粟下傍生草莠今狗尾也】黧【元色骊】骊牛之黄也似虎【黧黑黄色也骊乃深黑马耳正曰骊牛犹言犁牛狸牛不必拘以色论黧亦黑色也尔雅仓庚黧黄盖言仓庚色黧黑而黄增韵注黧黑而黄误也】白骨疑象武夫类玉【武夫石似玉补曰武夫即砮砮】此皆似之而非者也【补曰夫子曰不如乡人之善者好之其不善者恶之文侯之言亦此类而曰求其好掩人之美而扬人之丑者参验之则其好贤也不诚而且将以来谗贼之徒意则异矣】

文侯与虞人期猎【虞人掌山泽之官正曰孟子注守苑囿之吏鲍误以书注官言之】是日饮酒乐天雨文侯将出左右曰今日饮酒乐天又雨公将焉之文侯曰吾与虞人期猎虽乐岂可不一会期哉【皆与之期今往会之】乃往身自罢之魏於是乎始强

魏文侯与田子方饮酒而称乐【音岳】文侯曰钟声不比乎【比犹协补曰比音毗不毗言不和也】左高【言左方之声高】田子方笑文侯曰奚笑子方曰臣闻之君明则乐官【音洛以治官为乐正曰通监无两则字乐仍音岳下文二语甚明可推愚恐则乃明字讹衍】不明则乐音今君审於声【审言听之察】臣恐君之聋於官也文侯曰善敬闻命【彪谓周衰世主无如魏文侯之贤者夫其师友渊源有子方子夏之徒诲诱规切之虽欲无贤可得乎然则用真儒无敌於天下信矣补曰大事记史以田子方为文侯师说苑载翟璜谓子方曰公孙成进子夏而君师之进段干木而君友之进先生而君敬之盖得其实故书曰晋魏斯好贤师卜商友段干木敬田子方】

武侯【文侯子补曰名擘元年安王十六年乙未】

魏武侯与诸大夫浮於西河【补曰正义云西河即龙门河也】称曰河山之险不亦信固哉王锺【补曰姚云锺一作错】侍坐【元作王】王曰此晋国之所以强也若善修之则霸王之业具矣吴起对曰吾君之言危国之道也而子又附之是重危也武侯忿然曰子之言有说乎吴起对曰河山之险信不足保也是霸王之业不从此也昔者三苗之居左有【补正曰姚云下句一本无有字是按史及下文可见】彭蠡之波【彭蠡湖在豫章彭泽】右有洞庭之水汶【元作文】文【补曰文未详史以岷作汶此或远言之】山在其北而衡山在其南【衡南岳在长沙湘南】恃此险也为政不善而禹放逐之夫【衍夫字】夏桀之国左天门之陰【後志高都有天井关注云战国策桀居天门即此关也】而右天谿之阳【今按天门即史太华伊阙彼言右故此言左之陰天谿即河济彼言左故此言右之阳正曰按史左河济右

泰即太华伊阙在其南羊肠在其北文不同】卢辜在其北【地缺补曰一本卢作庠未详】伊洛出其南【孔曰伊水出陆浑洛水之上洛正曰伊水出今商州上洛县南熊耳山至洛阳县入洛洛水出今商州洛南县冢领山至巩县入河】有此险也然为政不善而汤伐之殷纣之国左孟门【太公世家注晋山险补曰索隐云在朝歌东北】而右漳【元作釜】釜【补曰通借】前带河後被山有此险也然为政不善而武王伐之且君亲从臣而胜降城城非不高【补曰姚云刘本此添也字】人民非不衆也然而可得并者政恶故也从是观之地形险阻奚足以霸王矣武侯曰善吾乃今日闻圣人之言也西河之政专委之子矣【起传有小异补曰起传与说苑文同末云由此观之在德不在险君若不修德舟中之人尽为敌国也史迁曰吴起说武侯以形势不如德然行之於楚以刻暴少恩亡其軀扬雄曰美哉言乎使起之用兵每若斯则太公何以加诸二子论之当矣然其言不可以人废也西河龙门之河地即同华等州魏之险阨也一传惠王其地日削於秦至纳上郡之时尽矣险岂足恃也哉起之言於是乎验矣】

惠王【武侯子补曰名罃元年烈王六年辛亥】

魏公叔痤为魏将而与韩赵战浹北【说文浹水出霍山西南入汾此二年败韩马陵败赵于怀补曰痤祖戈反】禽乐祚【赵将】魏王说郊迎以赏田百万禄之【闲田以待赏有功者】公叔痤反走再拜辞曰夫使士卒不崩直而不倚【直直前倚邪行】栋桡而不避者【挠折也喻敌之压已】此吴起余教也臣不能为也前脉地形之险阻【脉见其幽形见其顯】决利害之备使三军之士不迷惑者巴寧饗襄之力也【二人乃所谓能士】县赏罚於前使民昭然信之於後者王之明法也见敌之可击鼓之不敢怠倦者臣也王特为臣之右手不倦赏臣可也若以臣为有功臣何功之有乎王曰善於是索吴起之後赐之田二十万巴寧?襄田各十万王曰公叔岂非长者哉既为寡人胜强敌矣又不遗贤者之後不掩能士之迹公叔何可无益乎故又与田四十万加之百万之上使百四十万故老子曰圣人无积尽以为人已愈有既以与人【既亦尽也】已愈多公叔当之矣【彪谓公叔此言何其似魏绛也方之郤至骤称其伐彼已隘矣补曰按史田文既死公叔为相而害吴起以计疑起於武侯起惧得罪而去之楚公叔即痤也浹北之战痤乃归功於起之余教而使其嗣受赏何其前後之戾耶大事记顯王七年魏公孙痤败韩师赵师于浹秦庶长国伐浹获其将公孙痤谓史记秦本纪及魏世家云虜公孙痤惟赵世家秦魏年表云虜太子痤孟子梁惠王长子死焉盖太子申战没於齐者也凡史记是年言秦虜太子痤者非】

魏公叔痤病惠王往问之曰公叔病即不可讳【死者人之所不能避故云】将奈社稷何公叔痤对曰痤有御庶子【此公族官别於国官及太子官正曰公叔曰痤有御庶子知为痤之家臣如甘罗为文信侯少庶子之比说又见秦韩等策】公孙鞅愿王以国事听之也若弗能听勿使出境王弗应出而谓左右曰岂不悲哉以公孙之贤而谓寡人必以国事听鞅不亦悖乎【补曰史载鞅之言曰彼不能用君之言任臣人安能用君之言杀臣乎由是观之公叔知鞅而不能进将死之言上不能量其君之听否下不能测鞅之去就非悖而何】公叔痤死公孙鞅闻之已葬【补曰大事记顯王八年公孙痤卒解题痤去年为秦所获寻归之而终於相位也今年卫鞅自魏适秦则痤死必在今年】西之秦孝公受而用之秦果日以强魏日以削

此非公叔之悖也惠王之悖也惠王之愚固以不悖者为悖【商君传略同】

秦【衍韩字】韩围梁【秦献公二十三年战少梁此九年正曰按鲍说以为魏败韩赵于浚之年少梁即获公叔痤之战不闻燕赵之救也时方败赵赵岂得救之此皆无据之言且策云围梁不云少梁围梁必惠王徙都大梁後不可考矣徙都大梁在惠王三十一年】燕赵救之谓山阳君【楚宣策言此人王同时也】曰秦战而胜三国秦必过周韩而有梁三国而胜秦三国之力虽不足以攻秦足以拔郑【新郑郑近梁故云正曰韩哀侯二年已灭郑此郑即谓韩】计者【为梁计】不如构三国攻秦【元仕赵策正曰证据不明且当从旧】

龐葱与太子质於邯鄲【魏太子】谓魏王曰今一人言市有虎王信之乎王曰否二人言市有虎王信之乎王曰寡人疑之矣三人言市有虎王信之乎王曰寡人信之矣庞葱曰夫市之无危明矣然而三人言而成虎今邯鄲去大梁也远於市而议臣者过於三人矣愿王察之也【元作矣】矣王曰寡人自为知【言不信人】於是辞行而谗言先至後太子罢质果不得见【史不书太子质事以下章年时因旧次之於此正曰此策言邯鄲去大梁也远则徙都大梁以後事惠王三十一年秦虜公子卬後徙梁而韩宋鲁卫之朝乃惠王十五年也旧次恐不如此】

梁主魏嬰【史作罍音相近】觴诸侯於范台【此十五年鲁卫宋郑君来朝补曰大事记书韩宋鲁卫为序解题云是时魏惠王方强诸侯相率而朝之也索隐按纪年鲁恭侯宋桓侯卫成侯郑厘侯桓侯即公剔成厘侯即昭侯】酒酣请鲁君举觴【鲁共公补曰李善注文选引北堂书钞皆作举觴大事记鲁君举觴古者於旅也语於是道古即晋所谓杜举也】鲁君兴避席择言【择善而言】曰昔者帝女【盖尧舜女正曰无考】令仪狄【博物志言禹时人】作酒而美进之禹禹饮而甘之遂疏仪狄絕旨酒曰後世必有以酒亡其国者齐桓公夜半不寐【噉口有所銜也言不善食补曰兼苦箴反高注快也则当苦劫反】易牙【太公世家注雍巫字补曰知味者】乃煎熬【元作敖】敖【补曰熬古字通】燔炙【燔火熟物补曰有汁而乾曰煎乾煎曰熬肉熟之曰燔近火曰炙】和调五味而进之桓公食之而饱至旦不觉【饱而寢安补曰觉居效反】曰後世必有以味亡其国者晋文公得南之威【未详】三日不听朝遂推南之威而远之曰後世必有以色亡其国者楚王登强台而望崩山左江而右湖以临彷徨【自上视下曰临集韵彷徨仿佯仿佯徙倚也补曰姚云强台一作荆台崩山一作崇山艺文类聚引彷徨一作方惶亦艺文类聚引也】其乐忘死【补曰说苑云楚昭王欲之荆台司马子綦进谏曰荆台之游左洞庭之波右彭蠡之水南望猎山下临方淮其地使人遗老而忘死王不可游也後汉边让游章华台赋云楚王游云梦之泽息於荆台之上前方淮之水左洞庭之波右顾彭蠡之隩南眺巫山之阿延目广坐骋观终日顾谓左史倚相曰盛哉斯乐可以遗老而忘死也荆台即章华也淮南子云令尹子佩请饮庄王庄王许诺云云庄王曰吾闻子乐於强台强台者南望料山以临方皇左江而右淮其乐忘死若吾薄陋之人不可以当此乐也注料山名方皇水名右三说聊记以广闻】遂盟强台而弗登曰後世必有以高台陂池【书注泽障曰陂停水曰池】亡其国者【盖庄王云】今主君之尊仪狄之酒也主君之味易牙之调也左白台而右閭须【皆美人】南威之美也【补曰閭须见荀子】前夹林而後兰台强台之乐也【台林地缺名在其国】有一於此足以亡其国今主君兼此四者

可无戒与梁王称善相属【彪谓鲁司公之後也其教泽存焉故齐仲孙湫曰犹秉周礼韩起亦云周礼尽在鲁矣仲尼氏作缙绅先生萃焉於是特为中国礼义之邦观鲁君之所称说则周孔之泽深矣举觴一时而为天下万世之明戒鲁君岂非贤君哉补曰观鲁至深矣二语大事记取】魏惠王起境内衆将太子申而攻齐客谓公子理【申弟也正曰注以下说推之无明徵】之傳曰何不令公子泣王太后止太子之行事成则树德不成则为王矣太子年少不习於兵田盼宿将也而孙子【臆也】善用兵战必不胜不胜必禽公子争之於王王听公子公子必封不听公子太子必败败公子必立立必为王也【彪谓止太子之行正谊也而志於树德为王则譎矣故夫譎正之间不容髮人议论岂不或出於正言未卒而譎随之惟其心之不正故也】

魏太子自将过宋外黄【补曰高注太子申也外黄今陈留外黄故宋城也後徙睢阳】外黄徐子【刘向别録徐子外黄人】曰臣有百战百胜之术太子能听臣乎太子曰愿闻之客曰固愿效之今太子自将攻齐大胜并莒则富不过有魏而贵不益为王【为王之外无加也】若战不胜则万世无魏此臣之百战百胜之术也太子曰诺请必从公之言而遂客曰太子虽欲还不得矣彼利太子之战攻而欲满其意者衆【希赏也】太子虽欲还恐不得矣太子上车请还其御曰将出而还与北同不如遂行遂行与齐人战而死卒不得魏【元在宋策魏记三十年有彪谓此申生伐臯落之例晋国之覆轍也里克之諫惠王非忘之而忍为之故孟子以为不仁补曰以过宋而徐子言之从旧可】

齐魏战於马陵齐大胜魏杀太子申覆十万之军魏王召惠施而告之曰夫齐寡人之讐也怨之至死不忘国虽小吾常欲悉起兵而攻之何如对曰不可臣闻之王者得度【法度】而霸者知计今王所以告臣者疏於度而远於计王固先属怨於赵【记三十年伐赵赵告急於齐齐救赵伐魏正曰按魏伐赵赵告急於齐齐救赵伐魏乃惠王十八年败於桂陵时事此三十年魏龐?伐韩齐田忌孙臆伐魏以救韩魏大发兵使太子申将与龐?合军拒之战于马陵魏师大败杀太子申庞?魏庞?以下并大事记文从孙臆传说又见秦齐策】而後与齐战今战不胜国无守战之备王又欲悉起而攻齐此非臣之所谓也【谓谓得度知计】王若欲报齐乎则不如因变服【不為人君服】折节而朝齐楚王必怒矣【威王】王游人而合其鬪【游谓使人游二国之间也】则楚必伐齐以休楚而伐罢齐【罢音疲】则必为楚禽矣是王以楚毁齐也魏王曰善乃使人报於齐愿臣畜而朝【畜自比犬马也】田嬰许诺张丑曰不可战不胜魏【此设辞也】而得朝礼与魏和而下楚此可以大胜也【胜谓不败耳非战胜】今战胜魏覆十万之军而禽太子申臣万乘之魏而甲秦楚【居二国之上补曰姚本甲作半】此其暴戾定矣【言二国谓齐暴戾决矣正曰定止也谓齐之怒止】且楚王之为人也好用兵而甚务名终为齐患者必楚也田嬰不听遂内魏王而与之并朝齐侯再三赵氏丑之楚王怒自将而伐齐赵应之大败齐於徐州【彪谓施之策齐楚如视白黑数一二可谓明矣而不能止太子之将何邪岂言之而不听邪以施之智其於策马陵之战不劳虑矣张丑者亦施之伦欤】

惠施为齐【元作韩】韩魏交【为犹合】令太子鸣【魏记唯申及赫名余不名】为质於齐王欲见之【魏王】朱仓【魏人】谓王曰何不称病臣请说婴子曰魏王之年长矣今有

疾公不如归太子以德之不然公子高在楚楚将内而立之是齐抱空质而行不义也

襄王【惠王子补曰名赫元年显王三十五年丁亥正曰大事记周?王三十五年魏惠後元年
解题云史记魏世家惠王卒子襄王立襄王十六年卒子哀王立按通监考异汲冢纪年惠王
三十六年改元从一年始至十六年称惠成王卒即惠王也疑史记误兮惠成之世以为二王
之年也哀王特不称諡谓之今王世本惠王至襄王而无哀王今王者襄王也今从之愚按秦
惠之十四年亦改後元年即惠王之比而襄之为哀直以字近而讹尔】

魏惠王死葬有日矣天大雨雪至於牛目【驾车用牛故以及其目为深候】坏城郭且为棧
道而葬羣臣多諫太子者曰雪甚如此而丧行民必甚病之官费又恐不给请弛期【弛解也
昔约今解】更曰太子曰为人子而以民劳与官费用之故而不行先王之丧不义也子勿复
言羣臣皆不敢言而以告犀首犀首曰吾未有以言之也【未得其说以说】是其唯惠公乎
【施也】请告惠公惠公曰诺驾而见太子曰葬有日矣太子曰然惠公曰昔王季历葬於楚
山之尾纁水啗其墓【纁谓流也补曰姚云後语作蛮水注引荆楚记宜都乌水按季历卒葬
鄠县之南皇甫谧云楚山一云湔山鄠之南山虽有楚山之名不宜得蛮水所齧纁音鸾说文
云漏流也一曰溃也墓为漏流所溃故云吕氏春秋作葬於涡水之尾後云天故使明水见之
初学记引一作涡山论衡作滑山】见棺之前和【和棺两头木补曰玉篇□胡戈户卧二反
广韵作 皆云棺头也此作和盖音通】文王曰嘻先君必欲一见羣臣百姓也夫故使纁水
见之於是出而为之张朝【张幕帟如朝廷然正曰姚云张於朝注後语张张以朝按周礼掌
次以待张事】百姓皆见之三日而後更葬此文王之义也今葬有日矣而雪甚及牛目难以
行太子为及日之故得毋嫌於欲亟葬乎愿太子更曰先王必欲少留而扶社稷安黔首也【
秦称民黔首非此时语也正曰礼祭义亦有黔首字非始於秦】故使雪甚因弛期而更为日
【为犹撰正曰下文有】此文王之义也若此而弗为意者羞法文王乎太子曰甚善敬弛期
更择日惠子非徒行其说也又令太子未葬其先王而又因说文王之义说文王之义以示天
下岂小功也哉【补曰雨去声为之为及之为去声张之反】

徐州之役【楚败齐也齐宣十年此二年正曰惠王後二年补曰徐州见齐策】犀首谓梁王
曰何不阳与齐而陰结於楚二国恃王【衍齐字】齐【补曰一本於此下有楚字】必战齐
战胜楚而与乘之【与齐乘楚】必取方城之外楚战胜齐【衍败字】败【补曰姚云一本
无此字正曰即楚败齐将申缚泗上之役见秦策】而与乘之是太子之讐报矣【太子申】

苏子为赵合从说魏王曰大王之地南有鸿沟【项羽记注详在荥阳补曰苏子秦也下南有
字恐衍】陈汝【汝水出弘农入淮补曰陈宛丘豫州界汝恐连下南字汝南郡也而下衍有
字】南有许鄢昆阳邵陵舞阳【鄢下并属颍川正曰鄢史作鄢索隐云颍川有许鄢二县又
有鄢陵县故所称多惑昆水出南阳昆阳舞阳属颍川邵陵属汝南】新鄢【属南阳正曰索
隐云属汝南郡即鄢丘七思反又音妻史有新都字新都属南阳鲍误入】东有淮颍【水出
颍川阳城补曰淮见前】沂【水出泰山盖县】黄【即陈留外黄正曰黄说见秦策大事记
如鲍说】煮枣无疎【补曰姚本煮枣下有海盐字徐广云煮枣在济陰宛句正义云冀州信
都县东北有煮枣田宛句者在河南信都者在河北无疎姚注曾作无胥史司按苏代曰决宿

胥之口魏无虚顿丘徐广云纪年魏救山寨集胥口正义云魏志武帝於清淇口东因宿胥故渚开白沟道清淇二水入焉】西有长城之界【荥阳卷县有长城经阳武到密补曰大事记今开封阳武县魏惠王十五年魏龙贾帅师筑长城於西边长城即上所指又十九年魏筑长城塞固阳正义云自郑滨洛北定银州至胜州固阳县为塞固阳有连山东西黄河西南至夏涇等州按苏秦说合从在惠主後二年後七年纳上郡地则此时固阳之长城犹魏地也】北有河外卷衍燕酸枣【补曰正义云河外谓河南地卷丘权反在郑州原武县北衍燕酸枣见秦策史无燕字按张仪说魏亦云秦下兵攻河外拔卷衍燕酸枣正义谓河外即其地也】地方千里名虽小然而庐田庑舍【庐田间屋庑廊下周屋】曾无所刍牧牛马之地【居人多故】人民之衆车马之多日夜行不休已无以异於三军之衆【行人多故如军阵】臣窃料之大王之国不下於楚然横人誅【元作谋史作怵】谋【正曰怵音黜恐也誅音恤诱也策字通见前然作谋自可谓横人为王谋】王外交强虎狼之秦以侵天下卒有国患【国谓魏】不被其祸【谓横人】夫挟强秦之势以内劫其主罪无过此者且魏天下之强国也大王天下之贤主也今乃有意西面而事秦称东藩筑帝宫【为秦筑宫备其巡幸】受冠带【受服於秦】祠春秋【助秦祭祀】臣窃为大王愧之臣闻越王勾践以散卒三千【散则非梟勇】禽夫差於干遂【补曰干遂见秦策】武王卒三千人革车三百乘斩紂於牧之野岂其士卒衆哉诚能振其威也今窃闻大王之卒武力二十余万苍头二十万【盖以青帕首项纪注士卒皂巾补曰史记注魏氏武卒衣三属之甲操十二石之弩负矢五十置戈其上冠胄带剑羸三日之粮日中而趋百里大事记荀卿所谓魏之武卒也】奋击二十万厮徒十万【补曰正义云厮徒谓烹炊供养杂役厮音斯】车六百乘骑五千疋此其过越王勾践武王远矣今乃刼於羣臣之说而欲臣事秦夫事秦必割地效质故兵未用而国已亏矣凡羣臣之言事秦者皆奸臣非忠臣也夫为人臣割其主之地以外交偷取一旦之功【偷苟且也】而不顾其後破公家而成私门外挟强秦之势以内劫其主以求割地愿大王之熟察之也周书曰绵绵不絶【绵薄弱也正曰诗绵绵瓜瓞传不絶貌】蔓蔓【元作蔓】蔓蔓若何【蔓延也若蔓则无文之称耳若何言不可奈何正曰蔓蔓字通借】毫毛不拔【喻树之萌】将成斧柯【柯斧柄补白家语孔子观周庙金人之铭曰焰焰不灭炎炎若何?涓不壅终为江河绵绵不絶或成网罗毫末不札将寻斧柯云云策谓周书其指此欵】前虑不定後有大患将奈之何大王诚能听臣六国从亲专心并力则必无强秦之患故敝邑赵王【肃侯】使使臣献愚计奉明约在大王诏之魏王曰寡人不肖未尝得闻明教今主君以赵王之诏诏之敬以国从【秦传有】

张仪欲并相秦魏【仪相魏在此十三年正曰秦惠後三年魏惠後十三年】故谓魏王曰仪请以秦攻三川王以其间约南阳【约谓使韩以此与魏】韩氏亡史厌【韩氏之亡史名厌】谓赵献【与厌俱在楚正曰无考】曰公何不以楚佐仪求相之於魏韩恐亡必南走楚【补曰走音奏】仪兼相秦魏则公亦必并相楚韩也【仪因献得相必德献楚得韩仪必缓攻韩亦德献也】魏王将相张仪犀首弗利【补曰大事记魏惠王後十三年张仪相魏魏不事秦以公孙衍代相】故令人谓韩公叔曰张仪已合秦魏矣其言曰魏攻南阳秦攻三川韩氏必亡且魏王所以贵张子者欲得地也则韩之南阳举矣子盍少委焉【请以事委衍】以为衍功【有功魏乃任之正曰大事记令韩以与魏南阳为公孙衍之功】则秦魏之交可废矣【魏任衍则听其所为】如此则魏必图秦而弃仪收韩而相衍公叔以为然因而委之犀首

以为功果相魏【衍传有补曰大事记魏王不聽仪者公孙衍间之也衍传称衍相魏张仪去则不然以仪传考之仪慙无以归报留魏四岁而魏王卒复说其嗣君久之始去魏相秦尔愚谓仪说魏合秦襄王久而後听惠王之崛强犹未入其言故公孙衍之间易为力也】

楚许魏六城与之伐齐而存燕张仪欲败之谓魏王曰齐畏三国之合也【楚魏燕】必反燕地【此齐宣因丧伐燕所得正曰按史易王初立齐宣王因丧伐燕取十城苏秦说齐使复归燕十城必非此时策云伐齐存燕盖齐人破燕後事也】以下楚【衍赵字】赵【正曰姚本下句亦云失谋於楚赵】必听之而不与魏六城是王失谋於楚而树怨【衍而字】而【补曰疑衍】於齐秦也齐遂伐赵【赵魏邻也伐之以动魏】取乘丘【属泰山补曰正义云乘丘故城在兖州瑕丘县西北】收侵地虚顿丘危【补曰虚谓殷虚今相州所理顿丘故城在魏州顿丘县东北括地志二城时属魏余见秦策】楚破南阳九夷【疑当为九嶷正曰此南阳堵赭同阳属荆州者以下文连九嶷许鄢言之故也大事记李斯书云惠王用张仪计南取汉中包九夷制鄢郢九夷即属楚之夷方孔子在陈蔡相去不远所以有欲居九夷之言此与集注异愚谓此言破南阳之九夷也】内沛【豫州郡内言入其地正曰内市地名必非豫州者】许鄢陵危之所得者新观也【属魏郡补曰正义引括地志观津在冀州枣阳一云武邑县东南本赵邑今属魏今详名新观者恐以此大事记云属清河又云魏惠王三年齐伐魏取观津赧王四十二年魏再败赵魏取赵观津所属不常】而道途宋卫为制【言虽得新观路所从出义限二国】事败为赵驱【败者楚不与也楚不与则齐伐赵亡将及魏故奔走援之】事成功县宋卫【成谓楚与之地受地必由二国县言轻重系之】魏王弗听也张仪告公仲令以饥故赏韩王以近河外【赏犹劝也韩时饥因劝之就粟於河外河外近魏故魏恐韩王宣惠也正曰此句不可解恐韩王字当在令下而衍一以字谓公仲令韩王以饥故赏赐近河外之民】魏王惧问张子张子曰秦欲救齐韩欲攻南阳【补曰此河内修武】秦韩合而欲攻南阳无异也【言无他】且以遇于王【两君相遇则讲信修睦故遇者相好也】王不遇秦韩之卜也决矣【决无他疑韩以魏不与秦遇知其恶我必和秦而攻魏】魏王遂尚遇秦信韩【尚言欲之甚】广魏救赵【广犹心广体胖云乐之也此着书者述其遇秦之效魏昔惧而今心广又岂能止齐伐赵邪正曰宽广也寬魏之忧也】斥【元作尺】尺【补曰未详】楚人遽於革下【地缺革岂鬲邪遽传遽楚以传来许地魏斥之也补曰姚本革下遽未详恐有缺误革疑华】伐齐之事遂败

张仪恶陈轸於魏王曰轸善事楚为求壤地也甚力【衍之字】之左华【未详补曰楚策作左爽】谓陈轸曰仪善於魏王魏王甚爱之公虽百说之犹不听也公不如以【补补曰如下宜有以字楚策有】仪之言为资而反於楚王【反言报之王怀王】陈轸曰善因使人先言於楚【轸自是如楚正曰楚策云楚王喜欲复之未知即以此时如楚否策云仪善於魏王王甚爱之当是惠王时事补曰轸之荅秦王曰子胥忠其君天下皆欲以为臣孝已爱其亲天下皆欲以为子臣不忠於王楚何以臣为忠斯言宜若自信矣今也因张仪谓其善事楚为求壤地乃以为资而反楚则前日所云一时口给御人耳岂其情哉】

张仪欲穷陈轸【时在楚】令魏王召而相之来将倍【元作悟音背】悟【补曰字误姚云曾作桔】之将行其子陈应止其公之行【公翁同项羽纪注谓父】曰物之湛者不可不察

也【湛谓其谋之深】郑强出秦【强自秦出在楚补曰韩策郑强载金入秦请伐韩此云出秦也】曰应为智【言能止其父补曰姚本注曾智作之】夫魏欲絶楚齐必重迎公【軫在楚必合齐而魏欲离之故迎軫】郢中不善公者欲公之去也必劝王多公之车【王楚怀补曰郢中止去也读车字句】公至宋道称疾而母行使人谓齐王【闵正曰大事记张仪相魏在惠王後十三年寻以公孙衍代襄王二年因请成于秦为秦相後八年秦出之魏次年死其在位多惠王时与齐宣相涉】曰魏之所以迎我者欲以絶齐楚也齐王曰子东【使东来齐】无之魏而见寡人也请封子因以鲁侯之车迎之张仪欲以魏合於秦韩而攻齐楚惠施欲以魏合於齐楚以案兵人多为张子於王所【所犹处】惠子谓王曰小事也谓可者谓不可者正半况大事乎以魏合於秦韩而攻齐楚大事也而王之羣臣皆以为可不知是其可也如是其明耶亡羣臣之智术也【亡得无也正曰姚本亡作而下文有】如是其同耶是其可也未如是其明也而羣臣之智术也又非皆同也是其有半塞也【塞不明】所谓刼王者失其半者也【事不明而欲王必从是刼王也王而从之失其半矣正曰此策言小事人可否者且正半而此大事人皆同声必非皆知其可而智术之皆同者则明与不明者居半也彼刼王必以从失其明者之半也此策云欲以魏合於秦韩亦当是惠王时】

张【衍子字】子【补曰姚云刘去此字】仪以秦相魏齐楚怒而欲攻魏雍沮【魏人】谓张子曰魏之所以相公者以公相则国家安而百姓无患今公相而魏受兵是魏计过也齐楚攻魏公必危矣张子曰然则奈何雍沮曰请令齐楚解攻雍沮谓齐楚之君【闵怀】曰王亦闻张仪之约秦王乎【惠】曰王若相仪於魏齐楚恶仪必攻魏魏战而胜是齐楚之兵折而仪固得魏矣若不胜【衍魏字】魏魏必事秦以持其国必割地以赂王若欲复攻【秦攻齐楚正曰言魏割地合於秦齐楚复攻魏而秦救之则齐楚罢敝不足以应秦此策亦当在惠王时】其弊不足以应秦【二国尝战今必弊故不能当秦】此仪之所以与秦王陰相结也今仪相魏而攻之是使仪之计当於秦也非所以穷仪之道也齐楚之王曰善乃遂解攻於魏【补曰齐策秦惠王死仪乞之梁以致齐伐仪使冯喜说齐王云云其言颇与雍沮类】

哀王【襄王子元年慎靚王三年癸卯正曰哀当作襄说见前鲍所次多惠王时事见各条】

谓【补补曰章首有缺文】张仪臣【补】谓齐王【闵正曰见前】曰王不如资韩朋与之逐张仪於魏魏因相犀首【齐使相之】因以齐魏废韩朋而相公叔以伐秦公仲闻之必不入於齐据公於魏【此士言其效也齐废公仲而逐仪故公仲据仪不合齐】是公无患【此士计非先逐张仪不能得衍合魏非合魏不能废朋朋怒则复善仪矣於此然後知公仲之名朋也元在韩策正曰事与公仲公叔相涉当从旧策有魏因相犀首之语当是惠王时说见下章】

陈軫为秦使於齐过魏求见犀首犀首谢陈軫【辞不之见】陈軫曰軫之所以来者事也公不见軫軫且行不得待异日矣犀首乃见之陈軫曰公恶事乎何为饮食而无事【衍无事必来四字】无事必来【补曰四字恐因下文衍】犀首曰衍不肖不能得事焉何敢恶事陈軫曰请移天下之事於公犀首曰奈何陈軫曰魏王使李从【李从赵人】以车百乘使於楚公可以居其中而疑之公谓魏王曰【軫教衍】臣与燕赵故矣【言与之故】数令人召臣也

曰无事必来今臣无事请谒而往无久【言不久於彼】旬五之期【期以十日五日】王必无辞以止公公得行因自言於庭曰臣急使燕赵【言有急事出使】急约车为行具【行所当具】犀首曰诺谒魏王魏王许之即明言使燕赵诸侯客闻之皆使人告其王曰李从以车百乘使楚犀首以车三十乘使燕赵齐王【闵】闻之恐後天下得魏【恐得魏後於诸侯】以事属犀首犀首受齐事魏王止其使【初以无事请行今有齐事魏亦且任之故止之】燕赵闻之亦以事属犀首楚王【怀】闻之曰李从约寡人今燕齐赵皆以事因犀首【魏为主约故诸侯因衍以合魏】犀首必欲寡人寡人欲之乃倍李从而以事因犀首【从与衍皆为魏约耳而因衍者衆故楚亦因之背从者欲专於衍也】魏王曰所以不使犀首者以为不可【不可任】今四国属以事寡人亦以事因焉犀首遂主天下之事复相魏【复言得四国又相魏也非已相罢而又复衍传有在张仪初相之後彪谓轸之所言唯此有七国捭阖风气不然醇乎醇矣补曰轸传以李从为田需正曰陈轸过犀首而不见宜若有憾焉而必见之又教之以收天下之事任何也一人皆不善於张仪者也激犀首以重任皆所以倾仪而已鲍氏於轸深所归重此章知其失不可揜则曰不然醇乎醇矣鲍因轸荅秦王之楚之对而亟加矜獎曲为之说故愚亦屡擿其微非好为攻发也犀首相在惠王时说见下章】

齐王【闵】将见燕赵楚之相於卫约外魏【不亲之】魏王惧恐其谋伐魏也告公孙衍公孙衍曰王与臣百金臣请败之王为约车载百金犀首期齐王至之日【度其至卫之日】先以五十乘至卫间齐行人【补】以百金【间私见之正曰间居谏反投间隙也行以百金犹云行几金於某】以请先见齐王乃得见因久坐与从容谈三国之相怨谓齐王曰王与三国约外魏魏使公孙衍来今久与之谈是王谋三国也齐王曰魏王闻寡人来使公孙子劳寡人寡人无与之语也三国之相不【元作不相】不相【补曰字穀次当作相不】信齐王之遇遇事遂败【按上章张仪将相魏犀首以计去之乃得相而仪相魏四岁则所谓以计去之在仪欲相之初衍得相宜在仪复相秦之时也正曰大事记书魏惠王後十三年秦张仪免相相魏魏不事秦以公孙衍代相解题云衍传称衍相魏仪去则不然仪慙无以归报留魏四岁而惠王卒後魏襄王二年始去魏复相秦】

魏令公孙衍请和於秦綦母恢教之语曰无多割【补曰一本此下有曰字乃教衍说秦之辞】和成固有秦重和【补曰一本标孙本无和字】以与王遇和不成则後必莫能以魏合於秦者矣【衍已相秦故正曰此策惠襄之世不可定】

公孙衍为魏将与其相田需【元作繻从下章及史】繻【补曰即需】不善季子【未详】为衍谓梁王曰独不见夫服牛骖驥乎不可以行百步今王以衍为可使将故用之也而听相之计是服牛骖驥也牛马俱死而不能成其功王之国必伤矣愿王察之【彪谓此用贤而使不肖间之之说也而衍也非其人也补曰此策若作魏将则恐在襄王时】犀首田盼欲得齐魏之兵以伐赵梁君与田侯【闵王正曰事在齐宣十一年魏惠後三年赵肃侯十八年公孙衍欲败从田盼本非与谋故其闻衍之说犹能以用兵难之既而誅於其言劝两君以听衍而身将齐魏之兵盖徂於战鬪之习堕衍计中以成其欺以败和好快讐秦之欲皆盼之为也观马陵之役魏客之言张丑说楚之辞知盼为邻国所畏百姓所服今以此事观之盼亦优於勇而短于谋者也】不欲犀首曰请国出五万人不过五月而赵破田盼曰夫轻用其兵者其国

易危易用其计者其身易穷公今言破赵太易恐有後咎犀首曰公之不慧也夫二君者固已不欲矣今公又言难以惧之是赵不伐而二士之谋困也【二士衍盼】且公直言易而事已去矣夫构难而兵结田侯梁君见其危又安敢释卒不我予乎田盼曰善遂劝两君听犀首犀首【补二字补曰姚氏本有二字】田盼遂得齐魏之兵兵未出境梁君田侯恐其至而战败也悉起兵从之大败赵氏

犀首见梁君曰臣尽力竭智欲以为王广土取尊名田需从中败君【补曰一本标君一作臣又作之】王又听之是臣终无成功也需亡臣将侍需侍臣请亡王曰需寡人之股掌之臣也【犹股肱】为子之不便也杀之亡之【补曰一本标云有外之字】母谓天下何内之无若羣臣何也【内谓亲之称羣臣则衍与焉正曰言杀之亡之天下之人与内之羣臣皆不以为然也】今吾为子外之令母敢入子之事【入犹与】入子之事者吾为子杀之亡之胡如【胡犹何】犀首许诺於是东见田婴与之约结召文子【田文】而相之魏身相於韩【补曰田文为魏相盖犀首约结於婴召其子而相之也下章与此同事宜在襄王时非文奔魏相昭王事也身相韩衍欲相韩也下言置田需以稽二人则衍仍留魏矣一本此下别为一章姚本注云曾题刘连】苏代为田需说魏王曰臣请问文之为魏孰与其为齐也王曰不如其为齐也衍之为魏孰与其为韩也【衍陰晋人时属韩故下苏代说昭鱼亦云正曰陰晋魏地衍实魏人其善韩非以此】王曰不如其为韩也【衍而字】而苏代曰衍将右韩而左魏【右言助之力正曰时尚右说见赵策】文将右齐而左魏二人者将用王之国举事於世中道而不可【中道犹中立也言不能两全二国】且王无所闻之矣【不闻所以救之正曰彼有外心王不得而闻之】王之国虽渗【浸微浸弱漏器然】乐而从之可也【言如漏器尚足乐虽从二子可也然从二子必亟亡不得如是也补曰渗乐未详】王不如舍需於侧【舍犹措】以稽二人者之所为二人者曰需非吾人也【需非二人之党】吾举事而不利於魏需必挫我於王二人者必不敢有外心矣二人者之所为之利於魏与不利於魏王厝需於侧【厝措同】以稽之臣以为身利【身王身】而国便於事【补曰一本而便於事义姚注云刘去身利字一无而字似义长】王曰善果厝需於侧【彪谓哀王於是有人君之言不亡需是也惜其不旋踵需不入衍之事苏代入之矣待衍如是可也如得贤而付之阍外若此者不亦殆乎正曰魏王始听犀首而欲外田需复因苏代而置需以稽二人贤否乃不知用舍之不能荧惑於游士之言而拱手以听之其孱昏甚矣】

史举【即甘茂所事】非犀首於王犀首欲穷之谓张仪曰请令王让先生以国【衍以此说仪使之为己解举故举後见之】王为尧舜矣而先生弗受亦许由也衍因令王致万户邑於先生【弗受国故致邑】张仪说因令史举数见犀首王闻之而弗任也【任犹信也举既非之而数见之故王疑之】史举不辞而去【补曰据此让国之说不特鹿毛壽之愚燕哱也此恐惠王时事】

楚王【怀】攻梁南韩氏因围黄【元作薑下同】薑【补曰未详一本作□】成恢【魏人】为犀首谓韩王【襄】曰疾攻黄薑楚师必进矣魏不能支交臂而听楚韩氏必危故王不如释黄薑魏无韩患必与楚战战而不胜大梁不能守而又况存黄薑乎若战胜兵罢敝【罢音疲】大王之攻黄薑易矣【正曰此策时不可考】张仪为秦连横说魏王曰魏地方不至

千里卒不过三十万人地四平诸侯四通条达辐凑【如木枝分布而四方凑之如辐於毂】无有名山大川之限从郑至梁不过百里从陈至梁二百余里马驰人趋不待倦而至梁【言陈郑所至皆平地】南与楚境西与韩境北与赵境东与齐境卒戍四方【他国境或有山川关塞惟梁无之皆以卒戍守】守亭障者参列【十里一亭障隔也筑城垒为之补曰障关塞边候开封有古夷门关】粟粮漕庾【漕水运庾水漕仓】不下十万魏之地势固战塲也魏南与楚而不与齐则齐攻其东东与齐而不与赵则赵攻其北不合於韩则韩攻其西不亲於楚则楚攻其南此所谓四分五裂之道也且夫诸侯之为从者以安社稷尊主强兵显名也合从者一天下约为兄弟刑白马以盟於洹水之上以相坚也夫亲昆弟同父母尚有争钱财而欲恃诈伪反覆苏秦之余谋其不可以成亦明矣大王不事秦秦下兵攻河外拔卷衍破酸枣劫卫取晋阳【补曰史作阳晋正义云阳晋故城在曹州乘氏县西北】则赵不南赵不南则魏不北魏不北则从道絶【主从者赵故不言其地补曰一本复有从道絶三字史同】则大王之国欲求无危不可得也秦挟韩而攻魏韩劫於秦不敢不听秦韩为一国魏之亡可立而须也此臣之所谓大王患也为大王计莫如事秦事秦则楚韩必不敢动无楚韩之患则大王高枕而卧国必无忧矣且夫秦之所欲弱莫如楚而能弱楚者莫若魏楚虽有富大之名其实空虚其卒虽衆多然而轻走易北不敢坚战患【补正曰史作悉】魏之兵南面而伐胜楚必矣夫亏楚而益魏攻楚而适秦【适犹归】乃嫁祸安国此善事也大王不听臣秦甲出而东伐虽欲事秦而不可得也且夫从人多奋辞【犹大言】而寡可信说一诸侯之王出而乘其车约一国而成反而取【补补曰姚本作而反成而云云】封侯之基是故天下之游士莫不日夜搢腕【搢把腕手也】瞋目【瞋张目也】切齿【言之力也正曰荆轲传索隐云齿相摩切奋怒意】以言从之便以说人主人主覽其辞牵其说恶得无眩哉臣闻积羽沉舟羣轻折轴衆口铄金【补曰周语衆口铄金注衆口所毁虽金石犹可销史下又有积毁销骨一句江淹书积毁销金积谗磨骨】故愿大王之熟计之也魏王曰寡人蠢愚前计失之请称东藩筑帝宫受冠带祠春秋效河外【仪传在诸国之先彪谓魏迹秦而无阻固凡横人之辞若可听唯魏也故仪先之魏一摇而诸国动矣败从之约魏其过欤使魏而绎其说曰秦岂能有爱於我哉兵来不除道何为以说客先之是知其不可而沐我也且我事秦安得高枕而无忧哉如是展转计之则仪之辞屈矣魏不摇诸侯将又曰彼魏四达之国又通於秦彼犹坚约不动我何惧乎秦如是则诸侯一矣惜魏之不知出此也补曰史张仪留魏四岁而襄王卒实惠王哀王立实襄王张仪复说王王不听於是仪陰令秦伐魏魏与秦战败明年齐又败魏观津秦复欲攻魏先败韩申差诸侯震恐张仪复说魏王云云王乃倍从约而因仪请成於秦事在襄王二年正曰显王三十六年苏秦约六国合从次年秦使犀首约齐魏以伐赵而从约解慎?王三年苏秦约六国伐秦再申前约也兵至函谷关秦击之而走次年齐败魏赵观津则齐败约矣既而韩与魏赵伐秦而败张仪留魏六年说而不听今因其兵败从散而说之得其隙矣魏不得不听也魏非不知从之利而秦之不可信也劫於秦之强而患於与国之不一後三年魏复背秦合从其情可见矣惜其自同连鸡中兄弟争财之料而相与以趋於亡从之不可合合之不可久其势则然矣鲍之责魏殆未深究夫事情也补曰搢音厄蠢愚也书容抽江丑用陟降四反义并同】

齐魏约而伐楚以董庆为质於齐楚攻齐大败之而魏弗救田嬰怒将杀董庆盱夷【皆魏人补曰一本盱作吁姚注刘作于】谓田嬰曰楚攻齐大败之而不敢深入者以魏为将内之於

齐【言纵楚使深入乃击之也】而击其後今杀董庆是示楚无魏也魏怒合於楚齐必危矣不如贵【补曰姚注一作舍】董庆以善魏而疑之於楚也【正曰时不可考】

张仪走之魏【传言秦武元年羣臣恶之乞之梁此九年正曰按襄王九年仪走魏魏纳而相之此云不内恐非是时事】魏将迎之张丑諫於王欲勿内不得於王【王不听也】张丑退复諫於王曰王亦闻老妾事其主妇者乎子长色衰重嫁而已【重犹再】今臣之事王若老妾之事其主妇者魏王因不纳张仪【彪谓丑之自比若此岂可望於士君子之行哉哀王听其说是亦魏媼之耄者耳】

【衍魏字】魏文子【田文正曰提魏事也】田需周霄【孟子时有此人至是三十年矣正曰田文前相魏当襄王时孟子见梁襄王相去不远也】相善欲罪犀首犀首患之谓魏王曰今所患者齐也婴子言行於齐王【闵】王欲得齐则胡不召文子而相之彼必务以齐事王王曰善因召文子而相之犀首以倍田需周霄【二人虽善文今衍荐文文必善衍善衍则复背其所善】

魏王令惠施【施自孟子时至此亦三十余年正曰施屡见策文盖惠襄时人此策不可考】之楚令犀首之齐钩二子者【言周礼之等】乘数钧【车乘之数】将测交也【测犹卜也视何国厚君使因知其厚我下衍楚王闻之四字】楚王闻之【补曰四字恐因下文衍】施因令人先之楚言曰魏王令犀首之齐惠施之楚钩二子者将测交也【施欲楚之厚已】楚王闻之因郊迎惠施田需贵於魏王惠子曰子必善左右今夫杨横树之则生倒树之则生【补曰姚云倒刘作测愚谓倒字胜】折而树之又生然使十人树杨一人拔之则无生杨矣故以十人之衆树易生之物然而不胜一人者何也树之难而去之易也今子虽自树於王而欲去子者衆则子必危矣【补曰此与孟子虽有天下易生之物云云语相类而意在自树又云子必善左右则君子小人之用心可见矣】

田需死昭鱼谓苏代曰田需死吾恐张仪薛公【婴正曰史索隐以为田文按婴卒於闵王之世大事记附见於闵元年此事在四年後】犀首之有一人相魏者代曰然则相者以谁而君便之也昭鱼曰吾欲太子之自相也代曰请为君北见梁王必相之矣昭鱼曰奈何代曰若其为梁王【若汝也补曰一本君其为考下文是】代请说君昭鱼曰奈何对曰代也从楚来昭鱼甚忧代曰君何忧曰田需死吾恐张仪薛公犀首有一人相魏者代曰勿忧也梁王长主也必不相张仪张仪相魏必右秦而左魏薛公相魏必右齐而左魏犀首相魏必右韩而左魏梁王长主也必不使相也王曰然则寡人孰相【以史补王曰下八字正曰史有此八字按此乃苏代请昭鱼为王而设为说王之辞无此固可也】代曰莫如太子之自相是三人不以太子为非固相也【固犹久补曰不以一本作皆以史同】皆将务以其国事魏而欲丞相之玺【印也补曰秦武王初置丞相用樗里子甘茂在张仪死後此云丞相玺则魏已有此名】以魏之强而持三万乘之国辅之魏必安矣故曰不如太子之自相也遂北见梁王以此语告之太子果自相【魏记九年有补曰大事记赧王八年书秦逐公孙衍谓衍已去秦事不复见韩非子载犀首与张壽为怨陈需新入不善犀首因使人微杀张壽魏王以为犀首也乃诛之然则衍去秦後终为魏所杀也愚按陈需即策中田需而策以田需死後魏欲相犀首其说不同当

考又赧王二十二年伊阙之败策云公孙衍割地和秦大事记犹着其名岂别一人耶李兑约五国攻秦时亦有公孙衍去此又九年上距犀首为秦大良造时几五十年尝疑其甚远说见赵策】

周最善齐翟强善楚二子者欲伤张仪於魏张子闻之因使其人【仪之人】为见者嗇夫【见者最与强见王也正曰见贤遍反见者谓引见传命之臣仪使其臣为见者之嗇夫以间伺之补曰嗇夫书注主弊之官秦制郷有嗇夫职狱讼收赋税汉有虎圈嗇夫所职不同皆小臣之名】间见者【间以侯伺之】因无敢伤张子【此九仪再相魏时正曰无考】

周最入齐【魏不善之正曰周策为最谓魏王曰王不去周最合与收齐又谓最曰魏贵合秦伐齐而公修虚信云云不如谓王曰请入齐此语在田文相魏昭王时是?先见逐於齐今复自魏入齐详周策所载必最後欲之齐而魏听之非不善之故也】秦王【武正曰昭】怒令姚贾让魏王【最盖秦所置以相魏者补曰此因下文为王通下一语生说无据】魏王为之【为最盖秦亦怒最之去魏正曰是时齐秦交恶而秦欲合魏?自齐走魏人言其不忍背齐而今复之齐必复为齐所厚者魏虽欲合秦而犹牵於收齐之说其入齐盖魏听之故为之言於秦其辞亦婉】谓秦王曰魏之所以为王通天下者以周最也今最遁寡人入齐齐无通於天下矣【齐秦为敌魏既以最通天下於秦则外齐矣今最入齐天下不知以谓魏使之齐败齐事因不通齐矣正曰齐秦为敌齐逐最而魏收之天下信魏之不与齐故曰为王通天下今最遁入齐则天下知魏絶最而齐收之齐何以通於天下乎】敝邑之事王亦无齐累矣【齐纳魏所不善则可以絶之正曰最遁魏入齐而齐收之则齐魏之絶明矣秦可以不疑魏之与齐也】大国欲急兵【伐齐】则趣赵而已【促使应秦也魏不善最而言为最所以自为也按此姚贾与始皇所问之人相去八十余年高诱欲以为陈贾若此人者可也盖陈舜後得为姚姓而孟子与秦武魏哀时犹相及独以毁韩非相毁之人为此人则年时相絶太远矣可乎哉补曰趣赵说见周策正曰姚贾说见秦策】

秦召魏相信安君【史不书】信安君不欲往苏代为说秦王【武或昭正曰无考】曰臣闻之忠不必党【为信安说疑於党之】党不必忠今臣愿为【补补曰愿下有缺字】大王陈臣之愚意恐其不忠於下吏自使有要领之罪【要领斩刑也】愿大王察之今大王令人执事於魏【谓别置相以代信安】以完其交臣恐魏交之益疑也将以塞赵也【信安必右赵者秦召而代之欲魏不通赵】臣又恐赵之益劲也【交魏益坚】夫魏王之爱习魏信也甚矣【魏信即信安省言之】其智能而任用之也厚矣其畏恶严尊秦也明矣【恶犹惮】今王之使人入魏而不用则王之使人入魏无益也若用【用秦所使】魏必舍所爱习而用所畏恶此魏王之所不安也夫舍万乘之事而退【谓去相位】此魏信之所难行也夫令人之君处所不爱令人之相行所不能以此为亲则难久矣臣故恐魏交之益疑也且魏信舍事【亦去信也】则魏【元作赵】赵之谋者必曰舍於秦【此舍犹弃夺其爱习是秦弃魏也】秦必令其所爱信者用赵是赵存而我亡也【我魏也秦本欲塞赵而云然此魏自疑之辞非必秦意】赵亡而我危也则上有野战之气【将与秦战】下有坚守之心臣故恐赵之益劲也【魏不能独抗秦必结赵正曰赵之谋事者曰魏信见舍於秦秦亦将易置赵之臣令其所爱信者用於赵我之权去势夺是赵存而我已亡赵安而我独危则必战必守不听秦命是赵

益以强也】大王欲完魏【补补曰姚本有魏字】之交而使赵小心乎不如用魏信而尊之以名魏信事王国安而名尊离王【不事之】国危而权轻然则魏信之事王也上所以为其主者忠矣下所以自为者厚矣彼其事王必完矣赵之用事者必曰魏氏之名族不高於我土地之实不厚於我魏信以【衍韩字也】韩【补曰疑衍】魏事秦秦甚善之国得安焉身得尊焉今我构【元作讲】讲【补曰宜从构读】难於秦兵为招质【言於用兵为招为质招言召兵质犹本也为之张本正曰招质未详】国处削危之形非得计也结怨於外生患於中身处死亡之地非完事也彼将伤其前事而悔过其行冀其利必多割地以深下王【下亦事也】则是大王垂拱多割地以为利重【得地则益重】尧舜之所求而不能得也臣愿大王察之【彪谓尧舜让天下而何爱於地此特辩士欲重其事而言之过若此者不一也正曰此类注不必辩】

楼梧【魏人後又作梧补曰一本作□姚同注引管子云事无常而法令申不□则国失势注□古伍字谓偶合也愚按玉篇无□字有梧字五故反触也逆也策後作梧韵书梧作梧午荀子午箕军藟庄子梧国策韩子迂前汉志迺逆梧抵梧梧枝梧凡十一字典籍往往通借上去声】约秦魏魏太子为质【此十二年朝秦正曰世家襄王十二年太子朝於秦秦来拔我皮氏未拔而解此策云太子为质既而留於酸枣昭衍说後不云复遣当缺】纷强【魏人正曰高注魏臣】欲败之谓太后曰国与还者也【还犹反也两国相与好恶循环不定补曰高注还周旋於利也】败秦而利魏魏必负之【负言魏得利而强将不事秦所谓还反】负秦之日太子为粪矣【即所谓粪之正曰粪弃除也】太后坐王而泣【使王坐而泣於前】王因疑於太子【不决遣】令之留於酸枣楼子患之昭衍为周之梁楼子告之昭衍见梁王梁王曰何闻曰闻秦且伐魏王曰为期与我约矣【言期以太子结约而不遣为此故伐耶正曰言与我结约矣何为而伐】曰秦疑於王之约以太子之留酸枣而不之秦秦王【昭正曰无考】之计曰魏不与我约必攻我我与其处而待之见攻不如先伐之以秦强折节而下与国【与与国共伐魏】臣恐其害於东周【不欲正言魏受伐魏与周邻言周则魏可知元在秦策正曰交载秦魏事从旧可补曰为周之为去声】秦楚攻围皮氏【亦十三年补曰一本攻魏围皮氏属河东】为魏谓楚王【怀】曰秦楚胜魏魏王之恐【衍也字】也【正曰下章有此句法】见亡也【元作矣】矣必合於秦王何不背秦而与魏王魏王喜必内太子【岂秦归太子而攻耶正曰说见前章】秦恐失楚必効城地於王王虽复与之攻魏可也楚王曰善乃背秦而与魏魏内太子於楚秦恐许楚城地欲与之复攻魏樗里疾怒欲与魏攻楚恐魏之以太子在楚不肯也为疾谓楚王曰外臣疾使臣【使割予秦此所谓由楚】合亲以孤齐【秦楚魏合】秦楚重公公必为相矣臣意秦王【昭】与樗里疾之欲之也臣请为公说之乃谓樗里子曰攻皮氏此王之首事也【首言出兵正曰首事犹言第一事也】而不能拔天下且以此轻秦且有皮氏於以攻韩魏利也樗里子曰吾已合魏矣无所用之【故史书未拔而解】对曰臣愿以鄙心意公【意犹度】公无以为罪有皮氏国之所大利也而以与魏公终自以为不能守也故以与魏今公之力有余守之【余守为有余力】何故而弗有也樗里子曰奈何曰魏王之所恃者齐楚也所用者楼□翟强也【补曰□字书无此字韩策作鼻即□也策又有管鼻之令翟强与秦事云云与此事合疑楼□即管鼻也】今齐王谓魏王曰欲讲攻於齐【言欲讲秦攻秦皆於我夫魏求救欲讲而已而齐兼言攻故下言主兵正曰讲当作构讲攻犹言构兵】主兵之辞也是弗救也楚王【怀】怒於魏之不用楼子而使翟强为和

也【和齐秦】怨顔已絶之矣【怨顔欲絶之见於顔色】魏王之惧也见亡【以有亡形而惧】翟强欲合齐秦外楚以轻楼□【此强之和】楼□欲合秦楚外齐以轻翟强【补曰此二语当时事情也】公不如按魏之和【按谓主之正曰按止也】使人谓楼子曰子能以汾北与我乎请合於楚外齐以重公也此吾事也【疾言此事吾所欲为】楼子与楚王必疾矣【言应之速】又谓翟子子能以汾北与我乎【强亦魏人】必为合於齐外【衍於字】於楚以重公也翟强与齐王必疾矣是公外得齐楚以为用内得楼□翟强以为佐【主魏言之故言内】何故不能有地於河东乎【言且得皮氏按此盖□在楚欲因楚和秦以息攻鄢陵不顺也故此上说之又説樗里凡其辞两言齐楚翟楼示无所偏也而於楚独曰吾事则是为楼子也】

献书秦王【昭正曰无考】曰臣窃闻大王之谋出事於梁【谓攻之】谋恐不出於计矣【非得计也】愿大王之熟计之也梁者山东之腰也【腰人身之中】有蛇於此【兵法所谓率然补曰见孙武书及李靖问答】击其尾其首救击其首其尾救击其中身首尾俱救今梁者天下之脊也【补曰一本今梁王天下之中身也】夫秦攻梁者是示天下要断山东之脊也【要犹欲正曰要同上义山东脊天下要与上互言之示者显取之之意】是山东首尾皆救中身之时也山东见亡必恐恐必大合山东尚强臣见秦之必大忧可立而待也臣窃为大王计不如南出事於南方【谓楚】其兵弱天下不【补补曰作必不语顺又下必字恐当作不】必能救地可广大【言秦地】国可富兵可强主可尊王不闻汤之伐桀乎试之弱密须氏【试谓先之以其弱可必克也周纪注密须在安定陰密补曰密姑姓国在今寧州史周纪西伯伐密须诗所谓密人不恭者也此误以为汤又云试之於弱战国游士言圣贤事多妄谬此尤显然者也】以为武教得密须氏而汤知服桀矣今秦欲与山东为讐不先以弱为武教兵必大挫国必大忧秦果南攻蓝田鄢郢【蓝田秦地凝衍文彪谓征伐先後理正应尔故司马为秦议以伐蜀为先而我艺祖欲平太原诸国亦先平蜀正曰秦之攻楚多道蓝田武关以出攻如败赵蓝田之云秦人善远交近攻之策蠶食诸侯先三晋而後齐楚卒以成功其用兵之序可考矣此策魏畏秦攻移祸於楚故饰为之辞而鲍谓征伐先後理正应尔夫岂识当时大势哉又以司马错先伐蜀宋欲平太原亦先平蜀为试於弱之徵谬矣】

魏秦伐楚【秦昭六年与韩魏共攻楚此十八年】魏王不欲楼缓谓魏王曰不如令秦攻楚楚且与秦攻王王不如令秦楚战王交制之【缓时为秦计耳故明年相秦】

昭王【哀王子补曰世本名速元年赧王二十年丙寅】

秦败东周与魏战於伊阙杀犀武【此二年】魏令公孙衍乘胜而留於境【乘言因秦胜我留而与之讲若秦既去则无及已补曰公孙衍说见前】请卑辞割地以讲於秦为寔屡【魏人】谓魏王曰臣不知衍之所以听於秦之少多然而臣能半衍之割而令秦讲於王王曰奈何对曰王不若与寔屡关内侯【侯於关内耳此时未为爵补曰关内侯之称不独起於秦】而令之赵王重其行而厚奉之因扬言曰闻周君令寔屡已割魏於奉阳君而听秦矣【因地讲秦】夫周君寔屡奉阳君之与穰侯贸首之仇也【补曰奉阳君即李兑说见赵策此言与穰侯贸首之仇则二人欲陰取以定封之事也】今行和者寔屡也制割者奉阳君也太后恐

其不因穰侯也【后穰侯之姊】而欲败之必以少割请合於王而和於东周与魏也

秦约赵而伐魏魏王患之芒卯曰【补曰淮南子孟卯注齐人引策芒卯】王勿忧也臣请发张倚【魏人】使谓赵王【惠文】曰夫邲寡人固形【元作刑】刑【补曰此书刑形字通】弗有也【形犹势也高注为刑法虽通而此书多作形】今大王收秦而攻魏寡人请以邲事大王赵王喜召相国而命之曰魏王请以邲事寡人使寡人絶秦相国曰收秦攻魏利不过邲今不用兵而得邲请许魏张倚因谓赵王曰敝邑之吏効城者已在邲矣大王且何以报魏赵王因令闭关絶秦秦赵大恶芒卯应赵使曰敝邑所以事大王者为完邲也今效【元作郊补曰当从交文姚注云效一作効】邲者使者之罪也卯不知也赵王恐魏承秦之怒遽割五城以合於魏而支秦【此六年书卯以诈重者此也彪谓此冯亭上党之事也惠文失之於魏孝成失之於韩虽所丧败有多寡之差其贪而不明真父子也】

芒卯谓秦王【昭】曰王之士未为之中者也【中谓用事与诸国之中犹内应云】臣闻明王不背【元作聿】聿【补曰一本作聿俱未详首说见赵策】中而行王之所欲於魏者长平【元作羊下同属汝南】羊【补曰地未详或字误】王屋【在河东垣县东北】洛林【即苏代所谓林中河南宛陵林乡也】之地也王能使臣为魏之司徒【本周官此所谓为之中】则臣能使魏献之秦王曰善因令以为魏之司徒谓魏王曰王所患者上地也【上流之地近秦正曰未知所指】秦之所欲於魏者长平羊王屋洛林之地也王献之秦则上地无忧患因请以下兵东击齐壤地必不远矣魏王曰善因献之秦地入数月而秦兵不下魏王谓芒卯曰地入数月而秦兵不下何也芒卯曰臣有死罪虽然臣死则契折於秦【折毁也言不可有责於秦】王无以责秦王因赦其罪臣为王责约於秦乃之秦谓秦王曰魏之所以献长平羊王屋洛林之地者欲以下大王之兵东击齐也今地已入而秦兵不可下臣则死人也虽然後山东之士无以利事王者矣秦王惧【补曰姚本作懼】然曰国有事未贍【元作澹】澹【补曰即贍前汉志澹同】下兵也【贍给也】今以兵从後十日秦兵下芒卯并将秦魏之兵以东击齐启地二十二县

苏代【元作秦下同】秦【补曰燕策及史作代】拘於魏欲走而之齐【元作韩】韩魏氏闭关而不通齐使苏厉为之谓魏王曰齐请以宋地【时未举宋此侵伐所得耳正曰正义云涇阳君秦王弟悝也齐苏子告秦兵伐宋以封涇阳君然齐假设此策以救伐】封涇阳君而秦不受也夫秦非不利有齐而得宋地然其所以不受者不信齐王【闵】与苏代秦【补曰燕策及史作子下同】也【疑其善魏】今秦见齐魏之不合【衍也字】也如此其甚也则齐必不欺秦而秦信齐矣齐秦合而涇阳君有宋地则非魏之利也故王不如复东苏代秦【使得之齐】秦必疑齐而不听也夫齐秦不合天下无忧【补曰一本标云作变】伐齐成则地广矣【齐无秦而魏伐之可以广地苏传有在齐伐宋之前补曰燕策及史曰魏为燕执伐齐使人谓魏王曰云云於是出苏代代之宋】

五国伐秦【成臯之役此十年】无功而还其後齐欲伐宋而秦禁之齐令宋郭之秦请合而以伐宋秦王【昭】许之魏王畏齐秦之合也欲讲於齐谓齐王曰秦王谓宋郭曰分宋之城服宋之强者大国也乘宋之弊而与王争得者【王齐闵】楚魏也请为王无合楚之伐宋也

而王独举宋王之伐宋也请刚柔而皆用之【宋强宋弱皆必伐之】如宋者欺之不为逆役之不为讐者也王无与之讲以取地既已得地又以力攻之期於?宋而已矣臣闻此言而窃为王喜【元作悲】悲秦必且用此於王矣【用兵伐齐】又必且劫【元作曰】曰王必求地既已得地又且以力攻王又必谓王【衍曰字】曰使王轻燕燕齐之交已丑【恶也】又且收燕以东索於王【补曰一本更索】秦尝用此於楚矣又尝用此於韩矣愿王之深计之也秦善齐不可知也已【言不可信】故为王计太上伐秦其次宾秦其次坚约而详讲与国无相讐也【补曰详佯通史多有媾字句佯媾於秦此即赵策所谓不得已而必媾则愿五国复坚约者此宾即摈讎一本作离】秦齐合国不可为也已王其听臣也必无与讲【与秦讲】秦权重魏魏冉明熟【元作孰】孰【补曰即熟】是【言虑此明且熟】故有谓【元作又为】又为【补曰又有通】足下【或人谓齐王当如下】伤秦者【伤】不敢显也【恐秦觉之】天下可令伐秦则陰劝而弗敢图也见天下之伤秦也则先鬻与国而以自解也【言与国为之非我也】天下可令宾秦则为劫於与国而不得已者天下不可则先去【背诸国也】而以秦为上交以自重也如是人者鬻王以为资者也而焉能免国於患免国於患者必穷三节而行其上【补曰三节即上文太上其次之说】上不可则行其中中不可则行其下下不可则明不与秦而生以残秦【生犹进言伐之不已正曰不能伐不能摈又不能媾必为秦所伐则誓鬪而必死不与秦俱生以残秦姚本注云而一作两】使秦皆无百怨百利惟己之曾安【已止曾则也言使秦见残不择利害惟务止魏之残以自安也】无【补】令天【元作足】足下鬻之以合於秦【所谓鬻王以秦为上交者补曰今字上恐有缺误】是免国於患者之计也臣何足以当之虽然愿足下之听臣之计也燕齐讐国也【两国自宣闵易昭再世相讎】秦兄弟之交也【燕齐与秦】合讎国以伐婚姻【犹兄弟也此士欲为魏合燕齐以伐秦】臣为之苦矣【言伐秦之难而已为之】黄帝战於涿鹿之野而西戎之兵不至禹攻三苗而东夷之民不赴【元作起】起【言帝王用兵犹有不从者不经见】以燕齐【补】伐秦黄帝之所难也而臣已致燕甲而起齐兵矣臣又徧事三晋之吏奉阳君孟尝君韩珉【元从口】眠周最周韩余为徒【与为徒友】从而下之【补曰韩余疑即赵策韩徐周韩之间有脱字不然衍周字为徒从而下之句谓徒党合从也又恐从徒字讹衍】恐其伐秦之疑也又身自丑於秦【与秦恶】扮之【扮并也握也言合诸国补曰扮抚吻反】请焚天下之秦符者臣也次传焚符之约者臣也【传之诸国】次【元作欲】欲使五国约闭秦关者臣也【不通秦补曰燕策苏代谓焚天下之秦符上计破秦其次长宾之皆与此合】奉阳君韩余为既和矣苏修朱婴【此皆三晋之吏也】皆陰在邯鄲臣又说齐王而往败之【败宋郭合秦之约】天下共讲因使苏修游天下之语【游榆扬之】而以齐为上交【盖诈】兵请伐魏【兵齐兵】臣又争之以死而果西因苏修重报【修在邯鄲齐之西也报以齐不伐魏】臣非不知秦权【元作劝】劝【补曰恐作权上有】之重也然而所以为之者为足下也【彪谓此非苏代不能也故史言代复约从亲如苏秦时独所谓行其上不可则行其中下为不可用也夫伐秦不胜窜走求成之不给安能宾之诸侯见其败轻之矣岂有听其坚约之说哉盖代之计专以伐之为上而游辞见其多策耳计不出於此也正曰按赵策五国伐秦章苏代说奉阳君云云中有与此章出入者知此必代之辞也三策并陈上则伐之中则摈之下则媾之未及伐之败也鲍说谬矣】叶阳君【赵人】约魏魏王将封其子谓魏王曰王尝身济漳朝邯鄲抱葛孽【元作薛】薛【补曰赵世家作孽者是一本作薛亦作非】陰成以为赵养邑【供养之邑】而赵无为王有也王乃又封其子河【元作问】问【补曰字讹赵

策作河】阳姑密【元作衣】衣【补曰字讹赵策作密】乎【赵惠文十三年有与此语同云封李兑子则叶阳君兑之封乎补曰叶即奉之讹李兑也说见赵策】臣为王不取也魏王乃止【惠之十二年此十年】

秦使赵攻魏魏谓赵王曰【惠文正曰无考】攻魏者亡赵之始也昔者晋人欲亡虞而先伐虢伐虢者亡虞之始也故荀息以马与璧假道於虞宫之奇諫而不听卒假晋道晋人伐虢反而收虞故春秋书之以罪虞公今国莫强於赵而并【衍齐字】齐【正曰见下】秦王【昭正曰见下】贤而有声者相之【并犹兼声威声相助也言赵强矣兼得秦助正曰今国莫强於赵而兼齐秦句王贤而有声者相之句言赵强兼齐秦王既贤而又有声望者相之所以为秦腹心之疾也如此乃協此士引喻明切谓春秋罪虞亦不悖秦使赵攻魏之事无见或因其言而止欤】所以为心腹之疾者赵也【言秦以赵为疾】魏者赵之虢也赵者魏之虞也听秦而攻魏者虞之为也愿王之熟计之也

秦将伐魏魏王闻之夜见孟尝君【本传齐闵骄故奔魏魏相之此十一年正曰见後】告之曰秦且攻魏子为寡人谋奈何孟尝君曰有诸侯之救则国可存也王曰寡人愿子之行也重为之约车百乘孟尝君之赵谓赵王【惠文】曰文愿借兵以救魏赵王曰寡人不能孟尝君曰夫敢借兵者以忠王也王曰可得闻乎孟尝君曰夫赵之兵非能强於魏之兵魏之兵非能弱於赵也然而赵之地不岁危而民不岁死而魏之地岁危而民岁死者何也以其西为赵蔽也【魏在赵西为之蔽秦】今赵不救魏魏?盟於秦【?之血也】是赵与强秦为界也地亦且岁危民亦且岁死矣此文之所以忠於大王也赵王许诺为起兵十万车三百乘又北见燕王【昭】曰先曰公子【称其父婴】尝约两主之交矣今秦且攻魏愿大王之救之燕王曰吾岁不熟二年矣今又行数千里而以助魏且奈何田文曰夫行数千里而救人者此国之利也今魏王出国门而望见军虽欲行数千里而耻人可得乎燕王尚未许也田文曰臣効便计於王王不用臣之忠计文请行矣恐天下之将有大变也王曰大变可得闻乎曰秦攻魏未能克之也而台已燔游已夺矣【不暇游观】而燕不救魏魏王折节割地以国之半与秦秦必去矣秦已去魏魏王悉韩魏之兵又西借秦兵以因赵之衆以四国攻燕王且何利利行数千里而助人乎利出燕南门而望见军乎则道里近而输又易矣【输以饷军】王何利燕王曰子行矣寡人听子乃为之起兵八万车三百乘以从田文魏王大说曰君得燕赵之兵甚衆且亟矣秦王【昭】大恐割地请讲於魏因归燕赵之兵而封田文【彪谓田文可谓善言者矣其说赵也迺而不偪其说燕也直而不偪与夫嚙口虚喝者异矣补曰孟尝相魏在齐灭宋前大事记附见於昭王十年详见周策此事实昭王十三年秦纪秦昭二十四年取魏安城至大梁燕赵救之秦军去】

穰侯攻大梁【秦昭二十四年攻魏至大梁此十三年】乘郢北【元作北郢郢楚别邑其北近魏】北郢【正曰北郢乃楚之宜城即郡也史魏冉传入北宅遂围大梁此讹为乘北郢也又策入北地亦字讹】魏王且从【从顺服也】谓穰侯曰君攻楚得宛穰以广陶攻齐得刚博【并属太山补曰正义引括地志云故刚成在兖州褒丘县界愚谓刚博当即是刚壽正义云壽郢州县】以广陶得许鄢陵以广陶【补曰得许上当有攻魏字缺脱】秦王【昭】不问者何也以大梁之未亡也今日大梁亡许鄢陵必议【议其不当得】议则君必穷为君计

者勿攻便【补曰魏昭王十三年秦兵至大梁即取魏安城之役安厘王二年秦魏冉伐魏走芒卯入北宅遂围大梁魏割温以和二役皆冉相时而败芒卯则冉将以伐此策当在其时大事记载须贾说穰侯云云攻而不拔秦兵必罢陶邑必亡前功必弃矣下注此章谓与须贾同一卫亦以为此年事矣然秦攻取刚壽在秦昭三十六七年后此数年而策已云得刚壽而又不可晓也当考 宛穰广陶说见赵策 许鄢陵魏地见前秦得其地不知何时】白珪【魏人孟子称之赵岐以为周人非也盖至是三四十年矣正曰秦昭王初年魏冉已用事则芊戎之责已久十二年而当魏昭元年则其初年犹与魏襄相及正孟子时也赵岐以为周人何以知其非也但战国人姓名多偶同者鲍以在魏策中而即为魏人谬矣又按燕策白珪逃於秦则尝仕秦新序孟尝君问白珪恐亦此时史白珪传首云当魏文侯时李克务尽地力而白珪乐观时变後复引珪之言曰吾治生产如孙吴用兵商鞅行法则其人在鞅後首句特与李克对论非言其世也以二十取一语孟子正欲以其货殖之术施之国家者也又新序纪白珪战亡六成为魏取中山白珪显於中山中山人恶之於魏文侯投以夜光之璧则文侯时又一白珪欤或因史所书而讹舛欤】谓新城君曰夜行者能无为奸不能禁狗使无吠已也故臣能无议君於王【戎贵於秦王宜为秦王今珪说之岂非珪使魏我来魏】不能禁人议【补曰姚本云有臣字】於君也【秦策段产语同正曰段产策本在韩鲍以史注新城君为芊戎故曲为之说未知即是此人否】

秦攻韩之管【後志河南管城注在京县东北补曰郑州管城县】魏王发兵救之昭忌曰夫秦强国也而韩魏壤【言地与秦按】秦【元作梁补曰姚云刘作秦】不出攻则已若出攻非於韩也必於魏也今幸而於韩此魏之福也王若救之夫解攻者必韩之管也致攻者必魏之梁也魏王不听曰若不因救韩韩怨魏西合於秦秦韩为一则魏危遂救之秦果释管而攻魏魏王大恐谓昭忌曰不用子之计而祸至为之奈何昭忌乃为之见秦王【昭正曰时不可考】曰臣闻明主之听也不以挟私为政【与正同】是参行也【以诸国参考而行言参彼己也】愿大王无攻魏听臣也秦王曰何也昭忌曰山东之从时合时离何也秦王曰不识也曰天下之合【补曰一本此下有也字】以王之不必也【犹言不可测也方攻韩又攻魏是也】其离也以王之必也【伐一不移伐则诸国知免不急於从也】今攻韩之管国危矣未卒而移兵於梁合天下之从无精於此者矣【精犹明】以为秦之求索必不可支也故为王计者不如制【元作齐】齐【补曰疑字误或上有缺文】赵秦已制赵则燕不敢不事秦荆济不能独从【荆楚济齐正曰一本荆齐是未有称齐为济者字多傍水】天下争敌於秦则弱矣【言诸国合而竞与秦敌则秦弱】秦王乃止【彪谓隣国有兵救之恤邻之义昭王言是也秦伐韩而魏救之挑秦之祸昭忌之言亦是也要之从约坚则宜救犹救同室之鬪也无从约而救之则是乡邻有鬪被髮纓冠而往是岂不可已乎】

芮宋【魏人】欲絕秦赵之交故令魏氏收秦太后之养地【宣太后】秦王【昭】怒芮宋谓秦王曰魏委国於王【委与之】而王不受故委国於赵也李郝【赵人】谓臣曰子言无秦而养秦太后以地是欺我也故敝邑收之秦王怒乃絕赵【补曰姚本收秦太后之养地秦王於秦芮宋云云与此文有误当云收秦太后之养地於秦芮宋谓云云】

为魏谓楚王【慎襄正曰无考】曰索攻魏於秦【楚以攻魏索於秦】秦必不听王矣是智

困於秦而交疏於魏也楚魏有怨則秦重矣故王不如順天下【天下不欲秦伐魏】遂伐齊與魏便地【言以所得齊地與魏易兩便】兵不傷交不變所欲必得矣

管鼻之【魏人正曰注作鼻之名謬下兩之字亦語助管鼻恐即樓鼻說見前】令翟強與秦事【鼻之不欲故推之於強】謂魏王曰【鼻之謂之】鼻之與強猶晉人之與楚人也晉人見楚人之急帶劍而緩之楚人惡其緩而急之今鼻之入秦之傳舍【酈食其傳注止息傳置之舍】舍不足以舍之【守衛之盛舍不能容】強之入無蘇於秦者【言秦輕之無與為樵蘇者正曰一本蘇作蔽是言無人從之】強王貴臣也而秦若此其甚安可【秦待己已厚可以不與秦事秦輕強矣欲其重之必令與秦事乃可正曰翟強欲合齊秦外楚以輕樓鼻樓鼻欲合秦楚外齊以輕翟強鼻強不合而謂鼻令強與秦事者鼻容強為之秦入鼻言故輕強此士蓋為強言以激魏王者也此當在襄王時】

咸陽君【秦昭十七年入朝者於此知為韓人不疑】欲以韓魏聽秦魏王弗利白珪謂魏王曰王不如陰使人說咸陽君曰君入秦秦必留君而以多割於韓矣韓不聽秦必留君而伐韓矣故君不如安行【安猶徐】求質於秦【質事有不留之驗乃可入正曰質子之質】咸陽君必不入秦秦王不【衍敢字】敢合則王重矣

安厘王【昭王子元年赧王三十九年乙酉】

秦敗魏於華【華山在弘農華陰秦紀作華陽注亭名在密縣事在此二年正曰華陰之華去聲華下華陽史無音】走芒卯而圍大梁須賈【魏人】為魏謂穰侯曰臣聞魏氏大臣父兄皆謂魏王曰初時惠王伐趙戰乎三梁【春秋秦取梁漢夏陽也河內有梁周小邑也陳留浚儀大梁為三皆魏地正曰索隱云云梁即南梁又說見齊策】十萬之軍拔邯鄲【秦十二年攻趙虜莊賈正曰魏惠王十八年拔趙邯鄲二十年歸趙邯鄲】趙氏不割而邯鄲復歸齊人攻燕殺子之破故國【補曰通鑑大事記在宣王二十九年】燕不割而燕國復歸燕趙之所以國全兵勁而地不並於諸侯者以其能忍難而重出地也宋中山數伐數割而隨以亡臣以為【此臣魏大臣所稱】燕趙可法而宋中山可無為也夫秦貪戾之國而無親蚕食魏盡晉國戰勝鞏子【地缺正曰舉土刀反鞏羊益反又淖作澤古書三字皆通此未有據史鞏作暴下同徐廣云暴弩也大事記作暴吏未詳】割八縣地未畢入而兵復出矣夫秦何厭之有哉今又走芒卯入北地【梁之北非郡正曰史記作宅策字訛下同正義引竹書云宅陽一名北宅括地志云故城在鄭州滎陽縣西】此非但攻梁也且劫王以多割也王必勿聽也今王循楚趙而講【循猶順也以下文考之秦時蓋合楚趙共攻魏魏見二國為秦用遂欲講秦不反覆思之也正曰循即徇】楚趙怒而與王爭事秦秦必受之秦挾楚趙之兵以復攻則國救亡不可得【衍也字】也已愿王之必無講也王若欲講必少割而有質【亦事驗也正曰索隱云少割地而求秦質子】不然必欺【補曰索隱云必稱秦欺】是臣之所聞於魏也愿君之以是慮事也周書曰維命不于常此言幸之不可數也夫戰勝鞏子而割八縣此非兵力之精非計之功也天幸為多矣【補曰漢史天幸語本此】今又走芒卯入北地以攻大梁是以天幸自為常也智者不然臣聞魏氏悉其百縣勝兵以止戍大梁臣以為不下三十萬以三十萬之衆守十仞之城臣以為雖湯武復生弗易攻也夫輕信楚趙之兵陵十城之城戴【補曰一

本标孙作战】三十万之衆而志必举之臣以为自天下之始分以至于今未尝有之也攻而不能拔秦兵必罢【音疲】陰必亡【陰穰侯别邑正曰陰即陶说见赵策】则功必弃矣今魏方疑可以少割收也愿君【补补曰史愿君逮楚赵】之及楚赵之兵未任於大梁也【未以攻梁自任】亟以少割收魏魏方疑而得以少割为和必欲之则君得所欲矣楚赵怒於魏之先已讲也【已兵未至而与秦讲】必争事秦从是以散【从横之从】而君後择焉【择其所与於散从之後】且君之尝割晋国取地也何必以兵哉【先割取时不用兵】夫兵不用而魏效绦安邑又为陰启【言得亡国以拓陰之封地补曰又为止已合策文有脱误见後】两机尽【两谓得县启封尽无遗也】故宋卫効【魏自比二国二国小国也】尤憚【元作憚尤】憚尤秦兵【出地而小故愈畏秦】已合【魏合秦】而君制之【补曰史云又为陶开两道几尽故宋卫必効单父秦兵可全云云按此文明顺姚注亦宜引从之正义云故宋及单父是陶南道魏安邑及绦是陶北道索隐云穰侯封陶魏効绦安邑是得河东地言从秦通陶开河西河东之两道此时宋已?是秦将尽得宋地也愚谓可全即上言不用之意】何求而不得何为而不成臣愿君之熟计而毋行危也穰侯曰善乃罢梁围【彪谓贾之说不足以已秦也为其为魏也过深而说秦者不切夫以秦为天幸而欲其无行危也秦岂信之哉秦行是何危之有且其为魏之过深也适足以疑秦岂沮於是哉梁围之解将别有故非贾力也正曰大事记略载此章及穰侯攻大梁章谓同一术愚谓魏利於少割穰侯喜得此地而罢兵亦无不可大事记周赧王四十年秦昭三十二魏安厘二韩厘二十一赵惠文二十四年秦以魏冉为相国伐韩暴鸢救魏魏冉破之斩首四万焉走开封魏割八县以和魏冉复伐魏走?卯入北宅遂围大梁魏割温以和四十一年魏背秦与齐从亲秦魏冉伐魏拔四城斩首四万四十二年赵魏伐韩华阳秦魏冉白起客卿胡伤救韩败魏将芒卯华阳斩首十三万取卷蔡阳长社又败赵将贾堰沉其卒二万於河取观津魏予秦南阳以和以其地为南阳郡迁免臣居之通监纲目书略同不着暴鸢芒卯等及以地为南阳郡一节补曰按史魏安厘王二年三年四年连岁魏冉将兵来伐二年之战自暴鸢救魏败走年表秦纪魏世家魏冉传皆云兵至大梁次年之战不地最後华阳之战赵魏伐韩秦救韩败赵魏走?卯但史所载有差互纪以击?卯华阳传以走暴鸢并为次年事华阳之战或云得三晋将或云攻赵韩魏八县三县之殊十万十五万之舛故大事记参定书之今考此策须贾之辞谓战胜暴子割八县地未毕而兵复出此大事记所以书此役继於走暴鸢之後但策首书秦败魏於华恐於华二字因下章误衍也又按秦纪昭王三十四年书秦与魏韩上庸地为一郡南阳免臣迁居之三十五年初置南阳郡大事记於魏予秦南阳後书以其地为南阳郡迁免臣居之即以此为是年事按南阳凡二其一河南之修武其一邓州之堵阳免臣者以罪免迁守新边秦不信敌国之民故徙其国人使错居之前此二十七年攻楚赦罪人迁之南阳大事记必谓前已借地故今以新得之南阳而不知纪书乃谓秦与魏韩上庸地为一郡於南阳上庸属汉中今房州竹山县则上郡之南阳也次年乃书置南阳郡秦南阳郡即邓而修武更置河内郡不闻两南阳也昭王四十四年秦白起攻韩取南阳絶太行道使秦已置郡不应复云尔大事记亦书之矣此条盖因魏入南阳以和偶与下文南阳免臣相次而致误尔因上论大事记文附于此】秦败魏於华魏王且入朝於秦周诉谓王曰【补曰一本诉作欣是下同】宋人有学者三年反而名其母其母曰子学三年反而名我者何也其子曰吾所贤者无过尧舜尧舜名吾所大者无大天地天地名今母贤不过尧舜母大不过天地是以名母也其母曰子之於学者【於其所学】将尽行之乎愿子之有以易名母也子之於学也将有所不行也【补曰姚本也作乎】愿子之且以名

母为後也今王之事秦尚有可以易入朝者乎愿王之有以易之而以入朝为後魏王曰子患寡人入而不出邪许綰为我祝曰入而不出请殉寡人以头周诉对曰如臣之贱也今人有谓臣曰入不测之渊而必出不出请以一鼠首为汝殉者臣必不为也今秦不可知之国也犹不测之渊也而许綰之首犹鼠首也内王於不可知之秦而殉王以鼠首臣窃为王不取也且无梁孰与无河内急王曰梁急无梁孰与无身急王曰身急曰以三者身上也河内其下也秦未索其下而王効其上可乎王尚未听也支期曰王视楚王【顷襄】楚王入秦【絶句】王以三乘先之【光楚至秦】楚王不入楚魏为一尚足以扞秦王乃止王谓支期曰吾始已诺於应侯矣今不行者欺之矣支期曰王勿忧也臣使长信侯【魏相之善应侯者】请无内王王待臣也支期说於长信侯曰王命召相国长信侯曰王何以臣为支期曰臣不知也王急召君长信侯曰吾内王於秦者寧以为秦邪吾以为魏也支期曰君无为魏计君其自为计且安死乎【问何所安】安王乎安穷乎安贵乎君其先自为计後为魏计长信侯曰楼公将入矣【缓也侯其入欲与之议正曰无考之缓楼鼻韩策并见楼梧皆此时人】臣今从支期曰王急召君君不行血溅君襟矣长信侯行支期随其後且见王支期先入谓王曰伪病者乎而见之【令王见而辞疾】臣已恐之矣长信侯入见王王曰病甚奈何吾始已诺於应侯矣意虽道死行乎【虽死於路犹将行】长信侯曰王毋行矣臣能得之於应侯矣【能使应侯止王之行】愿王无忧【彪谓周诉之爱王也甚忠其谕王也甚切贤智人也厘王不能听而听支期期岂贤於诉哉盖期之所効者事而诉之所谕者理庸人固可示以事而难以理谕也微二臣者厘其为楚怀欬补曰为我为王以为秦以为魏之为去声】

华阳之战魏不胜秦明年将使段干崇割地而讲孙臣【并魏人】谓魏王曰魏不以败之上割【上谓当其时】可谓善用不胜矣而秦不以胜之上割可谓不善用胜矣今处期年乃欲割是羣臣之私【计不及也】而王不知也且夫欲玺者【得秦封受其玺】段干子也王因使之割地欲地者秦也而王因使之授【元作受】受玺夫欲玺者制地而欲地者制玺其势必无魏矣且夫奸人固皆欲以地事秦以地事秦譬犹抱薪而救火也薪不尽则火不止今王之地有尽而秦求之无穷是薪火之说也魏王曰善虽然吾以许秦矣不可以革也【革更也】对曰王独不见夫博者之用梟耶【犹上善用胜矣补曰正义云博头有刻为梟鸟形者掷得梟者合食其子若不便则为余行也】欲食则食欲握则握【握不食也食者行碁握不行也故史曰便则行不便则止】今君劫於羣臣而许秦因曰不可革何用智之不若梟也魏王曰善乃按其行【按犹止记四年有补曰史安厘王四年华阳战败後段干子请予南阳以和此策云按其行通监纲自云王不听卒以南阳为和】

秦魏为与国齐楚约而欲攻魏魏使人求救於秦冠盖相望秦救不出魏人有唐雎【元作且下同】且【补曰新序同史作雎】者年九十余谓魏王曰老臣请出西说秦令兵先臣出可乎魏王曰敬诺遂约车而遣之唐雎且见秦王【昭】秦王曰丈人芒然乃远至此甚苦矣魏来求救数矣寡人知魏之急矣唐雎且对曰大王已知魏之急而救不至者是大王筹策之臣无任矣【不堪其事】且夫魏一万乘之国称东藩受冠带祠春秋者以为秦之强足以为与也今齐楚之兵已在魏郊矣大王之救不至魏急则且割地而约齐楚王虽欲救之岂有及哉是亡一万乘之魏而强二敌之齐楚也窃以为大王筹策之臣无任矣秦王喟然愁悟遽发兵日夜赴魏齐楚闻之乃引兵而去魏氏复全唐雎且之说也【记十年有】

虞卿谓赵王【惠文】曰人之情寧朝人乎寧朝於人也赵王曰人亦寧朝人耳何故寧朝於人虞卿曰夫魏为从主而违者范痤也【魏相补曰一本作座史与此同】今王能以百里之地若万户之都请杀范痤於魏范痤死则从事可移於赵【赵主从也】赵王曰善乃使人以百里之地请杀范痤於魏魏王许诺使司徒【本周卿此时主徒隶者耳】执范痤而未杀也范痤献书魏王曰臣闻赵王以百里之地请杀痤之身夫杀无罪范痤【衍痤字】痤【补曰字衍】薄故也【犹细事】而得百里之地大利也臣窃为大王美之虽然有一焉百里之地不可得而死者不可复生也则王必为天下笑矣臣窃以为与其以死人市不若以生人市便【元作使】使【补曰姚注云一本无史同】也又遗其後相信陵君书曰夫赵魏敌战之国也赵王以咫尺之书来而魏王轻为之杀无罪之痤痤虽不肖故魏之免相【衍望字】望【补曰姚云刘作室史无】也尝以魏之故得罪於赵夫国无用臣【用言可任者补曰一本国内无用是】外虽得地势不能守然今能守魏者莫如君矣王听赵杀痤之後强秦袭赵之欲【袭言犹因赵之故态】倍赵之割则君将何以止之此君之累也信陵君曰善遽言之王而出之【十二年有与其以死市下元在赵策补曰从旧在赵可】

魏将与秦攻韩朱己【史作无忌补曰史魏王以秦救之故欲亲秦而伐韩以求故地无忌谓魏王曰云云大事记据之以其辞云秦太后母也以忧死故附载於宣太后之薨之後在赧王五十年按朱己即无忌字讹也】谓魏王曰秦与戎翟同俗有虎狼之心贪戾好利而无信不识礼义德行苟有利焉不顾亲戚兄弟若禽兽耳此天下之所同知也非所施厚积德也故太后母也而以忧死【秦昭四十二年此十二年】穰侯舅也功莫大焉而竟逐之两弟无罪而再夺之国此其为亲戚兄弟若此而又况於仇讐之敌国也【补曰一本标也作乎】今大王与秦伐韩而益近秦臣甚惑之而王弗识也则不明矣羣臣知之而莫以此谏则不忠矣今夫韩氏以一女子承一弱主【此十二年桓惠立八年矣补曰大事记云韩世家不载其事必是时韩王少母后用事也愚按是时秦宣太后赵惠文后齐君王后皆专政韩亦然也】内有大乱外安能支强秦魏之兵

王以为不破乎韩亡秦【有】郑地【时郑亡属韩】与大梁邻王以为安乎欲得故地【盖尝丧地於韩个欲取之】而今负强秦之祸也【补曰史负强秦之说据此则负当从恃训从策文则负任在背以为喻也史义长】王以为利乎秦非无事之国也韩亡之後必且便事便事必就易与利【补曰便事史并作更字】就易与利必不伐楚与赵矣是何也夫越山踰河絕韩之上党而攻强赵【补曰史作絕上党正义云韩上党从太行山西北泽潞等州是也】则是复阨与之事也【先时赵奢败秦於此补曰复扶又反阨与音遏豫】秦必不为也若道河内倍邲朝歌【倍音背】絕漳滏之水而以与赵兵决胜於邯鄲之郊是受智伯之祸也秦又不敢伐楚道涉山【元作而】谷行三十里而攻危隘之塞所行者甚远而所攻者甚难秦又弗为也【补曰三十史作三千者是危隘史作冥厄即崑厄也说见楚策大事记秦向楚有两道涉山谷是西道河外是东道此是采索隐正义之文按二家本文似以涉谷为地名当考正义云从褒斜入渠州即东南至申州攻左域山险厄之塞也】若道河外背大梁而右上蔡召陵以与楚兵决於陈郊秦又不敢也【补曰大事记引正义云从河外出函谷关历同州南至郑州东向陈州则背大梁也大事记今本作东向郑州者恐因上文讹史右蔡左召陵正义云上蔡县在豫州北邵陵故城在豫州鄆城县东并在陈州西从汴州南行向陈州之西郊则

上蔡召陵在南面向东皆身之右定无左字也】故曰秦必不伐楚与赵矣又不攻卫与齐矣【补曰卫齐皆在赵韩魏之东】韩亡之後兵出之日非魏无攻矣秦故有怀地邢丘之城垓津【地缺】而以之临河内河内之共汲莫不危矣【补曰史作秦固有怀茅固故通正义云怀州武陟县西故怀城括地志云怀州获嘉县东北有茅亭即苏忿生邑攢茅邢丘见秦策史城垓津索隐引策云邢丘安城今本无安字案之字即安讹也史此段後有安城字正义云在郑州原武县东南垓津索隐云在河北垓九威反正义引杜预以为汲郡城南延津愚按安厘王十一年秦拔我廩丘或作邢丘鄴丘余无见盖地皆壤界也索隐云共汲皆县名属河内共居庸反又见下刘辰翁以为共汲河者谬】秦有郑地得垣雍【秦纪注河内卷有垣雍城补曰正义引括云垣雍故城在郑州原武县面北雍於用反】决荥泽【属荥阳书注在敖仓东南补曰史作茷一本同】而水大梁大梁必亡矣【补曰正义云言韩亡後秦有郑地得垣雍城从荥泽决沟历雍灌大梁也大事记云始皇灭魏果用此策】王之使者大过矣乃恶安陵氏於秦【安陵魏之不欲攻韩者与羣臣异故恶之】秦之欲许之久矣【许言听之久言秦之先自恶之正曰史作王之使者出过而恶安陵氏於秦大事记策文则以策为明顺许史作诎正义引括地志云安陵在鄢陵县西北详见前大事记按策安陵君曰吾先君成侯受诏襄王以守此地盖安陵赵襄子所封其後远别为一国附庸於魏】

【今魏反令使晋国之於秦】然而秦之叶阳昆阳与舞阳高陵邻【高陵属琅邪此二县安陵封地以与昆阳叶阳邻故秦久恶安陵正曰高陵属京兆与下文地不相近史无高陵字策或误也注尤非正义云叶阳今许州叶县昆阳故城在叶县北舞阳故城在叶县东此时叶阳昆阳属秦舞阳属魏大事记叶阳今属汝州】听使者之恶也随安陵氏而欲亡之秦绕舞阳之北以东临许则南国必危矣【周纪注南国江汉之间又曰南阳也今详此时属韩正曰正义云南国今许州许昌县西南许昌故城此时属韩在魏之南故言南国大事记安陵在鄢陵县西北则去许汝不远矣愚按韩公云绕舞阳叶襄城其地皆壤界也故曰南国】南国虽无危则魏国岂得安哉【补曰魏国岂得安哉史作国无害大事记注引策文当从策】且夫憎韩不受安陵氏可也夫不患秦之不爱南国非也【补曰史不爱安陵氏下文可推大事记秦得南国则诸侯之势危矣魏不可以为非己地而不恤也】异日者【异犹他】秦乃在河西晋国之去梁也千里有余【言都绛安邑时】有【补补曰史无上文余字即以有字属河山云云策文则当有有字】河山以阨【元作兰下同】兰【阨入之阨正曰按字书阨门遮也阨门也牢也通作兰王莽传牛马同兰师古云兰谓遮兰则阨亦可通阨入之阨本作阨亦作兰於此义不切】之有周韩而间之从横【元作林】林军【横之军正曰史作林郷军林郷地名见芒卯谓秦王章大事记自秦伐林郷以来至于今也】以至于今秦十攻魏五入国中边城尽拔文台堕垂都焚【句阳有垂都亭正曰此引徐广说彼文元无都字补曰索隐云有庙曰都正义引括地志云文台在曹州冤句县索隐云文台台名大事记不取者岂以他策有台已燔游已夺之云与此类特泛言之邪堕许窥反】林木伐麋鹿尽而国继以围【补曰大事记赧王四十年穰侯围大梁】又长驱梁北东至陶卫之郊【卫在河淇之间与陶接故范蠡亦云】北至平阨【魏记注在东平须昌补曰史北至平监正义云平即兖州平陆监即故阨城在平陆县西南】所亡乎秦者山北【山吴华之属补曰史山南山北策无山南字疑缺文正义云山华山也华山之东南七国时邓州属韩汝州属魏华山之北同华银绥并魏地也】河外河内【补曰河外谓华州以东至陕虢河内谓蒲州以东至怀卫】大县数百名都数

十【补曰史大县数十名都数百】秦乃在河西晋国之去大梁也尚千里而祸若是矣又况於使秦无韩而有郑地无河山以阑兰之无周韩以间之去大梁百里祸必百此矣【补曰史作由此大事记从策文改】异日者从之不成也【元作矣补曰姚云矣刘作也史同】楚魏疑而韩不可得而约也今韩受兵三年矣【受秦兵】秦挠之以讲【以求地撓挠之】韩知亡犹弗听【补曰史识亡宜从策】投质於赵【质约也见下】而请为天下鴈行顿刃【鴈行言以次进补曰为去声】以臣之愚【?】观之则楚赵必与之攻矣此何也则皆知秦欲【补补曰史秦下有欲字大事记从之】之无穷也非尽亡天下之兵而臣海内之民必不休矣是故臣愿以从事乎王【补曰史无乎字大事记从策补】王速受楚赵之约而挟韩【衍魏字】魏【补曰字衍史无大事记以策补而字】之质以存韩为务因求故地於韩韩必効之如此则士民不劳而故地得其功多於与秦共伐韩然而无与强秦邻之祸夫存韩安魏而利天下此亦王之大时已【补曰史作天时大事记从策】通韩之上党於共莫使【使去音通其道不通他使将为关也正曰莫句补曰史作共甯下云使道安城出入赋之云云大事记从之正义云共卫州共城县甯怀州修武县解题云是时秦欲取韩上党故蠹食其地使与韩国中絶故劝魏假道使韩得与上党往来岂专为韩而已哉韩不失上党则三晋之势犹完也】道已通因而关之出入者赋之【赋征取】是魏重质韩以其上党也【质有要也正曰质犹贄韩以上党为质也】共有其赋【韩魏共之正曰史作今有当从策】足以富国韩必德魏爱魏重魏畏魏韩必不敢反魏韩是魏之县也魏得韩以为县则卫大梁河外必安矣【卫时已附梁】今不存韩则二周必危安陵必易【秦轻之也正曰易改易也】楚赵【衍楚字】楚【补曰字衍史无大事记从】大破魏齐甚畏【皆为秦所胜制】天下之西乡而驰秦入朝为臣之日不久【记有与上二章相次彪谓言秦之情者衆矣无白於此者也补曰大事记云信陵君之谏世家不载其从违亦不书与秦同伐韩取故地必以其言而止也信陵之言深切综练识天下之大势使魏能用其计纠率楚赵竭力助韩则韩不至失上党赵不至败长平六国不至为秦所吞矣谋既不用义以矫杀晋鄙流落於外六国垂亡魏始再用之犹能收合诸侯折强秦之锋若用之於上党长平未败之前天下雌雄之势未可量也此章大事记据史文具载又以策又易史之难通者注释甚详而於信陵惓惓曷重焉太史公谓说者皆以魏不用信陵君故国削弱至於亡天方令秦平海内魏虽得阿衡之佐曷益乎知几讥其舍人事而言天大事记之言殆为迁发也愚谓战国四公子并称特以好士之故黄歇乱人其事恶矣赵胜不能用赵奢廉颇而割地以召田单受冯亭之嫁祸几至亡国田文怒小丈夫之讥而灭一县不忍吕礼之嫉害而为宗国召兵尚奚足言哉其合从难秦歇既败嬴胜仅合楚赵之交以佐魏救独孟尝信陵两战败秦文临函谷无攻以求楚东国而名义索然信陵存赵却秦义烈甚高河外之战威震天下且退让不伐闻过能悔其才与智皆非余子比也因大事记称惜之言辄附着之】

秦赵构难而战【长平之役此十七年正曰秦赵之战多矣此策时不可考】谓魏王曰不如收【元作齐】齐【正曰齐上有脱字下文言齐可推】赵而构之秦【构者令其战也救赵而助之赵必与秦合战】王不构赵赵不以毁构矣【毁折也言不收赵赵不能以毁折之兵独与秦合战】而构之秦赵复鬪鬪必重魏是并制秦赵之事也王欲焉而收齐赵攻荆【欲意或欲也】欲焉而收荆赵攻齐欲王之东长之也【荆齐在魏东不乐属秦而欲魏为之长】待之也【待魏之东正曰荆齐赵皆在魏东长之为之长也待之待其事也欲王者此士愿

之之辞与上王欲焉不同也姚本长之下无也字】

长平之役平都君【田单正曰注非说见赵策】说魏王曰王胡不为从魏王曰秦许吾以垣雍【韩所得魏地补曰垣雍见前】平都君曰臣以垣雍为空割也魏王曰何谓也平都君曰秦赵久相持於长平之下而无决天下合於秦则无赵合於赵则无秦秦恐王之变也故以垣雍饵王也秦战胜赵王敢责垣雍之割乎王曰不敢秦战不胜赵王能令韩出垣雍之割乎【韩不畏秦故】王曰不能臣故曰垣雍空割也魏王曰善楼梧约秦魏【补曰姚注一作郢前有楼梧约秦魏即此人此时事也】将令秦王【昭正曰无据】遇於境谓魏王曰【或谓非梧正曰未见非梧】遇而无相【无相魏者】秦必置相不听之则交恶於秦听之则後王之臣将皆务事诸侯之能令於王上者【言处魏上而能使之从令若秦者补曰一本王之上者】且遇於秦而相秦者【相秦所置】是无齐也【独言齐者时君王后贤与齐敌也正曰注谬甚】秦必轻王之强矣【无齐助故】有齐者【羣臣能得齐事者】王不若相之齐必喜是以有齐者於秦遇秦必重王矣【补曰此时必魏合於齐将令之令平声】

十【补】八年【此八年春申未封正曰追称之辞】谓魏王曰昔曹恃齐【曹今定陶】而轻晋齐伐厘莒【厘疑扶风蔡正曰此不相涉齐策昔者莒莒好谋陈蔡好诈莒恃越而灭蔡恃晋而亡此厘字即莱左传公会郑伯於郕杜注厘城刘向引来牟作厘牟古字通】而晋人亡曹【史曹伯阳十五年背晋宋灭之哀公八年正曰即僖二十八年晋侯伐曹分曹卫田事凡言亡非必国灭也】繒恃齐而轻越【繒禹後属东海补曰姚本恃齐以扞越春秋鄆谷梁作繒杜注今琅邪鄆县】齐和子乱【太公田和正曰恐非】而越人亡繒【哀六年莒人灭鄆与此异补曰左氏莒人灭鄆鄆恃赂也注鄆有贡赋之赂在鲁恃之而慢莒此或讹为齐】郑恃魏以轻韩魏【补补曰此宜有魏字】伐榆关【九域图在平州界正曰大事记安王三年楚归郑榆关十一年魏韩赵败楚师于大梁榆关正义云榆关在郑之南大梁西】而韩氏亡郑原恃秦翟以轻晋秦翟平谷大凶而晋人亡原【僖二十五年原降使赵衰处原】中山恃齐魏以轻赵齐魏伐楚而赵亡中山【补曰周策宫他谓周君曰云云略同齐魏伐楚而赵亡中山此襄王十八年秦韩魏齐共败楚将唐昧事大事记谓史称赵与燕齐灭中山齐非】

【中山与国者亦未然说见燕赵等策】此五国所以亡者皆有【元作其】其所恃也非独此五国为然而已也天下之亡国皆然矣夫国之所以不可恃者多其变不可胜数也或以政教不修上下不辑而不可恃者或有诸侯邻国之虞而不可恃者或以年谷不登畜积竭尽而不可恃者【补曰一本畜作穡此书多作畜】或化於利【化犹移】比於患【比犹近】臣以此知国之不可必恃也今王恃楚之强而信春申君之言以是宾【元作质】质【补曰未详】秦而久不可知【久犹後】即春申君有变是王独受秦患也即王有万乘之国【即犹是】而以一人之心为命也臣以此为不完愿王之熟计之也

魏王问张旄曰吾欲与秦攻韩何如张旄对曰韩且坐而翬亡乎【翬胥同恃也补曰一本翬作胥】且割而从天下乎王曰韩且割而从天下张旄曰韩怨魏乎怨秦乎王曰怨魏张旄曰韩强秦乎强魏乎【问以何国为强】王曰强秦张旄曰韩且割而从其所强与所不怨乎且割而从其所不强与其所怨乎王曰韩将割而从其所强与其所不怨张旄曰攻韩之事王自

知矣【补曰此恐与信陵所谏同一事】

客谓司马食其【魏人音异基补曰索隐云酈审赵三人并以六国时卫有司马食其慕其名也】曰虑久以天下为可一者【虑久熟虑也】是不知天下者也欲独以魏支秦者是又不知魏者也谓兹公【指合从之人补曰兹公未详史夏侯婴食兹氏注太原县名春秋昭五年注莒邑者又地不相涉】不知此两者又不知兹公者也然而兹公为从其说何也从则兹公重不从则兹公轻兹公之处重也不实为期【言期约不可必】子何不疾及三国方坚也自卖於秦【谓陰倍从以收秦利】秦必受子不然横者将图子以合於秦是取子之资【从食其所资者从也】而以资子之讐也【谓横人皆以食其之从恶之於秦讐秦也正曰时与人不可考】

秦拔寧邑【此二十年正曰秦昭王四十一年魏冉已免相此十一年余说见赵策】魏王令人谓秦王【昭】曰王归寧邑吾请先天下讲【元从才从葍下同谓与秦讲】构魏【衍魏字】魏【补曰衍】冉曰王无听【无听其讲】魏王见天下之不足恃也故欲先讲构夫亡寧者宜割二寧以求讲构夫得寧者安能归寧乎

秦罢邯鄲攻魏取寧邑【正曰邯鄲赵都凡攻赵皆言邯鄲此策罢邯鄲必非赧王五十八年解邯鄲围时事且秦纪书拔寧新中次年赧王五十九年年表韩魏楚救赵新中而秦兵罢不闻卒拔也是岁赧王入秦而此云过二周攻王是二周无恙时也决为在前无疑寧新中非宁邑详见赵策】吴庆【吴人正曰无考】恐魏王之讲【元从才从葍】构於秦也谓魏王曰秦之攻王也王知其故乎天下皆曰王近也【近亲也天下以魏为亲秦故外之秦因攻之】王不近秦秦之所去【去犹远正曰王非亲秦乃秦之所欲攻去者】皆曰王弱也【无秦之助】王不弱二周【言实不弱视二周犹强也】秦人去邯鄲过二周而攻王者以王为易制也王亦知弱之召攻乎【若讲於秦复示弱也】

魏王欲攻邯战季梁【魏人非庄子所称正曰不可考亦不知何时】闻之中道而反衣焦不申【衣於行路犯风日故焦焦故不申濡润乃申耳】头尘不去【皆以欲见之速故不暇补曰焦卷申舒布也文选申作信去作浴】往见王曰今者臣来见人於大行【补曰行道也】方北面而持其驾告臣曰我欲之楚臣曰君之楚将奚为北面曰吾马良臣曰马虽良此非楚之路也曰吾用多【用所资也】臣曰用虽多此非楚路也曰吾御者善此数者愈善而离楚愈远耳今王动欲成霸王举欲信於天下恃王国之大兵之精锐而攻邯战以广地尊名王之动愈数而离王愈远耳犹至楚而北行也周肖【疑即霄正曰孟子记魏人若以为此人则非安厘之世矣】谓宫他曰子为肖谓齐王【王庭正曰无据事必在前】曰肖愿为外臣令齐资我於魏宫他曰不可是示齐轻也【肖魏臣而假重於外是示齐以无魏之重】夫齐不以无魏者以害有魏者【所不重为无肖是也正曰齐必不以无魏重者而害有魏重者不可示以无魏重也】故公不如示有魏公曰【令肖以此说齐】王【齐】之所求於魏者臣请以魏听齐必资公矣是公有齐以齐有魏也【因齐之资以得魏重肖当作霄】

信陵君杀晋鄙救邯鄲破秦人存赵国赵王【孝成】自郊迎唐雎【元作且】且谓信陵君

曰臣闻之曰事有不可知者有不可不知者有不可忘者有不可不忘者信陵君曰何谓也对曰人之憎我也不可不知也吾憎人也不可得知也【人不能知】人之有德於我也不可忘也吾有德於人也不可不忘也【补曰史云物有不可忘或有不可不忘大人有德於公子不可忘也公子有德於人愿公子忘之也语尤简洁】今君杀晋鄙救邯郸破秦人存赵国此大德也今赵王自郊迎卒然见赵王【卒猝同】臣愿君之忘之也信陵君曰无忌谨受教【彪谓唐睢当十一年求救年已九十余至是又十年其陈谊益高所谓耄期称道不乱者欤贤矣正曰史不云唐且恐有讹?说又见後章】

魏攻管而不下【补曰管见前策】安陵人【魏记注召陵有安陵】缩高其子为管守【补曰秦攻韩管而得之缩高之子为秦守者也通监纲目缩高之子仕於秦】信陵君使人谓安陵君曰君其遣缩高吾将仕之以五大夫使为持节尉【尉之持节者】安陵君曰安陵小国也不能必使其民使者自往请使道使者【使人道之】至缩高之所复信陵君之命【复犹重也信陵言之矣今申之】缩高曰君之幸高也将使高攻管也夫以父攻子守人大笑也【守人其子之人正曰守字句补曰一本標一作人之所大笑】见臣而下是背王也【王魏王正曰秦王】父教子背亦非君之所喜也敢再拜辞使者以报信陵君信陵君大怒遣大使之安陵曰安陵之地亦犹魏也【正曰说见下】今吾攻管而不下则秦兵及我【管在秦东可以扞魏正曰不得秦地必受秦攻】社稷必危矣愿君之生束缩高而致之若君弗致【补曰姚本此有也字】无忌将发十万之师以告【补曰姚本作造】安陵之城安陵君曰吾先君成侯【赵王也安陵属召陵召陵属魏而此谓成侯为先君盖先时两属赵魏故上曰犹魏】受诏襄王【赵襄子补曰大事记引作襄王见上】以守此地也手受大府之宪【大府谓魏受诏襄子而受魏之宪则此两属明矣宪法令也正曰大府之宪即受诏於襄子者上篇犹言第一篇也】宪之上篇曰子弑父臣弑君有常刑【补正曰有常即常刑也】不赦国虽大赦降城亡子【以城降人及亡人之子正曰亡人】不得与焉今缩高谨虽辞大位【补曰一本无谨字姚本谨解则虽乃谨之讹】以全父子之义而君曰必生致之是我负襄王之诏而废大府之宪也虽死终不敢行缩高闻之曰信陵君为人悍而自用也此辞反必为国祸吾已全已无违【元作为】为人臣之义矣【正曰无违人臣者不事二君之义】岂可使吾君有魏患也乃之使者之舍刎颈而死信陵君闻缩高死【衍素字】素【补曰字衍】服缟素避舍使使谢安陵君曰无忌小人也困於思虑【困犹不通】失言於君敢再拜释罪【拜所以谢也以安陵赦其罪故谢彪谓缩高之义直而善处死夫以信陵之愎而好遂高不死必加兵安陵城破之日固不免死而以此死易一国之命可不谓仁乎正曰信陵君贤而服义使其再闻安陵之辞亦将翻然而悔矣师不以直逞欲残民决不为也缩高不忍须臾之死而成其过惜哉补曰按上章无忌书谓王之使者譖安陵於秦而此策云云未详管守子守之守使者大使之使皆去声】魏王与龙阳君【魏之幸臣正曰幸姬也策言美人又云拂枕席此非楚安陵君鄢陵君壽陵君赵建信君之比长孙佐辅于武陵等诗用前鱼字皆以宫人言之】共舩而钓龙阳君得十余鱼而涕下王曰有所不安乎如是不相告也对曰臣无敢不安也王曰然则何为涕出曰臣为臣【元作王】王【补曰以己之得鱼推言王】之所得鱼也王曰何谓也对曰臣之始得鱼也臣甚喜後得又益大今臣直欲弃臣前之所得矣今以臣之凶恶而得为王拂枕广【补曰一本今以臣凶恶按孟子恶人注谓丑貌人此疑衍凶字或之字讹】今臣爵至人君走人於庭【在庭则人为之趋走】避人於途【在途则行者避补曰避一本作

辟宜音辟】四海之内美人亦甚多矣闻臣之得幸於王也必褰裳而趋大王【褰揭也】臣亦犹曩臣之前所得鱼也臣亦将弃矣臣安能无涕出乎魏王曰误【以不告为误正曰误犹言误矣当句然恐是諛字讹】有是心也何不相告也於是布令於四境之内曰有敢言美人者族【死及其族】由是观之近习之人其摯谄也固矣【势犹进正曰摯说文相持也又字同摯质义亦可同】其自羈【元作纂】纂系【元作繁】繁【补曰恐当作系】也完矣【羈覆也言自口自结於王正曰高注帽覆似亦作羈义按纂组类固结之义】今由千里之外欲进美人所効者庸必得幸乎假之得幸庸必为我用乎【我谓欲进之人正曰为我用犹言如我宠上句言未必得幸此句言假使得幸未必如我也】而近习之人相与怨我见有祸未见有福见有怨未见有德非用智之术也【正曰此策不知何王未可以安厘襄哀之世遂附之也】

或谓魏王王警四疆之内【将出兵先令以警之】其从於王者【凡兵械当从者】十日之内备不具者死王因取其游【旄旗之旒】之舟上系之【之犹於也亦以楚攻秦】臣为王之楚王晁【补曰一本作胥】臣之反而行【行兵】春申君闻之谓使者【即此说者】曰子为我反无见王矣【欲其亟反不必见考烈】十日之内数万之衆令涉魏境秦使闻之以告秦王【庄襄】秦王谓魏王曰大国有意必来以是而足矣【秦恐楚魏合故言魏兵自足不待楚也今详春申在时魏岁受秦兵惟此三十年无忌卒五国攻秦可当此语此及下二章元作韩策正曰事证未明】

魏鞅【魏人为魏说正曰一本观鞅史作观津人朱英见楚策 史楚考烈王二十二年诸侯合从西伐秦楚王为从长春申君用事至函谷关秦出兵攻诸侯兵皆败走考烈王以咎春申君以此益疎客有云云於是去陈徙壽春】谓春申曰人皆以楚为强而君用之弱也其於鞅也不然先君者【先春申用事之人】二十余年未尝见攻今秦欲踰兵於郢【元作澠】澠【补曰澠即郢】隘之塞【魏记所谓冥厄注楚险塞或以为江夏郢县补曰详见楚策注】不使【补曰史作便是不便句絶下与不可对文】假道两周倍韩以攻楚不可【倍音背此昔者所以未尝见攻】今则不然魏且旦暮亡矣不能爱其许鄢陵与梧【梧属楚国此时为魏正曰汉侯国梧属彭城与许鄢陵不相接左传襄十年晋师城梧及制杜注皆郑旧地制即虎牢梧必相近此时郑为韩按史云不能爱许鄢陵其许魏割以予秦秦兵去陈百六十里以此参较则策有缺误徐广云陈在许东南盖此时楚徙都陈也】割以予秦相【补】去百六十里【言秦伐楚之近不须假道】臣之所见者秦楚鬪之日近【元作也】也【正曰史作秦楚之日鬪也此策鬪字殺次在之日上】已【正曰元在韩策今详其文当属楚】

安邑之御史死其次恐不得也输人【输安邑里名】为之谓安邑【补补曰宜有邑字大事记有】令曰公孙綦为人请御史於王王曰彼固有次吾难败之因遽置之【令闻王言故立其次补曰一本有次乎吾难败其法因遽置之 大事记前汉百官表监御史秦官掌监郡此策云云六国已遣御史监郡矣非独秦也正曰魏都安邑在惠王未徙大梁前昭王十年献安邑於秦章次不当在此】

景闵王【安厘王子补曰名增元年秦始皇五年己未】

秦攻魏急【始皇五年攻魏取二十城此元年正曰说见後】或谓魏王曰【补曰乳丛子云秦急攻魏魏王恐或谓子顺曰如之何荅曰吾私其计然岂能贤於执政故无言焉魏王闻之驾如孔氏亲问焉曰国亡矣如之何对曰云云下文并同】弃之不如用之之易也【弃谓战而丧地用谓割地赂之正曰见下】死之不如弃之之易也【死谓败死】能弃之弗能用之能死之弗能弃之此人之大过也【补曰孔丛子注云弃其地不如用其地以攻守为易死其地不如弃其地以图存为易盖当计其势如何尔在弃之用之得其宜】今王亡地数百里亡城数十而国患不解是王弃之非用之也今秦之强也天下无敌而魏之弱也甚而王以是宾【元作质】质【正曰孔丛子注云景闵为太子时尝质於秦】秦王又能死而弗能弃之此重过也今王能用臣之计亏地不足以伤国卑体不足以苦身解患而怨报【怨谓不韦主攻者也】秦自四境之内执法以下【执政之臣】至於长挽者【长为挽车之人】故毕曰【毕犹尽】与嫪氏乎【嫪毒秦太后私人】与吕氏乎【不韦也此言与嫪氏耳】虽至於门闾之下廊庙之上犹之如是也今王割地以赂秦以为嫪毒功【因毒而割故功在毒】卑体以尊秦以因嫪毒王以国赞嫪毒【毒贵矣今又因之以割是以魏助之也】以嫪毒胜矣【以不败为胜】王以国赞嫪毒太后之德王也深於骨髓王之交最为天下上矣【补曰孔丛子注言太后德王则秦不加兵是乃王以此交秦为天下之上矣】秦魏百相交也百相欺也【言昔之交皆卒归於欺】今由嫪氏善秦而交为天下上天下孰不弃吕氏而从嫪氏【时二人已恶】天下必舍【元作合】合【补曰恐合字讹大事记作舍】吕氏而从嫪氏则王之怨报矣【补曰大事记以此章附见於始皇八年封嫪毒长信侯之下谓嫪吕争权略见於此景闵元年秦拔二十城策言亡地数百里亡城数十则此在後矣二年拔朝歌三年拔汲大事记所书则拔汲之年所谓秦攻魏急者盖其时矣补曰大事记曰子顺进退有圣贤之风宁忍出此乎】

秦王【始皇】使人谓安陵君曰寡人欲以五百里之地易安陵安陵君其许寡人安陵君曰大王加惠以大易小甚善虽然受地於先王愿终守之弗敢易秦王不说安陵君因使唐雎【元作且下同】且使於秦秦王谓唐雎且曰寡人以五百里之地易安陵安陵君不听寡人何也且秦灭韩【十八年】亡魏【二十一年】而君以五十里之地存者以君为长者故不错意也【补曰错置也】今吾以十倍之地请广於君【广其地正曰设辞易地实欲得之当识其意】而君逆寡人者轻寡人与唐雎且对曰否非若是也安陵君受地於先王而守之虽千里不敢易也岂直五百里哉秦王怫然怒谓唐雎且曰公亦尝闻天子之怒乎唐雎且对曰臣未尝闻也秦王曰天子之怒伏尸百万流血千里唐雎且曰大王尝闻布衣之怒乎秦王曰布衣之怒亦免冠徒跣以头抢地耳【抢突也补曰太史公语本此说苑作颡地师古曰抢千羊反】唐雎且曰此庸夫之怒也非士之怒也夫专诸之刺王僚也【僚吴王昭二十七年】彗星袭月聂政之刺韩傀也【傀韩相见韩策及刺客传】白虹贯日要离之刺庆忌也【吴越春秋要离吴人吴王阖闾欲杀王子庆忌要离诈以罪亡令吴王焚其妻子走见庆忌以劒刺之】仓鹰击於殿上【补曰仓即苍】此三子皆布衣之士也怀怒未发休祲降於天【休吉徵祲戾气自三子言之为吉正曰说文祲精气感祥也此休字犹言祥】与臣而将四矣若士必怒伏尸二人流血五步天下缟素今日是也挺劒而起秦王色挠【挠扰也正曰挠屈也奴効反】长跪而谢之曰先生坐何至於此寡人谕矣【谕晓也】夫韩魏灭亡而安陵以五十里之地存者徒以有先生也【雎自厘十一年求救至是五十余年矣彪谓雎刺劫之士自曹

沫以至荆轲皆不闻道惟若唐睢者可也为其激而发不专志於此也正曰唐且之名见於策者不一秦策应侯遣唐且载金之武安散天下士魏安厘王十一年唐且说秦是时应侯始相睢老於魏不应复为秦用又一唐且也且为魏说秦时九十余至与信陵君语相去十年已百岁为安陵君使秦有灭韩亡魏之言魏亡在始皇二十二年上去说秦凡四十二年决不存矣又一唐且也楚策唐且见春申君又一唐且也新序秦政魏司马唐且諫曰段干木云云当文侯时人一唐且也魏谓此策文其明而事多难信以始皇之兴灭何惮於安陵而易以五百里地是特为之辞而使之纳地耳唐且之使愚矣虽抗言不屈岂终能沮之乎荆轲之见也匿匕首於图秦法侍者不得操兵此云挺劒而起何也其辞固多夸矣】

战国策校注卷七

卷八

<史部,杂史类,战国策校注>

钦定四库全书

战国策校注卷八 宋 鲍彪 原注

元 吴师道 补正

韩【分晋得南阳及颍川之父城定陵襄城颍阳颍陰长社阳翟东接汝南西接弘农得新安宜阳正曰郑今河南之新郑及成臯荥阳颍川之崇高城阳鲍引汉地理志为南郑亦韩地而独遗不取误矣】

康子【补曰名虎】

三晋已破智氏将分其地段规谓韩王曰分地必取成臯【补曰见秦策】韩王曰成臯石溜之地也【溜言甚无积润补曰溜言多山石水所溜也】寡人无所用之段规曰不然臣闻百里之厚而动千里之权者地利也千人之衆而破三军者不意也【言地薄郑人不备正曰言地险寡足破衆】王用臣言则韩必取郑矣【正曰取郑在哀侯二年】王曰善【诸称王皆非当时语】果取成臯至韩之取郑也果从成臯始大

烈侯【景侯元年安王三年壬午正曰当云景侯?子元年史列侯取列烈通】

韩傀相韩【补曰史作韩相侠累索隐引高诱云韩傀侠累也今注本无侠古侠反累力追反韩非子傀作庖艺文类聚引作韩偃今按傀字呼乖徒回姑回矩鲋户贿等反不一傀与侠累字音有差互讹转说又见後】严遂重於君二人相害也严遂政议直指【政正同】举韩傀之过韩傀以之【犹以此】叱之於朝严遂拔劔趋之以救解【以救至得解】於是严遂惧诛亡去游求人可以报韩傀者至齐齐人或言轹深井里【轹之里名深井补曰轹即河内轹正义云深井里在怀州济源县南三十里政时客游此】聂政勇敢士也避仇隐於屠者之间严遂陰交於聂政以意厚之聂政问之曰【补曰一本问曰姚同】子欲安用我乎严遂曰吾得为役之日浅事今薄【薄犹近】奚敢有请於是严遂乃具酒自觴聂政母前【补曰一本其酒觴姚同】仲子奉黄金百镒【仲子遂字补曰索隐引高诱云严遂字仲子今本无】前为聂政母壽聂政惊愈恠其厚固谢严仲子【补曰一本固谢史姚同】仲子固进而聂政谢曰臣有老母家贫客游以为狗屠可旦夕得甘脆【肉之肥美者正曰说文甘美也脆小栗物易断也】以养亲亲供养备义不敢当仲子之赐严仲子辟人【辟犹屏辟去之】因为聂政语曰臣有仇而行游诸侯衆矣然至齐闻足下义甚高故直进百金者特以为丈人羶粦之费【丈人亦尊称政也粟十六斗为一秉?米一斛曰粦补曰一本夫人史姚同韦昭云古者尊大姬爲夫人又或作大人 粦落盖反又力制郎达二反】以反足下之謹【补曰一本交足下史

姚同反字必误】岂敢以有求邪聂政曰臣所以降志辱身居市井屠者幸以养老母【以有养为幸】老母在前【在未死前】政身未敢以许人也【补曰一本居市井者徒幸而养老母老母在史姚同无前字】严仲子固让聂政竟不肯受然仲子卒备宾主之礼而去久之聂政母死既葬除服聂政曰嗟乎政乃市井之人鼓刀以屠而严仲子乃诸侯之卿相也不远千里枉车骑而交臣臣之所以待之者至浅矣【补曰一本至浅鲜矣史姚同】未有大功可以称者而严仲子举百金为亲寿我义不受【补曰一本我虽不受史姚同】然是深知政也夫贤者以感忿睚眦之意【感言动心睚眦怒视也补曰师古曰睚音厓举眼也眦即皆反谓目匡也言举眼相忤者即杀之也一说睚五懈反眦士懈反瞋目貌】而亲信穷僻之人而政独安可嘿然而止乎且前日要政政徒以老母老母今以天年终政将为知己者用遂西至濮阳【补曰汉濮阳县属东郡春秋时帝丘也】见严仲子曰前日所以不许仲子者徒以亲在今亲不幸而死【补曰一本无而死二字姚同】仲子所欲报仇者【补曰一本仇者为谁史姚同】请得从事焉【补曰一本无此五字姚同史有】严仲子具告曰臣之仇韩相韩傀【补曰一本韩相傀姚同】傀又韩君之季父也宗族盛多居处兵卫甚设【设陈也补曰一本无多居处甚四字史有】臣使人刺之终莫能就今足下幸而不弃请益具车骑壮士以为羽翼政曰韩与卫相去中间不远【事泄易闻补曰一本韩与卫中间不远无相去二字姚同史有司马贞引高诱云韩都颍川阳翟卫都东郡濮阳故云云今注本无】今杀人之相相又国君之亲此其势不可以多人多人不能无生得失【谓相可否】生得失则语泄【补曰索隐云策作无生愔言所将人多或生异情语泄今本无此文】语泄则韩举国而与仲子为讎也岂不殆哉遂谢车骑人徒辞独行仗劒至韩【仗兵器也盖以劒为兵正曰仗执持也】韩适有东孟之会【东孟地缺补曰索隐引高注东孟地名今本无】韩王及相皆在焉持兵戟而卫侍者甚众【补曰一本无侍字史姚同】聂政直入阶刺杀韩傀【补曰姚本无杀字】韩傀走而列【元作哀下同】哀侯【按厘侯策及传皆言哀侯史记及年表皆书列侯策传可为误年不可移也补曰说见後】聂政刺之兼中列哀侯左右大乱聂政大呼所击杀者数十人【补曰一本无击字姚同史有】因自面皮【去面之皮补曰索隐云以刀刺其面皮欲令人不识列女传作披盖以刀斨面而去其皮也】抉腹屠肠【抉排也补曰史作决一本自屠出肠史姚同】遂以死韩取聂政屍暴於市县购之千金【县金募知者】久之莫知谁【补曰一本谁子史姚同】政姊嫪【补曰一本无嫪字姚注刘有嫪么茎反史作荣】闻之曰吾弟至贤【补曰姚本无吾字】不可爱妾之躯灭吾弟之名非弟意也【言往哭自吾意耳】乃之韩视之曰勇哉气矜之隆【矜自持也】是其轶赅育【轶车相出也】高成荆矣【说文成荆古之勇士今对贲豫复似两人补曰姚本云高吕氏春秋豫让必死於襄子而赵氏皆恐成刑致死于韩王而周人皆畏按此对豫让言则一人也】今死而无名【不显其人】父母既歿矣兄弟无有此为我故也【不显其名恐累及姊】夫爱身不扬弟之名吾不忍也乃抱屍而哭之曰此吾弟軹深井里聂政也亦自杀於屍下晋楚齐卫闻之曰非独聂政之能乃其姊者列女也【列义列可陈正曰列烈通补曰一本非独政之能乃其姊者亦列女也姚同】聂政之所以名施於後世者其姊不避菹醢之诛【菹醢菜也言剉断之如此补曰周礼注疏蠃菹之类菜肉通称全物若?为菹记文醢肉醬】以扬其名也【此三年书政杀韩相侠累刺客传有彪谓政之始终於其亲孝矣其临财也义矣尝欲评其死感其义烈不忍下笔独以谓人之居世不可不知人亦不可妄为人知也遂唯知政故得行其志惜乎遂徧徧徇细人耳政不幸谬为所知故死於是使其受知明主与贤相则其所成就岂不有万万於此者乎哀哉补

曰大事记按史记韩世家烈侯三年聂政杀韩相侠累十三年烈侯卒子文侯立十年卒子哀侯立六年韩严弑其君哀侯聂政之刺侠累与哀侯之弑相去远矣而聂政传乃谓严仲子事哀侯与韩相侠累有仇使政刺累与世家不合盖其氏偶同故刺客传误以为哀侯之时策曰东孟之会韩王及相皆在焉聂政刺韩傀兼中哀侯又曰聂政刺相兼中哀侯许异楚哀侯而殪之是故哀侯为君而许异终身相焉考之世家哀侯既弑其子懿侯即立许异将谁相哉侠累既死烈侯犹在位十年谓之终身相可也则此乃烈侯三年之事但战国策误以为哀侯耳又烈王五年韩严遂弑哀侯解题引正义云纪年晋桓公邑哀侯於郑韩山坚贼其君哀侯而立韩若山山坚即韩严也若山即懿侯也愚按此事国策误合二事为一司马迁两存而不决故温公与刘道原书苏氏古史皆疑之大事记考之未尽且史记年表世家两书韩严是聂政之事乃严遂而弑哀侯者乃韩严大事记谓氏偶同又不知韩严遂韩严国氏名交混也通监书严遂弑哀侯大事记因之未改当从史书韩严纲目书废遂下注哀侯以韩廙为相而忧韩遂二人相害遂刺廙于朝并中哀侯亦仍误也正曰史迁作刺客传失在樊盗而年表书盗杀韩相侠累独为得春秋书法纲目大事记不能易也父母遗体不敢毁伤以不义而灭其身得为孝乎非有夙昔之遇如智伯之於豫让非有累世之恩如韩之于子房以欲执仇之故厚已而使为不义得为知己乎鲍陈说区区陋矣补曰姊嫫之死盖兄弟之义策述其言以为不爱身以扬弟之名而说者徒知论名而不及义此皆战国之习也史记云使政知姊无憍忍之志不重暴骸之难必絶险千里以列其名姊弟俱戮於韩市者亦未必敢以身许仲子也列女传云嫫仁而有勇不怕死以灭名诗云死丧之威兄弟孔怀云云此之谓也愚谓子长得政之情子政得嫫之志然一则曰列其名一则曰不灭名犹免世俗之失也】

昭侯【庄侯子元年显王十一年癸亥】

成午从赵来谓申不害於韩曰子以韩重我於赵请以赵重子於韩是子有两韩而我有两赵也【补曰史申不害者荆人也故郑之贱臣学术以干韩昭侯用为相】

魏之围邯郸也申不害始合於韩王然未知王之所欲也恐言而未必中於王也王问申子曰吾谁与而可【与魏耶赵耶】对曰此安危之要国家之大事也臣请深惟而苦思之【惟亦思】乃微谓赵卓韩鼂曰子皆国之辩士也夫为人臣者言可必用【可岂可】尽忠而已矣二人因各进议於王以事【补曰一本各进】申子微视王之所说以言於王王大说之【补曰此术之最下者】

申子请仕其从兄官【仕其从父兄以官正曰注赘】昭侯不许也申子有怨色昭侯曰非所谓学於子者也从子之请而废子之道乎又将专行子之术而废子之请乎子尝教寡人循功劳视次第今有所求此我将奚从乎【此如此补曰此当属下句读】申子乃避舍请罪曰君真圣人也

苏秦为赵【元作楚下同】楚【补曰字误恐当作赵】合从说韩王曰韩北有巩落【竝属河南】成臯之固西有宜阳常阪之塞【常史作商殷纪注商今上洛是也补曰正义云商阪即商山在商洛县南亦曰楚山武关在焉】东有宛穰洧水【穰属南阳洧水出颍川阳城】

南有陁山【补曰见前】地方千里带甲数十万天下之强弓劲弩皆自韩出谿子少府【下皆弩名倣真训注谿子国名夷名又谿子阳匠名徐注少府所造】时力距来【徐注作之得时力倍於常其劲足以距来敌正曰徐注距来者谓弩势劲利足以云云】皆射六百步之外韩卒超足而射【举跼踏弩】百发不暇止远者达智近者掩心【箭中心上如掩】韩卒之劒戟皆出於冥山棠谿墨阳合伯邓师宛冯【司马彪注冥山在相州北汝南吴房有棠谿亭修务训注墨阳美劒名合伯地缺邓师岂南阳邓耶犹云洛师荥阳有冯池正曰相州北非韩地余见下】龙渊大阿【吴越春秋楚王召风胡子曰吴有干将越有欧冶寡人欲因子请因二人作劒风胡见二人作劒二其名云以上类言以地名正曰修务训注云墨阳之莫邪则墨阳地名合伯史作合膊姚本合山膊注曾无伯字索隐云邓国有工铸劒因名邓师宛人於冯池铸劒故名宛冯晋大康地理记汝南西平有龙泉可淬刀劒今按上说冥山棠谿龙渊地名邓师宛冯人名兼地大阿劒名合膊等未详】皆陆断马牛水击鹄雁当敌即斩坚甲盾鞬鍪【盾櫓鞬革履鍪兜鍪说文鍪鉤属鍪大口釜盖鍪如之补曰韵书鞬鍪首铠也】铁幕革抉【音筏】芮【史并不注补曰索隐云铁幕谓以铁为臂胫之衣以革为射决决射鞬也按诗决拾传决以象骨为之着右手大指以鉤弦阖体拾以皮为之着於左臂以遂弦恐此革即拾抉即决也索隐即以为一物盖据说文鞬射臂决之文也亦通索隐云与鞬同谓楯也芮音如字谓系楯之纷纆也愚按音伐即诗所谓蒙伐者字皆通借史云当敌则斩坚甲铁幕革抉芮无不毕具故说者上文以甲字句谓其劒皆能斩之策文不可从此读当以斩坚句而甲盾以下属无不具之文】无不毕具以韩卒之勇被坚甲跼劲弩带利劒一人当百不足言也夫以韩之劲与大王之贤乃欲西面事秦称东藩筑帝宫受冠带祠春秋交臂而服焉夫羞社稷而为天下笑无过此者矣是故愿大王之熟计之也大王事秦秦必求宜阳成臯令兹効之明年又益求割地与之即无地以给之不与则弃前功而後更受其祸且夫大王之地有尽而秦之求无已夫以有尽之地而逆无已之求此所谓市怨而买祸者也不战而地已削矣臣闻鄙语曰宁为鸡口无为牛後【补曰正义云鸡口虽小乃进食牛後虽大乃出粪大事记取】今大王西面交臂而臣事秦何以异於牛後乎夫以大王之贤挟强韩之兵而有牛後之名臣窃为大王羞之韩王忿然作色攘臂按劒仰天太息曰寡人虽死必不能事秦今主君以赵楚【补曰字误史正作赵】王之教诏之敬奉社稷以从【传在燕赵後云宣惠王今按合从在燕文公二十八年赵肃侯十六年此二十五年又苏秦传说六国後去赵而从约解是岁燕易王立徐注云自初说燕至此三年宣惠之元年也此时从已解则说从时非宣惠明矣沈括辨以为鸡口牛从今按秦称牛後盖以恶语侵韩故韩侯怒而从之鸡口牛从谬误也正曰大事记显王三十五年苏秦说燕与赵合从燕文公纳之赵三十六年苏秦说赵肃侯以六国合从按史年表是岁韩昭侯二十六年高门成而昭侯卒子宣惠王立苏秦说宣惠王盖昭侯卒後尔鲍序次非索隐引延笃云宁为鸡口不为牛从口鸡中主从牛子也沈说亦有所本也】

宣惠王【昭侯子元年显王子十七年己丑】

宣王谓繆留【韩人补曰繆居尤反汉有繆氏通监事记作繆监即阡魏策阡史作监田世家亦作监止】曰吾欲两用公仲公叔其可乎对曰不可晋用六卿而国分简公用田成阡止而简公弑【齐事见哀十四年】魏两用犀首张仪而西河之外亡【秦惠八年魏纳河西仪时为秦客卿未相魏也後至魏襄十三年相仪仪留四年去而衍相未尝两用未尝亡也此岂为

秦良造仪为客卿时魏以事听之邪正曰大事记魏惠後十三年张仪相魏魏不事秦秦以公孙衍代相仪留魏四岁後说襄王久之乃去二人更迭用衍相仪留犹两用也魏亡河西地大概言之不必两人为相时也大事记魏惠後五年以少梁与秦引此策云秦至是尽得河西地则犀首张仪之力是时二人皆信用於秦云云】今王两用之其多力者内树其党其寡力者藉外权羣臣或内树其党以擅【正曰韩子作骄】其主或外为交以裂其地则王之国必危矣【彪谓此非天下之正议也顾所用如何耳使得人如周召两用之庸何伤若公仲公叔也一之谓甚何必两补曰胡氏管见谓樛留之论似是而非不可遂以为法使所用而贤则一人而足不虞其专擅左右参副不虞其比党使其不贤则一人足以丧国又况二三其衆乎意者留於仲叔陰有所附欲国柄归一而不分故危言以动其君耳大事记云韩虽两用仲叔以战国策考之仲实专政叔亦间用事终不若仲之权宠也愚按鲍说有与胡氏合者而不得留之情故引以着之按此策宣惠欲两用非已用也当时叔之事不着意其止於用仲而仲叔并用实襄王之世以其争主几瑟公子咎知之也公仲卒不胜公叔则公叔又重矣二人争权樛留之言遂验是以帝王之要知人而后官人九经之序尊贤而后敬大臣则无患乎此矣】

楚昭献相韩秦且攻韩韩废昭献昭献令人谓公叔曰不如贵昭献以固楚秦必曰楚韩合矣【正曰此策不知何时按策有云几瑟公叔之讎而昭献公叔之人也又甘茂与昭献遇於境在未围雍氏时其相韩见周策必在宣惠之後】秦攻陜【此时史不书後至桓惠九年秦拔我陜然陈轸张仪同时仪死至桓惠九年四十六年矣轸必不存故因旧】韩使人驰南阳之地【驰反走示服也】秦已驰【驰进也韩避之而秦进也】又攻陜韩因割南阳之地秦受地又攻陜陈轸谓秦王【惠】曰国形不便故驰交不亲故割今割矣而交不亲驰矣而兵不止臣恐山东之无以驰割事王者矣且王求百金於三川而不可得求千金於韩一旦而具今王攻韩是絶上交而固私府也【言利移於下正曰即所谓无以驰割事王者】窃为王不取也

秦韩战于浊泽【长社浊泽补曰大事记韩与赵魏伐秦秦使庶长樛里疾与战修鱼虜韩将申差解题云浊泽即修鱼之地】韩氏急公仲朋【元作明】明【补曰当作朋大事记显王三年魏公子景贾伐韩与韩将韩明战于阳此人在公仲前】谓韩王曰与国不可恃【与谓山东】今秦之心欲伐楚王不如因张仪为和於秦赂之以一名都与之伐楚此以一易二之计也韩王曰善乃敝公仲之行【敝犹戒】将西讲於秦楚王【怀】闻之大恐召陈轸而告之陈轸曰秦之欲伐我久矣今又得韩之名都一而具甲【以一都之赋为兵备】秦韩并兵南乡此秦所以庙祠而求也今已得之矣楚国必伐【补曰一本伐矣】王听臣为之敝四境之内选师言救韩令战车满道路发信臣多其车重其币使信王之救已韩为不能听我【使其或不能从我以与秦战补曰一本救已也纵韩】韩之德王也【恩救我补曰一本韩必德王此以上姚同文胜】必不为鴈行以来是秦韩不和兵虽至楚国不大病矣为能听我絶和於秦秦必大怒以厚怨於韩韩得楚救必轻秦轻秦其应秦必不敬是我因秦韩之兵而免楚国之患也楚王大说乃敝四境之内选师言救韩发信臣多车币【补曰一本复作多其车重其币】谓韩王曰敝邑虽小已悉起之矣愿大国遂肆意於秦敝邑将以楚殉韩【殉言以死从之】韩王大说乃止公仲公仲曰不可夫以实告我者秦也以虚名救我者楚也恃楚之虚名轻絶强秦之敌必为天下笑矣且楚韩非兄弟之国也又非素约而谋伐秦矣【补曰一本

矣作也姚注刘作也】秦欲伐楚楚以起师言救韩此必陈轸之谋也且王已使人报於秦矣今弗行是欺秦也夫轻强秦之祸而信楚之谋臣王必悔之矣韩王勿听遂絶和於秦秦果大怒兴师与韩氏战於岸门【後志颍陰有岸亭事在十九年此要终言之也补曰徐广云岸门即岸亭正义引括地志云在许州长社县西北又韩世家太子仓入质于秦以和魏年表又书秦走犀首岸门盖救韩而败也】楚救不至韩氏大败韩氏之兵非削弱也民非蒙愚也兵为秦禽智为楚笑过听於陈轸失计於韩朋明【补曰明】也【记十六年有彪谓二子皆亿中之材也宣惠誡於其言惑于重币虽有公仲之谋固难以入至於非兄弟非素约而以虚名救我此言岂不明着矣乎如之何弗听也正曰鲍尝谓陈轸少捭阖风气故此以亿中称之此策非捭阖而何】

顏率见公仲公仲不见顏率谓公仲之谒者曰公仲必以率为阳也【阳佯同不实也补曰一本阳作場姚注刘作阳】故不见率也公仲好内【齐世家注内妇官也】率曰好士公仲嗇於财率曰散施公仲无行率曰好义【所谓不实】自今以来率且正言之而已矣公仲之谒者以告公仲公仲遽起而见之【彪谓顏率此言可行公仲而已诚有是也虽阳言何益於德苟无是也正言之吾何惧以是知公仲非躬行者也】

襄王【宣王子补曰名仓元年赧王四年庚戌】

张仪为秦连横说韩王曰【补曰此元年】韩地险恶山居五谷所生非麦而豆民之所食大抵豆饭藿羹【藿菽之少者补曰姚云史记後语作饭菽而麦下文亦作菽古语只称菽汉以後方呼豆按此非麦即豆也麦少又以豆饭】一岁不收民不厌糟糠地方不满九百里无二岁之所食料大王之卒悉之不过三十万而厮徒负养【负荷养牧之人正曰索隐云负养者负担以给养公家厮徒见魏策】在其中矣为除守徼亭障塞【徼巡也亦关境上补曰汉书徼外顏云徼塞也取徼遮之义字音叫】见卒不过二十万而已秦带甲百余万车千乘骑万匹虎贲【元作摯】摯【正曰摯摯通礼记蚤摯摯兽】之士【摯击鸟正曰凡鸟之猛兽之猛皆曰摯】跽【音徒】踬【音俱说文天寒足踬与此不合史注跳跃也补曰跽犹下文徒程此谓徒跽也义与科头協】科头【不着兜鍪】贯颐【贯人之颐正曰此说似与上文不类索隐曰两手捧颐而直入敌言其勇贯与捧亦不通刘辰翁云贯颐谓见射犹奋戟不顾死也则此连下文奋戟为义】奋戟者至不可胜计也秦马之良戎兵之衆探前蹶【元作跽】蹶後【字书无蹶字蹶跳也正曰说文蹶马行貌西都赋要蹶追踪音古冗反索隐云谓马前足探向前後足蹶於後蹶谓抉地言马走势疾前後蹄间一掷而过二寻也八尺曰寻】蹄间二寻【补曰一本此有腾字姚注曾添腾者二字】者不可胜数也山东之卒被甲冒胄以会战【胄兜鍪】秦人捐甲徒跣以趋敌【?裸也】左挈人头右挟生虏夫秦卒之与山东之卒也犹孟贲之与怯夫也以重力相压犹乌获之与婴儿也夫率孟贲乌获之士以攻不服之弱国无以异於堕千钧之重集於鸟卵之上必无幸矣【幸其不破碎无是理也】诸侯不料兵之弱食之寡而听从人之甘言好辞比周以相饰也皆言曰听吾计则可以强霸天下夫不顾社稷之长利而听须臾之说诖误人主者【诖亦误也补曰汉语诖误本此】无过於此者矣大王不事秦秦下甲?宜阳断絶韩之上地东取成臯宜阳则鸿台之宫桑林之苑【桑林在亳修务训言汤祷于桑山之林则似指言多桑之山非地名也正曰鸿台桑林韩台苑非汤所祷】

者也太平御覽作乐林】非王之有已夫塞成臯絕上地则王之國分矣先事秦則安矣不事秦則危矣夫造禍而求福計淺而怨深逆秦而順趙【元作楚】楚雖欲無亡不可得也故為大王計莫如事秦秦之所欲莫如弱楚而能弱楚者莫如韓非以韓能強於楚也其地勢然也今王西面而事秦以攻楚【衍為字】為【補曰一本無】敝邑秦王必喜【惠文】夫攻楚而私其地轉禍而說秦計無便於此者也是故秦王使使臣獻書大王御史須以決事韓王曰客幸而教之請比郡縣筑帝宮祠春秋稱東藩効宜陽【彪謂橫人之辭真所謂虛喝者韓之兵信弱食信寡矣獨不曰從合則能以弱為強以寡為多乎惜乎世主不少察於此也補曰甘茂攻宜陽在後此云効者請効之也儀歸而約敗矣】

鄭強【鄭公族韓滅鄭故為韓人補曰此人嘗請秦伐韓魏策亦有其人蓋游說秦楚之間者此豈以為韓而走儀故次之韓欤】之走張儀於秦【譖之於秦使逐之】曰儀之使者必之楚矣故謂太宰【楚官疆謂之】曰公留儀之使者【留之者欲詐為儀使之致地】強請西圖儀於秦故因西【補曰姚本作而】請秦王【武】曰張儀使人致上庸之地【秦惠十三年取上庸今言儀致之楚欲以怒秦】故使使臣再拜謁【強偽為楚使白此於秦下衍秦王字】秦王秦王怒張儀走【武元年此二年】宜陽之役【秦三年此四年】楊佺【賁人補曰佺即達字訛姚本正作達余說并見秦策】謂公孫顯曰請為公以五萬攻西周得之是以九鼎市甘茂也【茂與顯爭國顯得九鼎其功大秦必棄茂用顯】不然秦攻西周天下惡之其救韓必疾則茂事敗矣【補曰宜依此旧次刊去秦策所增】

秦圍宜陽【秦三年此四年】游騰謂公仲曰公何不與趙蔺離石祁【趙地韓嘗取之今使歸之】以質許地【韓地趙嘗取之質易地也正曰蔺離石祁見周趙策宜陽之役去秦前取蔺六年蔺離石祁不聞屬韓許亦與趙遠恐與趙下有缺文以質許地者以質音贄子而許之地也】則樓緩必敗矣【緩害韓者趙韓合故緩敗】收韓趙之地以臨魏【補曰一本地作兵】樓□【元作鼻】鼻【補曰說見魏策】必敗矣【□亦以魏害韓者】韓趙【補補曰姚云一本作韓趙】為一魏必倍秦【倍音背】甘茂必敗矣【茂攻宜陽韓得趙魏則不易拔故茂敗補曰一本茂作戊後章多同不復出】以成陽資翟強於齊楚必敗矣【元作之】之【齊楚敵也齊得地則益強可以敗楚時楚助秦故必敗正曰樓緩欲以趙合秦嘗勸趙割地事秦見趙策樓鼻為魏合秦楚外齊翟強為魏合齊秦外楚見魏策皆有事於秦者故策云然】須秦必敗【須言少待以趙魏救至而楚不助故敗】秦失魏宜陽必不拔矣【秦魏隣也失魏之害重於趙故獨言魏】為公仲謂向壽曰【補曰一本章首韓公仲據史韓公仲使蘇代謂向壽此章首及仲字下或有缺文當云蘇代為或云使蘇代】禽困覆車【禽所獲獸也能覆獵者之車不可忽正曰逐獸困急猶能奔觸傾覆人車】公破韓辱公仲公仲收國復事秦自以為必可以封【補曰史注公仲曰以為必可得秦封】今公與楚解【解言復好補曰見下】中封小令尹以桂陽【中言使楚自封之國中桂陽荊州郡補曰史與楚辭楚地索隱云秦地名近韓桂史作杜索隱云又封楚之小令尹以杜陽杜陽秦地今以封楚令尹是相合也今按策文中字恐是又字訛】秦楚合復攻韓韓必亡公仲躬率其私徒以鬪於秦【謂且賊壽於秦】愿公之熟計之也向壽曰吾合秦楚非以當韓也子為我謁之公仲曰秦韓之交可合也對曰愿有復於公【復重言之】諺曰貴其所以貴者貴【所以貴人所同貴正曰所以得貴也】今王之愛習公也不如公孫郝【元作赫下同補曰一本作郝姚同史作奭又

见秦策】其智能公也不如甘茂今三人者皆不得亲於事矣而公独与王主断於国者彼有以失之也公孙郝党於韩而甘茂党於魏故王不信也今秦楚争强而公党於楚是与公孙郝甘茂同道也公何以异之人皆言楚之多变也而公必之是自为贵也【非贵所同贵】公不如与王谋其变也善韩以备之若此则无祸矣韩氏先以国从公孙郝而後委国於甘茂是韩公之讎也【言以韩为讎】今公言善韩以待楚【补曰一本今公善韩以备楚】是外举不避讎也向壽曰吾甚欲韩合对曰甘茂许公仲以武遂反宜阳之民【补曰取其地而还其民也】今公徒收之甚难【徒言无地与之】向子曰然则柰何武遂终不可得已【与韩地宜以其所得於韩若武遂者可也茂已许之已无以易之也】对曰公何不以秦为韩求潁川於楚此乃韩之寄地也【此本韩地楚取之故云】公求而得之是令行於楚而以其地德韩也公求而弗得是韩楚之怨不解而交走【补曰走音奏】秦也秦楚争强而公过楚以攻韩【过谓以攻韩为楚罪补曰姚本收韩史同】此利於秦向子曰柰何对曰此善事也甘茂欲以魏取齐公孙郝欲以韩取齐今公取宜阳以为功【宜阳盖寿议攻而甘茂攻之】收楚韩以安之【使楚归潁川则楚韩讲故曰安】而诛齐魏之罪【诛犹求也求其过失以为郝茂之罪正曰诛责也正义云公孙奭甘茂皆欲以秦挟韩魏而取齐今向壽取晋阳以为功收楚韩以事秦而责齐魏之罪】是【衍以字】以公孙郝甘茂【衍之字】之无事也【言其失权正曰正义云二子不得合韩魏以伐齐也补曰按史甘茂传秦拔宜阳韩与秦平向壽为守宜阳将伐韩公仲使苏代谓壽云云而甘茂竟言昭王以武遂归韩由是壽奭怨谗茂】

客卿【韩】为韩谓秦王【武】曰韩珉之议知其君不知异君知其国不知异国被公仲者秦势能诎之【诎贬下也】以【补】秦之强首之者【首言以兵向之】珉为疾矣【珉者公仲所善公仲受兵则珉病正曰珉之议为其国之病也】进齐宋之兵至首垣【韩进之补曰首垣魏地见秦策】远薄梁郭所以不反魏者【反不合也兵薄梁郭疑於不合而合补曰一本不及魏姚同似义长】以为成【成平也犹和】而过南阳之道欲以四国西首也【韩宋齐魏】所以不者【言欲攻秦而不果者正曰见下】皆曰【衍以字】以燕亡於齐【亡谓丧地补曰前此四年齐破燕】魏亡於秦【孟子曰西丧地】陈蔡亡於楚【此亡国也】此皆絕地形【言其大小相絕而四国轻以小敌大故亡正曰所以不者再申不及魏之说燕魏亡地於齐秦陈蔡亡国於楚则地形已絕不可复通韩齐宋之於魏则不然絕地形以下当有缺文引言秦事】羣臣比周以蔽其上大臣为诸侯轻国也今王位正【言武王能正贵贱之位】张仪之贵不得议公孙郝【元作赫下同补曰姚本作郝】是从臣不事大臣也【从臣谓仪大臣郝也事言不得干其事正曰见下】公孙郝之贵不得议甘茂则大臣不得事近臣矣【近臣谓茂正曰大事记此秦武王未逐张仪前时事也大臣从臣之名始见于此大臣者张仪甘茂也从臣者公孙郝也秦武王不过防其交通使之互相伺察而已】贵贱不相事各得其位辐辏以事其上则羣臣之贤不肖可得而知也王之明一也公孙郝尝疾齐韩【言急於得二国补曰疾字恐有误】而不加贵【贵言不厚二国正曰言郝不加厚也】则为大臣不敢为诸侯轻国矣齐韩尝困公孙郝而不受则诸侯不敢因羣臣以为能矣外内不相为则诸侯之情伪可得而知也王之明二也【补曰王之明一也申羣臣比周蔽上之说王之明二也申大臣为诸侯轻国之说】公孙郝樗里疾请无攻韩陈四辟去【陈军陈以不攻故解散补曰四疑当作而】王犹攻之也【宜阳之役】甘茂约楚赵【欲攻魏】而攻敬魏【违其初约】是且构我【初约攻而反敬之是欲与三国难我也】茂且攻宜阳王犹校之也【茂

攻宜阳可以赎前若他人则置不检校正曰按史茂攻宜阳请约于魏此言在未攻宜阳之时茂党魏者楚赵当时盖与魏不合茂约结襄君而反其敬魏且将构难於我其欲攻宜阳王犹检察之以此二事称王之明智】羣臣之智无几於王之明者【几犹近】臣故愿公仲之以国【元作国以】国以【补曰当作以国】待於王【待待其命】而无自左右也【自犹由也】欲秦王听已勿用左右之说正曰谓公仲一心听王不由左右补曰大事记引此策在韩襄二年秦武元年解题云韩客谓向壽曰今王之爱习公也不如公孙郝当时所谓从臣指爱习而侍从者也秦用其爱习为人主私人其权至与大臣相抗古无是也愚谓公孙郝挟韩而议大臣必不得与而争於中故此士欲王自听公仲之待事而不由左右陈驾御之术以稔强明猜忌之见尔张仪出走毁者固非一人而茂攻宜阳亦以爽为忧大臣率为从臣所胜爱习真可畏哉】

或谓公仲曰听者听国【谓听於衆】非必听实也【实谓见事】故先王听谚言於市愿公之听臣言也公求中立於秦【立谓立於齐魏之间此章实为魏】而弗能得也善公孙郝以难甘茂欢齐兵以劝止魏【郝善齐故善郝则喜於齐之攻魏茂善魏故去茂则可以止魏之攻齐劝言茂欲为之补曰一本劝齐兵姚同】楚赵皆公之讎也【详此则公仲与齐者也二国不善齐故讎公仲】臣恐国之以此为患也愿公之复求中立於秦也公仲曰奈何对曰秦王以公孙郝【元作赫下同补曰姚本并作郝秦王当是昭下文言惠武】为党於公而弗之听甘茂不善於公而弗为公言公何不因行愿以与秦王语【行愿人姓名】行愿之为秦王臣也公【无私秦信之故可因】臣请为公谓秦王曰【补曰请行愿为公仲言於秦王】齐魏合与离於秦孰利齐魏别与合【离以交言别以兵言正曰合离别合反覆言之】於秦孰强秦王必曰齐魏离则秦重合则秦轻齐魏别则秦强合则秦弱臣即曰今王听公孙郝以韩秦之兵应齐而攻魏魏不敢战归地而合於齐是秦轻也臣以公孙郝为不忠今王听甘茂以韩秦之兵据魏而攻齐齐不敢战亦【元作不】不【补曰疑衍或求本亦字】求割地而合於魏是秦轻也臣以甘茂为不忠故不如令韩中立以攻齐【衍齐字】齐【补曰疑衍】王言救魏以劲之【齐时先以伐魏故令秦王声言救魏以劲韩之攻齐】齐魏不能相听必离【秦救魏则魏不憚齐亦不合於齐】兵交【元作史】史【补曰字义未详】王欲则信公孙郝於齐【欲言或欲此或欲彼】为韩取南阳易谷川以归【谷水出澠池】此惠王之愿也王欲则信甘茂於魏以韩秦之兵?魏以拒齐此武王之愿也臣以为令韩以中立以攻【元作劲】劲【补曰恐当作攻从上文】齐最秦之大急也公孙郝党於齐而不肯言甘茂薄而不敢谒【茂羈旅之臣故言薄此欲攻齐故其辞与茂正曰薄即上文不善於公薄下或有缺字】此二人王之大患也愿王之熟计之也

公仲数不信於诸侯诸侯【补两字补曰一本复有此二字姚同】錮之【不行其说】南悉国於楚【以国事听之】楚王【怀】弗听苏代为谓楚王曰不若听而备於其反也【反亦谓不信】仲之反也常杖【元作仗下同】仗【补曰仗倚也字与杖通】赵而畔楚杖仗齐而畔秦今四国錮之而无所入矣亦甚患之【公仲甚患】此方其为尾生之时也【言公仲自患其反之不利故欲为信尾生再见燕策苏代言名高盖论语微生泛论训亦云补曰庄子尾生与女子期於梁下水至不去抱梁柱而死与燕策所载同本微生释文引高诱注鲁人今注本无或谓即论语微生古今人表作尾生高】谓公叔曰公欲得武遂於秦而不患楚之能

扬河外也【扬犹动补曰年表襄王五年秦拔宜阳涉河城武遂六年秦复与我武遂九年秦复取之正义云武遂韩邑也近平阳非尧都楚昭睢曰秦破韩宜阳而韩犹复事秦者以先王墓在平阳而秦之武遂去之七十里以故尤畏秦 杨疑伤字讹】公不如令人恐楚王【怀】而令人为公求武遂於秦谓楚王曰发重使为韩求武遂於秦秦王【昭】听是令得行於万乘之王也韩得武遂以限【元作恨】恨【补曰疑限】秦无【元作毋】毋【补曰无通】秦患而德【元作得】得【补曰当作德】楚韩楚之县而已【言役属於楚】秦不听是秦韩之怨深而交事【补补曰恐交字下有缺字】楚也

谓公叔曰乘舟舟漏而弗塞则舟沉矣塞漏舟而轻阳侯之波【说阳侯多矣今按四八目伏羲六佐一曰阳侯为江海盖因此为波神欤补曰此出陶潜圣贤羣辅录侯一作使博物志阳国侯溺水因为大海之神】则舟覆矣今公自以为辨於薛公【辨犹治也犹言治於高溪薛公田婴】而轻秦是塞漏舟而轻阳侯之波也愿公之察也

齐令周最使郑【韩灭郑有其地故多称郑补曰韩灭郑徙都之故称郑犹魏都大梁称梁】立韩扰【韩公子盖立为相正曰无?】而废公叔周最患之曰公叔之与周君交也【交言其相善已不可以废之】今我使郑立韩扰而废公叔【补曰一本令我从上文】语曰怒於室者色於市【色作色】今公叔怨齐无可奈何也必絶周君而深怨我矣史舍曰公行矣请令公叔必重公周最行至郑公叔大怒史舍【舍齐所使与最同使正曰史或姓】入见【见公叔】曰周最固不欲来使臣窃强之周最不欲来以为公也使臣之强之也亦为公也【补曰最固不欲来使臣实强其来使也一本臣之强之也上无使字是姚同】公叔曰请闻其说对曰齐大夫诸子有犬犬猛不可叱叱之必噬人客有请叱之者疾视而徐叱之犬不动复叱之犬遂无噬人之心今周最固得事足下而以不得已之故来使彼将礼陈其辞【以礼陈说不急也】而缓其言郑王必以齐王【闵】为不急必不许也今周最不来他人必来来使者无交於公而欲德於韩扰其使之必疾言之必急则郑王必许之矣公叔曰善遂重周最王果不许韩扰

公仲使韩珉之秦求武遂而恐楚之怒也唐客【楚人】谓公仲曰韩之事秦也且以求武遂也非敝邑之所憎也韩已得武遂其形乃可以善楚臣愿有言而不敢为楚计今韩之父兄得衆者每相韩不能独立势必【衍不字】不【补曰疑衍】善楚【絶句】王曰【唐客以楚怀言告公仲】吾欲以国辅韩珉而相之可乎父兄恶珉珉必以国保楚公仲说【初恐楚怒已使珉今欲相珉则不怒也】仕【元作士补曰姚注钱作仕】唐客於诸公【盖荐之於韩之大臣乃得仕】而使之主韩楚之事

公仲以宜阳之故仇甘茂其後秦归武遂於韩【此六年补曰史甘茂传苏代谓向壽曰韩氏委国於甘茂茂许公仲以武遂反宜阳之民既而甘茂竟言秦王以武遂复归之韩向壽公孙奭争之不得由此怨谗茂 此九年秦复取武遂】已而秦王昭固疑甘茂之以武遂解於公仲也杜聊【韩人补曰姚本上聊字作赫疑聊字误】为公仲谓秦王曰朋【元作明】明【补曰当作朋】也愿因茂以事王【若公仲与茂善以实秦王之疑】秦王大怒於甘茂故樗里疾大说杜聊郑强以金八百入秦以伐韩【强以韩?故正曰无据补曰一本并作强一本载八

百金入秦请以伐韩】冷向谓郑强曰【补曰冷向即冷壽秦策高以为秦臣详此章为言】公以八百金请伐人之与国【韩秦之与】秦必不听公公不如令秦王【昭】疑公叔郑强曰何如曰公叔之攻楚也以几瑟之存焉【几瑟太子婴弟时质楚公叔所不善补曰几瑟史作虬虱後并同】故言伐【元作先】先楚也【正曰以攻楚】今已令楚王【怀】奉几瑟以车百乘居阳翟令昭献转而与之处【献本不善几瑟令之回心相善】旬有余彼已角【角言二人均礼补曰姚本角作觉是】而几瑟公叔之讎也而昭献公叔之人也秦王闻之必疑公叔为楚【几瑟韩爱子而在楚秦固疑其合楚公叔与几瑟讎故秦不疑今叔所善与之处而礼均然则秦安得不疑其为楚楚秦所恶也其伐韩不待请矣】公仲为韩魏易地公叔争之而不听且亡史惕【韩史正曰或姓】谓公叔曰公亡则易必可成矣公无辞以复反且示天下轻公公不若顺之夫韩地易於上【上上流魏之上正曰上谓魏】则害於赵【赵魏隣也魏地广赵之害也】魏易於下【下谓韩补曰一本魏地易】则害於楚公不如告楚赵楚赵恶之赵闻之起兵临羊肠楚闻之发兵临方城而易必败矣

錡宣【韩人】之教韩王取秦【取言与之合】曰为公叔具车百乘言之楚易三川因令公仲谓秦王【昭】曰三川之言曰秦王必取我【我三川也】韩王之心不可解矣【言其闻三川之言恐空失地故来与楚易补曰三川见秦策】王何不试以襄子【王秦王襄子秦诸公子不善太子者正曰无考】为质於韩令韩王知【衍之字补曰一本无姚同】王之不取三川也【韩之易地畏秦取之也今秦入质则不取可知】因以出襄子而德太子

襄陵之役【史不书补曰襄陵见齐策】毕长谓公叔曰请毋用兵而楚魏皆德公之国矣夫楚欲置公子咎【元作高从史後并此书亦或作咎置不立也事见十二年】高【补曰咎与臯通臯陶作咎繇此为高音同也】必以兵临魏【魏欲立咎故】公何不令人说昭子【阳也】曰战未必胜请为子起兵以之魏【韩起兵】子有辞以毋战【楚临魏欲置咎也韩今顺之故可以无战】於是【衍以字】以太子【几瑟也】与【元作扁】扁【补曰此与字讹】昭阳【元作杨】杨【补曰即阳音同而讹】梁王皆德公矣【阳得毋战梁得免兵补曰大事记韩世家襄王十二年太子婴死公子咎公子虬虱争为太子时虬虱质於楚楚欲内之遂围雍氏虬虱竟不得归韩韩立咎为太子战国策与世家所载参错重复不可详考大略二公子各有所主公仲主虬虱公叔主咎愚按楚策韩公叔有齐魏而太子有楚秦?此则公叔挟齐魏以主咎公仲挟秦楚以主虬虱也】

公叔使冯君於秦恐留教阳向【并韩人正曰阳向未必韩人】说秦王【昭】曰留冯君以善韩臣【韩之嫉冯者以留之为善】非上智也主君不如善冯君而资之以秦冯君广王【恃秦以自大补曰广字未详而有误】而不听公叔以与太子争【太子争也时未定所立故虬虱咎婴更称之补曰此太子指咎也秦主几瑟善冯君为顺秦之辞按大事记云国策中庶子强谓太子云云史苏代谓韩咎曰几瑟亡在楚楚王欲内之甚然则几瑟尝立为太子不胜公子咎之徒乃出奔也索隐曰伯婴即太子婴前死故咎与几瑟争立愚谓此大事记所谓不可考者】则王泽布而害於韩矣【国不和故补曰害疑善字】韩公叔几瑟争国【争立为相见後】郑强为楚王【怀】使於韩矫以新城阳人命世子【几瑟也】以与公叔争国楚怒将罪之郑强曰臣之矫与之以为国也臣曰【言其言然】世子得新城阳人必与公叔

争国而得全魏必急韩氏【魏欲立咎故急攻之】韩氏急必悬命於楚又何新阳人敢索若战而不胜幸【元作走】走而不死今且以至【言归楚】又安敢言地楚王曰善乃弗罪【楚策有大同郑作申】

韩公叔与几瑟争国中庶子强【庶子本周官秦置中庶子为太子官补曰新序楚庄王蒞政云云中庶子闻之跪而泣曰臣尚衣冠御郎十三年矣燕策有秦王宠臣中庶子蒙嘉卫鞅为公叔座庶子甘罗事吕不韦为庶子则中庶子者侍御左右之臣而当时家臣亦有此名非复周制矣秦官太子庶子中庶子此云中庶子强谓太子岂亦太子之官欤强或是郑强】谓太子曰不若及齐师未入【齐助公叔】急击公叔太子曰不可战之於国中国必分对曰事不成身必危尚何足以图国之全为太子弗听齐师果入太子出走【彪谓几瑟之及此言也义嗣也而卒不得立小人胜故也正曰几瑟之不欲战虑国之分耳非有息民全民之意退让之美也何义嗣之足称乎】

齐明谓公叔曰齐逐几瑟楚善之今楚欲善齐甚公何不令齐王【闵】谓楚王【怀】王为我逐几瑟以穷之楚听是齐楚合而几瑟走也楚王弗听是有陰於韩也【陰言私厚之然则公叔不可不备】

公叔将杀几瑟或谓公叔曰太子之重公也【太子咎】畏几瑟也今几瑟死太子无患必轻公韩大夫见王老冀太子之用事也固欲事之太子外无几瑟之患【时在楚故言外】而内收诸大夫以自辅也公必轻矣不如无杀几瑟以恐太子太子必终身重公矣

公叔且杀几瑟也宋赫为谓公叔曰几瑟之能为乱也内得父兄而外得秦楚也【补曰大事记云内得父兄指公仲也】今公杀之太子无患必轻公韩大夫知王之老而太子定必陰事之秦楚若无韩【言小国不之有补曰未详】必陰事伯婴【秦楚有韩则事太子太子韩嗣故也无韩乃事婴】伯婴亦几瑟也公不如弗杀【絕句】伯婴恐必陰保於公【婴与太子在韩皆几瑟之仇几瑟在故婴恐】韩大夫不能必其不入也【几瑟入】必不敢辅伯婴以为乱秦楚挟几瑟以塞伯婴【塞障也不使与事】伯婴外无秦楚之权内无父兄之衆必不能为乱矣此便於公【十二年书太子婴死因言公仲伯婴六事六事岂与太子同名欤正曰索隐说伯婴云云见前】

谓新城君曰公叔伯婴恐秦楚之内几瑟也公何不为韩求质子於楚【楚不主几瑟则必入质以此卜之】楚王【怀】听而入质子於韩则公叔伯婴必知秦楚之不以几瑟为事也必以韩合於秦楚矣秦楚挟韩以窘魏魏氏不敢东【不合齐】是齐孤也公又令秦求质子於楚【卜其与秦同否也】楚不听则怨结於韩【此韩皆主公叔伯婴为言】韩挟齐魏以盼楚【盼睥睨也正曰盼恨视也五礼反】楚王必重公矣【新城贵於秦楚欲秦援之故重新城】公挟秦楚之重以积德於韩则公叔伯婴必以国事公矣【记十二年有在楚围雍氏下补曰史以此为苏代之言新城君?戎也】

胡衍【韩人】之出几瑟於楚也【出而归韩】教公仲【衍教字】谓魏王【哀正曰襄】

曰太子在楚韩不敢离楚也【惧其为几瑟伐韩】王【元作公】公【正曰谓魏王之言止上二句言韩所以不敢离楚之故以解於魏也公何不试奉公子咎而为之请太子此劝公仲之辞试字可见大事记引此亦云公子反不若存之之明也】何不试奉公子咎【此後并因旧字】而为之请太子【请韩立之】因令人谓楚王【怀几瑟闻魏欲立咎故】曰韩立公子咎而弃几瑟是王抱虚质也王不如亟归几瑟几瑟入必以韩权报讎於魏而德王矣【补曰德王之王谓楚王大事记谓公仲始主几瑟後持两端几瑟既不得入遂改主咎以此章为证愚谓劝仲试奉咎者将以行其谓楚之谋激楚王之早入几瑟耳非果有奉咎之心也楚既败雍氏几瑟卒不得入公仲直以势穷力竭而遂止耳】

几瑟亡之楚楚将收秦而复之谓?戎曰废公叔而相几瑟者楚也【相谓昔日正曰相助也】今几瑟亡之楚楚又收秦而复之几瑟入郑之日韩楚之县已【元作邑】邑【补曰策文如此句者每作已然邑字自通】公不如令秦王贺伯婴之立也韩絶於楚【楚主几瑟而今立婴故絶韩】其事秦必疾秦挟韩亲魏齐楚後至者先亡此王业也

冷向谓韩咎曰【史有公子咎有韩咎补曰史冷向作苏代愚谓咎即太子咎岂有内几瑟之理当是谓公仲之辞此大事记所谓不可考者】几瑟亡在楚楚王【怀】欲复之甚今楚兵十余万在方城之外臣请令楚筑万家之都於雍氏之旁韩必起兵以禁之公必将矣公因以楚韩之兵奉几瑟而内之几瑟得入而德公必以韩楚奉公矣【记十三年有】

楚令景鲤入韩韩且内伯婴於秦景鲤患之【楚欲立几瑟怨秦立婴故】冷向谓伯婴曰太子【谓伯婴】入秦秦必留太子而合楚以复几瑟也是太子反弃之【言已得立而弃之向盖为鲤者彪谓太子国之本也而纷纷不定若此韩有相其皆何事耶正曰已若入秦而秦与楚复几瑟反为自弃也大事记云置嗣不定大臣外连敌国相与为市国之不亡者幸也愚观咎与几瑟争立实大臣辅之争而鲍谓置相何事独弗考乎】楚围雍氏【此十二年补曰围雍氏见周策】五月韩令使者求救於秦冠盖相望也秦师不下殽韩又令尚靳使秦谓王【昭】曰韩之於秦也居为隐蔽出为鴈行今韩已病矣秦师不下殽臣闻之唇揭者【揭犹反】其齿寒愿大王之熟计之宣太后曰使者来者衆矣独尚子之言是召尚子入宣太后谓尚子曰妾事先王曰【补曰一本曰作也姚同】先王以其髀【股也】加妾之身妾固不支也尽置其身妾之上而妾弗重也何也以其少有利焉【补曰宣太后之言污鄙甚矣以爱魏丑夫欲使为殉观之则此言不以为耻可知秦母后之恶有自来矣】今佐韩兵不衆粮不多则不足以救韩夫救韩之危日费千金独不可使妾少有利焉尚靳归书【以书归】报韩王韩王遣张翠张翠称病日行一县张翠至甘茂曰韩急矣先生病而来张翠曰韩未急也且急矣甘茂曰秦重国智主也【补曰一本智作知姚注云钱改作之】韩之缓急莫不知今先生言不急可乎张翠曰韩急则折而入於楚臣安敢来甘茂曰先生毋复言也甘茂入言秦曰公仲柄得秦师【柄犹持补曰史记枋有得秦按字书枋与柄同此恐字讹】故敢扞楚今雍氏围而秦师不下殽是无韩也公仲且抑首而不朝【抑首不意貌】公叔且以国南合於楚楚韩为一魏氏不敢不听是楚以三国谋秦也如此则伐秦之形成矣不识坐而待伐孰与伐人之利秦王曰善果下师於殽以救韩【甘茂传有茂入言下补曰大事记赧王十五年楚围雍氏引此章云此即周纪所载之事楚前围雍氏在赧王三年秦惠王犹在位安得有宣太后楚後

围雍氏甘茂出奔已数年两者皆不合】

楚围雍氏韩令冷向借救於秦秦为发使公孙昧入韩【补曰昧当音莫葛反公子昧唐昧皆然】公仲曰子以秦为将救韩乎其不乎对曰秦王【昭】之言曰请道於南郑【属汉中补曰正义云南郑梁州县蓝田雍州县秦言或出雍州西南至郑或出雍东南历蓝田出嶢关俱绕楚北境以待韩使而东救雍氏如此迟缓殆不合於楚矣按史止作殆不合矣无军於南郑四字窃谓史为是盖雍氏在阳翟而此言合军南郑殊不相涉且上文请道南郑而此曰不合军於南郑岂非误乎】蓝田以入攻楚出兵於三川以待公殆不合军於南郑矣【不与楚战】公仲曰奈何对曰秦王必祖张仪之故谋【昔者所谋补曰秦策有说见本条】楚威王攻梁张仪谓秦王【惠】曰与楚攻梁魏折而入楚韩固其与也【韩魏之与补曰一本固其与国家也姚同】是秦孤也故不如出兵以劲魏【阳为助魏实欲其与楚战】於是攻皮氏【楚攻之】魏氏劲威王怒楚与魏大战秦取西河之外以归【惠八年补曰说亦见秦策】今也其将阳言救韩而陰善楚公恃秦而劲必轻与楚战楚陰得秦之不用也【不为韩用】必易与公相支也公战胜楚遂与公乘楚易三川而归【乘因取之也】公战不胜楚楚塞三川而守之公不能救也臣甚恶其事司马康【秦人补曰康史作庚】三反之郢矣甘茂与昭献遇於境其言收玺【玺军符收之者言欲止楚之攻韩正曰牧取也玺印也如楚置相玺之云索隐以为昭献欲得秦官之印玺】其实犹有约也【疑秦楚约攻韩】公仲恐曰然则奈何对曰公必先韩而後秦先身而後张仪【先已所见後仪之故智言欲秦之救已而不欲其劲韩也徐注欲以为仪在之日而云非也正曰先韩者急图其国后秦者不望其救先身者善已之谋後仪者不堕人之诈徐说见後】臣【补】以【补曰姚注云刘去以字】公不如亟以国合於齐楚秦必委国於公以解伐是公之所以外者仪而已【外犹后也此言不恃秦耳承上故言仪正曰不堕仪之故智为外於仪耳】其实犹之不失秦也【虽合齐楚图国事耳秦无辞怨史记十二年有正曰即上文秦委国於公云云补曰徐广云秦记惠王後十三年楚围雍氏纪年於此亦说楚景翠围雍氏韩宣惠五年秦助韩共败楚屈匄又云齐末围煮枣皆与史记年表及迁世家符同此是前围雍氏事也後围雍氏是赧王十五年事大事记书楚景翠围韩雍氏秦樗里疾帅师救韩败楚解围具载徐说谓世家合而为一者误又按正义云徐见张仪尚存生此前後之见此是公孙时却述张仪时事愚谓此策虽曰视张仪故谋其下云先身后仪又云所外者仪似非仪死后之辞然楚围之解实以秦救公孙衍之言为不可信耳此章宜在前鲍序次误又按大事记云韩年表书秦助我攻楚围景痤楚将之名与纪年不同盖纪年云屈匄也愚按韩楚世家并云败楚将屈匄丹阳夫丹阳之与雍氏相去远矣景痤恐即景翠声转而讹景痤之败雍氏之战也屈匄之败丹阳之战也丹阳之后其雍氏之役欤大事记首书丹阳之役后书景翠围韩且丹阳大败之余楚力未苏何暇於围韩哉】

或谓韩公仲曰夫孥子之相似者【孥一乳两子补曰孥音患力员二反】惟其母知之而已夫利害之相似者【补曰一本利害无夫字】唯智者知之而已今公国其利害之相似正如孥子之相似也得其道为之则主尊而身安不得其道则主卑而身危今秦魏未和成【时则言和】而非公适两束之【束犹约】则韩必谋矣【谋谓和不坚而复议之】若韩随魏以善秦是为魏从也【从人而已非自约之】则韩轻主卑矣【补曰一本韩轻矣】秦已善韩必将置其所爱信者令用事於韩以完之【全秦之事】是公危矣今公与安成君【韩人】

为秦魏之和成固为福不成亦为福秦魏之和成而公适两束之是韩为秦魏之门户也【喻两国由之】是韩重而主尊矣安成君东重於魏而西重於秦操右契【左契待合而已右契可以责取】而为公责德於秦魏之王【公仲制和为德於秦今责其报】列地而为诸侯公之事也【言当务此】若果安韩魏而终身相公之下服【服犹事以侯国为上则相犹为下也】此主尊而身安矣秦魏不终相听者也【後必相违】齐怒於不得魏必欲善韩以塞魏魏不听秦必务善韩以备秦是公择布而割也【布喻齐魏割喻制之补曰齐怒详文意当作秦怒姚注择布钱作择稀】秦魏和则两国德公不和则两国争事公所谓成为福不成亦为福者也愿公之无疑也

或谓公仲曰今有一举而可以忠於主便於国利於身愿公之行之也令天下散而事秦则韩最轻矣令【补曰姚本无令字】天下合而离秦则韩最弱矣合离之相续则韩最先危矣此君国长民之大患也今公以韩先合於秦天下随之是韩以天下事秦秦之德韩也厚矣韩与天下朝秦而独厚取德焉公行之计【之犹此】是其於主也至忠矣天下不合秦秦令而不听秦必起兵以诛不服秦久与天下结怨构难而兵不决韩息士民以待其豊【豊罍也】公行之计是其於国也大便也昔者周倭以西周善於秦而封於梗阳【太原榆次有梗阳乡】周啓以东周善於秦而封於平原今公以韩善秦韩之重於两周也无先计而秦之争机也【在已之计无先於此在秦则为争言欲之急机言不可失】万於周之时今公以韩为天下先合於秦秦必以公为诸侯以明示天下公行之计是其於身大利也愿公之加务也

厘王【襄王子元年赧王二十年丙寅】

韩咎【太子咎即厘王】立为君而未定也【几瑟伯婴难之补曰韩襄王十二年公子咎公子几瑟争立楚围雍氏次年魏襄王与齐闵王会於韩立咎为太子此策必其争立之时若既即位则何未定之有】其弟在周周欲立车百乘而送之恐韩咎入韩之不立也綦毋恢曰不如以百金从之韩咎立因以为戒【所谓兵创补曰姚注云刘改因作曰】不立则曰来効贼也【得立者以咎弟为贼正曰公叔公仲之用事仲先而叔後韩咎既立则公仲之权宠衰矣伯婴几瑟咎之争立伯婴必先死鲍序次错乱非是】五国约而攻秦【赵惠文十三年此十年正曰说误见下】楚王【顷襄正曰此怀王为从长合齐赵韩魏燕及匈奴伐秦时事在怀王十一年韩宣惠王十五年说见赵策 此策文见孔丛子以为子顺之言其注谓魏公子无忌率五国兵败蒙恬为尤误】为从长不能伤秦兵罢而留於成臯魏顺谓沛【元作市下同】市【正曰孔丛子作市大事记作沛】丘君【太公世家君其长也】曰五国罢必攻沛市丘【注沛丘为贝曰贝丘属清河正曰成臯与清河絶远恐非】以偿兵费君【元作若】若资臣臣请为君止天下之攻沛市丘君曰善因遣之魏顺南见楚王曰王约五国而西伐秦不能伤秦天下且以是轻王而重秦故王何不卜交乎楚王曰奈何魏顺曰天下罢必攻沛市丘以偿兵费王令之勿攻沛市丘五国重王【五当作四正曰是役本六国言五国重王则楚在外史年表等书五国故因此称五国此明是楚约从时事大事记改五作四遂以此策附注李兑约五国伐秦之年亦误其曰合五国之衆一筹不画逡巡而却乃欲攻一小邑以偿费楚王为从长不知诸侯与已之深浅始欲卜交宜乎秦以折箠答之此言移以论怀王尤为切中者也】且听王之言而不攻沛市丘不重王且反王之言而攻沛市丘然则王之轻重必明矣故楚

王卜交而沛市丘存【补曰留成臯而将攻市丘市丘必韩地不然则策当在楚不在韩】

韩人攻宋【齐记闵三十八年书韩为齐攻今从史定为此十年】秦王【昭】大怒曰吾爱宋与新城阳晋同也【补曰正义引括地志云新城故城在宋州宋城县界阳晋故城在曹州乘氏县西北又见楚策】韩珉与我交而攻我所甚爱何也苏代【元作秦今从史】秦【补曰当作代】为韩说秦王曰韩珉之攻宋所以为王也以韩之强辅之以宋楚魏必恐恐必西面事秦王不折一兵不杀一人无事而割安邑此韩珉之所以祷於秦也【祷言以此求事秦】秦王曰吾固患韩之难知一从一横此其说何也【韩难知而代说如此何也】对曰天下固令韩可知矣【言非独代知之】韩固已攻宋矣其西事秦以万乘自辅【万乘秦也】不西事秦则宋地不安矣【虽得宋地不能自安】中国白头游敖之士【敖出游也】皆积智欲离秦韩之交伏轼结鞶【鞶驾牛具在胷者】西驰者未有一人言善韩者也伏轼结鞶东驰者未有一人言善秦者也皆不欲韩秦之合者何也则晋楚智而韩秦愚也晋楚合必伺韩秦【伺亦图也小言之正曰伺窥也】韩秦合必图晋楚请以决事秦王曰善【齐记有韩字并作齐补曰赵策谓魏王曰韩珉处於赵去齐三千里王以此疑齐曰有秦陰五国伐秦无功苏代谓齐王举说奉阳君之辞曰天下争秦秦内韩珉於齐又云与韩氏大吏东勉齐王必无召珉而韩策云韩珉相齐盖韩珉为齐伐宋也首句不云韩攻宋而云韩人疑人即珉之讹苏代为燕反间劝齐伐宋将以敝齐而为燕恐秦之败其事故游说以止之尔史记恐有所据当考】或谓韩王曰秦王【昭】欲出事於梁而欲攻降安邑韩计将安出矣【谓有齿寒之忧】秦之欲伐韩以东闚周室甚唯寐忘之今韩不察因欲与秦必为山东大祸矣秦之欲攻梁也欲得梁以临韩恐梁之不听也故欲痛之以固交也【攻之深使之惩创不敢离秦补曰一本固欲病之姚同注云钱刘作痛】王不察因欲中立【不助秦亦不救魏】梁必怒於韩之不与已必折为秦用韩必举矣愿王熟虑之也不如急发重使之赵梁约复为兄弟使山东皆以銳师戍韩梁之西边非为此也山东无以救亡此万世之计也秦之欲并天下而王之也不与古同事之虽如子之事父犹将亡之也行虽如伯夷犹将亡之也行虽如桀纣犹将亡之也【言志於亡之而已无择也】虽善事之无益也不可以存适足以自令亟亡也然则山东非能从亲合而相坚如一者必皆亡矣【彪谓秦之大情此策陈之无余蕴矣非苏氏兄弟不能也说之着明如此而听之者藐藐岂天亡之邪盖汉运将兴而秦为之鸛獭也补曰大事记引此策自秦之止益也谓论秦最得其情附见于赧王二十九年魏献安邑之後愚以齐赵燕策考之宜附赧王十六年说见齐策秦伐魏陈軫合三晋而东一章】

谓郑王曰昭厘侯一世之明君也申不害一世之贤士也韩与魏敌侔之国也申不害与昭厘侯执珪而见梁君非好卑而恶尊也非虑过而议失也申不害之计事曰我执珪於魏魏君必得志於韩必外靡於天下矣【靡蔑视之正曰靡散也忙皮反补曰昭厘侯朝魏见魏策】是魏敝矣诸侯恶魏必事韩是我俛【元作免】免【补曰此书免俛通】於一人之下而信【平】於万人之上也夫弱魏之兵而重韩之权莫如朝魏昭厘侯听而行之明君也申不害虑事而言之忠臣也今之韩弱於始之韩今之秦强於始之秦【补曰孔丛子韩与魏有隙子顺谓韩王曰昭厘侯一世之明君也申不害一世之贤相也韩与魏敌侔之国而厘侯执珪见梁君者非好卑而恶尊虑过而计失也与严敌为隣而动有灭亡之忧独动不能支二难故降心以相从屈已以求存也申不害虑事而言忠臣也昭厘侯听而行之明君也今韩弱於始之韩

魏均於始之魏秦强於始之秦而背先人之旧好以区区之衆居二敌之间非良策也齐楚远而难恃秦魏呼吸而至舍近而求远是以虚名自累而不免近敌之困者也为王计者莫如除小忿全大好也吴越之人同舟济江中流遇风波其相救如左右手者所患同也今不恤所同之患是不如吴越之舟人也韩王曰善按此文与策上文略同其下则异子顺之言主除忿全好策文主尊秦非子顺意也今全録以俟考者】今秦有梁君之心矣而王与诸臣不事为尊秦【不以尊秦为事】以定韩者臣窃以为王之明为不如昭厘侯而王之诸臣莫如申不害也昔者秦【补】穆公一胜於韩原【晋记毙於原注晋韩原后志在冯翊夏阳补曰左氏僖十五年传在同州韩城】而霸西州【犹言西方】晋文公一胜於城濮而定天子【僖二十八年补曰姚云曾改子作下】此皆以一胜立尊【尊谓霸】令成功名於天下【令犹使正曰立尊令句】今秦数世强矣大胜以十数小胜以百数大之不王小之不霸名尊无所立制令无所行【诸侯不从其令】然而春秋用兵者非以求主尊成王於天下也【言志於尊王而已】昔先王之攻有为名者有为实者为名者攻其心【使之心服而已】为实者攻其形【形在外者谓地与民】昔者吴与越战越人大败保於会稽之上吴人入越而户抚之【徧至其家抚安之】越王使大夫种行成於吴请男为臣女为妾身执禽【禽鸟小贄也正曰执禽鸟服役】而随诸御【吴之执事者】吴人果听其辞与成而不盟此攻其心者也其後越与吴战吴人大败亦请男为臣女为妾反以越事吴之礼事越越人不听也遂残吴国而禽夫差此攻其形者也今将攻其心乎宜使如吴攻其形乎宜使如越夫攻形不如越而攻心不如吴而君臣上下少长贵贱毕呼霸王臣窃以为犹之井中而谓曰我将为尔求火也东孟之会【补曰姚及一本自为一章恐非】聂政阳坚【坚政之副犹秦武阳正曰说见前】刺相兼君许异【韩人】蹇列【元作哀下同】哀侯而殪之【蹇犹留侯蹇汉王足盖使之佯死补曰蹇一本作蹴字通说文蹴蹇也蹇蹈也】立以为郑君韩氏之衆无不听令者则许异为之先也是故列哀侯为君而许异终身相焉而韩氏之尊许异也犹其尊列哀侯也【补曰按哀侯既弑则无终身相之事以为列侯则又非杨坚为贼之事哀列二字讹舛不明且从本文读之而已】今日【补曰一本曰作曰】郑君不可得而为也【为去音谓蹇之正曰下文天子不可得而为与此同则为当如字】虽终身相之焉然而吾弗为云者岂不为过谋哉【言无前日之难而可以久相而曰不为者过也】昔齐桓公九合诸侯未尝不以周襄王之命然则虽尊襄王桓公亦定霸矣九合诸侯之尊桓公也【侯之与九合者】犹其尊襄王也今日天子不可得而为也虽为桓公然而【补此两字】吾弗为云者岂不为过谋而不知尊哉【此欲其尊秦】韩氏之士数十万皆戴列哀侯以为君而许异独取相焉者无他也诸侯之君无不任事於周室也而桓公独取霸者亦无他也【知所尊而已】今强国将有帝王之豊【谓秦】而以国先者此桓公许异之类也岂可不谓善谋哉夫先与强国之利强国能王则我必为之霸强国不能王则可以避其兵使之无伐我【补曰一本避作辟当音辟】然则强国事成则我立帝而霸【立言彼为帝由我尊之】强国之事不成犹之厚德我也今与强国【今谓韩】强国之事成则有福不成则无患然则先与强国者圣人之计也【正曰此策时不可考其说虽多务尊强国而已非善谋也 为名为实为尔为之先之为去声】韩阳役於三川【征伐之役】而欲归足强【韩人】为之说韩王曰三川服矣王亦知之乎役且共贵公子【役役人公子谓阳等辈贵言立之为君】王於是召诸公子役於三川者而归之【正曰时不可考】秦大国也韩小国也韩甚疏秦而见亲秦【为秦所亲补曰一本然而正曰然而上以也句计之恐当作之计谓见亲於秦之计非金无以为亲】韩【补】计之非金无以也【金

以事秦】故卖美人美人之贾贵诸侯不能买故秦买之三千金韩因以其金事秦秦反得其金与韩之美人韩之美人因言於秦曰韩甚疏秦【美人怨韩卖之又知韩之情】从是观之韩之美人于金【此两者】其疏秦乃始【衍於字补曰一本无姚同】益明故客有说韩者曰不如止淫用【淫侈也】以是为金而事秦是金必行而韩之疏秦不明美人知内行者也【谓国中隐事】故善为计者不见内行【见显示之补曰见贤遍反正曰时不可考】

张丑之会齐楚讲於魏也谓韩公仲曰今公疾攻魏之郢【元作运下同後志琅邪东莞有郢亭正曰非魏地运未详】运魏急则必以地和於齐楚故公不如勿攻也魏缓则必战【与齐楚战】战胜攻郢运而取之易矣【胜则兵敝又无齐楚之助韩可取运】战不胜则魏且内之【内运於韩】公仲曰诺张丑因谓齐楚曰韩已与魏矣【与之讲正曰公仲事当附襄王时】以为不然则盍观公仲之攻也公仲不攻【从丑之言】齐楚恐【恐韩魏合】因讲於魏而不告韩

谓韩相国【公仲也正曰无考未必厘王时】曰人之所以善扁鹊者为有臃肿也使善扁鹊而无臃肿也则人莫之为之也【无为善之】今君以所事【谓王】善平原君者为恶於秦也【以见恶於秦故善之以支秦】而善平原君乃所以恶於秦也【秦以平原难之故恶之而韩与之善故亦恶韩】愿公之熟计之也

韩相公仲【衍珉字下同】珉使韩侈之秦请攻魏秦王【昭】说之韩侈在唐【晋阳注诗唐国正曰唐未详】公仲死韩侈谓秦王曰魏之使者谓後相韩辰曰公必为魏罪韩侈韩辰曰不可秦王仕之又与约事【言约攻魏】使者曰秦之仕韩侈也以重公仲也今公仲死韩侈之秦秦必弗入【补曰一本复有入字姚云曾有】又奚为挟之以恨魏王【昭】乎韩辰患之将听之矣今王不召韩侈韩侈且伏於山中矣【惧罪】秦王曰何意寡人如是之权也【权犹变也始说侈而今不入是变也补曰权未详字疑有误】令安伏【秦人正曰无考】召韩侈而仕之【补曰公仲珉策屡各见此两言公仲珉不可晓公仲即公仲侈此云公仲死後韩侈云云则韩侈别是一人也父亦多难通疑缺】

韩珉相齐令吏逐公疇豎【齐人正曰无考】又【元作大】大怒於周之留成阳君【君本在齐为秦善之珉欲使之之秦过周周人留之故怒正曰成阳君韩人鲍於魏策已言之今於此言韩珉相齐而怒之故又云君本在齐又因魏策成阳君欲以韩魏听秦故生此说皆非】谓韩珉曰公以二人者为贤人也所入之国因用之乎则不如其处小国【谓周】何也成阳君为秦去韩公疇豎楚王【顷襄正曰无据】善之今因公逐之二人者必入秦楚必为公患且明公之不善於天下【明显犹示二大国恶之天下不能善也】天下之不善公者与欲有求於齐者且收之以临齐而市公谓山阳君【韩人】曰秦封君以山阳【兗州郡】齐封君以莒齐秦非重韩则贤君之行也今楚攻齐取莒上不交齐次弗纳於君【弗使入莒】是棘齐秦之威而轻韩也【棘犹难也楚攻齐而不纳秦之所封山阳又韩人故云正曰棘义未详诗传多训急楚攻以下本文自明其时不可考】山阳君因使之楚

赵魏攻华阳韩请急於秦【以急告也】冠盖相望秦不救【补曰攻华阳事见魏策】韩相

国【辰也正曰无考】谓田荅曰事急愿公虽疾为一宿之行田荅见穰侯穰侯曰韩急乎何故使公来田荅对曰未急也穰侯怒曰是何以为公之主使乎【公犹国也言其不任】冠盖相望告敝邑甚急公言未急何也田荅曰使韩急则将变矣穰侯曰公无见王矣臣请令发兵救韩八日中大败赵魏於华阳之下【记二十三年有补曰与前章张翠说同】

韩氏逐向晋於周【晋周人使周逐之正曰无据】周使成恢为之谓魏王【安厘正曰无?时不可考】曰周必寬而反之【反谓还】王何不为之先言是王有向晋於周也【有言得其用】魏王曰诺成恢因为谓韩王曰逐向晋者韩也而还之者魏也岂如道韩反之哉【道犹由】是魏有向晋於周而韩王失之也【不反之则然】韩王曰善亦因请复之

张登【中山人见其策】谓费縹【韩人】曰请令公子牟【补曰一本牟作年姚同】谓韩王曰费縹西周讎之东周宝之此其家万金王何不召之以为三川之守是縹以三川与西周戒也【三川近西西讎之故縹有戒心】必尽其家以事王西周恶之必効先王之器以止王【止韩勿使为守】韩王必为之【此下登言其効也】西周闻之必解子之罪以止子之事【守三川非縹之欲登云云解其罪耳正曰韩厘王元年赵灭中山大事记载韩燕中山称主在周显王四十六年当宣惠王十年中山策有张登去此时甚远然此策本不可定为何王之世鲍强附之】

魏王【安厘】为九重之盟【九重谓王城欲城之先盟其衆正曰一本九里大事记引之姚同说见後】且复天子【赧四十二年马犯请梁城周有复之之语正此二十三年复复其尊正曰按周纪复之之文谓许梁以鼎事正义复一音扶又反非谓复王大事记按韩非子魏惠公为白里之盟将复立天子彭喜谓郑君曰君勿听云云战国策所载与此同但止言魏王而不言惠王以白里为九里以彭喜为房喜以郑君为韩王所谓将复立天子者是时七国既称王不以周为天子也或者犹咎孟子劝诸侯行王道何哉盟不知何年附载於慎靓王三年魏惠王薨之前按此策当属惠王】房喜【韩人】谓韩王曰勿听之也大国恶有天子而小国利之王与大国弗听【此言韩亦大国】魏安能与小国立之

桓惠王【厘王子元年赧王十三年己丑】

建信君【赵人】轻韩熙赵敖为谓建信君【元作侯】侯曰国形有之而存无之而亡者魏也【赵魏为邻故其势如此】不可无而从者韩也【欲为从必得韩】今君之轻韩熙者交善楚魏也【此为从者说也从宜善韩而善此二国者非也正曰初无此意但谓今君之轻韩熙因交善於楚魏故也】秦见君之交反善於楚魏也其收韩必重矣【秦之志常反诸国补曰一本之交之善】从则韩轻【从必得韩而反轻者国小不得主从】横则韩重【最近秦故】则无从轻矣【韩以为轻正曰无从者轻指赵言也】秦出兵於三川则南围鄢蔡邵之道不通矣【谓颍川鄢陵以南二蔡邵陵】魏急【上三邑皆近魏正曰鄢许属魏者策於魏多言许鄢陵】其救赵必缓矣秦举兵破邯鄲赵必亡矣故君收韩可以无衅

战国策校注卷八

卷九

<史部,杂史类,战国策校注>

钦定四库全书

战国策校注卷九 宋 鲍彪 原注

元 吴师道 补正

燕【东有渔阳右北平辽西辽东西有上谷代郡鴈门南有涿郡之易容城范阳北有新城故安涿县良乡新昌及渤海之西而乐浪玄菟亦属焉】

文公【桓公子元年显王八年庚申】

奉阳君【衍李兑二字】李兑甚不取於苏秦【传亦云正曰奉阳君李兑者通封邑姓名言之也苏秦当作苏代因苏秦称奉阳君不说之语而讹也此策有苏代为奉阳君说燕於赵以伐齐奉阳君不听乃入齐即奉阳君不取苏秦之事也李兑因为苏秦云云此李兑二字误美也大事记以此章备载於苏秦说燕与赵合从之下又据古史谓肃侯时奉阳君公子成实未亡削去捐馆之语愚尝辩苏秦所称奉阳君必别为一人奉阳君实李兑非公子成也且此章知决为苏代者其言曰燕弱国也东不如齐西不如赵又曰燕亡国之余此言正子哙之後昭王未破齐之时也文公据全燕之盛何得若此言哉史迁谓世言苏秦事多异代厉事有类者皆附之秦则此类也】苏秦在燕李兑因为苏秦谓奉阳君曰齐燕离则赵重齐燕合则赵轻今君之齐【谓以燕合齐】非赵之利也臣窃为君不取也奉阳君曰何吾合燕於齐【问何以言然】对曰夫制於燕者苏子也【言其制燕】而燕弱国也东不如齐西不如赵岂能东无齐西无赵哉而君甚不善苏秦苏秦能抱弱燕而孤於天下哉是驱燕而使合於齐也且燕亡国之余也【惠公六年大夫诛其姬而惠公奔齐齐晋入之至而卒正曰史年表燕惠公欲杀公卿立幸臣公卿诛幸臣公恐出奔齐此事在周景王六年至燕文公二十八年苏秦说燕之岁为二百有五年不应远举此事此必齐破燕昭王既立之时也以此言知非苏秦约从时事说亦见赵策】其以权立【权谓外与贵也】以重外以事贵【并谓齐赵正曰以权立者谓燕破亡之余太子平以权宜立其势微弱必重外必事贵外与贵谓他国齐赵之属也】故为君计善苏秦则取之【取言与之交】不善亦取之以疑燕齐【齐不善苏子苏子在燕而赵人取之则齐疑燕合赵而外已齐疑燕燕亦不能信齐矣】燕齐疑则赵重矣齐王【宣正曰湣】疑苏秦则君多资【疑其合燕於赵】奉阳君曰善乃使使与苏秦结交【正曰此策非文公时】

苏秦将为从【此二十八年】北说燕文侯曰燕东有朝鲜【属乐浪补曰朝鲜箕子所封今高丽国索隐云音潮仙】辽东【并州郡】北有林胡楼烦【补曰见赵策】西有云中九原【属五原补曰正义云云中郡城在林榆县东北九原郡城在林榆县西界二郡皆在胜州】

南有呼沱易水【出涿故安补曰呼沱见前正义云易水源出易县西谷中之东东南流与滹沱河合水经易水出涿郡故安县良乡西山大事记引此二条】地方二千里带甲数十万车七百乘骑六千匹粟支二年南有碣石雁门之饶【并州郡补曰正义云碣石山在平州燕东南雁门山在代燕西南】北有枣栗之利民虽不田作枣栗之实足食於民矣此所谓天府也夫安乐无事不见覆军杀将之忧无过燕矣大王知其所以然乎夫燕之所以不犯寇被兵者以赵之为蔽於其南也秦赵五战【补曰设辞也】秦再胜而赵三胜秦赵相蔽而王以全燕制其後此燕之所以不犯难也且夫秦之攻燕也踰云中九原过代上谷弥地踵道【弥犹亘踵犹系正曰踵足後也徐曰犹言继踵也】数千里虽得燕城秦计固不能守也秦之不能害燕亦明矣今赵之攻燕也发号出令不至十日而数十万之衆军於东垣矣【垣谓城正曰正义云东垣赵之东邑在恒州真定县南故常山城】度呼沱涉易水不至四五日而距国都矣故曰秦之攻燕也战於千里之外赵之攻燕也战於百里之内夫不忧百里之患而重千里之外计无过於此者是故愿大王与赵从亲天下为一则国必无患矣燕王曰寡人國小西迫强秦促近齐赵【补曰一本南近齐魏】齐赵强国【补曰一本有也字】今主君幸教诏之合从以安燕敬以国从於是齎苏秦车马金帛以至赵【传在说诸国之初】权之难【与齐战也】燕再战不胜赵弗救咍子【文公孙子咍】谓文公曰不如以地请合於齐赵必救我若不吾救不得不事【燕齐合则赵轻虽不救我後必事我】文公曰善令郭任以地请讲於齐赵闻之遂出兵救燕【齐策此役言及魏冉知为文公末年补曰大事记从鲍说】

易王【文公子元年显王三十七年己丑】

燕文公时秦惠王以其女为燕太子妇【文公二十年正曰史二十八年】文公卒易王立齐宣王因燕丧攻之取十城武安君苏秦为燕说齐王再拜而贺因仰而吊【补曰索隐曰当时庆吊应有其辞史不録耳】齐王按戈而却曰【却秦使退】此士何庆吊相随之速也对曰人之饥所以不食乌喙者【本草乌头一名天雄】以为虽偷充腹而与死同患也今燕虽弱小强秦之少婿也王利其十城而深与强秦为仇今使弱燕为雁行而强秦制其後以招天下之精兵【此言秦兵为天下精】此食乌喙之类也齐王曰然则柰何乎对曰圣人之制事也转祸而为福因败而为功故桓公负妇人而名益尊【齐桓公也好内而霸正曰齐伐宋章苏代曰智者之举事也转祸而为福因败而成功齐人紫败素也而贾十倍正义引韩子云齐桓公好服紫一国尽服紫当时十素不得一紫取恶素帛染为紫其贾十倍按二章所称文意正同盖紫者妇人之服紫败素得厚利所谓名益尊也】韩献开罪而交愈固【宣十二年楚伐郑许之平晋救之荀桓子欲还彘子不可韩献子谓桓子彘子以偏师陷子罪大矣不如进也战于邲晋败绩成十三年献子将下军孟献子曰晋师乘和必有大功十六年战于鄢陵楚败绩】此皆转祸而为福因败而为功者也王能听臣莫如归燕之十城卑辞以谢秦秦知王以已之故归燕城也秦必德王燕无故而得十城燕亦德王是弃强仇而立厚交也且夫燕秦之俱事齐则大王号令天下皆从是王以虚辞附秦而以十城取天下也此霸王之业【衍矣字】矣所谓转祸为福因败成功者也齐王大说乃归燕城以金千斤谢其後顿首涂中【涂泥也自卑之甚】愿为兄弟而请罪於秦【传有】

人有恶苏秦於燕王者曰武安君天下不信人也王以万乘下之尊之於廷示天下与小人羣

也武安君从齐来而燕王不馆也谓燕王曰臣东周之鄙人也见足下初【见】身无咫尺之功而足下迎臣於郊显臣於廷今臣为足下使利得十城功存危燕足下不听臣者人必有言臣不信伤臣於王者且臣之不信是足下之福也使臣信如尾生廉如伯夷孝如曾参三者天下之高行也而以事足下可乎【补曰姚本作不可乎】燕王曰可曰有此臣亦不事足下矣【衍苏秦曰三字】苏秦曰且夫孝如曾参义不离亲一夕宿於外足下安得使之之齐廉如伯夷不取素飧【诗注素空也】污武王之义而不臣辞孤竹之君【尔雅孤竹四荒中北国汉属辽西令支】饿而死於首阳之山【伯夷传注在蒲坂华山之北河曲之中】廉如此者何肯步行数千里而事弱燕之危主乎信如尾生期而不来【传言与女子期】抱梁柱而死信至如此何肯扬燕秦之威於齐而取大功乎哉【补曰燕秦燕字疑衍】且夫信行者所以自为也非所以为人也皆自覆之术【覆犹庇护也自护其名】非进取之道也且夫三王代兴五霸迭盛皆不自覆也君以自覆为可乎则齐不益於营丘【即北海营陵太公所封】足下不踰【衍楚字】楚【补曰此正以燕楚相远言之】境不窥於边城之外且臣有老母於周离老母而事足下去自覆之术而谋进取之道臣之趣固不与足下合者足下皆自覆之君也仆者进取之臣也所谓以忠信得罪於君者也燕王曰夫忠信又何罪之有也对曰足下不知也臣邻家有远为吏者其妻私人其夫且归其私之者忧之其妻曰公勿忧也吾已为药酒以待之矣後二日夫至妻使妾奉卮酒进之妾知其为药酒也进之则杀主父言之则逐主母乃阳僵弃酒主父大怒而笞之【笞击也】妾之弃酒上以活主父下以存主母也【补曰阳僵覆酒事亦见列女传云周室大夫妻一本故妾一僵而弃酒上以云云】忠至如此然不免於笞此以忠信得罪者也臣之事适不幸而有类妾之弃酒也且臣之事足下亢义益国【亢高极也言高其义】今乃得罪臣恐天下後事足下者莫敢自必也且臣之说齐曾不欺之也使【衍之字】之说齐者莫如臣之言也虽尧舜之智不敢取也【言无成功者虽圣智不足取也按秦传有而略补曰此与後章苏代谓燕昭王章同惟中一段彼言燕欲伐齐事为异记者或有差互不可考也人言秦不信故秦言已之不信乃足下之福如尾生亦无益谓守行义不成功名者之不足贵也又曰仆所谓以忠信得罪则又以信自待公为反覆以诳时君而莫有诘之者也】

王吟【易王子元年慎靓王元年辛丑】

苏秦死其弟苏代欲继之乃北见燕王吟曰臣东周之鄙人也窃闻王义甚高甚顺鄙人不敏窃释锄耨而干大王至於邯鄲所闻於邯鄲者又高於所闻东周臣窃负其志乃至燕廷观王之羣臣下吏大王天下之明主也【观其臣知其主】王曰子之所谓天下之明主者何如者也对曰臣闻之明主者务闻其过不欲闻其善臣请谒王之过夫齐赵者王之仇讎也楚魏者王之援国也今王奉仇讎以伐援国非所以利燕也王自虑此则计过无以谏者非忠臣也王曰寡人之於齐赵也非所敢欲伐也【言虽知其讎以其强故奉之不敢伐】曰夫无谋人之心而令人疑之殆有谋人之心而令人知之拙谋未发而闻於外则危今臣闻王居处不安食欲不甘思齐报齐【因丧见伐之怨正曰说误见後】身自削甲札【札牒也甲之革缘如之正曰札本简牒之簿者甲用革为之左成十六年养由基蹲甲而射之穿七札焉注言能陷坚札侧滑反】妻自组甲紃【紃绵也治之为组以穿札正曰景帝诏纂组注组今绶丝绦也韵书以绳直物曰紃此谓编组穿甲之绳也紃悲萌反鲍因庄子泝泝紃之文生义不知彼字与

此不同】曰有大数矣【补曰一本身自削甲札曰有大数矣与下文同大事记引此姚本同】有之乎王曰子闻之寡人不敢隐也我有深怨积怒於齐而欲报之二年矣【自即位至是正曰二年字必误】齐者我讎国也故寡人之所欲报也直患国敝力不足矣子能以燕报齐寡人奉国而委之於子矣对曰凡天下之战国七而燕处弱焉独战则不能有所附则无不重南附楚则楚重西附秦则秦重中附韩魏则韩魏重且苟所附之国重此必使王重矣今夫齐王【闵】长主也【补曰司马贞云年长也或谓齐强故称长主】而自用也【不如燕之附人正曰自恃其强也】南攻楚五年穡积散【穡亦积】西困秦三年【为秦所困正曰秦为齐困】民憔悴士罢敝【罢音疲】北与燕战覆三军获二将【史并不书】而又以其余兵南面西举【补曰姚本而举】五千乘之劲宋【举宋在齐闵二十八年燕昭王二十六年比时未举也而下十二章亦言齐以宋地封泾阳盖宋策齐宣也所拔五城正曰此言举五千乘之宋非仅得其城邑而已盖在?宋之後明矣下章包十二诸侯即史所谓泗上诸侯邹鲁之君皆称臣者】而包十二诸侯此其君之欲得也【得其欲】其民力竭也安犹取哉【言齐不可复攻取】且臣闻之数战则民劳久师则兵敝【师兼不战言之】王曰吾闻齐有清济浊河可以为固有长城钜防足以为塞【补曰清济以下说见秦策】诚有之乎对曰天时不与虽有清济浊河何足以为固民力穷敝虽有长城钜防何足以为塞且异日也济西不役【不役者养兵以备敌】所以备赵也河北不师所以备燕也【补曰济西齐州以西也河北谓沧景等州在漯河之北者正义云】今济西河北尽以役矣封内敝矣夫骄主必不好计而亡国之臣贪於财王诚能母爱宠子母弟以为质宝珠玉帛以事其左右彼且德燕而轻亡宋【轻者易为之然则前言举未亡也】则齐可亡已王曰吾终以子【补补曰一本有子字姚同】受命於天矣曰内寇不与【寇犹乱与犹和】外敌不可拒【言不能制内则不可以拒外】王自治其外【谓谋敌齐】臣自投其内【谓治於内补曰为燕间齐投其内也】此乃亡之势也【彪谓燕昭之举实自代发之正曰大事记云战国策载苏代说燕之辞误以为吟使吟能有志如是岂至覆国乎论其世考其事皆说昭王之辞也按史记误同】

苏代为燕说齐未见齐王【闵】先说淳于髡曰人有卖骏马者比三旦【比犹连】立市人莫之知往见伯乐曰臣有骏马欲卖之比三旦立於市人莫与言子还而视之去而顾之【顾反视补曰还当音旋义同】臣请献一朝之费【元作贾】贾【补曰疑费字】伯乐乃还而视之去而顾之一旦而马价十倍今臣【衍之字补曰一本无姚同】之欲以骏马见於王【马自喻也】莫为臣先後者【为之助也】足下有意为臣伯乐乎臣请献白璧一双黄金千镒以为马食【自喻为马则此所献马之食也正曰献此以为马之食】淳于髡曰谨闻命矣乃入言之王而见之齐王大说苏子

陈翠合齐燕将令燕王之弟为质於齐【代传说王吟已乃使一子质齐正曰鲍因此指为王吟事然史云一子质齐而此云燕王之弟则不合矣其时未可定】燕王许诺太后闻之大怒曰陈公不能为人之国则亦已矣焉有离人子母者老妇欲得志焉【以杀辱之为快】陈翠欲见太后王曰太后方怒子子其待之陈翠曰无害也遂入见太后曰何驪也【驪少肉也】太后曰赖得先王鴈鹜之余食不宜驪者【补曰姚本无者字】驪者忧公子之且为质於齐也陈翠曰人主之爱子也不如布衣之甚也非徒不爱子也又不爱丈夫子独甚太后曰何也对曰太后嫁女诸侯奉以千金膏地百里以为人之终也【嫁则女之事毕矣封亦公子之终

也】今王愿封公子百官持职【持犹守也封无功者争之职也】羣臣効忠曰公子无功不当封今王之以公子为质也且以为公子功也【补曰一本且以为公子功而封之也姚同】而太后弗听臣是以知人主之不爱丈夫子独甚也且太后与王幸而在故公子贵太后千秋之後王弃国家而太子即位公子贱於布衣故非及太后与王封公子则公子终身不封矣太后曰老妇不知长者之计乃命公子乘车制衣为行具【补曰此与触讦谏赵威后同战国所载事多如此然触讦言尤婉切所以人多称之】

或献书燕王燕【补曰一本无此燕字姚同】王而不能自恃【弱国必得援】不恶卑名以事强事强可以令国安长久万世之善计也【补】以事强而不可以为万世则不如合弱将奈何合弱而不能如一【以不一为无如之何】此臣之所以为山东苦也比目之鱼【尔雅东方有比目鱼不比不行谓之鰈】不相得则不能行故古人称之以其合两而如一也今山东合弱而不能如一是山东之智不如鱼也又譬如车士之引车也三人不能行索二人五人而车因行矣今山东三国弱【盖韩魏赵也】而不能敌秦索二国因能胜秦矣然而山东不知相索者智故不如车士矣胡与越人言语不相知志意不相通同舟而凌波至其相救助如一也今山东之相与也如同舟而济秦之兵至不能相救助如一智又不如胡越之人矣三物者【物犹事】人之所能为也山东主【补曰一本主上有之字】遂不悟此臣之所为山东苦也愿大王之熟虑之也山东相合之主者不恶【补】卑名之国者可长存【言山东欲存惟不羞名卑者可也】之卒者【之犹其也卒猝同补曰疑当以三者字句不然卒者下有缺文】出土以戌韩梁之西边此燕之上计也不急为此国必危矣王必大忧今韩梁赵三国已合矣秦见三晋之坚也必南伐楚赵见秦之伐楚也必攻燕【补曰一本必北攻姚同】物固有势异而患同者秦之伐韩故中山亡【秦不暇救故赵亡之正曰秦非助中山者补曰一本之伐作久伐下句同姚并同按赵策苏厉曰楚人久伐而中山亡魏策曰中山恃齐魏以轻赵齐魏伐楚而赵亡中山大事记谓楚与魏连兵中山失助而亡史称主父与齐燕共灭中山则齐非中山与国也愚谓中山近魏二国相善信矣赵与齐燕灭中山乃年表惠文四年所书已与世家差一年且赵之有事中山久矣自武灵十九年胡服以来攻城略地无岁无之何至此而始合齐燕灭之邪而秦韩齐魏伐楚败唐昧重丘当武灵二十五年是年赵年表书攻中山通监纲目书中山君奔齐齐策称中山君臣於齐盖四国伐楚而赵不与赵得以攻中山而亡之其君遂出奔也史所载与策合者莫明於此中山君自奔齐则与齐共灭之言未可据秦韩齐魏共伐楚则所谓楚魏连兵非此年齐策曰齐燕战而赵氏兼中山则史记之言有误大事记或未察也今燕策又谓秦伐韩故中山亡则韩亦助中山者是年秦伐韩取穰岂其事欤愚尝因此策与齐策陈轸合三晋事同而辨中山非至惠文三年始亡特迁其主尔以此数策观之尤信】今秦之伐楚燕必亡【赵亡之】臣窃为王计不如以兵南合三晋约戍韩梁之西边山东不能坚为此此必皆亡燕果以兵南合三晋也【此三年与楚三晋攻秦彪谓此三物喻从之精者也故虽子吟庸主亦能感动惜乎言犹在耳而诸侯之心已变矣此岂非天亡之哉正曰此章当是昭王时说见齐策秦伐魏章下】

燕王吟既立苏秦死於齐苏秦之在燕也与其相子之为婚而苏代与子之交及苏秦死而齐闵【元作宣下并同】宣【正曰通监大事记赧王二年齐湣王元年齐伐燕子之子吟死在赧王元年正宣王时事策与孟子合甚明辨见秦策】王复用苏代燕吟三年与楚三晋攻秦

不胜而还子之相燕贵重主断苏代为齐使於燕燕王问之曰齐【衍宣字】宣王何如对曰必不霸燕王曰何也对曰不信其臣苏代欲以激燕王以厚任子之也於是燕王大信子之子之因遗苏代百金听其所使鹿毛寿【鹿盖钜鹿寿之所居补曰徐广云一作厝毛甘陵县本名厝□索隐云春秋後语亦作厝韩子作潘寿】谓燕王曰不如以国让子之人谓尧贤者以其让天下於许由由必不受有让天下之名实不失天下今王以国让相子之子之必不敢受是王与尧同行也燕王因举国属子之【属犹付与】子之大重或曰禹授益而以啓人为吏【以啓臣为益吏】及老而以啓为不足任天下传之益也啓与友党【补曰姚本支党】攻益而夺之天下是禹名传天下於益也【补曰一本无也字】其实令啓自取之今王言属国子之而吏无非太子人者是名属子之而太子用事王因收印自三百里石吏而効之子之【补曰大事记以石计禄始见于此】子之南面行王事而吟老【以老自休】不听政顾为臣国事皆决子之子之三年燕国大乱百姓恫怨将军市被太子平谋将攻子之储子【见离娄下正曰何以知即此人】谓齐闵宣王因而伐之破燕必矣王因令人谓太子平曰寡人闻太子之义将废私而立公飭君臣之义【飭成也犹正】正父子之位寡人之国小不足先後【补曰正义云先後并去声】虽然则唯太子所以令之太子因数党聚衆将军市被围公宫攻子之不克将军市被及百姓乃反攻太子平将军市被死以殉国构难数月死者数万衆燕人恫怨【元作恐补曰姚本作怨】百姓离意孟轲谓齐闵宣王曰今伐燕此文武之时不可失也【补曰此当时所谓孟子劝齐伐燕者也使无孟子之书则人将此言之信乎要之圣贤决无是事也推此则凡後世之诬罔圣贤而无徵者可知】王因令章子将五都之兵【都大邑补曰索隐云五都即齐也临淄是五都之一】以因北地之衆【齐之北近燕】以伐燕士卒不战城门不闭燕王吟死齐大胜燕子之亡二年而燕人立太【元作公】公【补曰当作太史有】子平是为燕昭王【记三年有彪谓王吟七国之愚主也惑苏代之浅说贪尧之名恶禹之实自令身死国破盖无足算齐闵所以请太子者近於兴灭继絶矣而天下不以其言信其心盖名实者天下之公器也岂可以虚称矫举而得哉故齐闵之胜适足以动天下之兵而速临淄之败也正曰大事记云子吟安知所谓尧舜者哉彼子之之徒借是名以篡国子吟特为说客所愚耳方子之未得国也则说以尧让许由由不受有让天下之名实不失天下吟於是乎以燕让及子之既得国也则又说以禹不如尧荐益而以啓人为吏已而攻益夺其国吟於是乎擦三百石吏以上而効之其愚至此尚足论乎後世因此遂有不可慕虚名受实祸之论是论肆行则利禄之外无非虚名妨吾利禄者无非实祸人纪?矣此君子之所惧也欲不惑者其唯知实理乎】初苏秦弟厉因燕质子而求见齐王【闵】齐王怨苏秦【秦为燕谋齐故】欲囚厉燕质子为谢乃已遂委质为臣燕相子之与苏代婚而欲得燕权乃使苏代侍【元作持】持【补曰史作侍】质子於齐齐使代报燕燕王吟问曰齐王其霸乎曰不能曰何也曰不信其臣於是燕王专任子之已而让位燕大乱齐伐燕杀王吟子之燕立昭王而苏代厉遂不敢入燕皆终归齐齐善待之苏代过魏魏为燕执代齐使人谓魏王【哀正曰襄】曰齐请以宋封泾阳君秦不受秦非不利有齐而得宋地也不信齐王与苏子也今齐魏不和如此其甚则齐不欺秦【秦所以不信齐疑其合魏也】秦信齐齐秦合泾阳有宋地非魏之利也故王不如东苏子【使归齐】秦必疑而不信苏子矣【疑其合齐魏】齐秦不合天下无变【五国无秦之兵】伐齐之形成矣【时齐魏相恶故云】於是出苏代代【补补曰史复有代字】之宋宋善待之【补曰此策自苏代过魏以下又见魏策疑自为一章而复出姚本别提行】

昭王【唵子补曰名平元年赧王四年庚戌】

张仪为秦破从连横谓燕王曰【补曰仪说在昭元年】大王之所亲莫如赵昔赵王【元作王襄子也】王【正曰魏策称襄子谓襄王即此类】以其姊为代王妻欲并代约与代王遇於勾注之塞【补曰勾注见赵策】乃令工人作为金斗长其尾【补曰索隐云凡方者为斗若安长柄则名科尾即斗之柄其形若刀者是也按韵书科斗音同索隐皆云斗】令之可以击人与代王饮而陰告厨人曰即酒酣乐进热歃【饮也】即因反斗击之於是酒酣乐进取热歃厨人进斟羹【斟注也补曰即酒酣乐中请进热歃句於是酒酣乐进取热歃句正曰索隐云热而啜之是羹也斟谓羹汁故名汁曰斟】因反斗而击代王杀之王脑涂地【涂犹汚补曰一本反斗而击之代王脑涂地正义云反斗倒柄击也】其姊闻之摩笄以自刺也【笄簪也】故至今有摩笄之山天下莫不闻【补曰正义云摩笄山在蔚州飞狐县东北百五十里事亦见赵世家大事记元王元年晋赵无恤灭代解題代北狄之别种其国在今蔚州史记误以简子卒在贞定王十一年十二年灭代今从外纪古文又云襄子夏屋之役见史记行如虎狼盖生於兼并无亲之国而承简子贪暴之规遂以为临大利决大计非用仁义之所也】夫赵王【武灵】之狼戾无亲【暴戾如狼】大王之所明见知也且以赵王为可亲邪赵兴兵而攻燕再围燕都而劫大王【赵燕记皆不书】大王割十城乃却以谢赵王已入朝渚池【补曰一本今赵王姚同】効河间以事秦今大王不事秦【补曰一本此句无今字姚同】秦下甲云中九原驱赵而攻燕则易水长城非王之有也【济北卢注云东至海盖亦距燕云正曰易水见前章正义云长城在易州界】且今时赵之於秦犹郡县也不敢妄兴师以征伐今大王事秦秦王【昭】必喜而赵不敢妄动矣是西有强秦之援而南无齐赵之患是故愿大王之熟计之也燕王曰寡人蛮夷僻处虽大男子裁如婴儿【补曰裁史注音在仅也】言不足以求正谋不足以决事今上客幸而教之请奉社稷西面而事秦献常山之尾【补曰尾犹末也恒山之东】五城【传有在楚韩齐赵後彪谓燕昭贤智主也非仪此说能震动且人之性稟有父子不相肖者自襄至武灵七入传矣而欲以其狼戾无亲例之人岂信之哉然而燕昭之听之也卑甚盖拊摩新附之民势未可以有为又诸国从之者衆故为卑辞以纾其国是仪之横有幸也加之数年收集缮治有其绪则若云者固昭王之所唾而弃者史言苏代复重燕燕使约从如初此昭王之素所蓄积也】

宫他为燕使魏魏不听留之数月客谓魏王【哀正曰无考】曰不听燕使何也曰以其乱也对曰汤之伐桀欲其乱也故大乱者可得其地小乱者可得其宝今燕客之言曰【客即他】事苟可听虽尽宝地犹为之也王何为不见【补曰西周等策有宫他未知即此人否事苟可听云云语燕客之言以利诱王使见之也】魏王说因见燕客而遣之【彪谓是客也以隣国为壑者也彼恶知所谓天下为度者乎】

燕昭王收破燕後即位卑身厚币以招贤者欲将【补曰一本此有以字姚同】报讎故往见郭隗【补曰五罪反】先生曰齐因孤国之乱而袭破燕孤极知燕小力【补曰一本此有少字姚同】不足以报然得贤士与共国以雪先王之耻孤之愿也【记有此文】敢问以国报讎者奈何郭隗先生对曰帝者与师处王者与友处霸者与臣处亡国与役处【役仆役】屈已而事之【屈枉也正曰屈也犹言折节】北面而受学则百已者至先趋而後息【先彼而

趋後彼而息】先问而後嘿则什已者至人趋则若已者至【补曰一本人趋已趋是姚同】冯几据杖【冯据也】眄视指使则厮【补曰音斯】役之人至若恣睢奋击【睢仰目正曰恣睢暴戾也後荀彧传注暴怒貌睢香萃反唐史音锥】跳藉叱咄【响呵藉践也当从足集韵咄呵也正曰响呼俱呼具二反咄都活反下言叱咄上有响字为复跳藉义亦不类当是响藉见韩策释为跳跃此谓跳跃跳藉也】则徒隶之人至矣此古服道致士之法也【服犹事事有道者】王诚博选国中之贤者而朝其门下天下闻王朝其贤臣天下之士必趋於燕矣昭王曰寡人将谁朝而可郭隗先生曰臣闻古之君人有以千金求千里马者三年不能得涓人【谒者也正曰楚世家涓人见国语韦昭云今之中涓汉书颜注中涓官名居中而涓洁也如淳云主通书谓出入命也】言於君曰请求之君遣之三月得千里马马已死买其骨五百金反以报君君大怒曰所求者生马安事死马而捐五百金涓人对曰死马且买之五百金况生马乎天下必以王为能市马马今至矣於是不能期年千里马之至者三【记无之】今王诚欲致士先从隗始隗且见事况贤於隗者乎岂远千里哉於是昭王为隗筑宫而师之乐毅自魏往邹衍自齐往剧辛自赵往士争趣燕燕王吊死问生与百姓同其甘苦二十八年国殷富士卒乐佚轻战於是遂以乐毅为上将军与秦楚三晋合谋以伐齐齐兵败闵王出走於外燕兵独追北入至临淄尽取齐宝烧其宫室宗庙齐城之不下者唯独莒即墨【记同彪谓燕昭郭隗皆三代人也欲为国雪耻君臣问对无他言专欲得贤士而事之此无竞惟人之谊也欲无兴得乎哉臣役之对天下之格言市马之喻万世之美谈太史公独何为削之亦异於孔氏删修之法矣正曰立国用贤固三代之道未可即以为三代之人大史公固为疎略然孔氏删修之法则不系此补曰大事记解题引国策说苑云云今按说苑文小异鶡冠子博选篇亦用隗言此则柳宗元所谓伪书取以充入者也】客谓燕王曰齐南破楚西屈秦用韩魏之兵燕赵之衆犹鞭策也【御诸国如马】使齐北面伐燕即虽五燕弗能当王何不陰出使【密遣使者】散游士顿齐兵【顿劳敝之也】敝其衆使世世无患燕王曰假寡人五年寡人得其志矣苏子曰请假王十年燕王说奉苏子车十五乘【补曰姚本五十乘是】南使於齐谓齐王【闵】曰齐南破楚西屈秦用韩魏之兵燕赵之衆犹鞭策也臣闻当世之举王【兴起之王补曰举字恐因下误衍】必诛暴正乱举无道【五旬举之之举】攻不义今宋王【君偃】射天笞地铸诸侯之象使侍屏匱【屏厠也当作井匱路厠补曰周礼宫人为井匱注井漏井所以受水潦郑司农云匱路厠也铸诸侯之象即後章秦王所谓宋王无道为木人以象寡人射其面者】展其臂弹其鼻此天下之无道不义而王不伐王名终不成【补曰大事记云齐之伐宋也苏代实啓之引策曰今宋王无道云云】且夫宋中国膏腴之地隣民之所处也【齐民隣宋者处之】与其得百里於燕不如得十里於宋伐之名则义实则利王何为弗为齐王曰善遂兴兵伐宋三覆宋宋遂举燕王闻之絶交於齐率天下之兵以伐齐大战一小战再顿齐国成其名故曰因其强而强之乃可折也因其广而广之乃可缺也【彪谓听言亦难矣苏子所以告齐王天下之正谊也齐用之不旋踵而招天下之兵故有事於天下者不可以人之言求诸已而已已无罪而後可以诛人之罪已无衅而後可以乘人之衅正曰宋固可伐矣齐之伐宋犹孟子所谓以燕伐燕不行仁政动天下之兵者也苏代曰王不伐王名终不成伐之名则义实则利此岂天下之正谊哉】

齐伐宋【此二十七年】宋急苏代乃遗燕昭王书曰夫列在万乘而寄质於齐【寄犹委也一说如质子寄寓】名卑而权轻奉【元作秦】秦【补曰史作奉万乘助齐】齐助之伐宋

民劳而实费破宋残楚淮北【楚之淮北宋隣也宋破则此地残补曰此已申淮北明矣下文又曰必反宋地而归楚之淮北】肥大齐【肥亦大也】雠强而国弱也此三者皆国之大败也而足下行之将欲以除害取信於齐也【宋者齐之害】而齐未加信於足下而忌燕也愈甚矣然则足下之事齐也失所为矣夫民劳而实费又无尺寸之功破宋肥雠而世负其祸矣【负犹荷】足下以宋加淮北强万乘之国也【宋五千乘国也又加之淮北则万乘而强】而齐并之是益一齐也北夷【齐之北国正曰索隐云北夷谓山北狄附齐者正义云齐桓公伐山戎】方数百里加之以鲁卫【言齐因举宋且并此数国】此所谓强万乘之国也而齐并之是益二齐也夫一齐之强而燕犹不能支也今乃以三齐临燕其祸必大矣虽然臣闻智者之举事也转祸而为福因败而成功者也齐人紫败素也【败犹恶也素白繒染为紫】而贾十倍越王勾践栖於会稽而後残吴霸天下此皆转祸而为福因败而成功者也今王若欲转祸而为福因败而成功乎则莫如遥霸齐而厚尊之使之盟於周室【背秦而从使齐主盟补曰一本使使明於】尽焚天下之秦符约曰夫上计破秦其次长宾客秦秦挟宾客以待破【挟如挟长之挟秦挟宾客本欲并天下而反见破故必患正曰姚本长宾之秦史长宾之秦挟宾以待破史文为是按魏策有此文法宾即摈二客字因宾字误衍】秦王【昭】必患之秦五世以结诸侯今为齐下秦王之志苟得穷齐不憚以一国都为功【将割以赂与国】然而王何不使布衣之人以穷齐之说说秦谓秦王曰燕赵破宋肥齐尊齐而为之下者燕赵非利之也弗利而势为之者何也以不信秦王也今王何不使可以信者接收燕赵令涇阳君若高陵君【二君秦所重天下信之】先於燕赵秦有变【谓背二国】因以为质则燕赵信秦矣秦为西帝赵为中帝燕为北帝立为三帝而令诸侯韩魏不听则秦伐之齐不听则燕赵伐之天下孰敢不听天下服听因驱韩魏以攻齐曰必反宋地而归楚之淮北夫反宋地而归楚之淮北燕赵之所同利也并立三帝燕赵之所同愿也夫实得所利名得所愿则燕赵之弃齐也犹释敝屣【革履也当作蹠正曰蹠所绮反说文舞履也徐云谓足根不正纳履也引汉志邯郸女跼蹠字与蹠履通】今王之不收燕赵则齐霸必成矣诸侯戴齐而王独弗从也是国危也【秦受齐伐】诸侯戴齐而王从之是名卑也王不收燕赵名卑而国危王收燕赵名尊而国宁夫去尊宁而就卑危智者不为也秦王闻若说也必如刺心【言其切已正曰心痛如刺】然【补曰然字句可】则王何不务使智士以若此言说秦伐齐必矣夫取秦上交也伐齐正利也尊上交务正利圣王之事也燕昭王善其书曰先人尝有德苏氏【资秦合从】子之之乱而苏氏去燕燕欲报雠於齐非苏氏莫可乃召苏氏【王吟策言魏出之之宋宋善待之今在宋也正曰按此策文盖齐已宋取楚淮北之後劝之尊齐摈秦而说秦以伐齐非将伐宋时事也策云苏代过魏魏为燕执之齐使人说魏出代代之宋宋善待之史遂以此策首语接其下且史纪代事前後固多误如举五千乘云云以为说子吟之类代为燕间齐劝之伐宋见於策者可考矣是宋未灭时代已至燕岂至此时尚留宋而为之说燕哉此策不能无舛而史尤失之也】复善待之与谋伐齐竟破齐闵王出走【代传有】

苏代谓燕昭王曰今有人於此孝如曾参孝已信如尾生高廉如鲍焦史鰌【卫卿子鱼】兼此三行以事王奚如王曰如是足矣对曰足下以为足则臣不事足下矣臣且处无为之事归耕乎周之上地耕而食之织而衣之王曰何故也对曰孝如曾参孝已则不过养其亲耳信如尾生高则不过不欺人耳廉如鲍焦史鰌则不过不窃人之财耳今臣为进取者也臣以为廉不与身俱達【不苟取故多穷】义不与生俱立仁义者自完之道也非进取之术也王曰自

忧不足乎【忧亦完也不完则忧故曰完又曰忧】对曰以自忧为足则秦不出穀函齐不出营丘楚不出疏章【地缺】三王代位五伯改政皆以不自忧故也若自忧而足则臣亦周之负箠耳【箠竹器】何为烦大王之廷邪【烦浼也】昔者楚取章武【属渤海】诸侯北面而朝秦取西山诸侯西面而朝曩者使燕毋去周室之上【去犹失也上上地燕盖尝攻得而不取也正曰此句未详恐注非】则诸侯不为别驾而朝矣【言同轨而朝燕与朝秦楚同】臣闻之善为事者先量其国之大小而揆其兵之强弱【揆度也】故功可成而名可立也不能为事者不先量其国之大小不揆其兵之强弱故功不可成而名不可立也今王有东向伐齐之心而愚臣知之王曰子何以知之对曰矜戟砥剑【矜矛柄戟盖为矜施戟砥柔石所以砺也】登丘东向而叹是以愚臣知之今夫乌获举千钧之重行年八十而求扶持故齐虽强国也西劳於宋南罢於楚则齐军可败而河间可取燕王曰善吾请拜子为上卿奉子车百乘子以此为寡人东游於齐【为燕说齐】何如对曰足下以爱之故与【补曰与平声姚本下复有则字】何不与爱子与诸舅叔父负床之孙【负言背倚床立未能行也】不得【此属皆不得不处与车】而乃以与无能之臣何也王之论臣何如人哉今臣之所以事足下者忠信也恐以忠信之故见罪於左右王曰安有人臣尽其力竭其能而得罪者乎对曰臣请为王譬昔周之上地尝有之其丈夫宦三年不归其妻爱人其所爱者曰子之丈夫来则且奈何乎其妻曰勿忧也吾已为药酒而待其来矣已而其丈夫果来於是因令其妾酌药酒而进之其妾知之半道而立虑曰吾以此饮吾主父则杀吾主父以此事告吾主父则逐吾主母与杀吾主【补补曰此宜有主事】父逐吾主母者宁佯蹶而覆之【蹶踣也】於是且佯僵而仆之其妻曰为子之远行来之故为美酒今妾奉而仆之其丈夫不知缚其妾而笞之故妾所以笞者忠信也今臣为足下使於齐恐忠信不渝於左右也臣闻之曰万乘之主不制於人臣十乘之家不制於衆人匹夫徒步之士不制於妻妾而又况於当时之贤主乎臣请行矣愿足下之无制於羣臣也【补曰此策说见前苏秦章】

燕王谓苏代曰寡人甚不喜訑者言也【沅州谓欺曰訑补曰訑徒案反或作诞】苏代对曰周地贱媒为其两誉也之男家曰女美之女家曰男美然而周之俗不自为取妻且夫处女无媒老且不嫁舍媒而自銜敝而不售【敝犹败无成事也】顺而无败售而不敝者唯媒而已矣且事非权不立非势不成夫使人坐受成事者唯訑者耳王曰善矣【彪谓訑亦吾所恶而实不可废古者使功使过使智使愚盖用人可也处已则否正曰利诞谩之人以为用此不正之论也使过之说不类使愚使贪使勇亦谓御得其道耳非此之谓也】

苏代谓【元作为】为奉阳君【此亦其後袭称正曰说见赵策】说燕於赵以伐齐奉阳君不听乃入齐【代入】恶赵令齐絶於赵齐已絶於赵因之燕谓昭王曰韩为谓臣曰人告奉阳君曰使齐不信赵者苏子也令齐王【闵】召蜀子【齐将正曰无考】使不伐宋者【?】苏子也令齐王谋遁取秦以谋赵者【遁逃去也言避秦兵取言与之合正曰按此策下文所云臣以为不若逃而去之以韩魏循自齐而为之取秦深结赵以劝之】苏子也令齐守赵之质子以甲者又苏子也请告子以请齐【告子名不害代请之使为已请齐正曰无据史引韩为谓代举或人告奉阳君之言请者或人之请为赵言於齐也】果以守赵之质子以甲【果者必欲告子如是】吾必守子以甲【言告子不听则然正曰谓告子齐果守赵质子以甲则吾将守子以甲】其言恶矣虽然王勿患也【人所告奉阳之言於代为恶燕王善代必患之】

故代告王以无患为其乱齐赵所以利燕】臣故知入齐之有赵累也【言赵恶代】出为之以成所欲【出者奋不顾也言知其有累而奋为之欲谓利燕】臣死而齐大恶於赵臣犹生也今齐赵絶可大纷已【纷乱也】持臣非张孟谈也【持犹使补曰持字疑特】使臣也如张孟谈也齐赵必有为智伯者矣奉阳君告朱謹与赵足曰【代称奉阳之言然二皆赵人】齐王使公玉曰【齐人姓名正曰一本公玉按字书三画中近上者于方反三画匀者虞欲反隶始加点以别字新序有公玉丹史公玉带则公玉姓也此疑有缺误】命说【奉阳名正曰说即兑之讹说见赵策】曰必不反韩珉今召之矣【言故反前下类此】必不任苏子以事今封而相之必【元作令】令不合燕今以燕为上交吾所恃者顺也【公玉父名正曰无考鲍因下言有甚於其父遂云尔按赵策齐欲攻宋章以三晋劫秦使顺也甘之恐即此人】今其言变有甚於其父顺始与苏子为讎见之如【元作知】知无厉【补曰无害也】今贤之两之【两谓封与相正曰贤之谓以代为贤两之谓与之并处】已矣吾无齐矣【并述奉阳之言】奉阳君之怒甚矣【此代自言】如齐王【衍王字】王【补曰衍字】之不信赵而小人奉阳君也【待之为小人】因是而倍之【音背言燕宜然正曰言齐因是倍赵】不以今时大纷之解而复合则後不可奈何也故齐赵之合苟可循也【循言顺燕】死不足以为臣患【代本以二国之合必不顺燕今乃合而顺之故有死逃之罪正曰言二国之合必害於燕苟顺而无害国之利也故已之死逃荣辱皆不足论】逃不足以为臣耻为诸侯不足以为臣荣被髮自漆为厉不足以为臣辱【补曰历史音赖见秦策死不足以为臣患及尧舜之贤而死两节与秦策范雎说同】然而臣有患也臣死而齐赵不循恶交分於臣也【燕以二国可因而代不欲则三国皆恶代矣然二国卒不可因则代之恶皆有所分交犹皆】而後相効【交後人见其不可因而効已】是臣之患也【患其後时】若臣死而必相攻也【齐赵相攻】臣必勉之而求死焉尧舜之贤而死禹汤之智而死孟贲之勇而死乌获之力而死生之物固有不死者乎在必然之理【死者人之必然】以成所欲王何疑焉臣以【补曰一本此有为字】不若逃而去之【许以罪逃去】臣以韩魏循自齐【言逃燕则自韩魏顺行至齐】而为之取秦【言劲齐以怒赵】深结赵以勤之【此劲赵以怒齐也结亦以韩魏赵自燕结之勤犹厚】如是则近於相攻也臣虽为之不【?】累燕【正曰臣虽为之累燕下文引奉阳君之言而释之曰臣虽为之不累燕】奉阳君告朱謹曰【亦代称之】苏子怒於燕王之以吾故【以用也吾指奉阳】弗子相【子谓謹正曰子谓代】又不予卿也【补曰一本不予相又不予卿也予亦为苏子自予也】殆无燕矣其疑至於此【燕王善代而奉阳谓其怒燕者疑也】故臣虽为之不累燕【疑代怒燕故代虽为燕纷二国二国不怨燕也】又不欲王【欲犹须也言其自相攻不须燕】伊尹再逃桀而之汤【补曰一本此句上有再逃汤而之桀六字姚本同】果与鸣条之战而以汤为天子伍子胥逃楚而之吴果与柏【元作伯】伯【正曰古字通古今人如柏虎柏益伯乐之类】举之战而报其父之讎今臣逃而纷齐赵始可着於春秋且举大事孰不逃桓公之难管仲逃於鲁阳虎之难孔子逃於卫【定八年阳虎作难十四年孔子乃适卫不如此所云】张仪逃於楚【传不书正曰即仪至楚之事】白圭逃於秦【未详】望诸相中山也【此与乐毅同号】使赵赵劫之求地望诸攻关而出外孙之难【未详】薛公释载【不乘车也】逃出於关【齐湣二十五年田文入秦秦囚欲杀之因秦幸姬得出驰去变姓名出关】三晋称以为好【补补曰士上恐有缺字】士【太史公曰好客自喜】故举大事逃不足以为辱矣卒絶齐於赵赵合於燕以攻齐败之【补曰此策文多未详注多未安】

燕昭王且与天下伐齐而有齐人仕於燕者昭王召而谓之曰寡人且与天下伐齐旦暮出令矣子必争之争之而不听子因去而之齐寡人有时复合【预言不胜与齐合补曰一本复合和也】且以因子而事齐当此之时也燕齐不两立然而常独欲有复收之之志若此也【收犹合不两立则不可复合而不能无合之之志彪谓此少年狡狴之行小人患失之类而燕聊为之此其所以不王也补曰当此以下纪述者之辞】齐魏争燕齐谓燕王曰吾得赵矣魏亦谓燕王曰吾得赵矣燕无以决之而未有适【补曰音的】予也苏代谓燕相曰臣闻辞卑而币重者失天下者也辞倨而币薄者得天下者也今魏之辞倨而币薄燕因合於魏魏【补补曰姚本有此字】得燕【元作赵】赵【正曰魏曰得赵燕因合於魏而得赵也】齐遂北矣【魏昭十二年与秦赵韩燕伐齐败之燕独入临淄此二十八年】

苏代自齐使人谓燕昭王曰臣间【元作闻间犹顷也】闻【补曰当作间正曰间去声致隙曰间间隔也】离齐赵齐赵已孤矣王何不出兵以攻齐臣请为王弱之燕乃伐齐攻晋【疑兵也实合魏而阳攻以疑齐正曰晋地名下文云晋下可见】令人【代令之】谓闵王曰燕之攻齐也欲以复振故地也【振举也盖欲复王吟所失】燕兵在晋而不进则是兵弱而计疑也王何不令苏子将而应燕乎夫以苏子之贤将而应弱燕燕破必矣燕破则赵不敢不听是王破燕而服赵也闵王曰善乃谓苏子曰燕兵在晋今寡人发兵应之愿子为寡人为之将对曰臣之於兵何足以当之王其改举【别用他将】王使臣也是败王之兵而以臣遗燕也战不胜不可振也【振救也】王曰行寡人知子矣苏子遂将而与燕人战於晋下【晋之下地】齐军败燕得甲首二万人苏子以其余兵以守阳城而报於闵王曰王过举令臣应燕今军败亡二万人臣有斧质之罪请自归於吏以戮闵王曰此寡人之过也子无以为罪明日又使燕攻阳城及狸【燕地也赵悼襄元年攻燕取狸阳城正曰据此策则燕取之於齐者也大事记引正义云燕无狸阳疑字误当作渔阳按此文两云阳城及狸则正义说亦未可据】又使人谓闵王曰日者齐不胜於晋下此非兵之过齐不幸而燕有天幸也今燕又攻阳城及狸是以天幸自为功也王复使苏子应之苏子先败王之兵其後必务以胜报王矣王曰善乃复使苏子苏子固辞王不听遂将与燕战於阳城燕人大胜斩首三万齐君臣不亲百姓离心燕因使乐毅大起兵伐齐破之【彪谓苏代之於燕齐皆尝隙而复善之情礼均也而独为燕图齐之深何哉昭王贤也虽然糜烂人之民人以行其说而奉其所贤仁者不为也独不念尝委质於齐乎补曰苏代倾诈不义一至於此其罪浮於张仪矣】

苏代自齐献书於燕王曰臣之行也固知将有口事【言人譖之】故献御书而行【献侍御者以书】曰臣贵於齐燕大夫将不信臣臣贱将轻臣臣用将多望於臣【望犹责】齐有不善【谓恶燕】将归罪於臣天下不攻齐将曰善为齐谋天下攻齐将与齐兼贸【元作鄮】鄮【补曰鄮当作贸互易也字增邑讹】臣【贸犹卖】臣之所重处重留【元作卯】鄮【正曰一本卯作卯姚同据此则重当平声重卯犹言累卯谓已处危也上文恐多重字】也【重犹难也留谓处於齐为难】王谓臣曰吾必不听衆口与谗言吾信汝也犹列眉也【言无可疑补曰列眉未详一本犹□□者也姚同龙龕手监□古□字愚谓即□字也□□者斩断果决之意】上可以得用於齐次可以得信於下苟无死女无不为也以女自信可也【以犹由】与之言曰【王与之】去燕之齐可也期【元作其】其【补曰当作期字通借】於成事而已臣受令以任齐【得任於齐正曰以齐为任】及五年齐数出兵未尝谋燕齐赵之交

一合一离燕【衍王字】王【正曰一本不与齐谋赵则与赵谋齐疑王即不字之讹】与齐谋赵则与赵谋齐【燕与齐谋赵实欲离齐於赵代因与赵谋齐以成燕之谋正曰见上】齐之信燕也至於虚北地【虚言不设备齐北近燕】行其兵【以北兵伐他国】今王信田伐与参去疾之言【二人谗代者】且攻齐使齐犬马而不言燕【且辞也犬马言已贱齐如之又不泄燕之谋补曰一本犬马□姚同字书无□字恐即贱】今王又使庆【燕臣名】令臣曰吾欲用所善王苟欲用所善王欲用之【补曰姚本王苟欲用之无中间五字文义为胜】则臣请为王事之王欲醢臣【醢释同见邹忌说琴补曰魏世家如耳云以秦醢卫张仪传醢之索隐云古释字】专【元作剗】剗【补曰专字讹】任所善则臣请归醢事臣苟得见则盈愿【彪谓为人间者均有此六患非燕昭之明代其危哉功成矣犹不能无此患况他人乎代之谋齐亦异乎豫让之於赵矣彼哉彼哉补曰此策盖代在齐而或有疑之於王者故代以书自白文多未详燕昭即位志复齐讎非一日矣乐毅以赵乱适卫至燕在十七年之後又十年始合五国以破齐方其患齐之强志未逞也苏代之徒为之间齐离赵之交激秦之怒劝之以伐宋骄其兵而罢其师齐卒以亡代有力焉而世不数何也盖毅之为燕约结信义服人卒用此以胜何假乎代之为哉代之倾诈反覆效用於燕亦昭王之贤明有以御之非倚以成功也】

秦召燕王燕王欲往苏代约燕王【约犹止】曰楚得枳【属巴郡】而国亡【皆谓失地秦昭此七八九年连拔楚郡】齐得宋而国亡【即此二十八年入临淄三十二年下七十城】齐楚不得以有枳宋事秦者何也是则有功者秦之深讎也【言此以见克齐者秦之所恶也】秦取天下非行义也暴也秦之行暴正告天下告楚曰【补曰姚本秦之行暴於天下正告楚曰】蜀地之甲轻舟浮於汶【汶江水出岷山补曰汶眉贫反即岷】乘夏水【江夏注沔水自江别至南郡华容为夏水正曰索隐云夏音暇谓夏潦之水盛涨时也下文乘夏水两出可见矣】西下江五日而至郢汉中之甲轻舟出於巴乘夏水下汉【补曰一本而下姚同】四日而至五渚【史注在洞庭正曰今详本文下汉而至五渚则五渚乃汉水下流洞庭在江之南非其地也】寡人积甲宛东下随【属南阳】智者不及谋勇者不及怒寡人如射隼矣【隼祝鸠喻易也正曰射隼见易解卦正义云隼今之鹞也】王乃待天下之攻函谷不亦远乎楚王为是之故十七年事秦秦正告韩曰我起乎少曲【韩地范雎传伐韩少曲补曰本文少曲高平正义云相近高平在怀州河阳县西北】一日而断太行【补曰正义云太行山羊肠坂道北过韩上党也】我起乎宜阳而触平阳【补曰宜阳见前平阳即近武遂韩坟墓所在者】二日而莫不尽繇我【繇由同正曰索隐云繇音摇摇动也我属下句】离两周而触郑五日而国举韩氏以为然故事秦秦正告魏曰我举安邑塞女戟韩氏太原卷【不通此四处正曰安邑女戟见前太原在河东时属赵卷见魏策正义云卷犹断絶轨免反太原当为太行盖曰秦举魏之安邑塞魏之女戟则韩氏太行断絶也按赵策秦举安邑而塞女戟韩氏太原絶正义以卷为絶据此】下轹【元作枳】枳【补曰姚本我下按枳道即河内地轹枳字通】道道南阳封冀【道道所由也後志河东皮氏有冀亭注引此正曰南阳即修武封封陵杜预云在蒲州】兼包两周乘夏水浮轻舟强弩在前鉞戟在後决荥口【荥泽之口补曰索隐云荥泽口与今汴河口通其水深可以灌大梁公子无忌亦云然大事记灌大梁之策战国以来人皆知之秦卒用此策】魏无大梁决白马之口魏无济阳决宿胥之口【徐注纪年曰敖山寨集胥口】魏无虚顿丘【补曰大事记云水经注河水旧在白马县南决通齐阳黄沟

白马本卫之曹邑今滑州县史作外黄济阳大事记作黄齐阳说又见秦策宿胥虚顿丘并见秦魏策】陆攻则击河内水攻则灭大梁魏以为然故事秦秦欲攻安邑恐齐据之则以宋委於齐曰宋王无道为木人以象【补曰一本作写盖古象字作鸟拙也】寡人射其面寡人地絶兵远不能攻也王苟能破宋有之寡人如自得之已得安邑塞女戟因以破宋为齐罪秦欲攻韩【元作齐】齐恐天下救之则以齐委於天下曰齐人【补曰一本人作王姚同】四与寡人约四欺寡人必率天下以攻寡人者也【必言攻之决】有齐无秦无齐有秦必伐之必亡之已得宜阳少曲致蔺离【补】石【补曰蔺离石见前据文恐有离字姚注石字三本同作君详此当缺】因以破齐为天下罪秦欲攻魏重楚【恐楚击其後】则以南阳委於楚【补曰邓之南阳】曰寡人固与韩且絶矣残均陵【地缺正曰正义云均州故城在随州西南盖均陵也】塞颍隘【补曰见楚策】苟利於楚寡人如自有之魏弃与国而合於秦因以塞颍隘为楚罪兵困於林中【补曰见魏策】重燕赵以胶东委於燕【胶东国故齐国项纪注即墨也】以济西委於赵已得讲於魏质【元作至】至【补曰索隐云当作质】公子延【秦子正曰魏子】因犀首攻赵【补曰一本首下有属行而三字史姚同索隐曰谓连兵相属也行胡郎反】兵伤於离石遇败於马陵而重魏则以叶蔡委於魏【补曰马陵叶蔡并见前史离石作譙石马陵作阳马索隐云并赵地名】已得讲於赵则却魏魏不为割困则使太后穰侯为和嬴则兼欺舅与母【嬴谓胜舅谓穰侯】适燕者曰以胶东【适谪同补曰适即上所谓因以为罪者】适赵者曰以济西适魏者曰以叶蔡适楚者曰以塞颍厄适齐者曰以宋必令其言如循环【补曰言其无穷不可致诘也】用兵如刺蜚【集韵虫名喻易也补曰蜚匪微反又上去二音一本刺绣姚注云钱本添入蜚字】母不能知【补曰一本知作制姚同】舅不能约龙贾之战【魏襄五年秦拔我龙贾军补曰此据世家年表在二年大事记从年表云魏惠王後二年】崖门之战封陵之战【魏哀十六年秦败我封陵恐岸亭在颖韩注记岸门封陵亭名然则封陵亦属颖川正曰哀当作襄封陵见封冀注补曰岸门之战赧王元年当韩宣惠王十九年】高商之战【史不书】赵庄之战【赵肃侯十三年赵庄与秦战死河西】秦之所杀三晋之民数百万今其生者皆死秦之孤也【补曰死於秦者之孤】西河之外上雒之地三川晋国之祸三晋之半【言上三地被祸居晋国之半正曰西河上雒魏地三川韩地言秦已得三晋之半也】秦祸如此其大而燕赵之秦者【补曰之下恐有缺字】皆以争事秦说其主此臣之所大患燕昭王不行苏代复重於燕燕反约从亲如苏秦时或从或否而天下由此宗苏氏之从约代厉皆以寿死名显诸侯【代传有在伐齐事後彪谓秦之所以正告诸侯及其用诈皆愚弄之也而诸侯莫省独一燕昭知之然亦不久死矣彪故曰秦横之成天幸也补曰文甚明快】

燕饥赵将伐之楚使将军之燕过魏见赵恢赵恢曰使除患无至【除之使不至】易於救患伍子胥宫之奇不用【此除患者】烛之武【僖三十年晋秦围郑佚之狐言於郑伯曰国危矣若使烛之武见秦君师必退之武见秦伯曰郑知亡矣而有益於君敢以烦执事越国以鄙远君知其难也焉用亡郑以倍邻邻之厚君之狐也秦伯说乃还】张孟谈【皆救患者】受大赏是故谋者皆从事於除患之遗者【谓救患者补曰一本遗作道下无者字姚同义是】而无【元作先】先【补曰上疑有缺文】使除患无至者今与【补曰一本作予姚同】以百金送公也【公谓楚使】不如以言公听吾言而说赵王【惠文】曰昔者吴伐齐为其饥也伐齐未必胜也而弱越乘其敝以霸今王之伐燕也亦为其饥也伐之未必胜而强秦将以

兵乘【元作承】承【正曰此书乘承通後昌国君章有】王之西是使弱赵居强吴之处而使强秦处弱越之所以霸也愿王之熟计之也使者乃以说赵王赵王大说乃止燕昭王闻之乃封之以地【封恢也恢盖赵之仕魏而为燕者为燕亦所以为魏也正曰无据】

赵且伐燕苏代为燕谓惠王【赵惠文】曰昨者臣来过易水蚌方出曝【蚌也】麤而鹬啄其肉【鹬知天将雨鸟】蚌命而箝其喙【箝箝也】鹬曰今日不雨明日不雨即有死蚌蚌亦谓鹬曰今日不出明日不出即有死鹬两者不肯相舍渔者得而并擒之【补曰姚注谚语谚诗皆叶後语必见死蚌脯即多一字?文类聚引云蚌将为脯即见蚌脯此则叶韵然不闻蚌鹬得雨则解也陆农师读两作两两谓辟口恐别有据愚按韵补蚌叶彼五反鹬知将两两即解去尔一本箝作相字通鹬音聿亦有衍音】今赵且伐燕燕赵久相攻以敝大衆臣恐强秦之为渔父也愿王熟计之也惠王曰善乃止【正曰燕惠武城皆与赵惠王相及此策时不可考】

惠王【昭王子元年赧王三十七年癸未】

昌国君乐毅为燕昭王合五国之兵【传云并合赵楚韩魏燕之兵补曰正义云故昌城在淄州淄川县东北】而攻齐下七十余城尽郡县之以属燕三城未下【聊莒即墨补曰毅传唯莒即墨未下燕世家云聊莒即墨未下盖因燕将守聊城不下之事而误说见齐策】而燕昭王死惠王即位用齐人反间疑乐毅而使骑劫代之将乐毅奔赵赵封以为望诸君【补曰史赵封毅为观津号望诸君索隐云望诸泽名在齐盖赵有之故号马】齐田单诈骑劫卒败燕军复收七十余城以复齐燕王悔惧赵用乐毅乘【元作承】承【正曰说见上】燕之敝以伐燕燕王乃使人让乐毅且谢之曰先王举国而委将军将军为燕破齐报先王之讎天下莫不振动寡人岂敢一日而亡将军之功哉会先王弃羣臣寡人新即位左右误寡人寡人之使骑劫代将军为将军久暴露於外【暴曝同】故召将军且休计事将军过听以与寡人有隙【元即郅隙不合也】郅遂捐燕而归赵将军自为计则可矣而亦何以报先王之所以遇将军之意乎【补曰自先王举国止此一节恐当在後章燕王书寡人不佞云云之上余说见彼章】望诸君乃使人献书报燕王曰臣不佞不能奉承先王之教以顺左右之心恐抵斧质之罪以伤先王之明而又害於足下之义【无罪而杀毅非义也】故遁逃奔赵自负以不肖之罪【负言荷罪在身】故不敢为辞说今王使使者数之罪臣恐侍御者之不察先王之所以畜幸臣之理【畜养也幸亲爱之】而又不白於臣之所以事先王之心【白犹明】故敢以书对臣闻贤圣之君不以禄私其亲功多者授之以官随其爱能当者处之故察能而授官者成功之君也论行而结交者立名之士也臣以所学者观之先王之举措有高世之心故假节於魏王【时诸侯不通出关则以节假之故上言毅自魏往见王正曰毅传毅为魏昭王使燕燕王以客礼待之毅辞让遂委质为臣正义云假魏节使燕】而以身得察於燕【补曰毅传赵人因沙丘之乱适魏至燕故大事记附见於燕昭王十七年】先王过举擢之于宾客之中而立之于羣臣之上不谋於父兄而使臣为亚卿【亚次也】臣自以为奉令承教可以幸无罪矣故受命而不辞先王命之曰我有积怨深怒於齐不量轻重而欲以齐为事臣对曰夫齐霸国之余教而骤胜之遗事也闲於兵甲习於战攻王若欲攻之则必举天下而图之莫径【元作劲补曰一本作径】於结赵矣且又淮北宋地楚魏之所同愿也【楚欲得淮北魏欲

得宋时皆属齐】赵若许【许燕】约楚赵宋尽力【宋虽已举其遗民怨之补曰一本约楚魏宋尽力姚同史云赵若许而约四国攻之其文为明】四国攻之齐可大破也先王曰善臣乃口受令具符节南使臣於赵顾反命【回顾而反言其速】起兵随而攻齐以天之道先王之灵河北之地随先王举而有之於济上济上之军奉令击齐大胜之轻卒锐兵长驱至国齐王【闵】逃遁走莒仅以身免珠玉财宝车甲珍器尽收入燕【补曰此数语毅罪状也】大吕陈於元英【大吕律均元英燕乐名正曰索隐云大吕齐钟名元英燕宫殿名】故鼎反乎历室【故鼎齐所得燕鼎凡鼎以占休咎故归之律历之室正曰历史作磨周礼遂师抱磨音历又史表磨侯汉表作历古字通用说见秦策正义引括地志云元英历室燕二宫名在幽州蓟县西四里宁台之下高诱云燕吟乱齐伐燕杀吟得鼎今反归古鼎今注本无】齐器设於宁台【燕台】蓟丘之植【蓟幽州国植旗帜之属】植於汶篁【汶水出泰山莱芜原竹田曰篁言燕以齐为塞正曰索隐云蓟丘燕所都言燕蓟丘之所植植齐王汶上之竹徐注谓燕之疆界移於齐之汶水非此之谓此言燕蓟丘之所植移植於汶上之竹田索隐云亦然按昉集古今文以毅书为首有策问云夷门之植植为燕其说用毅语也愚谓左氏以太宫之椽归为卢门之椽句法正同补曰一本汶皇】自五伯以来功未有及先王者也先王以为顺于其志【补曰一本以为恢于志】以臣为不顿命【顿犹坠】故裂地而封之【补曰谓封昌国君也】使之得比乎小国诸侯臣不佞自以为奉令承教可以幸无罪矣故受命而弗辞臣闻贤明之君功立而不废故着於春秋蚤知之士【蚤知先见也】名成而不毁故称於後世若先王之报怨雪耻夷万乘之强国收八百岁之蓄积【通太公数之】及至弃羣臣之日遗令诏後嗣之余义执政任事之臣所以能循法令顺庶孽者【新立之君皆患庶孽之乱昭王能预顺之】施及萌隶【萌氓同】皆可以教於後世臣闻善作者不必善成善始者不必善终昔者伍子胥说听乎阖闾故吴王远迹至於郢夫差弗是也【不然子胥之说】赐之鸱夷而浮之江【?夷榼名马革为其形以斂骸骨正曰史乃取子胥尸盛以?夷革应劭云取马革为?夷榼形】故吴王夫差不悟先论之可以立功故沉子胥而弗悔子胥不蚤见主之不同量故入江而不改【补曰史不化索隐云言子胥怨恨故虽投江而神不化犹为波涛之神也】夫免身全功以明先王之迹者臣之上计也离毁辱之非【离丽也犹遭正曰离罹通遭也】堕先王之名者臣之所大恐也临不测之罪以幸为利者义之所不敢出也臣闻古之君子交绝不吐恶声【补曰正义曰不说己长而谈彼短】忠臣之去国不洁其名【毁其君而自洁】臣虽不佞乎【补曰一本无乎字盖衍】数奉教於君子矣恐侍御者之亲左右之说而不察疏远之行也故敢以书报惟君之留意焉【传有补曰大事记延平陈氏曰乐毅之下齐也止侵略寛赋斂除暴令修旧政求逸民显而礼之祀桓公管仲於郊表贤者之间封王蠋之墓凡可以悦其民者无不为之此孟子所以教齐者齐王不能用之於燕而乐毅能用之於齐吕子读书记曰乐毅伐齐云云曰若不遂乘之待彼悔前之非改过恤下而抚其民则难虑也推此言则世之论毅者岂其然乎朱子曰乐毅亦战国之士何尝是王者之师又曰毅初合秦魏之师又因人怨湣王之暴故一举下齐七十余城湣王死人心之怒已解恐三国分功故急遗之以燕之力亦止於此况田单忠义死节坚守二城自不可攻非不欲取盖力不能尔毅在当时亦恣意虏掠正孟子所谓毁其宗庙迁其重器者尔愚谓乐毅之伐齐取宝器烧宫室见於田齐燕世家毅传国策皆然徵以毅之自言盖诬矣陈氏首以止侵掠为美似未察其实也齐以燕伐燕燕以齐伐齐孟子所以教齐王者毅实违之是尚为能用之乎虽有寛赋除暴反政礼贤数端不足以揜其罪也故愚着朱子说并记吕子他日之论以见其不满於毅如此而取陈

氏者特一时之见未为定论也】张丑为质於燕【正曰丑见齐韩魏中山等策与楚威王田婴公仲张仪相涉恐非惠王之王世】燕王欲杀之走且出境境吏得丑丑曰燕王所为将杀我者人有言我有宝珠也王欲得之今我已亡之矣而燕王不我信今子且致我我且言子之夺我珠而吞之燕王必当杀子剖子腹【剖判也】及【补曰姚本作反】子之肠矣夫欲得之君不可说以利吾要且死子肠亦且寸絶境吏恐而放之【补曰韩非子记子胥语楚边候同此】

王喜【惠王曾孙元年赧王五十三年丁未】

燕王喜使栗腹以百金为赵孝成王寿酒三日反报曰赵民其壮者皆死於长平其孤未壮可伐也王乃召昌国君乐闲【穀子补曰史穀奔赵後燕王复以其子乐间为昌国君索隐云闲纪闲反】而问曰何如对曰赵四達之国也其民皆习於兵不可与战王曰吾以倍攻之可乎曰不可曰以三可乎曰不可王大怒左右皆以为赵可伐遽起六十万以攻赵令栗腹以四十万攻鄢使庆秦【补曰史作卿秦一本标後语作庆奉】以二十万攻代赵使廉颇以八万遇栗腹於鄢使乐乘【穀之族】以五万遇庆秦於代燕人大败乐闲入赵【燕记元年有正曰史在王喜四年余说见下】燕王以书且谢焉曰寡人不佞不能奉顺君意故君捐国而去则寡人之不肖明矣敢端其愿【端犹专也愿欲复用之】而君不肯听故使使者陈愚意君试论之语曰仁不轻絶智不轻怨君之於先王也世之所明知也寡人望有非则君掩盖之【有非而掩盖之王喜所自谦】不虞君之明罪之也【虞犹图】望有过则君教诲之不虞君之明弃之也且寡人之罪国人莫不知天下莫不闻君微出明怨【言间虽无出之赵以明有怨於我人亦知之】以弃寡人寡人必有罪矣虽然恐君之未厚也谚曰厚者不毁人以自益也仁者不危人以要名【补曰此当有也字姚本作以讹】故掩人之邪者厚人之行也救人之过者仁者之道也世有掩寡人之邪救寡人之过非君孰【元作恐】恐【补曰字有误一本心所姚同】望之今君厚受任於先王以成尊轻弃寡人以快心则掩邪救过难得於君矣且世有薄而故厚施【世虽薄我我反厚施之】行有失而故惠用【行与我不合反惠爱任用之正曰有过失当弃反顺用之】今使寡人任不肖之罪【任犹负】而君有失厚之累请为君择之也【择其所处】无所取之国之有封疆【补曰一本此有犹字姚同】家之有垣墙所以合好掩恶也【补曰恶如字】室不能相和出语邻家未为通计也怨恶未见而明弃之未为尽厚也寡人虽不肖乎未如殷纣之乱也君虽不得意乎未如商容箕子之累也然则不内盖寡人【盖一作尽】而明怨於外恐其适足以伤於高而薄於行也非然也苟可以明君之义成君之高虽任恶名【所谓任不肖之罪】不难受也本欲以为明寡人之薄而君不得厚扬寡人之辱而君不得荣此一举而两失也义者不亏人以自益况伤人以自损乎君无以寡人不肖累往事之美昔者柳下惠吏於鲁三黜而不去或谓之曰可以去柳下惠曰苟与人之异恶往而不黜乎犹且黜乎宁於故国尔【补曰此论语所记便不及】柳下惠不以三黜自累故前业不忘不以去为心故远近无议今寡人之罪国人未知而议寡人者徧天下语曰论不修心【凡有修者先必有失而善论者不然补曰修字必有误】议不累物仁不轻絶智不简功【简与附反犹弃也】简弃大功者辍也【辍止也】轻絶厚利者怨也辍而弃之怨而累之宜在远者【疎远之臣可尔】不望之于君也今以寡人无罪君岂怨之乎愿君捐怨追惟先王复以教寡人意君曰【意度其然】余且愿心【待之以不善之心】以成而过

不顾先王以明而恶使寡人进不得修功退不得改过君之所揣也【言间量我也】唯君图之此寡人之愚意也敬以书谒之乐间乘怨不用其计二人卒留赵不报【彪谓过而不改然後为过燕王喜过在於悞谏伐赵其於间未见其有可絶之处而能悔如此礼不云乎其嗟也可去其谢也可食何间絶之深也抑其书辞条达明丽婉乎屈曲天下之伟文也正曰责其出奔以明怨薄已而扬过悔艾惩创之意少未见其果可以释憾而反国也补曰新序以此为燕惠王遗乐毅书考之毅答惠王书云今足下使人数之以罪而史所载惠王让毅无数罪之语前章燕王使人让毅且谢之曰云云当是此章之首盖错简也且策以此为乐间答书而未云间乘怨不用其计於乘何与史赵世家孝成王十五年廉颇破杀栗腹虜庆秦乐间则是间为将而被虜燕世家则云奔赵又赵孝成王十六年廉颇围燕以乐乘为武襄君二十一年孝成王卒廉颇将攻繁阳取之使乐乘代之颇攻乘乘走据策史所记多舛故知此书非乐间事而新序之说为是云】

秦并赵北向迎燕【并合也迎以兵迎之】燕王闻之使人贺秦王【始皇】使者过赵赵王【悼襄】系之使者曰秦赵为一而天下服矣燕【元作兹】兹【补曰恐燕字讹】之所以受命於赵者为秦也【言燕先时服赵者以秦与赵合】今臣使秦而赵系之是秦赵有隙秦赵有隙【补曰一本并作郅姚同】天下必不服而燕不受命矣且臣之使秦无防於赵之伐燕也赵王以为然而遣之使者见秦王曰燕王窃闻秦并赵燕王使使者贺千金秦王曰夫燕无道吾使赵有之子何贺使者曰臣闻全赵之时南邻为秦北下曲阳为燕【下曲阳属钜鹿】赵广三百里而与秦相距五十余年矣所以不能反胜秦者【反犹报也言数为秦败不能报而胜之】国小而地无所取今王使赵北并燕【此并谓兼有之】燕赵同力必不复受命【?】於秦矣臣窃为王患之秦王以为然起兵而救燕【赵悼襄九年攻燕取狸阳城兵未罢秦攻邺拔之此十九年】

燕太子丹质於秦亡归见秦且灭六国兵已临易水恐其祸至太子丹患之谓其太傅鞠武曰【补曰一本鞠作鞠下同索隐云音麴又如字】燕秦不两立愿太傅幸而图之武对曰秦地遍天下威胁韩魏赵氏则易水以北未有所定也柰何以见陵之怨【传言丹质秦秦遇之不善】欲批其逆鳞哉【批白结切击也说难龙可扰而骑也然喉下有逆鳞径尺人有婴之则必杀人人主亦有补曰一本批作排姚云曾钱作此字】太子曰然则何由太傅曰请入图之【请太子入息已乃图之】居之有间樊将军亡秦之燕太子客之【补曰姚本容之】太傅鞠武谏曰不可夫秦王【始皇】之暴而积怨於燕【怨其亡归】足为寒心【补曰凡人寒甚则心战恐惧亦战】又况闻樊将军之在乎是谓【元作以】以【补曰史作谓然以义亦通】委肉当饿虎之蹊【蹊径也】祸必不振矣【振救也】虽有管晏不能为之谋也愿太子急遣樊将军入匈奴以灭口请西约三晋南连齐楚北讲於单于然後乃可图也太子丹曰太傅之计旷日弥久心惛然恐不能须臾【言已忧思昏瞶且死须臾不可待】且非独於此也夫樊将军困穷於天下归身於丹丹终不迫於强秦而弃所哀怜之交置之匈奴是丹命固卒之时也【知祸且至而犹为乏自疑命止於此】愿太傅更虑之鞠武曰燕有田光先生者其智深而虑沉【沉犹深补曰一本其智深其勇沉史姚同】可与之谋也太子曰愿因太傅交於田先生可乎鞠武曰敬诺出见田光道太子【衍曰字】曰愿图国事於先生田光曰敬奉教乃造焉太子跪而逢迎却行为道【不敢背之】跪而拂席田先生坐定左右无人太子

避席而请曰燕秦不两立愿先生留意也田光曰臣闻骐骥盛壮之时一日而驰千里至其衰也弩马先之今太子闻光壮盛之时不知吾精已消亡矣虽然光不敢以乏国事也【不令太子所图有阙】所善荆轲可使也太子曰愿因先生得【衍愿字】愿交荆轲可乎田光曰敬诺则起趋出【补曰一本即趋出姚本即起】太子送之至门戒曰丹所报先生所言者国大事也愿先生勿泄也田光俛而笑曰诺【补曰正义曰俛音俯按俛即俯字汉书晁错传俛仰韩信俛出东方朔俛啄顔注即俯】俛行见荆轲【俛致敬貌礼一命而俛】曰光与子相善燕国莫不知今太子闻光壮盛之时不知吾形已不逮也幸而教之曰燕秦不两立愿先生留意也光窃不自外【言不自踈於轲】言足下於太子愿足下过太子於宫荆轲曰谨奉教田光曰光闻长者为行【补曰一本长者之行】不使人疑之今太子约光曰所言者国大事也愿先生勿泄也是太子疑光也夫为行而使人疑之非节侠士也【荀悦曰立气势作威福结私交以立强於世者谓之侠】欲自杀以激荆轲【言其死非为泄欲厉勉轲使死之耳】曰愿足下急过太子言光已死明不言也遂自刭而死轲见太子言田光已死致光之言【补曰一本此四字作明不言也姚同史同今本】太子再拜而跪膝下行【以膝行不立行故言下】流涕有顷而後言曰丹所请田先生不言者欲以成大事之谋今田先生以死明不泄言岂丹之心哉荆轲坐定太子避席顿首曰田先生不知丹不肖使得至前愿有所道此天之所以哀燕而不弃其孤也【补曰索隐云无父曰孤时燕王尚在或记者失辞或诸侯骄子亦僭称孤也又刘向曰燕王真之太子】今秦有贪利之心而欲不可足也非尽天下之地臣海内之王者【补曰荀子注引策作牢天下之王】其意不餍今秦已虏韩王【秦十七年虏王安】尽纳其地又举兵南伐楚北临赵王翦数十万之衆距漳邺而李信出太原云中赵不【补曰一本下有能字】支秦必入臣入臣则祸至燕燕小弱数困於兵今计举国不足以当秦诸侯服秦莫敢合从丹之私计愚以为诚得天下之勇士使於秦闕以重利【闕言示之以利使之见而欲也】秦王贪其势必得所愿矣诚得劫秦王使悉反诸侯之侵地若曹沫之与齐桓公则大善矣脱不可因而刺杀之彼大将擅兵於外而内有大乱则君臣相疑以其间诸侯得合从其偿【补曰一本此有破字姚同】秦必矣此丹之上愿不知所以委命【委弃性命犹言不知死所】惟荆卿留意焉久之荆轲曰此国之大事也臣弩下恐不足任使太子前顿首固请无让然後许诺於是尊荆轲为上卿舍上舍太子日造门下供太牢具异物间进车骑美女恣荆轲所欲以顺适其意久之荆卿未有行意秦将王翦破赵虏赵王迁【十九年】尽收其地进兵北略地至燕南界【略经略之】太子丹恐惧乃请荆卿曰秦兵旦暮渡易水则虽欲长侍足下岂可得哉荆卿曰微太子言臣愿得谒之今行而无信则秦未可亲也夫【术今字】今樊将军秦王购之金千斤邑万家诚得樊将军首与燕督亢之地图【後志涿郡方城县有督亭注引此补曰正义云督亢坡在幽州范阳县东南今固安县南有督亢陌幽州南界刘向别録云督亢膏腴之地盖欲献之故画图】献秦王秦王必说见臣臣乃得有以报太子太子曰樊将军以穷困来归丹丹不忍以已之私而伤长者之意愿足下更虑之荆轲知太子不忍乃遂私见樊於期【将军名】曰秦之遇将军可谓深矣父母宗族皆为戮没今闻购将军之首金千斤邑万家将奈何樊将军仰天太息流涕曰吾每念常痛於骨髓顾计不知所出耳轲曰今有一言可以解燕国之患而报将军之仇者何如樊於期乃前曰奈何【补曰一本为之奈何姚同】轲曰愿得将军之首以献秦王秦王必喜而召见臣臣左手把其?右手搃其胷其胷【搃刺也知鸩反补曰搃一作抗故他本连有二字下文同索隐云抗拒也义非】然则将军之仇报而燕国见陵之耻除矣将军岂有意乎樊於期偏袒扼腕而进曰此臣之日夜切

齿腐心【腐者痛之极补曰勇者奋厉必以左手扼右腕也切齿见前一本拊心】乃今得闻教遂自刎【刎断也】太子闻之驰往伏屍而哭极哀既已无可奈何乃遂盛樊於期之首函封之於是太子预求天下之利匕首得赵人徐夫人匕首【补曰索隐云徐姓夫人名男子也】取之百金使工以药淬之【淬当从火坚刀刃也若淬则灭火器尔正曰淬焠通取内反说文徐云淬剑烧而入水也此谓以毒药染锔而淬之也後语注云以药水鉴匕首为淬鉴古电反】以试人血濡缕【沾濡衣之一缕】人无不立死者乃为装【行具也】遣荆轲燕国有勇士秦武阳年十三杀人人不敢牾【元作悟】悟【正曰悟忤通姚作忤说见魏策】视【悟逆也】乃令秦武阳为副荆轲有所待欲与俱其人居远未来而为留待顷之未发太子迟之疑其改悔乃复请之曰日已尽矣荆卿岂无意哉丹请先遣秦武阳荆轲怒叱太子曰今日往而不反者竖子也今提一匕首入不测之强秦仆所以留者待吾客与俱今太子迟之请辞决矣遂发太子宾客知其事者皆白衣冠以送之至易水上既祖【祖行祭补曰诗毛传祖而舍輶饮酒於其侧曰饯疏輶谓祭道路之神封土为山象伏牲其上既祭送者饯之饮毕乘车辄之而去】取道高渐离击筑荆轲和而歌为变徵之声【地形训云变徵为商盖悲音补曰应劭云筑似琴而大头安弦以竹击之故名按刘子云荆轲如秦宋意击筑文选高渐离击筑荆轲歌宋如意和之】士皆垂泪涕泣又前而为歌曰风萧萧兮易水寒壮士一去兮不复还复为羽声【其音怒】怆慷【壮士不得志也补曰一本慷慨羽声朱子楚辞後语作羽声慷慨】士皆瞋目髮尽上冲冠於是荆轲遂就车而去终已不顾既至秦持千金之资物厚遗秦王宠臣中庶子蒙嘉【补曰中庶子说见前新序邹阳书作蒙恬盖误後语蒙类注云蒙恬弟也】嘉为先言於秦王曰燕王诚振怖大王之威【振震同下同】不敢兴兵以逆军吏【补曰一本以拒大王】愿举国为内臣比诸侯之列给贡职如郡县而得奉守先王之宗庙恐惧不敢自陈谨斩樊於期头及献燕督亢之地图函封燕王拜送于庭使使以闻大王唯大王命之秦王闻之大喜乃朝服设九宾【礼大小行人以九仪掌宾客之礼正曰大事记相如奉璧入秦秦王斋五日後乃设九宾礼於庭注引正义韦昭云九宾则周礼九仪也刘伯庄云九宾者周王之备礼天子临轩九服同会秦赵安得九宾但亦陈设车辂文物尔不得以周礼九宾仪为释愚按前汉书大行设九宾恐即秦仪也】见燕使者咸阳宫【补曰关中记云孝公都咸阳今渭城是也水北曰阳其地在渭水之北九嶷诸山之南故曰咸阳自始皇及胡亥皆都此】荆轲奉樊於期之头函而秦武阳奉地图匣以次进至陛【升高陛也】秦武阳色变振恐羣臣恠之荆轲顾笑武阳【顾武阳而笑】前为谢曰北蛮夷之鄙人未尝见天子故振慄【慄惧也】愿大王少假借之使得毕使於前秦王谓轲起取武阳所持图轲既取图奉之秦王发图图穷而匕首见因左手把秦王之手而右手持匕首搃之未至身秦王惊自引而起？絶拔剑剑长操其室【操把持也与操同晋人多用扣室剑鞘补曰索隐云古者带剑上长拔之不出室欲王推之於背今前短易拔故云王负剑】时惶急【惶恐也坚在室牢也】剑坚故不可立拔荆轲逐秦王秦王环柱而走羣臣惊愕【愕相逐惊也】卒起不意【卒猝下同】尽失其度而秦法羣臣侍殿上者不得持尺寸之兵诸郎中执兵皆陈於殿下非有诏不得上方急时不及召下兵以故荆轲逐秦王而卒惶急无以击轲而乃以手共？之【搏击也】是时侍医夏无且以其所奉药囊提荆轲【提擿也补曰且即于反提侄帝反史提文帝提吴太子语同此】秦王方环柱走卒惶急不知所为左右乃曰王负剑王负剑遂拔以击荆轲断其左股荆轲废乃引其匕首以提【衍擿字本注字也】擿【补曰姚本无提字二字即上搃抗并存之类索隐云擿与擲古字同持益反亦提义】秦王不中中柱秦王复击轲轲被八创

轲自知事不就倚柱而笑箕踞以骂【踞坐展两足曰箕补曰既断左股何云展两足】曰事所以不成者乃欲以生刳之必得约契【复地之契】以报太子也左右既前斩荆轲秦王目眩良久已而论功赏羣臣及当坐者【罪所当坐】各有差而赐夏无且黄金二百镒曰无且爱我乃以药囊提荆轲也於是秦大怒燕益发兵诣赵诏王翦军以伐燕十月而拔燕蓟城【并此二十九年】燕王喜太子丹等皆率其精兵东保於辽东秦将李信追击燕王王急用代王嘉计杀太子丹欲献之秦秦复进兵攻之五岁而卒灭燕国【秦二十五年此三十三年】而虏燕王喜秦兼天下其後荆轲客高渐离以击筑见秦皇帝而以筑击秦皇帝为燕报仇不中而死【刺客传有彪谓太子丹不忍一朝之愤轻亡其国其谋悖矣夫以一夫行刳刺於大国出於仓卒不意或幸以中而欲从容质责使悉反侵地取契以归此岂持匕首之所可恃鞠武初谋似矣太子不用不能力争妾妇之明也数士之死燕国之亡皆武实为之荆轲之事甚似曹刿其所不可者刿发愤於一朝而轲畜谋於积岁且白衣祖送者满路其不漏露而先败抑已幸矣轲不足道也厥後留侯亦?椎窃发此其人岂愚哉盖积志仇秦不知所不可使其不逢汉帝则亦死以为期不能一日而亡秦也豫子高渐离张留侯三人者皆孝子忠臣至一之行也惟轲於此则无处焉补曰胡氏谓秦皇狙诈之智虎狼之威千骑万乘之衆挥椎奋击既无觉者大索天下又不能得良非独免并免力士其智略之妙固已视吕政如置中兔何败获之有鲍以三人并论愚谓三人报仇之志则同以智略言之则异胡说当矣朱子曰轲匹夫之勇其事无足言然於此可以见秦政之无道燕丹之浅谋而天下之势已至於此虽圣贤复生亦未知其何以安之也】

战国策校注卷九

卷十

钦定四库全书

战国策校注卷十 宋 鲍彪 原注

元 吴师道 补正

宋【沛梁楚山阳济陰东平及东郡之须昌寿张补曰汉志寿张下有今之睢阳四字】景公【嗣元公元年恭王四年乙酉补曰史年表景公名头曼汉书古今人表作兜乐汲冢师春作繇头曼兜栾音读固相混若繇则岂先二名而後一之者邪黄伯思考辨秘阁古器有宋公繇餗鼎与汲冢合因知异书有不可废者谩记於此】

公输般【鲁之巧人补曰高注公输般鲁般之号也他书或作班古字通汉书班师】为楚设机【天地疏机关也云梯之属补曰高注云机械云梯之属也索隐云械者云梯撞车飞石车弩之具】将以攻宋墨子【宋人名翟】闻之百舍重茧【百里一舍补曰此句高注下有重茧累胝也一句又庄子百舍注百日止宿也按茧即趺字吉典反增韵谓足胝起如茧胝音支】往见公输般谓之曰吾自宋闻子【闻其善】吾欲藉子杀王【正曰一本三杀王并作杀?云人?并而邻反集韵云唐武后字作?如臣字作??即人也】公输般曰吾义固不杀王墨子曰闻公为云梯【梯之高上入云】将以攻宋宋何罪之有义不杀王而攻国是不杀少而杀衆敢问攻宋何义也公输般服焉请见之王【见翟於王】墨子见楚王【非昭即惠正曰当缺】曰今有人於此舍其文轩【车有雕饰者正曰文作之车高注】邻有敝舆而欲窃之舍其锦绣邻有短褐【竖使之衣补曰一本短褐姚本注短一作短韩公考异云短褐一作短方云货殖传用短字董彦远洪李善皆辨古无短褐字按短褐字贾谊贡禹货殖传班彪刘平张衡传凡六见班彪论汉书作短文选则用丁管切是唐儒两用之故少陵以长纓短褐为对而史记孟尝传国策墨子语皆传写之讹今按国策短一作短史士不得短褐司马真亦音竖班彪王命论短字韦昭云当作短襦也又淮南子巫马期纯衣短褐而高诱无说未必皆传写之讹柳子厚亦尝用之安知韩公之必不然乎两存以俟知者】而欲窃之此为何若人也王曰必为有窃疾矣【疾犹癖】墨子曰荆之地方五千里宋方五百里此犹文轩之与敝舆也荆有云梦犀兕麋鹿盈之江汉鱼鼈鼃鼃为天下饶宋所谓无雉兔鲋鱼者也【鲋鱼之小者正曰尔雅翼鲋鱣也今作鲫】此犹梁肉之与糟糠也荆有长松文梓楸楠豫章【大小凡五正曰高注皆大木也补曰楸楠豫章书注楸梓一本楠作枏章作樟姚同楠即枏】宋无长木此犹锦绣之与短褐也臣【元作恶】恶【补曰疑字误】以王吏之攻宋为与此同类也王曰善哉请无攻宋【彪谓翟之说美矣然此时诸侯固有窃疾强吞弱大并小直患其力不给尔岂为若说止攻哉意者墨守之严输般服疾焉假此说以缩兵则有之彼楚国非止足而无有窃疾者也补曰墨子曰公输般为云梯之械成将以攻宋墨子闻之至于郢见公输般之攻械盖墨子之守固有余般诘而言曰吾知所以距子矣吾不言墨子亦曰吾知子之所以距我者吾不言楚王问其故墨子曰公输子之意不过欲杀臣杀臣宋莫能守虽然臣之弟子禽滑厘等三百人已持臣守围之器在宋城上而待楚寇矣虽杀臣不能絶也楚王曰善哉吾请无攻宋】

城矣 史云墨翟宋之大夫或云并孔子时或云在其後索隐云按别录墨翟书有文子文子子夏弟子问於墨子如此则墨子作七十子後愚按孔子以敬王四十一年卒景公以元王七年卒相去十一年擅弓季康子母死般请以机封则般亦与孔子相及大事记云杨墨之说肆行於天下必在春秋後盖异端之说非王教尽废不能兴也】

梁王【襄正曰惠】伐邯鄲而徵师於宋宋君使使者请於赵王【武灵正曰成侯】曰夫梁兵劲而权重今徵师於敝邑敝邑不从则恐危社稷若扶梁伐赵【扶谓助之】以害赵国则寡人不忍也愿王之有以命敝邑赵王曰然夫宋之不如梁也【补曰一本不足如梁高注如当也】寡人知之矣弱赵以强梁宋必不利也【补曰高注梁必兼宋故宋不利之矣】则吾何以告子而可乎【虽知宋不助梁然无辞使宋不听梁】使者曰臣请受边城【请得攻一城以应梁补曰姚本注臣字曾本自此至卷尾皆作惠】徐其攻而留其日以待下吏之有城而已【攻之不力使赵无失城】赵王曰善宋人因遂举兵入赵境而围一城焉梁王甚说曰宋人助我攻矣赵王亦曰【补曰一本赵王亦说曰姚同】宋人止於此矣故兵退难解德施於梁而无怨於赵故名有所加而实有所归【君偃宜无此善以在犀首伐黄下苏秦论攻宋前故次之此正曰大事记周显王十五年梁惠十七年宋公剔成十六年宋伐赵围一城解题曰梁惠王伐邯鄲引策云云又按史世家景公六十四年卒左传景公在位四十八年卒大事记定从左氏景公卒当元王七年鲍以此次之景公缪甚】

谓大尹【宋卿正曰左传哀二十六年宋景公无子取得与啓畜诸公宫於是云云六卿三族降听政因大尹以达杜注近官有宠者鲍因大尹字遂傅会为景公时盖无稽之言也】曰君日长矣【君宋君】自知政【言亲国事】则公无事公不如令楚贺君之孝则君不夺太后之事矣【后时与政】则公常用宋矣【见用於宋尹盖太后之人正曰皆无考】

宋与楚为兄弟齐攻宋楚王【威】言救宋宋因卖楚重以求讲於齐【卖谓衒鬻之】齐不听苏秦为宋谓齐相曰不如与之【听其讲】以明宋之卖【元作资补曰一本作卖姚同】楚重於齐也楚怒【怒其背已而与齐讲】必絶於宋而事齐齐楚合则攻宋易矣【苏秦与剔成齐宣同时知非闵时正曰此必非景公时】

剔成【嗣辟公元年烈王七年壬子立正曰桓公大事记引苏氏云按索隐汲冢纪年作桓公辟兵庄子曰桓公出前驱呼辟蒙人以为狂而史记作辟公辟公名辟谥辟事必不尔史记盖误】

齐攻宋宋使臧子索救於荆荆王【威】大说许救甚劝【补曰劝力也】臧子忧而反其御曰索救而得有忧色何也臧子曰宋小而齐大夫救於小宋而恶於大齐此王之所忧也而荆王说甚必以坚我我坚而齐敝荆之利也臧子乃归齐王【宣】果拔宋五城而荆王不至【此四章有苏秦语得为君偃弑立怒邻宜不能曲折如此故系之剔成然则孟子所称者亦皆剔成也正曰此章时不可考缺之可也鲍妄为傅会至谓孟子所称皆剔成孟子谓戴不胜子之王薛居州居王所王非偃而谁】

君偃【辟公子剔成君弟弑立元年显王四十一年癸巳正曰按世家剔成四十一年弟偃攻袭剔成败奔齐自立为宋君故大事记书宋公剔成为弟偃所攻出奔齐偃自立】

宋【衍康字下同】康王之时【按史君偃在年表世家传并不书谥正曰索隐云战国策吕氏春秋皆以偃谥康王】有雀生?【集韵音欺今江东呼鸛鷖为鷖?正曰此与尔雅鷖鷖?注同文鷖音格鷖音忌?音欺按史记好射騏鴈騏小鴈也音欺愚按策文云小而生巨以雀生鴈言可也云见祥而不祥鷖鷖非祥也黄公绍韵会騏?并为一字音期者非新序作鷖所载比策文为详今通监作?】於城之隅【隅隅也】使史占之曰小而生巨必霸天下【盖言逊也补曰高注太史能辨吉凶之妖祥康王无道不敢正对故云危行言逊太史有焉】康王大喜於是灭滕【隐七年注在沛国公丘县补曰大事记云杜氏世族谱滕为齐灭观孟子所载滕定公文公则杜说误策所记是也】伐薛取淮北之地乃愈自信欲霸之速成故射天笞地斩社稷而焚灭之曰威服天下鬼神骂国老谏臣【元作曰】曰【补曰疑字误】为无颜之冠【冠不覆额补曰史王偃盛血以革囊县而射之命曰射天淫於酒妇人羣臣谏者辄射之诸侯皆曰桀宋】以示勇剖伛之背楔朝涉之胫【楔刻胫胫也】而国人大骇齐闻而伐之民散城不守王乃逃倪侯之馆【侯其臣也正曰无稽】遂得而死【补曰世家云杀王偃年表云死於温温魏地新序得下有病字】见祥而不为祥反为祸【补曰元高注云祸谓齐湣王与楚魏共伐宋杀康王而灭国三分其地家语背者殷王帝辛之世有雀生大鸟於城隅占之曰凡以小生大则国家必王而名益昌於是帝辛侍雀之德不修国政亢暴无极朝臣莫救外寇乃至殷国以亡又说苑孔子曰昔者殷王帝辛云云下段亦同愚按宋殷後也疑即此一事而记者不同】

凡六章

卫【东郡及魏郡黎阳河北之野王朝歌後文公徙楚丘黎阳是也】

灵公【襄公子元年景王三十年丁卯正曰说见赵策】

卫灵公近痈疽【孟子有其人盖医之幸者补曰痈疽疡医】弥子瑕【补曰灵公幸臣其妻与子路之妻兄弟亦见孟子】二人者专君之势以蔽左右复涂侦【卫人补曰韩非子亦有此文而稍异云侏儒善假梦以见主道恐此复涂侦字或侏儒之讹然彼以痈疽为雍鉏则误也】谓君曰昔日臣梦见君君曰子何梦曰梦见竈君君忿然作色曰吾闻梦见人君者梦见日今子曰梦见竈君而言君也有说则可无说则死对曰日并烛天下者也一物不能蔽也若竈则不然前之人炆【炆炙燥也补曰炆余亮反庄子炆者避竈释文炊也盖炊而向竈者】则後之人无从见也今臣疑人之有炆於君者也是以梦见竈君君曰善於是因废痈疽弥子瑕而立司空狗【元在赵策正曰宜从旧说见赵策】

悼公【出公弟元年定王十四年癸酉正曰杜注悼公蒯聩庶弟公子黜史作黔二字并其淹反大事记周贞定王元年卫悼公元年解题引古史云左传出公复入八年悼公立事甚详史记出公复入二十一年卒黜攻出公子自立悼公五年卒】

犀首【魏官也非公孙衍正曰据左传南文子相卫悼公悼公与智伯并时则犀首非公孙衍矣司马彪谓犀首为魏官以此策考之悼公元年当贞定王元年至威烈王二十二年三晋始为诸侯时六十余年是时已有犀首非魏官矣意者其为姓名或号说见秦策然则此犀首者亦三晋之臣欤】伐黄【补曰旧注黄国名按策言黄不一处此未详】过卫使人谓卫君【此策以南文子与智伯同时知为悼公补曰左传出公之入也夺南氏邑杜注子南之子公孙弥牟弥牟与褚师比等逐公越皐如等将纳公文子致衆而问曰弥牟亡有益云云遂立悼公南氏相之事在哀公二十五年二十六年】曰敝邑之师过大国之郊曾无一介之使以存之乎敢请其罪今黄城将下矣已将移兵造大国之城下【已言已下黄】卫君惧束组三百緦【组斜文纷纒之属十首为一緦补曰组屡见前緦古本反说文带也诗緦滕传绳也皆与此不协鲍因高注】黄金三百鎰以遗使者南文子【卫大夫】止之曰是胜黄城必不敢来不胜亦不敢来是胜黄城则功大名美内临其伦【临言以功处其上伦其辈类】夫在中者【国中之臣】恶临议其事【议谓潜短之】蒙大名【蒙冒处之也】挟成功坐御以待中之议【坐御言不营为】犀首虽愚必不为也是不胜黄城破心而走归【破心惧甚也】恐不免於罪矣彼安敢攻卫以重其不胜之罪哉果胜黄城帅师而归遂不敢过卫

智伯欲伐卫遗卫君野马【騊駼也】四百璧一【补曰一本白璧姚同】卫君大说羣臣皆贺南文子有忧色卫君曰一国大懼而子有忧色何文子曰无功之赏无力之礼不可不察也野马四百璧一此小国之礼【补曰一本有也字姚同】而大国致之君其图之卫君以其言告边境智伯果起兵而袭卫至境而反曰卫有贤人先知吾谋也【补曰说苑吴赤市使智氏及赵简子以乘璧遗卫事相类】

智伯欲袭卫乃佯亡其太子使奔卫南文子曰太子顔为君子也【顔太子名君谓智伯】甚爱而有宠非有大罪而亡必有故使人迎之於境曰车过五乘慎勿纳也智伯闻之乃止【彪谓南文子卫之贤智人也虑无遗算补曰大事记贞定王十二年晋荀瑶袭卫解题曰失其年国语序蓝台之宴云还自卫姑载于此未必果此年也战国策云云并载此二年】

嗣君【平侯子元年显王四十五年丁酉】

秦攻卫之蒲【秦昭四年取蒲坂此二十三年正曰年表世家拔魏蒲坂蒲坂在河东非卫地世家卫嗣君时独有濮阳按史秦昭王元年樗里子伐蒲索隐云樗里疾围蒲不克而秦惠王薨事与此合正义云蒲故城在滑州匡城县此即子路作宰地】胡衍谓樗里疾曰公之伐蒲以为秦乎以为魏乎为魏则善为秦则不赖矣【赖犹利】卫所以为卫者以有蒲也今蒲入於魏【卫恐秦取蒲必自入之魏】卫必折於魏【往求援也补曰一本蒲入於秦司马贞引策云今蒲入於秦卫必折而入於魏樗里疾传有亦作入於秦】魏亡西河之外【秦惠六年正曰秦惠八年魏纳河西地後二年魏入上郡於秦而河西滨洛之地失】而弗能【补曰一本有复字姚同】取者弱也今并卫於魏魏必强魏强之日西河之外必危且秦王【昭】亦将观公之事害秦以善【元作害补曰一本作善姚同】魏秦王必怨公樗里疾曰柰何胡衍曰公释蒲勿攻臣请为公入戒蒲守【戒告之以释攻】以德卫君樗里疾曰善胡衍因入蒲谓其守曰樗里子知蒲之病也其言曰吾必取蒲今臣能使释蒲勿攻蒲守再拜因効金二百

鎡【元并作溢】溢【补曰鎡通】焉曰秦兵诚去请厚子於卫君胡衍取金於蒲以自重於卫樗里子亦得三百金而归又以德卫君也【补曰史樗里子传有】

卫使客事魏三年不得见卫客患之乃见梧下先生【盖以所居为号补曰高注家有大梧树因以为号若柳下惠艺文类聚作梧丘】许之以百金梧下先生曰诺乃见魏王【哀正曰无考】曰臣闻秦出【元作入】入【正曰一本作人兵下有出字】兵未知其所之秦魏交而不修之日久矣愿王專【元作博】博【补曰字当作专】事秦无有他计魏王曰诺客趋出【客谓梧下】至郎门而反【补曰姚注读作郭门按韩非子使郎中自开道於郎门之内愚恐郎即廊见秦策】曰【佯若不为卫客偶思念得之】臣恐王事秦之晚王曰何也先生曰夫人於事已者过急【过犹多】於事人者过缓今王缓於事已者安能急於事人奚以知之【王问】卫客曰【梧下称之】事王三年不得见臣以是知王缓也魏王趋见卫客【彪谓此一时气俗无不没於利者以先生称於世其人不薄矣而以百金诺人为之行狡猾之计况小子乎彼哉彼哉正曰此策时不可考何得附之嗣君】

卫嗣君时胥靡【有罪人盖贤者也正曰此本高注窃以为不然有罪而逃何以知其贤此慕传说之事而误说者也卫君以金赎之者耻其失政废刑尔观其言可见补曰靡忙皮反晋灼曰胥相也靡随也顔曰连繫相随而服役之犹今之囚徒庄子注以铁锁相连繫】逃之魏卫赎之百金不与乃请以左氏【卫地缺请亦赎也】羣臣諫曰一百金之地赎一胥靡无乃不可乎君曰治无小乱无大【大小谓国】教化喻於民三百之城足以为治【补曰三百或言家】民无廉耻虽有十左氏将何以用之【彪谓卫君之言及此足以兴起而不得霸岂辅之者无其人乎以羣臣之所諫知不及其君远矣然享国四十余年不受外兵则三百为治之言允蹈之者欤正曰罪人而逃可谓无政矣割地以求胥靡可谓无谋矣其言虽善事则疾矣补曰韩非子有略同】

卫嗣君病富术谓殷顺且曰【皆卫人正曰古人以且名者皆子余反如夏无且唐且龙且之类是也】子听吾言也以说君勿益损也【使之一如其教】君必善子人生之所行与死之心异始君之所行於世者食高丽也【凡有养於口体皆得言食补曰食高丽疑人名】所用者縹错挈薄也【二臣名】羣臣尽以为君轻国而好高丽必无与君言国事者子谓君【补曰子谓君以下今教之以说君也上言死则心异故言此可以动之】君之所行天下者甚縹縹错主断於国而挈薄辅之自今以往者公孙氏【卫国姓也故商君卫之庶孽公子也姓公孙氏正曰高注公孙氏谓嗣君也商君前见秦策】不血食矣君曰善与之相印曰我死子制之嗣君死殷顺且以君令相公子【补】期【嗣君子】縹错挈薄之族皆逐之也【彪谓嗣君贤君也富术称之贬矣盖諫者之言多务为深切诡激之辞使嗣君不贤安能受其言而委之以二臣乎正曰鲍误释胥靡之事遂以卫君为贤其实非也然能从顺且之諫使制二子犹愈於迷复者也补曰縹先结反挈女居反】

卫人迎新妇上车问驂马谁马也御曰惜之新妇谓仆曰拊驂无答服【惜言爱也拊尤爱之正曰高拊击也车两旁曰驂轅中曰服击其驂则两服马受劳答也鲍以为借马故曰爱者非是】车至门扶【人扶妇下】教送母【母送妇者将还故戒之】曰灭竈将失火入室见

白曰徙之牖下妨往来者主人笑之此三言者皆至言也然而不免为笑者蚤晚之时失也【初为妇而云然失之蚤也正曰此策时不可考补曰吕氏春秋白圭新与惠子相见惠子说之以强惠子出白圭告人曰云云与此相类】

凡九章

中山【汉属国有卢奴北平北新城唐深泽若陞安国曲逆望都新市补曰索隐云中山故鲜虞国姬姓也路史杜佑云常山灵寿中山国有故城城中有山故号中山汉中山王靖始移居卢奴太事记威烈王十二年中山武公初立又按左传昭公十二年晋荀吴假道於鲜虞灭肥是冬晋复伐鲜虞杜预云鲜虞北狄别种在中山新市县中山名始见定公四年晋合诸侯召陵谋为蔡伐楚荀寅曰诸侯方贰中山不服无损於楚而失中山不如辞蔡侯则识时势也】

乐羊为魏将攻中山其子时在中山中山君烹之作羹致於乐羊乐食之古今称之曰【补】乐羊食其子以自信明害父以求法【此害於父道而羊为之求为狗国之法也补曰说见赵策】

犀首立五王【秦韩燕宋中山也楚春秋时王齐宣魏惠显王三十五年王赵武灵独不王其後秦惠十二年韩宣惠燕易王王明年秦惠始王秦惠改元之七年宋偃始王故武灵八年书五国相王即秦七年也正曰大事记周显王四十六年韩燕中山皆称王赵独称君其後亦称王解题按战国策犀首立五王高氏以为齐赵魏燕中山鲍氏以为秦韩燕宋中山二家之说皆非也齐魏王已久秦之王出於张仪宋中山俱小国使宋是时称王齐何为独怒中山况偃之称王又在慎靓之三年乎然则犀首所立五王其可考者韩燕赵中山其一则不可考也赵武灵王初称君世家十一年书王召公子职於韩则是时已称王矣七国惟楚僭王远在春秋之世其余六国魏最先赵最後又显王三十五年齐宣王魏惠王与诸侯会于徐州以相王解题云齐魏之王以国策考之盖在魏拔邯郸之岁显王十六年而秦纪今年又书齐魏为王未知孰是然策所载似得其实盖魏以邯郸之胜齐以桂陵之胜各僭称王若今岁魏方衰弱齐亦未有大功何为骤称王乎今年书相王者齐魏僭王已久至是共会诸侯欲其皆王以同己之僭也秦纪所书或者齐魏前此称王於其国至此名号始通於诸侯乎又显王四十四年秦初称王解题云张仪之请也秦纪书魏君称王衍一魏字愚按赵世家武灵王十年五国相王赵独否曰无其实敢处其名乎令国人谓已曰君十一年始云王召公子职也然则云五国相王者谓五国皆称王非谓在此年也鲍误】而中山後持【持犹疑也立之後而复疑正曰高注待中山小故後立】齐谓赵魏曰寡人羞与中山并为王愿与大国伐之以废其王中山闻之大恐召张登而告之曰寡人且王齐谓赵魏曰羞与寡人并为王而欲伐寡人恐亡其国不在索王【今所谋者救亡尔不求为王】非子莫能吾救登对曰君为臣多车重币臣请见田婴中山君遣之齐见婴子曰臣闻君欲废中山之王将与赵魏伐之过矣以中山之小而三国伐之中山虽益废王【益犹甚也言事有甚於此者】犹且听也且中山恐必为赵魏废其王而务附焉【附赵魏也主废者齐故不附之】是君为赵魏驱羊也【补曰高注是君为赵魏驱羊而使得食之】非齐之利也岂若中山废其王而事齐哉田婴曰柰何张登曰今君召中山与之遇而许之王中山必喜而絶赵魏赵魏怒而攻中山中山急而为君难其王【难则所

谓羞与为王】则中山必恐为君废王事齐【不王中山齐志也今为废之所以事齐】彼患亡其国是君废其王而立其国贤於为赵魏驱羊也田婴曰诺张丑曰不可臣闻之同欲者相憎同忧者相亲今五国相与王也负海不与焉【负海齐也先已王补曰高注齐不欲与之同王则与如字】此是欲皆在为王而忧在负海【忧齐废之】今召中山与之遇而许之王是夺四【元作五下同】五【正曰一本下三处作四姚同疑此或有误】国而益负海也【中山与四国同欲今与齐遇是夺彼而益我也】致中山而塞四国四国寒心必先与之王而故亲之是君临中山而失四国也且张登之为人也善以微计荐中山之君久矣【荐进也】难信以为利田婴不听果召中山君而许之王张登因谓赵魏曰齐欲伐河东【河车魏地】何以知之齐羞与中山并【元作之】之为王甚矣今召中山与之遇而许之王是欲用其兵也岂若令大国先与之王以止其遇哉赵魏许诺果与中山王而亲之中山果绝齐而从赵魏中山与燕赵为王齐闭关不通中山之使其言曰我万乘之国也中山百【补曰一本作千姚同】乘之国也何倖名於我欲割平邑【属代郡正曰正义引括地志平邑故城在魏州昌乐县东北见赵世家】以赂燕赵出兵以攻中山蓝诸君【中山相也补曰索隐云战国策望诸作蓝诸愚按燕策望诸相中山恐即此人与乐毅同号者索隐指为毅则误矣】患之张登谓蓝诸君曰公何患於齐蓝诸君曰齐强万乘之国耻与中山倖名不憚割地以赂燕赵出兵以攻中山燕赵好倍而贪地【倍谓背约补曰一本好位姚同注曾作倍】吾恐其不吾据也大者危国次者废王柰何吾弗患也张登曰请令燕赵固辅中山【固言辅之坚】而成其王事遂定公欲之乎蓝诸君曰此所欲也曰请以公为齐王【闵】而登试说公可乃行之蓝诸君曰愿闻其说登曰王之所以不憚割地以赂燕赵出兵以攻中山者其实欲废中山之王也王曰然然则王之为费且危夫割地以赂燕赵是强敌也出兵以攻中山首难也【首为攻伐之难】王行二者所求中山未必得王如用臣之道地不亏而兵不用中山可废也王必曰子之道柰何蓝诸君曰然则子之道柰何张登曰王发重使使告中山君曰寡人所以闭关不通使者为中山之独与燕赵为王而寡人不与闻焉【此王此君皆中山正曰王发重使之王指齐王】是以隘之【隘亦不通也补曰隘当读作厄】王苟举玉【补】趾以见寡人请亦佐君中山恐燕赵之不已据也今齐之辞云即佐王必遁燕赵与王相见【此并齐王正曰王苟举趾与即佐王之王指中山】燕赵闻之必怒绝之王亦绝之是中山孤孤何得无废以此说齐王齐王听乎蓝诸君曰是则必听矣此所以废之何在其所以存之乎张登曰此王所以存者也【此王中山】齐以是辞来因言告燕赵而无往【以齐王言告之而不往齐】以积厚於燕赵燕赵必曰齐之欲割平邑以赂我者非欲废中山之王也徒欲以离我於中山而已亲之也虽百平邑燕赵必不受也蓝诸君曰善遣张登往果以是辞来中山因告燕赵而不往燕赵果俱辅中山而使其王事遂定【彪谓张登臆则屡中言之必可行者也虽其用智有裨阖风气而术无害亦狡狴可喜非君子之所排也正曰裨阖狡狴岂非君子之所排者因其文之可喜而谓其术之无害悖矣】

司马喜【中山臣补曰姚本喜作熹後同】使赵为已求相中山公孙弘陰知之中山君出司马喜御公孙弘参乘公孙弘曰为人臣招大国之威以为已求相於君何如君曰吾食其肉不以分人司马喜顿首於轼曰臣自知死至矣君曰何也曰【补补曰恐缺曰字】臣抵罪君曰行吾知之矣【行使之行车二人雅不相善弘无故云然似欲中喜者故知】居顷之赵使来为司马喜求相中山君大疑公孙弘公孙弘走出【补曰太史公自序司马氏其在卫者相中

山徐广云名喜邹阳书司马喜蒞於宋而相中山按战国有两公孙弘一在齐为孟尝君见秦昭王者即此人与汉平津为三韩子云公孙弘断发而为越王骑又一人也】

司马喜三相中山陰简难之【简陰姬名也难谓忌之】田简谓司马喜曰赵使者来属耳【霍光传注属近也正曰诗耳属于垣史记注属犹注也言赵使属耳中山之事】独不可语陰简之美乎【赵使近至宜有报可因报使言之赵也】赵必请之君与之即公无内难矣君弗与赵公因劝君立之以为正妻陰简之德公无所穷矣果令赵请之【补】君弗与司马喜曰君弗与赵赵王【武灵】必大怒大怒则君必危矣然则立以为妻固无请人之妻不得而怨人者也田简自为取使【取请为使也正曰自谓可以取赵使此书取字如此者多为与之善而得其心之义】可以为司马喜可以为陰简可以令赵勿请也【简请使耳实喜自使见下正曰此章以为语赵使下章以为司马喜使说赵王此正记所传之异两可以为之去声】陰姬与江姬争为后司马喜谓陰姬公【姬父也】曰事成则有土得民【言公得封补曰一本子民姚同】不成则恐无身欲成之何不见臣乎【怪其不来谋】陰姬公稽首【首至地也】曰诚如君言事何可豫道者【言将厚报之未可先言】司马喜即奏书中山王【补】曰臣闻弱赵强中山中山王说而见之曰愿闻弱赵强中山之说司马喜曰臣愿之赵观其地形险阻人民贫富君臣贤不肖商敌为资【商较之】未可豫陈也中山王遣之见赵王【武灵】曰臣闻赵天下善为音佳丽人之所出也今者臣来至境入都邑观人民謡俗【徒歌曰謡】容貌顔色殊无佳丽好美者以臣所行多矣周流无所不至未尝见人如中山陰姬者也不知者特以为神人【元作力】力【正曰尽力言之】言不能及也其容貌顔色固以过絶人矣若其眉目准頰权衡【准鼻頰鼻梁权辅骨当作颧衡眉上正曰准鼻头頰额也见孟子蹙额注蔡泽传蹙颧索隐云鼻蹙眉】犀角偃月【犀角首骨偃月额骨】彼乃帝王之后非诸侯之姬也赵王意移大说曰吾愿请之何如司马喜曰臣窃见其佳丽口不能无道尔即欲请之是非臣所敢议愿王无泄也司马喜辞去归报中山王曰赵王非贤王也不好道德而好声色不好仁义而好勇力臣闻其乃欲请所谓陰姬者中山王作色不说司马喜曰赵强国也其请之必矣王如不与即社稷危矣与之即为诸侯笑中山王曰为将奈何司马喜曰王立为后以絶赵王之意世无请后者虽欲得请之邻国不与也中山王遂立以为后赵王亦无请言也【此两章一事尔而曲折小差着书者自以所闻驳异也然则此书之作亦至慎矣补曰司马喜绳陰姬以语赵王而胁君以行诈取宠视张仪於郑袖其恶尤甚记者好夸何慎之有】主父欲伐中山使李疵观之李疵曰可伐也君弗攻恐後天下主父曰何以对曰中山之君所倾盖与车者【倾者却不御也与之同车皆所尊礼者补曰一本车下无者字姚同】而朝穷闾隘巷之士者【君而朝士亦尊礼也】七十家主父曰是贤君也安可伐李疵曰不然举士则民务名不存本【本谓农业】朝贤则耕者惰而战士懦【皆不强力也以贤者不耕战故】若此不亡者未之有也【彪谓李疵小人也乃欲使人君废贤而置士夫贤者在位将使耕者愈力战士愈奋而谁敢惰懦且不贤而耕且战民之分也何敢与贤者并民惟不务名耳岂有务名而不趋於善者乎若疵者小人之无忌憚者也补曰韩非子有末云举兵而伐中山遂灭也尝读商君之言曰国之所以兴者农战也民求官爵不以农战而巧言虚道者其国必削诗书礼乐善修仁廉辨慧国有此者上无使守战敌主必削下民必贫此商君所以遗礼义上首功而富国强兵之术也武灵胡服骑射一反先王之教其桀骜之志使卒不死而获逞有以异於秦乎李疵者窥见其所大欲故以舍士急耕战之说导之当时风声气习不约而合其悖

繆固不足辨也抑其所称中山之事也殆未必然大事记据吕氏春秋晋太史屠柰谓周威公曰天生民而令有别有别人之义也所以异於禽兽麋鹿也君臣上下之所以立也中山之俗以昼为夜以夜继日男女淫乱因无别焉其主弗之禁此亡国之风也居二年中山果亡其亡之故可考矣使贤俊盛多尊礼无失则当时风俗安得至此乎】

战国策校注卷十

李文叔书战国策后序

李文叔书战国策後序

战国策所载大抵皆从横捭阖譎诌相轧倾夺之说也其事浅陋不足道然而人读之则必尚其说之工而忘其事之陋者文辞之胜移之而已且寿考安乐富贵尊荣显名爱好便利得意者天下之所欲也然缴而射之或将以致人之忧死亡忧患贫贱苦辱弃损亡利失意者天下之所恶也然动而竭之或将以导人之乐至于以下求小以高求大纵之以阳闭之以陰无非微妙难知之情虽辨士抵掌而论之犹恐不白今寓之文字不过一二言语未必及而意已隐然见乎其中矣由是言之则为是说者非难而载是说为不易得也呜呼使秦汉而後复有是说者必无能载之者矣虽然此岂独人力哉盖自夏商积制作以至于周而文物大备当其盛时朝廷宗庙之上蛮貊穷服之外其礼乐制度条施目说而威仪文章可着之简册者至三千此数圣人文章之实也及周道衰寢淫陵迟幽厉承之于是大坏然其文章所从来既远故根本虽伐而气焰未易遽熄也于是浮而散之鍾于谈舌而着於言语此庄周屈原孙武韩非商鞅与夫仪秦之徒所以虽不深祖吾圣人之道而所着书文辞駸駸乎上薄六经而下絕来世者岂数人之力也哉今战国策宜有善本传於世而舛错不可疾读意天下之于至宝常不欲使人易得故余不复窜定而其完篇皆以丹圖其上云

王觉题战国策

王觉题战国策

战国策三十三篇刘向为之序世久不传治平初始得钱唐顔氏印本读之爱其文辞之辩博而字句脱误尤失其真丁未岁予在京师因借馆阁诸公家藏数本参校之盖十正其六七凡诸本之不载者杂见於史记他书然不敢辄为改易仍从其旧盖慎之也当战国之时强者务并吞弱者患不能守天下方争於战胜攻取驰说之士因得以其说取合时君其要皆主於利言之合从连衡变诈百出然自春秋之後以迄于秦二百余年兴亡成败之迹粗见於是矣虽非义理之所存而辩丽横肆亦文辞之最学者所不宜废也会有求予本以开板者因以授之使广其传庶几证前本之失云清源王觉题

孙元忠书阁本战国策后

孙元忠书阁本战国策後

臣自元佑元年十二月入馆即取曾巩三次所校定本及苏颂钱藻等不足本又借刘敞手校书肆印卖本参考比巩所校补去是正凡三百五十四字八年再用诸本及集贤院新本校又得一百九十六字共五百五十籤遂为定本可以修写黄本入秘阁其後字多脱漏然亦间得一两字癸酉岁臣朴校定右十一月十六日书阁本战国策孙元忠

孙元忠刘元父语

孙元忠刘元父语

此书舛误特多率一岁再三读略以意属之而已比刘原父云吾老当得定本正之否耶【以上皆依姚本】右战国策隋经籍志三十四卷刘向录高诱注止二十一卷汉京兆尹延笃论一卷唐艺文志刘向所录已阙二卷高诱注乃增十一卷延叔坚之论尚存今世所传三十三卷崇文总目高诱注八篇今十篇第一第五阙前八卷後三十二三十三通有十篇武安君事在中山卷末不知所谓叔坚之论今他书时见一二旧本有未经曾南丰校定者舛误尤不可读南丰所校乃今所行都下建阳刻本皆祖南丰互有失得余顷於会稽得孙元忠所校於其族子慤殊为疎略後再扣之复出一本有元忠跋并标出钱刘诸公手校字比前本虽加详然不能无疑焉如用壑?字皆武后字恐唐人传写相承如此诸公校书改用此字殊所不解竊萃作唐史释音释武后字内壑字云古字见战国策不知何所据云然然壑乃古地字又壑字见亢仓子鷖冠子或有自来至於?字亦岂出於古欤幽州僧行均作切韵训诂以此二字皆古文岂别有所见耶孙旧云五百五十籤数字虽过之然间有谬误似非元书也括苍所刊因旧无甚增损余萃诸本校定离次之总四百八十余条太史公所采九十余条其事异者止五六条太史公用字每篇间有异者或见於他书可以是正悉注於旁辨變水之为漬水集字之为语助与夫必题校人并题续注者皆余所益也正文遗逸如司马贞引马犯谓周君徐广引韩兵入西周李善引吕不韦言周三十七王欧阳询引苏秦谓元戎以铁为矢史记正义碣石九门本有宫室以居春秋後语武灵王游大陵梦处女鼓瑟之类略可见者如此今本所无也至如张仪说惠王乃韩非初见秦厉人怜王引诗乃韩婴外传後人不可得而质矣秦古书见於世者无几而予居穷乡无书可检閱访春秋後语数年方得之然不为无补尚覬博采老得定本无刘公之遗恨绍兴丙寅中秋剡川姚宏伯声父题

顷岁予辩正鲍彪战国策注读吕子大事记引剡川姚宏知其亦注是书考近时诸家书录皆不载则世罕有蓄者後得於一旧士人家卷末载李文叔王觉孙朴刘敞语其自序云尝得本於孙朴之子慤朴元佑初在馆中取南丰曾巩本参以苏颂钱藻刘敞所传并集贤院新本上标钱刘校字而姚又会粹诸本定之每篇有异及他书可正者悉注于下因高诱注间有增续简质谨重深得古人论撰之意大与鲍氏率意窜改者不同又云访得春秋後语不为无补盖晋孔衍所着者今尤不可得尚赖此而见其一二讵可废邪考其书成当绍兴丙寅而鲍注出丁卯实同时鲍能分次章条详述注说读者眩於浮文往往喜称道之而姚氏殆絕无足怪也宏字令声今题伯声甫待制舜明廷辉之子为删定官忤秦桧死大理狱弟寬令威宪令则皆显于时其人尤当传也余所得本背纸有宝庆字已百余年物时有碎烂处既据以校鲍误因序其说于此异时当广传写使学者犹及见前辈典则可仰可慕云至顺四年癸酉七月吴师道识

右战国策隋经籍志三十四卷刘向录高诱注止二十卷汉京兆尹延笃论一卷唐艺文志刘向录已阙二卷高诱注乃增十一卷延笃论时尚存今所传三十三卷崇文总目高诱注八篇印本存者有十篇武安君事在中山卷末不详所谓延笃论今亡矣其未曾经曾南丰校定者

舛误尤不可读其浙建原小本刊行者皆南丰所校本也括苍耿氏所刊鹵莽尤甚宣和间得馆中孙固孙觉钱藻曾巩刘敞苏颂集贤院共七本晚得晁以道本并校之所得十二焉如用壑?字皆武后字恐唐人相承如此诸公校书改用此字殊不可解窠萃作唐书释武后用壑字云古地字见战国策不知何所据而云然壑乃古地字又壑字见亢仓子鷖冠子或有自来至於?字幽州僧行均作切韵训诂以此二字云古文岂别有所见邪太史公所采九十三事内不同者五韩非子十五事说苑六事新序九事吕氏春秋一事韩诗外传一事皇甫谧高士传三事越絶书记李园一事甚异而正文遗逸引战国策者司马贞索隐五事【豫让击襄子之衣衣尽血吕不韦言周凡三十七王白圭为中山将亡六城还拔中山马犯谓周君马犯谓梁王云王病愈作瘡字】广韵七事【晋有大夫芬质音抚文切芊干者着书显名安陵丑雍门周中大夫蓝诸晋有亥唐赵有大夫?贾音肇训门也齐威王时有左执法公旗蕃】玉篇一事【骥仰而喷鼓鼻也】太平御览二事【涸若耶以取铜破?山而出锡廊庙之椽非一木之枝先王之法非一士之志】元和姓纂一事【引风俗通云晋大夫芸贤】春秋後语二事【赵武灵王游大陵梦处女鼓瑟平原君璧者注云璧拏跛之名】後汉地理志一事【东城九门注云碣石山在县界】後汉第八赞一事【廉颇为人勇鸷而好士】艺文类聚一事【苏秦为楚合从元戎以铁为矢长八寸一弩十矢俱发】北堂书钞一事【楚人以弱弓微缴如归鴈之上者】徐广注史记一事【韩兵入西周令成君辩说秦求救】张守节正义一事【碣石九门本有宫室以居】旧战国策一事【罗尚见秦王曰秦四塞之险利於守不利於战】李善注文选一事【苏秦说孟尝君曰秦四塞之国高诱注云四面有山关之固故曰四塞之国也】皆今本所无也至如张仪说惠王乃韩非子初见秦书厉怜王引诗乃韩诗外传既无古书可以考证第叹息而已某以所闻见以为集注补高诱之亡云上章执徐仲冬朔日会稽姚寬书

右此序题姚寬撰有手写附于姚注本者文皆与宏序同特疏列逸文加详考其岁月则在後乃知姚氏兄弟皆尝用意此书寬所注者今未之见不知视宏又何如也因全录着之左方以俟博考者吴师道识

刘勰文心雕龙云从横之世史职犹存秦并七王而战国策盖录而不叙故即简为名也

刘知几史通云从横互起力战争雄秦兼天下而着战国策其篇有东西二周秦楚燕齐三晋宋卫中山合十二国分为三十三卷夫谓之策者盖录而不序故即简以为名或云汉代刘向以战国游士为之策谋因谓之战国策至孔衍又以策所书未为尽善乃引太史公所记参其要删彼二家聚为一录号春秋後语除二周及宋卫中山其所留者七国而已始自秦孝公终於楚汉之际比於春秋亦尽二百余年始衍撰春秋时国语复撰春秋後语勒成二书各为十卷今行于时惟後语存焉又云左传後经传不作于是文籍唯有战国策及太史公书而已至晋著作郎鲁国乐资乃追述二史撰为春秋後传其书始以周贞王续前传鲁哀公後至王赧入秦文王之继周终至二世之灭合三十卷

括苍刊本序

括苍刊本序

余至括苍之明年岁丰讼简颇有文字之暇於是用诸郡例镂书以惠学者念战国策未有板本乃取家旧所藏刊焉是书讹舛为多自曾南丰已云疑其不可考者今据所藏且用先辈数家本参定以俟後之君子而已昔袁悦之还都止齋战国策曰天下要惟此书而李权从秦宓借战国策宓曰战国从横用之何为盖学者好恶之不侔如此夫是非取舍要当考合乎圣人之道以自择要之此先秦古书其叙事之备太史公取以着史记而文辞高古子长实取法焉学者不可不家有而日诵之故余刊书以是为首云绍兴四年十月鲁人耿延禧百顺书

右修职郎司理参军马陞校勘

左迪功郎兗州学教授赵涣校勘

左朝散郎通判军州事崔耀卿

龙图阁直学士左朝奉大夫知军州事耿延禧

战国策校注